


2/12 60
Чорхим Раҳим

ЧИН МУХАББАТ

РОМАН

ИККИНЧИ НАШРИ



18314
N1
362

УзССР ДАВЛАТ БАДИЙ АДАБИЁТ НАШРИЁТИ
ТОШКЕНТ - 1960

1992-1993



Баринчи боб ЕРИМ, ЯХШИ ҚОЛ!

1

Тонг ёришмоқда.

Тұхта хола ҳовли ўртасидаги сүрига келиб, оппоқ ёстиққа әнгашди: «Тур, болам, бир оз гаплашиб олайлик...» Кампир шу қадар секин шивирлаб гапирдикі, бу сүзларни унинг ўзигина эшилди. «Хай, мен нега уни бевақт үйғотяпман, тим билсін, бу хил уйқу кенжамга яна қачон насиб қиласы, бир оз ором олсін» деди-да, сүрига сұянди. «Хар қалай үйғотай» деди яна она ва үглиниң бошиға әгилди, әгилди-ю танг қотди: күрпа-ниң ичіда ҳеч ким йўқ... Кечқұрун түшалған қарғашойи күрпа, гулли чойшап устида оқ ўрикниң әгри шохлари ва қалин барглари орасидан түқилиб турған тонг ёруғлиги танга сочиб қўйғандек жимиirlаб турибди. «Қани Нормат?»

Ҳали яқындагина Нормат шу жойда қўлларини иккі ёнига ташлаб тонг ҳавосини шимириб ётган эди. Ҳали яқындагина кампир, тандир олдидан қайтаётиб, кенжасининг юзига тикилиб, унинг енгил нафас олиб ётганини ўз кўзи билан кўрган эди.

Унинг кийимлари ҳам йўқ. Кўйлаги ўрик шохида, әтиги сўрининг тагида турарди... Энди йўқ... Кетибди... Қаёққа кетибди-а?

Нормат шу тонгда узоқ сафарга — фронтга жўнайди. Кампир уни кузатиш тараддуси билан тун бўйи ухлагани йўқ. У, қайроқ буғдой унидан ёғлиқ патир, сомса ёпди, қатлама пиширди. Норматнинг кийимларини тахлаб, чамадонга жойлади, сўнгра оқ ўрик термоқчи бўлди...

Қуёш секин-аста кўтарилиб, қалин шохлар орасидан мўралай бошлади. Тұхта хола сўрининг кун чиқиши

Томонида этик нағалининг янги изини кўриб қолди. Из уни дарча томонга олиб борди. Дарчанинг орқаси анорзор, унинг этагидан анҳор ўтади. Этик изи анҳор бўйида йўқолди. Кампир анҳорга тикилди, нишаб оқаётган сувда ўзининг аксидан бошқа ҳеч нарса кўринмади. «Эҳтимол, Адолатни йўқлаб кетгандир...» Сув оқими томон юрган кампир яна этик изига йўлиқди. Кампир из қидириб боғма-боғ бориб, баланд девор олдидага тўхтади. Девор орқаси — Соҳиб қорининг анорзори. Ҳамма ёқ жимжит, фақат онда-сонда булбуллар ноласи эшитилади. У, анорзорга ўтишни ҳам, ўтмасликни ҳам билмай, иккиланиб қолди. «Соҳиб қори кўриб қолса нима дейди, каллайисаҳарлаб боғимда нима қилиб юрибди бу хотин, демайдими?»

Шу чоқ узоқдан чинни пиёла жарангидай кулги эшитилди-ю тезда жимида. «Нормат!..» Кампир деворга бўй чўзиб, ўша ёққа қаради: анорзорда ҳеч ким йўқ, ёнроқ тагидаги супа бўм-бўш, ишком томонда ҳам шарпа сезилмайди. Шу яқиндаги гулзор хушбўйини ўғирлаб келган шабада гуп этиб димогига урилди. Ана, Нормат девор тагида, анҳор лабида, қуёш шуълала-рига кўмилган қизил гул панасида ўтирибди. У, қарши-сидаги атир гулнинг новвот ранг ғунчасига қўл чўзмоқда. Она ўзини тутолмади.

— Нормат! Нима қилиб ўтирибсан бу ерда?!

Атир гул тўсатдан силкинди-да, кимдир энгашиб, анорзорга қочди.

Нормат икки қўлини атир гулдан учган «қуш» томонга чўзганича қолди:

— Адолат!..

2

— Қаёқда юрибсан, Нормат? — деди, катта кўчада кутиб турган колхоз шофери она-бала қаршисига чиқиб. — Тез юр, кутишинб турибди.

Гўё шофер уни кўчаданоқ олиб кетаётгандек, Тўхта хола ялина бошлади.

— Шошилма, болам, Нормат понушта қилиб олсин! Шофер кўнмади.

— Нонуштани гузарда қиласиз. Вақт зиқ.

Она ўғлининг баридан тортиб, уйга судради.

Норматнинг жиянлари: «Акам фронтга кетяпти» деб, уни излаб, қўни-қўшниларникини кезиб чиқишиған

эли. Ҳовли бир зумда болаларга тұлди. Улар бир-бирларига навбат бермай, Нормат акаси түғрисида чуғурашмоқдалар. Бири: «Нормат акам аскарликка кетяпти» деса, иккинчиси: «Катта командир бўлгани боряпти» дейди. Яна бир чўғолроғи: «Нормат акам урушга боряпти, Гитлерни ўлдирашиб келади» деб бошқаларнинг гапини бўлиб қўяди. Шу чоқ катта дарвозадан Эргаш билан Холмат кириб келишди. Эргаш хушчақчақ ва тегишқоқ йигит эди. Айниқса болаларни кўрганда, болаларга ўхшаб кетар эди. Унинг остоңадан қадам қўйинши билан болалар баб-баравар Норматнинг Гитлерни ўлдиргани кетаётгани ҳақида чуғурлай бошладилар. Эргаш болаларнинг бирини елкасига уриб, бирининг бурнини чимчилаб, яна бирига: «Бор, кўзингни ювиб ке, кирдан қорайиб кетипти» деб ҳазил қилди. Холмат бекам, одатдагидек салмоқлаб қадам ташлаб айвонга ўтиб кетаверди. Ариқча сувида юзини юваётган Нормат шошилиб артинди-да, Эргашга пешвоз чиқди. Эргаш у билан қучоқлашиб кўришмоқчи бўлган эди. Нормат унинг белидан маҳкам кучоқлади-да, даст кўтариб, уни айвон супасига чиқариб қўйди. Болалар гуриллаб уларниң олдига келиб, қийқириб муҳокама қила бошладилар. «Қўрдингми, менинг акам полвоң!» деди Норматнинг жиянларидан бири. «Пўқалас бўлса урушга олармиди!» деди яна бир бола. «Балли азамат, қойилман!» деди Эргаш ҳам кулимсираб. Тўхта хола оёғи ерга тегмай тараддудда, ҳаллослаб юрибди.

— Хорманг, кампир,— деди Эргаш, белини рўмол билан маҳкам боғлаб олган Тўхта холанинг олдига келиб.

— Бор бўл, болам, кел, гиргиттон!— кампир Эргашнинг елкасига қоқди.

Аввал Холмат, кейин Эргаш айвон олдига келиб, ишманидир гаплашиб қолишиди.

Тўхта хола ҳали кўрпаси йиғилмаган сўрига дастурхон ёзиб, қумғонда чой келтирди.

— Ўтиришлар, чой тайёр. Сен ҳам ўтир, Эргаш,— деди кампир ва икки пиёлага чой қуйиб узатди. Нормат қўлидаги чойни хўплади-ю, ўрнидан турди.

Она Норматнинг бўйига тикилиб қаради. Кечагина мактабга қатнаб юрган бола бугун онанинг кўзига шер йигит бўлиб кўринди. Унинг кифтлари дуркни, кўкраги кенг, билаклари йўғон.

— Шошма, болам,— кампир тандир томонга югурди

ва хокандозда исириқ тутатиб келиб, Норматнинг бошидан айлантириди.

Нормат онасининг ажин босган юзига, ёшли кўзларига термулди. Она ҳаётига чанг солаётган айрилиқ дардидаги ўртаниб, кўз ёшлари ажинли юзига оқиб тушмоқда. Нормат: «дадил бўл, онажон!» дегандек унга кулиб қаради ва кучли қўллари билан онасининг билакларини сиқди. Ўғлиниңг ёниб турган кўзлари ўртанаётган она юрагига далда бўлгандек, бақувват қўллари унга мадор бағишилагандек бўлди. Кампир қаддини ростлади.

— Энди сиз шу ерда қолинг,— деди онасига Нормат дарвозадан чиқаркан,— уринманг... Тез-тез хат ёзиб турман.

Кампир индамасдан чопонини бошига ёпиниб, машинага чиқа бошлади. Нормат онасини қучоқлаб, ўпди.

— Жон онажон, шу ерда қолинг!

Кампир ўғлини бағрига босиб, ҳўнграб йиғлаб юборди.

— Хайр, онажон!

Кампир машинага интилган эди, катта ўғли Холмат уни қўлтиқлаб, уйга бошлади.

Нормат мукчайиб қолаётган онасига қараган эди, унинг кўзига пастак девор орқасидаги қадрдан ҳовли, унинг ўртасидаги якка туп ўрик кўринди. Ўрикниңг барглари беҳисоб исирғаларга ўхшайди. Машина жойидан жилиши ҳамон, гарбга хиёл ёнбошлаб турган аноплар носқовоққа ўхшаш гулларини баланд кўтариб, гўё унинг орқасидан югураётгандек туюлди. Норматнинг назаридаги «Гулистон» қишлоғининг уйлари, боғлари ҳам машина билан бирга жилаётганга ўхшади. Ҳамма кўчада. Ҳамма унга оқ ийл тилаб қўл силкимоқда. Машина гузарга яқинлашган сари баландликка кўтарилмоқда ва Норматнинг кўзига бутун қишлоқ кафтдек кўриниб турибди. Чап томонда тоғ этаклари, ўнг томонда яшил пахтазор, ўртада қишлоқ. Қишлоқнинг уйлари, катақ-катақ ҳовлилари, паст-баланд боғлари — ҳаммаси, ҳаммаси Норматга тикилаётганга ўхшайди. Баланд сўритокларда чумак урган чиллакилар, камбарг дарахтлардаги олма ва нашватилар у билан хайр-хўшлашмоқда. Буларнинг ҳаммаси шу қишлоқда ҳаммадан олдин фронтга кетаётган Норматда юрти, ўз чаманлари учун қандайдир фаҳр ҳисларини уйғотмоқда.

Машина қишлоқ чойхонасига яқинлашганды сельпо-нинг савдо мудири Бозоров йўлни тўсди.

— Бир пиёла чой ичиб кетинглар.

Бозоров сельпо магазини рўпарасига, ариқ бўйида-ги сўрига қизил гилам, иккита кўрпача тўшаб, тўртта пар ёстиқ ташлаб қўйинбди. Бозоров азиз меҳмонларни, яхши улфатларни ана шу жойга таклиф қиласди.

Нормат узр айтгунча шофер жавоб қиласди:

— Соат тўққизда военкоматда бўлишимиз керак.

— Тўққизга анча бор,— деди Бозоров соатига қараб.— Кечиксаларинг военкоматга ўзим айтиб қўяман.

Нормат унинг илтимосини рад қилиб: «вақт зиқ» деган эди, Бозоров: «Бўлмаса, тўхтаб туринглар» деди-да, ариқ устидаги сўрига югурди. Паст бўйли, япалоқ юзли, ғўладек юмалоқ Бозоровнинг лапанглаб югуриши Норматнинг кўзига узоқдан гўё тўнгак думалагандек бўлиб кўринди. Бир оздан кейин Бозоров бир қўлида шиша, бир қўлида пиёла билан ҳансираф етиб келди.

— Ма, Нормат, оқ йўл берсин. Яхши ният билан бир пиёладан отайлик!

Нормат кўзини чирт юмиб, пиёладагини ичиб юборди.

— Раҳмат, оғайни,— деди Бозоров қувониб,— сўзимни ерда қолдирмадинг.

У, шиша билан пиёланни шоферга бериб, «айлантириб туринг» деди-да, ўзи лапанглаб магазин томонга югурди. Магазин қоровулини чақириб, нимадир деган эди, у бир оздан кейин тугунча кўтариб чиқди. Бозоров тугунчани қўлтиқлаб, тебраниб-тебраниб, машинага интилди.

— Мана, оз бўлса ҳам кўп ўрнида кўриб, йўлда улфатлар билан баҳам кўринглар. Биз урушга ярамаймиз. Юрак касал. Кўряпсиз-ку, у ердан-бу ерга ўтгунча жоним бўғизимга келди. Қишлоқдан, уй ичидан хотиржам бўл, Нормат, ўзим Тўхта холадан хабар олиб турман. Ёрдамимни аямайман.

Нормат Бозоровга тикилиб қаради. Адолатга кўз олайтириб, орқаворатдан гап-сўз қилиб юрган бу ғаламуснинг хушомадидан Норматнинг кўнгли ғаш бўлиб қолди. «Оёғининг олти бўлиши бежиз эмас...»— деб ўйлади-да, Бозоровга ёвқараш қиласди. Буни сезган Ба-

зоров шошилиб қолди. Хайриятки, машина қисқа сигнал берип, ўрнидан жилди-ю, бир ондан кейин күздан ғойиб бўлди. Шу чоқ Бозоровга «Гулистан» қишлоғи жуда кенгайиб кетгандай ва шу кенг «Гулистан»нинг ғунчаси — Адолат Бозоровга инъом қилиб ташлаб кетилгандай туяди.

4

Йигитлар колоннаси военкоматдан чиқиб, катта тош йўл билан станцияга жўнади. Йўлнинг икки бетига тўлиб, фронтга кетаётган қизил аскарларнинг ота-оналари, қавм-қариндошлари борарди. Кўча ўртасида бир хилда қадам ташлаб бораётган аскарлар лейтенантнинг командаси билан ашула бошлидилар. Тўхта хола Норматнинг овозини таниб қолди...

— Йигитлар сараси боряпти,— дейишади одамлар ва бир зарбда оёқ ташлаб, равон илгарилаётган сафга ҳавас билан қараб, улар кўздан ғойиб бўлгунча тикилиб қолишади. Ёш-ёш қизлар, ўқувчи болалар сафдаги йигитларга гулдасталар узатмоқдалар, узатолмай қолганлар эса, қўлларидағи гулларни аскарлар бошига сочмоқдалар. Эщик олдига чиқиб турган ота-оналар сафдаги йигитларга қараб, бундан бир йил ёки икки йил илгари аскарликка узатган ва хизматни тугатиш олдида урушга тўғри келиб, ҳозир жанг қилаётган болаларини эслардилар. Тўхта хола йўлнинг чап томонида, кенжасидан кўзини узмай, индамай борарди. Тўхта хола бошидаги тугунча оғирлигини сезмас ва терлаган юз-кўзига кўча чанги ёпишаётганини ҳам пайқамас эди.

Лейтенант колоннани станциянинг чап томонидаги саройга бурди. Йигитлар катта қўргоннинг текис майдончасида терларини артишиб, чангларини қоқишиб, ўзларини тартибга солиб олдилар. Қўргон ичидагима гаплар бўлаётгани ва кенжак ўғил нима билан машғул экани Тўхта холага маълум эмас. Кузатгани келган кишилар ташқаридаги майдондан казармадан кўз узолмай турибдилар. Норматлар бир неча кун шу жойда яшайди. Шу сабабданми, кекса бир командир чиқиб, кўчаларда аскар болаларини кутиб турган кишиларни ўй-уйларига қайтарди. Тўхта хола ҳам қишлоққа қайтди ва бир ҳафтадан кейин, ўғлининг жўнари яқинлаш-

тап куни әрталаб сомса ёпиб, заводга келаётган колхоз аравасида станцияга келди.

— Ўртоқ командир, ижозат этинг,— деб Нормат лейтенант Морозовга кўчада кўз тутиб турган онасини кўрсатди.

Тўхта хола ўз ўғлини таниёлмади. Унга ҳарбий форма жуда ҳам ярашган ва бутунлай ўзгартириб юборган эди. Онанинг қаршисида гўё бошқа бир йигит турарди. Унинг овози, кўзигина таниш. Унинг «онажон» деб термулиб туришигина Норматга ўхшайди. Она шошилиб тугунини очди:

— Ол, болам, сомса ёпиб келдим...

Норматнинг кўнгли: «Адолат шу ерда» деб далолат бериб турибди. У атрофга олазарак бўлиб қаради, аммо ҳеч кимни кўрмади. «Эҳтимол, уялаётгандир, эҳтимол, анов кунги воқиадан ранжигандир... Нега шундай қиплдинг, онажон, нега Адолатни мендан қочирдинг?..»

Тўхта хола Норматнинг кимиидир қидираётган олазарак кўзларига қараб-қараб қўйди-да, хаёлга чўмди. «Адолатни кутяпти, шекилли... Нега у келмади?.. Нега мен ўзим уни бошлаб келмадим? Айб менда. Мен уларга ҳалақит бердим, уларниг гапини бўлдим, кенжамнинг баҳт қушини учирив юбордим. Келармикин? Келмаса, армонда кетади ўғлим... Ҳовлиқмалигим қурсил мени...»

Норматнинг назарида онасининг кўзлари киртайиб, юзи буришиб қолганга ўхшади. «Ғам тортяпти бечора...»

Кўчада бир нечта қўқон арава тўхтади. Аравалардан тугун кўтарган, қоп орқалаган кишилар тушдилар. Бир зумда кўча атрофлардан келган одамларга тўлиб кетди. Қўнфироқларини жаранглатиб извони етиб келди, ундан Бозоров лапанглаб тушди.

Сўқмоқлар билан станцияга келган Адолат Норматни кўрди-ю, Тўхта холадан уялгани учунни, унинг олдинга келолмай турди ва, ниҳоят, йигитнинг кўзи тушиши билан «келдим» дегандек қараб қўйди.

Нормат онасига ер остидан боқди. Тўхта хола ўғлини мақсадини тушунди-да, жазб этган томонга қаради: шойи рўмолчасининг учини тишлаб, Адолат турарди. Тўхта хола ичиде «хайрият» деб қўйди.

— Адолат, келинг, қизим, бери келинг,— деди кампир қўли билан имлаб.

Нормат ўрнидан туриб, камарини қаттиқ тортиб гимнастёркасини текислади да, Адолатнинг олдига борди.

— Келинг.

Адолат бутунлай ўзгариб кетганга ўхшайди, юзи ойлек тўлиб, нақш олмадек қизариб турибди. Бу қиз илгари ҳам шу қадар гўзал эдими?.. Нормат уни гўё биринчи марта кўряпти, гўё унинг жони шу қизга, шу юлдузга парвона...

Нормат Адолатнинг юмшоқ қўли, нозик бармоқларини кафти билан силади.

— Сал кеч қолганингида кўролмай армонда кетардим.

— Амакимнинг қизи идорага телефон қилди. У сиздан кўз-қулоқ бўлиб турган эди...

Сочларини ўйнаб турган Адолат қалин ва узун киприкларини ялт этиб кўтариб, Норматга қаради. Гўё Норматнинг юраги ловиллаб ёниб кетгандай бўлди. Иложи бўлса-ю, Адолатни шу чоқ бағрига босиб, атиргуллар тагида сўраб улгуролмаганларини сўраб олса!.. Вакт зиқ, дақиқалар ғанимат.

Нормат ўзини ўнглаб олди.

— Мен сиздан бир нарсани сўрамоқчи эдим,— деди у.

— Нимани?

Адолат ер остидан қиё боқди, бутун вужуди қулоққа айланди.

Нормат қизнинг учқунлаб турган қора кўзларига тикилиб, сўради:

— Кутасиами?

Севимли йигитнинг бу саволи, интизорликда тикилиб турган кўзлари Адолатни ўртантариб юборди. «Ростдан ҳам у кетяптими? Бутунлай кетяптими, қайтиб келадими? Қачон қайтади?»

— Кутаман!..

Шу вакт команда берилди:

— Сафланинг!

Нормат Адолатнинг ширмон юзидан ўпди ва она бағрига отилди. Кампир Нормат билан Адолатни қучоқлаб ҳўнграб йиғлаб юборди. Нормат ҳам ўпкасини тутолмади, аммо она бағридан чиқиб, сафга бориб қўшилди.

Кампирнинг олдидан гурс-гурс юриб солдатлар ўтди. Она ёшли кўзлари билан уларга тикилди, кейин куза-

түвчиларга қаради: уларнинг олдида шойи рўмолининг учи билан кўз ёшини артиб, пиқ-пиқ йиғлаб Адолат турарди...

5

Станциянинг биринчи изига қизил эшелон келиб тўхташи билан, яна чўзиқ ва амirona команда эшитилди:

— Вагонларга!

Жангчилар бўр билан номерланган вагонларга чиқишиди. Одамлар гувиллашиб вагонларни қуршаб олишиди. Кимдир, кекса хотинлардан бири, овозининг борича додлаб юборди. Аммо унинг фарёдини бошқаларнинг хўшлашув овозлари босиб кетди. Тўхта хола ўзини босиб, кўз ёшларини ютиб, тақдирга тан бериб тура қолди. Эшелон бошлигининг сигналидан кейин паровоз буғчиқариб, чўзиқ гудок берди-да, катта қизил составни судраб кетди. Вагонларга иргитилган гулдасталарнинг кўпи ерга тушди ва уларни териб олган болалар яна вагонлар орқасидан югурнишиди. Кузатувчилар қўлида рўмолчалар ҳилпиради...

Тўхта хола поезд кўздан ғойиб бўлгандан кейин ҳам темир йўл изларига тикилиб туриб қолди.

— Олсин-у олдирмасин! — деди кампир, икки қўли билан юзини силаб. Кампир чап ёнида оёғининг учи билан ер чизиб турган ғамгин Адолатга боқди.

— Юринг, қизим, кетайлик.

Адолат «майли» дегандай хомуш қаради. Улар ёнма-ён индамайгина бордилар. Адолат йўлдаги ҳар бир тошни санаб, ўй суриб бораркан: «Нега қизларни аскарликка олишмайди? Олишса, мен ҳам бирга кетардим!» дерди ўз-ўзига. Унинг хаёли қизил эшелонга эргашиб кетди...

Қўнғироқларини жаранглатиб етиб келган извошдан Бозоров тушди.

— Оббо, Тўхта хола-еї, Норматни ҳам узатдингиз! Хафа бўлманг, ўғлингиз тегирмондан бутун чиқадиган йигит!

Бу гап Тўхта холага қаттиқ ботди. Кампир Бозоровнинг юзига ғазабли кўзларини тикди.

— Хафа бўлманг, Тўхта хола, кўпга келган тўй,— деди Бозоров, унинг қўнглини кўтариш учун.— Қани энди

бизни ҳам чақирса, биз ҳам фронтта кетардик. Афсуски, бизни олишмайди. «Сен кетсанг, сельпо кимга қолади?» дейишиялти. Мен ўзим сизга қарашиб тураман, кам-күстингиз бўлса тортимасдан, менга айтиб туринг, хола!

Кампир жим. Бозоров хаёлга чўмиб турган Адолатга яқинлашди.

— Қани, Адолатхон, извошга чиқинг, атайин сизни олиб кетгани келдим,— деди у, қизга кулиб боқиб ва қўшиб қўйди:— Дадангиз айтдилар. Агар ташлаб кетсан ҳафа бўладилар. Тўхта холамни ҳам бирга олиб кетамиз. Қани, она, извошга чиқинг.

— Извошсиз ҳам етиб оламан,— деди кампир, Адолатга беҳаё тикилиб турган Бозоровни жеркиб.— Юринг, қизим, йўлдан қолмайлик.

Тўхта хола билан Адолат дала йўлига бурилдилар, Бозоров уларнинг орқасидан бир оз қараб тургач, «икки қўлингни отангнинг ўзи боғлаб беради» деб, ўнг қўли билан жағини силади-да, извошга ўтириб, катта йўлни чангитиб кетди.

6

Сельпога пиёда бораётган Соҳиб қори Бозоров извошининг ўз ёнига келиб тўхтатанини кўриб ҳайрон бўлди. Отларнинг туёқларидан кўтарилган чанг Соҳиб қорининг юз-кўзига урилди.

— Извошга чиқинг, Қори ака,— деди Бозоров, чангдан юз ўгириб турган магазин мудирига қараб.

Соҳиб қори қироат билан: «бисмиллоҳу раҳмону раҳим...» деди-да, извошга оёқ қўйди.

— Бир оз кутмабсиз-да, Қори ака. Иссикда анча уриниб қолибсиз.

— Мен хўжам кутиб қолдимикинлар, деб хижолатда эдим. Шукурки, учрашиб қолдик.

— Мен ҳам сизни маҳтал қиласлик учун шошилдим.

Извош кўприкдан ўтгач, ўнгга бурилиб, тўхтади. Бозоров Соҳиб қорини сельпо базаси ёнидаги ўз ҳужрасига бошлиди. Улар ҳужрага киришлари ҳамон база қоровули эшик олдида пайдо бўлиб, фармойиш кутгандек Бозоровга қаради.

— Қани, дастурхонингизни ёзаверинг,— деди Бозоров унга.

Хаял ўтмай дастурхон нози-неъматга тўлди. Сихларда кавоб келгач, Бозоров жавоннинг пастки тортмасини очиб, бир шиша беш юлдузлик конъяк олди.

— Шаробул антаҳурро, Қори ака. Энг азиз меҳмонга атаб қўйган эдим. Ризқингиз улуғ экан. Шу яқин ўртада фақат сиз ёқасиз менга, Қори ака. Кўпдан бери суҳбатингизни орзу қилиб юрардим-у, фурсат тополмасдим. Қаранг-а, бугунга насиб қилган экан.— Бозоров лиммо-лим қадаҳни Соҳиб қорига узатди.— Қани, олинг, айрилмас дўстликка!

Соҳиб қори қадаҳни қўлига олиб, ўтирган ўрнидан қўзғалди-да:

— Эсонлик бўлсим, тинчлик бўлсин!— деб чўқишириди.

Шиша бўшагач, Бозоров Соҳиб қорини база омборига олиб кирди.

— Молларнинг сараси сизники,— деди у, ҳамроҳига қараб.— Нима керак?

Соҳиб қори яшикларга тикилиб қолди.

— Ҳиммат... ҳимматларига боғлиқ...

— Чой... қанд... калиш... танлаб ола беринг, ҳа... фактори ҳам тайёр... Ҳа, айтганча, аямга, қизингизга бол матолар ҳам бор. Уларни бир юборинг, ўзлари танлаб кетишин. Ўзингизга маълум, уруш молни бир озиқиб қўйди. Аммо хотиржам бўлинг, мен сизни ходовой товарлардан сиқмайман.

...Соҳиб қори извошга ортилган яшиклар тепасида ўтириб бораркан, магазинига келгунча ўйлади:

«Бу инъомнинг илони чақмаса гўрга эди...»

Икканичи боб ПУЛАТ ИЗЛАРДА

I

Эшелон неча соатдан бери тўхтамай, жадаллаб бормоқда. Нормат юқоридаги полкада вагон тешигидан қараб ётибди. Кўм-кўк боғлар, қирғоқларини майса қоплаган ариқлар, паст-паст уйлар орқада қолиб кетди. Бепоён чўл бошланди. Поезд шу қадар елмоқдаки, Норматнинг назаридаги поёныз даشت чир айланиб, телеграф столбалари унга қараб чопиб келаётгандай...

Нормат кимнингдир «мот! мот!» деб қичқирган товушини эшитиб пастга қаради. Вагон ўртасига кўндаланг қўйилган тахтада тўрт киши домино ўйнамоқда, шахматчилар пастки полкада ёнбошлаб ўтиришибди. Эшик олдида бир неча киши тўпланиб тамоша қилиб туришибди.

Вагонни бошига кўтарган гурунг шуларники эди. Норматнинг атрофида ҳам йигитлар ётишибди. Уларнинг баъзилари хат ёзмоқда, баъзилари шифтга тикилиб хаёлга чўмган.

Уларнинг нималарни ўйлаётгани Нормат учун сир, аммо унга фақат бир нарсагина маълум — уруш, жудолик... Ҳамманинг хаёли шу уруш билан банд.

«Қандай бўлади уруш? — деб ўйламоқда Нормат.— Кинолардагидай, милтиқни икки қўллаб ушлаб олиб, «урра!» деб олға ташланавериладими ёки ўтган йили икки ойлик таълим вақтида машқ қилдирилгандай доим душманни қувлаб юриладиган бўлса, нега Қизил Армия чекиняпти?.. Газеталар: «палонча самолёт уриб туширилди», «пистонча танк ёндирилди» деб ёзмоқда. «Уриб туширилди», «ёндирилди», «ўлдирилди»дан бошқа гап йўқ. Шундай бўлса ҳам душман бостириб келмоқда... Нимаси зўр душманнинг? Техникаси зўр, кучи кўп, дейишади... Техника бизда ҳам бор-ку? Ёки бошқача техникамикан уники? Кучга келгандачи, кучимиз каммӣ улардан? Уларда саксон миллион — бизда икки юз миллион! Германия харитада бир тишлам бўлса, Совет Иттифоқи бир қулоч! Қандака уруш бўляпти ўзи? Қачонгача шундоқ давом этади? Наҳотки, душман техникаси бизни ҳам босиб ўтиб, шу ерларгача келади... Худо кўрсатмасин бизга бундай баҳтсизликни! Исроилдан сўраймикин? У, уруш кўрган, мендан кўра кўпроқ қўйлак йиртган...»

— Исроил ака, Исроил ака,— деди Нормат, шахмат ўйнаб ўтирган Азимовга қараб.

Азимов қора фарзинни қўлида бир оз ушлаб туриб, тахтанинг оқ катагига тақијлатиб босди-да, «шоҳ» деди. Унинг рақиби шоҳни ҳужумдан мудофаа қилиш учун узоқ ўйланиб қолди.

— Лаббай, дўстим, нима дейсан?

— Бас қилинг ўйинни, дейман. Урушдан гапириб берсангиэчи.

— Урушми, уруш ҳам худди шу шахматга ўхшайди.

Пиёда, отлиқ офицер... Майдон... Бири ҳужум қиласы, бири мудофаа, бир-бiriни аяш йўқ. Ярадор қиласы, ўлдиради ёки асир олади... Шахматда ҳам шунақа, лекин бу — ўйин... Фронтда бошқа гап... Даҳшат, ўлиш, ўлдириш...

Унинг ҳикоясини фақибининг «гарде!» деган ультиматуми кесиб қўйди. У фарзинини ўрнидан кўчирмаса, ютқазиб қўяди. Азимов ҳамма нарсани унтиб, бутун борлиги билан шахмат таҳтаси устига энгашиб олди. Шу қарашида у, таҳтадаги барча кучларнинг таҳминий ҳаракатларини кўз олдига келтириб, ўзининг эҳтиётсиз юриш қилганини ва бу эҳтиётсизлик ўйиннинг тақдирини ҳал қилганини тушуниб таслим бўлди.

— Шахматда таслим бўлиш мумкин,— деди Исройл Норматга ўгирилиб,— лекин урушда асло мумкин эмас.

Исройл Норматнинг ўйчан юзига қаради-да: «Урушнинг ташвиши зўр бу йигитда...» — деган фикр кўнглидан ўтди. У бармоқларини ўйната бошлади. Исройлнинг бармоқ ўйнашга тушганидан Нормат унинг хаёлга чўкканини тушунди. Исройл бирор нарса ҳақида ўйлагудек бўлса, дарҳол бармоқ санашга тушар ва ўйлаб ўйига етгунча бармоқларини қимирлатгани-қимирлатган эди. Ҳозир ҳам у бармоқларини бир бошдан қирсиллатиб чиқиб, ўнг қўлининг бош бармоғини қимирлатиб ўтириби. Бундай пайтларда у ҳеч нарсани эшийтмайди, ҳеч кимга қулоқ солмайди: ўзига хос бир бўлак дунёда — хаёл дунёсида яшайди. Ўзининг айтишича, у Финляндия урушида том тагида қолиб шикастланган, кейин шу хил асабийликка мубтало бўлган. Исройл уруш кўрган йигит бўлса ҳам, ҳозиргидек урушни кўргани йўқ. Нормат унинг хаёлини сочиб юбормаслик учун ўз ўрнига бориб чўзилди-да, анча вақт ўй сурисиб, ниҳоят, ухлаб қолди. Унинг тушига ҳам фронт кирди. Фронт гўё катта бир шахмат таҳтаси эмиш, унинг ҳар бир катагида душман. Фақат бир катагида Нормат ва унинг дўстлари, барча катакларга баб-баравар ўқ отиб: «гарде!», «шоҳ!» деб қичқиришаётганмиш. Кейин улар душманларга ёпирилиб, катакларни ёриб, таҳтани синдириб чиқиб кетишибди. Душманлар қўл кўтариб: «таслим бўлдик» дейишибди. «Шахматда-ку таслим бўлдинг, жангда ҳам таслим бўлишинг керак!» деганича Нормат уйғониб кетди. Ту-

шини Исройлга айтиб бермоқчи эди, унинг данг қотиб ухлаб ётганини кўрди.

Нормат саҳарлари от сугоргани ёки қўш ҳайдагани борган чоқларида Адолатнинг уйи олдидан «Дарёларни ёқалаб, ёқалаб ёр келади-ё...» деган ашулани айтиб ўтарди. Ҳозир ҳам шу ашула эсига тушди-да, айтгиси келди, бироқ ҳамма унинг оғизига қараётгандек туюлди, уялди. Йигит шифтга қараб ётганча ширин орзуларга маст бўлди...

«Оҳ Адолатхон, «фақат сизни кутаман» деганинг ростми? Ростлигига ишонаверайми? Сенга ишониш мумкин, лекин одамлар... Одамларнинг оласи кўп. Улар тек турармикинлар? Ўртада бурун бўлмаса, у кўзинг бу кўзингни ўяди, дейдилар. Кўзимнинг қораҷиғи қишлоқда қолди. Уни чўқилашмайди, деб бўладими? Ҳаммадан ҳам Бозоров... Адолат «йўқ!» деб туриб олса, ким уни соchlаридан бураб бегонага тутқизолади! Ҳеч ким! Адолат сочидан буратиб қўядиган қизлардан эмас!. Яна ким билсин бу қизларни! Уларнинг шайтони зўр бўлади, дейишади. Уруш чўзилиб кетадими, ёки тезроқ тугайдими — бу ёғи менга ҳам, унга ҳам қоронғи. Урушдан соғ қайтаманми — буниси ҳам даргумон. Уруш қишлоқни алғов-далғов қилиб юборди Ана шу қоронғилиқ, ана шу нотинчлик Адолатни гангиратиб қўймасмикин? «Фақат сизни кутаман». Бегимхон ҳам Эралига худди шундай деган эди, шекилли. Унинг ваъдасини қайси шамол қаёққа учирив кетди? Адолатнинг ваъдаси ҳам шамолга учмасмикин? Э, эзма! Нималарни вайсаяпсан, Адолатни синамабмидинг? Адолат Бегимхонга ўхшаб шамолга сўз шопирадиган қизлардан эмас! Мен уни онамга омонат ташлаб кетяпман. Оҳ, онажон, сенга ҳам қийин!..»

2

Ана шундай ҳаёт уч кун давом этди. Тўртинчи куни кечқурун вагонларга шам берилмади. Станция ҳарбий коменданти «чироғ ёқилмасин!» деди. Эшелон ошпазлари кечаси овқат пиширмаслик ва кечки овқатни ҳам кундузи пишириб қўйиш ҳақида бўйруқ олдилар. Паровоз тумшуғига иккита пулемёт ўрнатиб, саккиз кишилик наряд юборилди. Үн тўртинчи вагон томига қўл

пулемёти, охириги вагонга иккита станокли пулемёт ўрнатилди.

Эшелон навбатчиси вагонларни айланиб юриб, навбатчиларга ҳаво тревогаси сигналини айтди. Политруклар вагонма-вагон ўтиб, ҳаво ҳужумига қарши чоралар инструкциясини тушунтирилдилар. Эшелон навбатчиси:

— Противогазларни осиб олинглар! — деб буйруқ берди.

Рота старшинаси Куценко вагонга кириб, солдатларнинг химпакетларини текширди, сўнгра қопчиғининг оғзини очиб, Норматга ниманидир узатди.

— Мана, эҳтиёт қилиб сақла.

— Нима бу?

— Бинт.

Нормат бинтни противогаз халтасининг устки чўнтағига солиб қўйди ва медальоннинг кўриб, «номай аъмомлиминг ҳаммаси шунда» деди-да, уни шимишининг соат чўнтағига бекитди. Вагонга взвод командири кириши билан, у ўз жойига бориб ўтириди.

Ҳамма жойлашгач, взвод командири сержант Тургенев отув қуроллари ҳақида такрорий машғулот бошлади.

Тургенев қўл пулемётни ўртага қўйиб, «қани, буни ким бузиб беради?» деган эди, бурчакда жим ўтиргаи Эмин Ражабов қўлини кўтарди: «Мен бузаман, ўртоқ сержант». Тургенев пулемётни унинг олдига суриб қўйди. Эмин уни шошилиб қўлига олди-да, бир зумда қисмларини ажратиб, газетага териб қўйди. «Қани энди бунинг номларини айтиб бер» деди сержант унга. Эмин ўйламай-нетмай, «бошқаси айта қолсин» деган эди, ҳамма кулиб юборди.

— Бузишдан бошқасини билмайсанми?

— Нега билмас ҳанман,— деди Эмин,— тузатиши ҳам биламан. Ҳозир йигиб берайми?

— Йигишга устасан, буни биламиш, қани, пулемётчи бўлсанг, механизмларини гапириб бергиччи!

— Механизмлариними?.. Механизмларини Вания галирсин...

Яна кулги кўтарилиди.

— Нега куласанлар?— деди Вания, жангчиларга қараб.— Пулемётчи мен, у ёрдамчим. Мана қулоқ солинглар...— У, пулемёт қисмларини бирма-бир қўлга

олиб, уларнинг хусусиятлари, тутган ўрни ва ўзаро ҳаракат бирлигини гапириб берди-да, уларни Эмин Ражабовга узатди:

— Ол, тузатиб, ёғлаб қўй.

Эшелон ярим станцияга келиб тұхташи билан машгулот тугади.

Вания Великанов гармонини олиб, унинг тұгмалари ни шўх-шўх боса бошлади. Бирпасда унинг вагони олдидә солдатлар тўпланиб қолди.

— Нега жим турбисизлар?— деди тўпланганлар олдига келган Черницов кулимсираб.— А ну пляска...

Эшелон комиссарининг енг шимариб ўйинга тайёр турганини кўриб, Вания гармонининг тактини ўзгартирди-да, шўх частушкаларни бошлади. Черницов ўртада икки марта айланди, сўнгра Тургеневни ўртага тортди. Тургеневдан кейин икки-уч жангчи ер депсиди ва кимдир лейтенант Морозовни ўйинга тортмоқчи бўлиб унга қўл чўзган эди, Морозов билагидати қизилини кўрсатиб, эшелон навбатчисиман, деб қутулмоқчи бўлди. Аммо жангчилар бунга кўнмай, уни ўйинга таклиф қила бошлаган эдилар, Морозов соатига қарадида, уни ўйинга тортмоқчи бўлаётган жангчиларга қараб, овозининг борича қичқириб юборди:

— По вагонам!!!

Солдатлар ғовур-ғувур, шовқин-тўполон билан вэгонларга ташландилар.

Поезд йўлида давом этди.

Эшелон катта бир станцияга келганда, Нормат вагон эшикласидан бошини чиқариб қаради. Станция қоп-қоронги. Трамвайларнинг гувиллашлари, машиналарнинг сигналлари, от туёқларининг дукурлаши ва кишилар ғовурига караганда бу жой катта шаҳарга ўхшарди. Аммо чироғ йўқлиги учун хеч нарса кўринмади. Фақат онда-сонда кўк лампочкалар милтиллаб турибди.

— Бу қайси шаҳар?— деб сўради у, вагон ғилдиракларини ёғлаб юрган темир йўлчидан.

— Куйбишев.

Эшелон бу жойда тұхтаб қолди. Қизил аскарлар әрталаб ҳаммолга туширилди.

Эшелоннинг көйинги тұхташида, вагон тирқишидан қараб турган Исрпил Азимов бу станцияни таниб:

— Пенза!— деди.

— Тревога!..

Вагондан вагонга тарқалган бу команда билан ҳамма ўрнидан турди. Самолёт моторларининг овози эшигилди. Бир неча самолёт темир йўл устидан гарб томонга ўтиб кетди.

— Отбой!..

Булар ўзимизнинг бомбардимончи самолётларимиз эди. Тревога вақтида яшириниб олган жангчи Эмин Ражабов полка тагидан чиқиб жавдираб атрофга боқди. Нормат унинг оқарган юзларига қаради-ю, лекин ҳеч нима демади.

Эмин Ражабов ионвойхонада шогирд эди. Унинг меҳнатга қўйган биринчи қадами ун элаш, хамир қориш, тандирга ўт ёқиши бўлди. Сарғиш юзи, ингичка қўли, умуман, кўриниши унинг нимжонроқ ўсганидан далолат бериб турагар эди... У, ҳарбийгача тарбия таълимотини ўтаётган чоғда уруш бошланиб қолгач, Юрьев қисмида қолиб кетди. Полк уруш вақти штатига кўчирилгач, уни тўртинчи ротанинг иккинчи взводига ёэзб қўйдилар. У, бу взводга Нормат билан баб-бара-вар келди. Уларнинг танишлиги ўша кундан бошланганди.

Бир оздан кейин яна мотор овози эшигилди. Эмин Ражабов ўзини яна полка тагига олмоқчи эди, Нормат ушлаб қолди:

— Дадил бўл, ўртоқ, кемага тушганинг жони бир!..

3

Сўнгги масофани поезд шошилмай ўтди. Кичик-кичик станцияларда ҳам унинг йўлига қизил фонаръ кўндаланг бўлаверди. Узун-узун эшелонлар, бири-бирини кувиб етиб, гизиллаб ўтиб турибди.

Поезд яна жадаллаб юра бошлади, аммо олдинга ўтказиб юборилган составларга етолмади, аксинча, яна бир неча составга йўл бўшатиб берди.

Нормат атрофни кузатарди. Посезд билан баравар гарбга кетаётган қуёшининг сафари тезлашди ва у кесилган қизил тарвуз палласидек ўрмон дарахтларига илиниб қолди. Паровоа шунча тезлаётган бўлса ҳам, унга етолмади. Сал ўтгандан кейин қуёш уфққа ботиб

кетди. Фазога қоронилик ёйилди. Шу пайт Норматнинг кўзига йўлнинг икки томонидаги ўрмон бепоён кўмир ғарамидек қора ва зим-зиё бўлиб кўринди. Унинг кўзи тиниб, хаёл уни яна уруш фронтларига бошлади... «Тезроқ ета қолсак эди!..» Норматнинг назарида, поезд жуда секин юраётгандек, гўё фронт аскарга асло муҳтоҷ эмасдек эди. Фронтлардан келаётган хабарларга қараганда, чекиниш давом этмоқда, янги-янги шаҳарлар ташлаб чиқилмоқда. Поезд яранган Россия ерини кесиб бормоқда. Орқада бепоён водийлар, чўллар, боғлар, ўрмонлар, экинзорлар, нечаче обод қишлоқ ва шаҳарлар қолди. Йўлнинг у ёғида ҳам, бу ёғида ҳам Россия, орқа ва олдида — ҳалиги кун ботиб кетган жойгача ва ундан нарида ҳам Россия тупроғи ястаниб ётарди. Душман ана шу бепоён Ватанини топтамоқчи...

«Утолмайди! — деди Нормат ўэ-ўзича.— Юриб, нечаче паровозлар чарчади, неча марта алмашиниб, дам олиб, юра-юра шу чоққача пойтахтга ҳам етганимиз йўқ... Россияни жанг билан босиб ўтиш осонми? Осон эмас! Мана, Москвага келдик.»

Нормат вагон тирқишидан қаради: шаҳар зим-зиё. Доимо кулиб турган, чароғон Москва қоронифилатилган. Норматнинг кўзига қора нуқталардан бошқа ҳеч нарса кўринмади.

Вокзал майдонига яқин кўчаларда трамвайларнинг овози эшитилмоқда. Троллейбуслар, енгил машиналар калта-калта сигнал бериб ўтмоқда.

Кремль соати дамба-дам жаранглаб занг уриб, Москва қон томирлари тўхтамай уриб турганидан, Москва организами тўхтамай ишлаб турганидан, Москва ғалаба сари яна 15 минут, яна ярим соат, чоракам бир соат, бир соат олеа бораётганидан дарак бериб турибди.

Кўкда ялт этиб чақмоқ чаққандек бўлди. Бу — учар юлдуз каби из ёзиб, Москва осмонини душман самолётларидан қўриқлаб турган прожектор эди. Унинг ёруғида Кремлининг баланд миноралари ялт этиб кўзга чалинди-ю, яна зим-зиё бўлди. Норматнинг кўзига ниқобланган ана шу Кремль ўрмонга, унинг бинолари эса, юксак дарахтларга ўхшаб кетди.

Нормат 1940 йили Бутуниттифоқ Қишлоқ Хўжалик виставкасида қатнашган эди. У Москванинг қудратини

ўша виставкада ёк кўрган. «Виставканинг ўзи бир олам» деган эди у ҳамқишлоқларига. Нормат виставкада турли нав буғдойларни, саксонтадан туққан наследор чўчқалар-у, ўн пақирлаб сут берадиган гавмуш сигирларни, бир тоиналик новвосларни кўрган. Гўё бутун деҳқончилик дунёси ана шу виставка шаҳрига кўчиб кирганга ўхшарди. У, шу виставкада Грузия боғбонлари, Калинин канопчилари, шимол кийикчилари, украинлар, белоруслар, сибирликлар, Карелия ўрмоичилари, Сахалин балиқчилари билан, бутун СССР билан танишган эди. Ватанимиз бошига қора кунлар тушгандан бери виставка дарвозалари ёпилган. Нормат кўрган одамларнинг кўплари аллақачон милтиқ, автомат ушлаб ўрушга кетгандилар...

Учинчи боб АДОЛАТНИНГ АҲДИ

1

Уруш ташвиши, жудолик ғами ҳар бир хонадонга, ҳар бир кўнгилга ҳокимона кириб келди. Бу кулфат Адолатнинг ҳам уйига кирди, унинг ҳам диалини тирнай бошлади. Норматдан кейин, Адолат ўз акаси Олимжонни ҳам фронтга кузатди. Ҳар кун қўни-қўшиларнинг дарвозалари тақиллаб, почтальоннинг бир хил сўзи эштиларди: «повестка»... Ҳар куни бирон уйдан кимдир хайрлашгани киради. Қишлоқнинг сара йигитлари армияга — Ватан ҳимоясига кетдилар. Норматни военкоматга элтиб қўйган шофер ҳам куни кечаки Адолатларнинг ҳевлиси олдидан охирги марта сигнал бериб ўтди, у ҳам машинаси билан бирга фронтга жўнади. Қишлоқда кексалар, хотиплар ва ўсмирларгина қолди.

Уруш Адолатнинг ҳам йўлини тўди. У, Москвадаги Ломоносов номли Давлат университетига ўқишига бориш орзусида юрар ва бу ҳақда Нормат билан ҳам маслаҳатлашган эди. Университет қабул комиссиясига ариза юбориб, «филология факультетига қабул қилишни» сўраган эди. Адолат Москвага бориб камол топиш орзусида колхоз ишидан ҳам жавоб олган эди, афсуски орзуси амалга ошмади. Энди эса Адолатнинг

күзига ҳамма ёқ қоронғи күринади. Күчалар жимжит. Ҳеч ким унинг дардини билгиси келмайди. «Ростдан ҳам «Гулистан»да ҳаёт сўнъяптими?» дейди Адолат ва ўз саволидан ўзи чўчийди.

Мана, «Гулистан»даги чинорлар, сада қайрағочлар қадимгидек гердайиб турибди. Мана, боғдаги анор дарахтлари қуёшдан нур эмиб, ғунча тұгмоқда, кенг дала-лардаги ғүзаларниң тағ шохлари гулламоқда, күсак тұгмоқда, улар саратон оташига бардош беріб, чидам билан пишиб етилмоқда.

Уларга мадад керак, мададкорлар керак.

Ана шу ҳақиқат гүё Адолатни уйқудан уйғотгандек бўлди, уни далага — меҳнатга чақирди.

— Менга иш беринг,— деди Адолат, колхоз раиси Қодир акани кўчада учратиб.

Қодир ака мош-гуруч соқолини силади-да, ўйланиб қолди. «Бу қизнинг авжи ўқийдиган вақти. Ўқийман деб звеноликни ташлади, Москвага бораман деб фотиҳа олди. Мана энди ўқишдан маҳрум, иш беринг, дейди. Қандай иш берсам экан?»

— Қайси иш маъқұл экан сенга? Табелчилик қиласанми?

— Йўқ,— деди Адолат.

Қодир ака ранжигандек бўлиб сўради:

— Табелчилик иш эмасми?

Адолат узр сўраб жавоб берди:

— Бу ишни бригадир қилса ҳам бўлаверади. Менга мустақил иш беринг.

— Бўлмаса,— деди Қодир ака, бошини қашиб,— идорага ўта қол. Секретарни олиб кетишгандан бери идоранинг эшиги очилгани йўқ. Ўзинг биласан, бухгалтеримиз ҳам икки колхозга хизмат қиляпти.

— Бошқа, оғирроқ иш бераверинг! Ёки ишонмаяпсизми менга? Ёмон кетмончимиидим? Ёки звенони эплэмабманми!

— Бўлмаса, кечқурун идорага кел. Бафуржа гаплашамиш.

— Мени даштга юборинг.

— Даштга?

— Ҳа, даштга.

— Норматнинг ўрнигами?

— Ҳа!..

— Жуда соз. Тайёрланавер!

Дашт бригадаси 1939 йили тузилган эди. «Гулистой» колхози ўша йили эрта баҳорда «дашт» деб аталган за неча замонлардан бери ишлатилмай ётган бўзда янги ер очди. Бу ерга колхоз ёшларининг ҳаракати билан Пасариқдан чиғир билан сув оқизилди. Сув чиқарган ёшлар бир бригадага уюшиб, 1940 йилда шу янги ердан пахтадан юқори ҳосил олдилар, бригада бошлиғи Нормат Жабборов эса, 1940 йили Москвадаги Қишлоқ Хўжалик виставкасига юборилди.

Энди ана шу донгдор бригадир йўқ, бригаданинг энг сўнгги звено бошлиғи ҳам кеча қопчиғини орқалаб военкоматга жўнади. Ёшлар бригадасида қизларгина қолди.

2

Адолат даштга қоқ тушда келди. Қуёш тепада туриб олиб, пастга олов сочаётганга ўхшайди. Fўзалар анор пўстидек қорайиб, ерга энгашиб турибди. Баъзи жойлардаги fўзаларни ғумай босиб кетган. «Аттанг...» деди хўрсиниб Адолат, сувсиэликдан баргларини шалпайтириб турган fўзаларга қараб. Fўзалар гуллаётган пайт. Агар улар шу пайтда суғорилмаса, бригаданинг меҳнати зое кетади...

Адолат пахтазор ёқалаб кета туриб, хуррак ованини эшилди.

— Нима гап? Қанақа иш бу!

Адолатнинг товуши шотут тагида қатор тизилишиб ётган қизларни чўчитиб юборди. Улар секин-аста туришиб, уйқули кўзларини ишқай бошладилар.

— Ким қичқирди? — деди, ариқча ичиди чўзилиб ётган жувон бошини кўтариб.

Қизлар бир-бирларига қарашди-ю, Адолатга имо қилишди.

— Fўзани сел босибдими, депман,— деди-да, ҳалиги жувон яна бемалол ёнбошлаб олди. Қизлар орасида кулги кўтарилди.

Адолат ухлаётган жувоннинг тепасига борди.

— Нима ётиш бу, Бегимхон! Тулинг ўрнингиздан! Бегимхон парво ҳам қилмади.

— Нега қичқирасиз, Адолат? Бирор ерга ўт кетибдими?

— Fўзага ўт кетибди; қаранг, тутақиб ётибди.

— Сув бўлмаса, кўз ёши билан суғорамизми?

— Сув топиш керак. Ҳовучлаб бўлса ҳам суғорамиш. Ёввойи ўт-чи? Ёввойи ўтни йўқотишга кўз ёши керак эмас-ку?..

— Вой, Адолатхон, бизга нега хўжайинлик қиласиз? «Нормат акам бригадир эди» деб керилманг. Нормат ким бўлади ўзи сизга! Оламан деган билан ёр бўлармиди? Ҳолва деган билан оғиз чучийдими?

Адолат қизларнинг шу хил қарши олишини кутмаган эди, ўзини йўқотиб қўйди. Нима қилиш керак? Секин орқасига қайтиб кетаверсинми? Бу қизларнинг авзойи шундай бўладиган бўлса, Адолатга сўз беришадими? Адолатнинг аҳволини кўрган қизлар бир-бирларини турта бошладилар:

— Адолат тўғри айтади, туринглар, уйқуга ҳам тўйдик.

Аммо Бегимхон ётган ерида чалқанча ёта берди.

— Турмайсизми, Бегимхон!

Бегимхон ўзининг якка қолганини сезиб бир оз бўшади.

— Нега биз-бизига оласиз, туряпман-ку.

Адолат қизларни ёввойи ўт босиб кетган пайкалга бошлади.

Дашт бригадасининг ғўзалари фақат бир марта культивация қилингап эди. МТСдан яна битта «универсал» келади деган овоза чиқди-ю, келмади. Айтишларига қарганда, худди ўша «универсал» ҳам, универсалчи ҳам фронтга кетган эмиш. Бутун бошлиқ колхозда битта «универсал» талаш. Раис: «универсал» кексалар бригадасида ишласин, ёшлар кетмон чопиги қилаверсин, депти.

Ўз ёнида ғумай юлаётган Адолатнинг қўли қийилиб қонағанини кўрган Бегимхон хоҳолаб кулиб юборди. Қизлар ҳам пиқир-пиқир кулишиди. Адолат гапни бошқа ёққа бурмоқчи бўлиб, сўради:

— Нима топиб олдингиз?

Яна кулги кўтарилиди. Адолат ҳайрон қараб қолди. Кимдир, қизлардан бири: «бас энди, қизлар» дегандан кейингина кулги босилди. Адолат яна ғумай юла бошлади. Ғумай тифида унинг қўли яна қийилди. Қон оқиб, бармоги ачий бошлагандан кейин, рўмолчасига кафтини ўраб олди. Шу маҳал яна кулги кўтарилиди. Адолат бу сафарги кулгини аччиқ мазақ деб тушунди-да, ғўзага энгашиб, кўзидан дув-дув ёш тўқди. Бегимхон икки чак-

касидаги гажжагини силкитиб, муштларини белига ти-
раб турған эди, Адолат үшқириб берди.

— Ишиңгни қылсанг-чи, Бегимхон!

— Мен ишимни билиб қиляпман. Аммо қўлимни қо-
натганим йўқ. Отолмаган сопқон ҳам этга тегади, ҳам
бетга...

— У нима деганинг?— деб Адолат Бегимхонга еб
юборгудек ёвқарашиб қилди.

Бегимхон Адолатнинг ҳозирги ҳолатини кўриш билан
1938 йилда бўлиб ўтган воқия эснга тушди. Ўшанда ҳам
Адолат Бегимхонга ҳозиргидек ўқрайиб қараган эди...

Уша йили кузда Бегимхон 7-синфнинг биринчи чора-
гидан кетиб қолди. Колхоз отбоқари Эрали совчи Қўй-
гандан кейин, унинг отаси Бегимхонни мактабга юбормай
қўйди. Бегимхон Адолатнинг энг яқин дугонаси эди. Бир
куни Адолат «юр мактабга» деб унинг олдига кирди. Бе-
гимхон кўк қарғашойи қийик тикиб ўтирган экан, ўзинт
боравер, дегандек ерга қараб ўтираверди. «Нима қилга-
нинг бу?» деди Адолат, таажжубланиб. Бегимхон чоки-
ни йифишириб, дугонасини кўрпачага ўтқазди-да, патнус
тузаб келди. Адолатга бир пиёла чой узатиб, яна қийинқ-
ни қўлига олди. Бу ҳол Адолатни ҳайратга солди. Бегим-
хон бутунлай ўзгариб кетган эди. Адолат ҳайрон бўлиб:
«Нима гап ўзи?» деб сўраган эди, Бегимхон сиполик би-
лан: «Қудалар шошираётган эмиш...» деб қўя қолди. Адо-
лат: «Тўй яқинми ҳали?» деб эди, Бегимхон ерга қаради.

— Ўқишинг-чи? Ўқишинг нима бўлади?

— Билмасам. Фотиҳани бузиб бўлмас эмиш...

Бу — унинг узил-кесил жавоби эди.

Адолат сакраб ўрнидан туриб, дугонасининг уйдағ
чиқиб кетди. Эртасига улар комсомол бюросида уч-
трашдилар. Бюорда Бегимхоннинг эрга тегамас деб,
мактабни ташлаб кетиш масаласи муҳокама қилинди.
Адолат мажлисда куйиниб-куйиниб:

— Бегимхонни зўрлаб эрга беришяпти — деди.

— Ёлрон гап! Ўзим хоҳлаб тегяпман! — деди Бе-
гимхон жаҳл билан.— Ўзим хоҳладим! Қишлоқ Сове-
тида «хоҳладим» қоғозига ўзим қўл қўйдим. Адолат-
га алам қилмасин!

Адолат икки юзини ушлаганича қолди. Музокара
давом этди. Адолат бюро аъзоларининг қизғин гапла-
рини эшитди-ю, аммо улар нима деб, нима қарорга ке-
лишганини англай олмади. Охири, «сеснинг фиқринг-

чи?» деб сўрашганида. Адолат Бегимхондан: «Мактабни ташламасликка сўз берасанми?» деб сўради. Бегимхон Адолатнинг қарашидан кўзларини яшириб, «сўз берман» дейишга мажбур бўлди. Шундан сўнг Бегимхон икки-уч кун мактабга қатнаган бўлди-ю, кейин яна кўринмай қолди. Орада тўй бўлди, сўнгра қайноне, қайнота ўртага тушди. Бегимхон эса, уларнинг измидан чиқишига журъат этолмади...

Шу-шу Адолат Бегимхон билан гаплашмай қўйди. Орадан уч йил ўтди. Мана энди улар яна рўпара келдилар. Бегимхоннинг онаси «куёв чақирди»сини ўтказиши билан, 1939 йили Эрали ҳарбий хизматга кетди. Бегимхон бу йил кузда эримнинг келишига сўяман деб қўй боқиб юрган эди, уруш бошланиб қолди. Эралидан дарак бўлмади. Уч йиллик воқналар Бегимхон хаёлидан турна тизмасидек қаторлашиб ўтди. Гўё Эралининг ҳарбийга кетиши, кейин урушга тутилиб қолиб, ғойиб бўлишининг айбдори Адолатга ўхшаб кўринди. Ана шу Адолат гўё ҳозир ҳам унга тинчлик бермаётгандек туюлди-да, Бегимхон тўлиқиб кетди.

— Чачайма, Адолат! Чачайган кўзларинг эримнинг бошини еди, энди мени хароб қилмоқчимисан?!

3

Адолат кечаси узоқ вақтгача ухлай олмади. Бегимхоннинг ҳақорати унинг уйқусини қочирди: «Унинг эрига менинг кўзим теккан эмиш. Мен унинг бошини еган эмишман...»

Адолатнинг тинчимаётганини фақат унинг ёнида ётган Шакархон сезди. Шакархон ёш жиҳатдан шу ердаги қизларнинг энг каттаси, лекин ҳали эрга чиқмаган эди. У ўзини шу қизларнинг кўз-қулоги, насиҳатгўйи, деб биларди. Қизлар орасида чиқадиган ҳар хилғийбат ёки кўнгилхонликка Шакархон ҳукм чиқарар эди. Бегимхон билан Адолат ўртасида юз берган кўнгилсиз воқиа уни ҳам безовта қилмай қолмади. Шакархоннинг ҳам уйқуси қочди. У, Адолатнинг ойдинда ярқираб турган ўйчан кўзларига тикилиб, унинг аламга тўлганини пайқади.

— Нега ухламаяпсиз, Адол?

— Шундай, ўзим... Қаранг-а, қандай гўзал оқшом...

Ҳақиқатан ҳам дала оқшоми гүзал эди. Тиниқ осмонда юлдузлар чарақлаб турибди. Чап томон адир, қир. Янтоқлар қорайиб, чақмоқ тошлар сийдинда ярқираб турибди. Ўнг томон кўкаламзор: гўза, духобадек қалин тўшалиб ётибди. Ой шуъласида дарахтлар сояси вазмин-вазмин қўмирламоқда. Сув сепгандек жимжит. Онда-сонда полиз атрофидан бедананинг ширагли овози келади. Адир томонда чигирткалар чийиламоқда...

— Бегимхон сизни хафа қилганга ўхшайди...

— Мени эмас, ўзини хафа қилди. Биласизми.— Адолат Шакархон томонга ўгирилиб олди,— мени унга ҳар доим яхшилик қилиб келдим. Ўқишингни ташлама, дедим, ёмон бўл, демадим. Эрга тегма демадим, тегавер, лекин вақтида тег, дедим. Бармоғинг ангишвонага тиқириб, қўлинг чокка ўралиб қолмасин, десам, душманликдан айтмагандирман. Илгари тушунмаган эди, ҳозир ҳам тушунмаяпти. Шундай кунларда кек сақлашга нима-ю, ўч олишга нима!

Бегимхон ёнидаги ғовур-ғувурдан ўйғониб кетди. У, пўнғирлаб: «Бироннинг уйқусини бузиб ғувурлашга нима бор» деди-ла, чап томонига ағдарилиди, яна кўзини юмиб, уйқу чақирди. Уйқу уни босиб кетаётган чоқда сўзнинг орасида ўз номини эшишиб қолиб сесканди. «Яна мени гийбат қилишяпти...» Бегимхон Адолатнинг гапларини эшишиб бўлгач, ўрнидан туриб, кўрласига ўтириб олди.

— Ҳа, ойимча, эрга теккаи бўлсам хўп қипмаи, ажаб қилиман. Эрга тегиб ёмони бўлганим йўқ. Худога шукур, тўй кўрдим, чимилдиққа кирдим, орзу ҳавас кўрдим. Замона бунаقا бўлиб кетаркан... Қишлоқда йигит қолмади. Урушдан қайтишадими-йўқми... Анз. Зебинисо нима бўлди? Бечора чимилдиқ кўрмай қазо қилди. Орзусига етолмай, икки қўли кўксига кетди. Мени ҳам ўшанаقا бўлсин, деганимидинг, Адолат?

Адолат ҳам сакраб ўрнидан туриб, кўрпага ўтириб олди.

— Нима демоқчисан?

— Ҳай-ҳай, қизлар, юлишиб кетманлар,— деди Шакархон, Бегимхоннинг қўлидан ушлаб.

— Кўрмайсанми буни...

— У нима қилибди, ҳақ гапни айтништи.

— Ҳақ гап шуми? Эрга текканим унга малол келибди? Үзи-ку Норматга эргашиб юриб-юриб, қуруқ қолди. Энди аламини мендан олмоқчи...

— Қуруқ қолганим йўқ,— деди Адолат қатъийлик билан,— истасам эртагаёқ бирга бўламан.

— Бўлиб бўпсан. У қайда-ю сен қайда. Қиз жонинг билан қаергача боралардинг.

— Нима, қиз бола одаммас, деб ким айтди сенга? Қиз бола кимдан кам? Қиз бола сувда сузмаяптими, осмонда учмаяптими?! Қараб тур, шу деганингга албатта бораман!

Шакархон гапга аралашди:

— Ҳай, Адол, қиз болаларни фронтга олмас эмиш. Қизларни ҳам олаверса, даладаги иш кимга қолади?..

Уч қязнинг тортишувидан бирин-кетин бутун шийсон уйғонди. Қизлар бири-биридан суришириб, ким нима деганини, можаро нимадан чиққанини аниқлаб олди. Бегимхон Қизларнинг кўпчилиги Адолат томонига ўтиб олганини кўриб, «ҳамманг мени яккалаяпсан» деди-да ҳўнграб йиғига тушди. Шакархон учи юлатмоқчи бўлган эди, Бегимхон зарда билан ўрнидая туриб, қизларнинг «ҳай-ҳайига» қулоқ солмай пахтазор томонга кетди...

Тўртинчи боб ФАЗАБНИНГ ТУФИЛИШИ

Тўртинчи рота Уздечкино станциясида поезддан тушиб, фарб томонга юрди. Йўл жуда тиқин ва серқатнов. Мотопехота колонналари тўхтовсиз ўтиб туриди. Катта-кичик танклар, оғир тўпларни судраган тракторлар, тачанкалар ўрмаламоқда. Қизил яримой тамгали санитария аравачалари, машиналар... Йўл чанг. Замбараклар устида ўтириб кетаётган жантчиларнинг кўзлари, тишлирагина ялтираб кўринади. Ротанинг энг охирида келаётган Норматнинг юзидағи чанг терда лой бўлиб ёпишмоқда. У, пешона терини артиб, шовқин бўлаётган томонга қаради.

Оғир тўппи судраб кетаётган трактор бузилиб, йўлни тўсиб қўйибди. Унинг ёнидан ўтмоқчи бўлган трак-

тор ҳам тиқилиб қолибди... Олдинги позициядан келастган шоферлар: «тракторингни ол, йўлни бўшат» деб қичқирадилар. Бир зумда катта йўл машиналар ва тракторларга тўлди. Ҳамма ўз машинаси; ўз трактори, ўз аравасини ўтказишга тиришади. Ҳамма ўз гапини маъқул қиласди. Йўлнинг кун чиқиш томонидан келаётганилар: «йўл бўшат, биз фронтга бораётимиз!» деса, ғарбдан келаётганилар: «биз фронтчилармиз, йўл бизники!»— деб ўдағайлайдилар.

— Самолёт!— деб қичқирди, машинада турган ҳаво кузатувчиси.

Булутлар орасида паналаб юрган немис самолётлари шўнгигиб тушиб, ваҳима сола бошлади. Тревога эълон қилиниши билан солдатлар дарахт паналарига, ўйдим-чуқур жойларга ўзларини олдилар, бутун колонна ерга ётди. Свастикалик учта шўнгувчи самолёт пулемётдан ўқ ота бошлади. Ҳаво ҳужуми Нормат учун кутилмаган ҳодиса эди. У нима қилишини билмай, бошқалар қатори гавдасини ерга ташлади. Бир самолёт унинг қоқ тепасидан учиб ўтди, атрофга дўлдек ўқ ёғилди, қулоғининг тагидан икки-уч ўқ визиллаб ўтиб шу ерда тупроққа қориши. Самолёт овози узоқлашиши билан Нормат қўлларини, оёқларини қимирлатиб кўрди: ҳамма ёғи бутун. Шу маҳал яна самолётнинг гувиллаши эшишилди, гўё фашистлар унинг қимирилаганини кўриб қолгандек, яна Норматнинг тепасига ёпирилди. Нормат нима қилишини билмай, атрофига қаради-да, беш метрча нарироқда турган тягач тагига эмаклади. Самолётлар машиналар тўпланган жойга ҳужум бошлаган ҳамон, фронт томонидан келаётганиларниг бири: «огонь!», «огонь!» деб қичқириб пистолет-пулемётдан ўқ уза бошлади. Кейин онда-санда милтиқ тасир-тусури эшишилди ва қўл пулемёти тилга кирди.

Капитан Юрьев машинасини колонна орқасида қолдириб, ҳаво ҳужуми бўлган жойга югуриб келди. У, йўл бўйларида ётиб олиб, якка-якка ўқ узаётган жангчиларни кўрди.

— Залп! Залп!— деб қичқирди у, йўлнинг чап томонидаги буталар тагида ётган бир группа жангчиларга қараб. Улар капитаннинг командаси билан тепадаги самолётга барча қуроллардан бирданига баб-баравар ўқ уздилар. Самолёт дарҳол тепага кўтарилиб, йўлнинг

нариги томонига ўтиб кетди. Шу вақт ўрта күчада занжири узилиб, йўлга кўндаланг бўлиб қолган тягач тагидан якка милтиқ овози эшитилди ва кул ранг тутун чиқди. Юрьев тягач олдига борди.

— Кимсан?

— Мен, жангчи Нормат Жабборов...

— Қаёққа қараб отяпсан?

— Самолётга...

— Бу ёқча чиқ! — деди Юрьев, Норматга қараб.

Нормат тягач тагидан эмаклаб чиқиб, гимнастёркасининг тугмалари, шапкасининг козирёги ва хром этигининг қўнжигача ярқираб турган капитанни кўрди. Унинг қошлари чимирилиб бир-бирига туашган, кўк кўзлари ўйнаб турарди. Нормат қисм командирини биринчи марта шундай вазиятда кўриши эди: у ўзини ўнглаб, унга честь беришга шошилди.

Юрьев унинг пешонасига суйкалган автолни, гимнастёркасига теккаи қора мойни артиб олишга буюрди, кейин Норматга тикилиб қаради.

— Ўқнинг қадрига етиш керак,— деди Юрьев,— самолёт орқангда учиб юрибди, сен булатга қараб ўқузяпсан.

Шу вақт буталар орасидан жангчи Отступний югуриб чиқди.

— Ўртоқ капитан,— деди у, ингичка бўйини чўзив честь бераркан,— бу ўзи ғўрроқ солдат. Эшелонда ҳам ўзимизнинг самолётларни «мессер»га ўхшатиб, мисимизни чиқарган. Буни менга топширинг, мен унга...

Бояги самолёт яна тягач тепасидан гувиллаб ўтди. Нормат ўзини панага олди-да, унга ўқ уза бошлади. Отступний унинг ёнида ётиб олиб: «От, отавер!» деб қичқирди. Шу вақт нарироқдан залп берилди, пулемётлар овози эшитилди, қаршилик кучайганини кўрган самолёт ҳавога кўтарилиганча қайтиб келмади.

Батальон йўлида давом этди.

Нормат енги билан пешона терини артиб, атрофга қаради. Ҳамма ёқда одамлар чумолидек ўрмалашиб юрибди, тош ва шағалга теккан белкураклар тарақлайди. Чуқурликлардан иргитилаётган тупроқ окопларнинг чап қирғоқларида тоғ бўлиб кўтарилимоқда. Урмондан келтирилган тўсин ва ёғочлардан ер ости бостирилмалари тайёрланмоқда. Окоп қазиётган жангчиларнинг

орқа линиясида ҳам белкураклар тарақлаб, тупроқлардан тоғ яралмоқда. Мана дарё... Дарёнинг нариги юзида окоп қазиётганлар орасида чоллар, хотинлар ва ўсмирлар ҳам кўринади. Булар умрида қўлига белкурак ушламаган, ҳаётида чумчук ҳам сўймаган олим, артист, шоир ва рассомлар, москвалик кўнгилликлар, мўйсафид ишчилар — халқ лашкарлари эди.

«Ҳўҳ-ҳо!..» деб юборди Нормат буларни кўриб. Унинг назарида шу дарё бўйида яна бир катта Фаргона канали қурилаётганга ўхшайди. Фақат канал эмас, балки тўғонлар, шлюзлар, темир-бетон уйлар ҳам бир-йўла ва бирданига қурилаётганга ўхшайди. Онда-сонда милтиқ овози эшитилиб, ракета шуъласи кўрилгандан кейин, Нормат фронтда эканини, бу ерда чаңқоқ водийларга сув берувчи, нур берувчи канал эмас, балки ҳарбий истеҳкомлар кавланиб, ёв йўлига гов тиклашаётганини сезди. «Шунча одам, шунча асбоб-аслаҳа!.. Агар шу куч, бу ҳаракат канал учун ишлатилса... Ҳех-ҳе!.. Мирзачўл тугул, қозоқ саҳролари ҳам пахтазор бўлиб кетар эди» деб ўлади Нормат. У, йўлдаги ҳаракатлар, от-аравалар, танклар, замбарак тортган тракторлар, учиб юрган самолётлар, машиналар, парвозлар қанчадан-қанча бензин ичиб, автоль, кўмир ютаётганини ўлади. Қанчадан-қанча тоза металл одамларга отилиб, ерда йўқ бўлаётиди. «Агар бу металл ўз эҳтиёжимизга ишлатилса, қишлоғимиз томлари ҳам тунукали бўлиб, колхозчиларнинг барчаси машинада юради!..»

2

Юрьев батальони «алоҳида ўқчи батальон» номи билан армия резервиде эди. Махсус кўрсатма бўлгунча, «алоҳида ўқчи батальон» Ильичёвкада жанговар-сиёсий тайёргарликни такомиллаштириб, армия қисмларининг жанг тажрибаларини, душман тактикасини ўрганиб, жангларга ҳозир бўлиб туриши керак эди.

Батальон комиссари Черницов армия сиёсий бошқармасидан келган янги қўлланмани ўқиб чиққаҷ, буни дарҳол жангчиларга етказишга қарор қилди. Роталарда ҳар куни эрталаб сиёсий ахборот ўтказилар, унда Совет Информация бюросининг ахбороти, фронт ва армия газеталарида босилган жанг ҳикоялари ўқиб

әшиттирилар эди. Бугунги құлланма сиёсий ахборот са-
виясими оширишни талаң қыларди. Улуғ Ватан урушида
қатнашаётган күчларнинг нисбати, мақсади күн сайин
йилмий асосда тушунтириб бориши керак.

Құлланмада бу масалаларни қандоқ тушунмоқ ва
қандоқ тушунтироқ кераклығы баён этилған. Совет
ерининг бир қанча қисмининг вақтінча құлдаған кетиши,
душманнинг вақтінча тантана қилаётгандығы — түсат-
дан жоюноңа ҳужум оқибати... Қызыл Армияның вақ-
тинча чекиниши душманнинг сон ва техника жиҳатидан
устунлиги, бунинг устига, Европадаги ғолибона уруш-
ларда чиниққанлитидан...

Черницов бошини қашлаб, ўйланиб қолди. Унинг
ўрнида бешіқа ҳар қандай кишининг ҳам боши қотиши
турған гап эди. Ахир, у яқындағына, уруш бошланиши-
дан олдин ва уруш бошланған кезларда бошқача гап-
ларни вайтматағынди. «Бир зарбага уч зарба биләз
жасып берамиз! Урушни душман территориясыда олиб
берамиз!» деган киши Черницовнинг ўзи әмасмиди! Эн-
ди у, солдатларга бутунлай бошқа гапни айтиши керак.
Айтишга айтади-ю, лекин исботлай оладими? Баҳсла-
шиш вақты әмас. Лекин Черницовнинг виждони ўз қо-
нуни, ўз җүкми, ўз овозига зет. Бу уруш тасодиғий
әмас, албатта, бу воқөлек осмондан түшгани йүқ. Ер-
юнида, бир қитъада, күз олдимизда рүй берди-ку! Фа-
шизм — коммунизмнинг ашаддий душмани. Рим, Бер-
лин, Токио ўқи бизга қарыш қаратылған. Гитлер Евро-
пани босиб олғач, чегарамизда қүшинларини түплаб,
замбарагининг оғзини байробимизга қарши түгрилади.
Ғафлатда қолдикми? Генералларимиз буни билмасми-
дилар? Мамлакатимиз поёңсиз, давлатимиз улуғ, халқ-
ларимиз ҳамдил, ҳамжиҳат!

Сен, Черницов, шуларни айт жангчиларга! Машақ-
қатли, аммо муқаррар ғалабадан гапир!

Кечқурун соат 19 да Юрьев Ильчевка қишлоғида-
ғы штабс квартирада кенгаш чақырди. Беш хопалик
ёғоч уйга рота командирлари, політруклар ва штаб
командирлари йиғилдилар. Юрьев нималарнилдир ўқы-
моқда ва имзо чекиб, яна адъютантга узатмоқда. Ко-
миссар ҳозиргина алоқа офицери полк штабидан келтир-
ған оперсводкани ўқир эди.

— Баштаймиз,— деди комиссар.

Юрьев ишларини түхтатди.

— Юртимиз оғир күнларни кечирмоқда,— деб сўз бошлади Черницов.— Ватанимиз ўт ичиди. Бутун Европани дабдаба билан босиб ўтган фашизм ҳарбий машинаси катта фронт бўйлаб ҳужум қилмоқда. Қизил Армия чекинаёттир...

Қомячидирларнинг кўплари Черницовни илгари ҳам танир эдилар. Черницов ҳарбийга келгунча райком секретари эди. Унинг районидан чақирилган запас командирлар турли-туман ишда, у билан тез-тез учрашиб турардилар. Черницов ҳар қандай вазиятда ўзини тула биладиган одам ва минг ўлчаб, бир кесадиган раҳбар буляши билан бирга, моҳир нотик ҳам эди. Ҳар бир сўзни ўзига хос оҳангда, таъсирчан қилиб гапироладиган бу кишининг ҳозирги нутқи салобат билан таъсирчан жарангламоқда. Командирлар ундан кўз узолмай, унинг ҳар бир сўзини диққат билан тинглагондадар.

— Бизнинг қўшинларимиз Витебск шаҳрини ташлаб чиқдилар. Белоруссиянинг яна бир шаҳри, дарё бўйидаги шаҳар — саноат шаҳри қўлимиздан кетди. Немис десантчи қисмлари қадимги рус шаҳри Смоленскини босиб олдилар. Душман вақтинча тантана қилмоқда...

Тўртични рота командири лейтенант Морозов Черницовга тикилганча қараб қолди. Унинг киприклари намланди... Лейтенант кўзидан ёш оқиб тушаётганини ўзи ҳам сезмай қолди.

Морозов эсини танигандан бери ҳарбий хизматда. Уни Қизил Армия вояга етказди. У, Қизил Армияни дунёда энг қудратли, енгилмас армия деб билади ва унга ишонади. Наҳотки, ана шу энг қудратли, енгилмас армия биринчи жангларга бардош беролмай чекинаверса, Совет Ватанининг муқаддас тупроғини фашист этиги топтаб юрса! Морозов бунга сира чидай олмайди, буни ўйлаб, унинг бағри ўртанимоқда. Морозов Смоленска түғилиб, Смоленска ўсган. Унинг ота-оналари ўша жойда қолган. Уруш бошланмасдан 15 кун илгари хотини Леля билан ўғилчаси Славикни олиб Смоленска кетганди. Славикни ёз бўйи ўрмонларда, Днепр қирғоқларида ўйнатиб, кузда, мевалар ширага тўлиб, гарқ пишганда Фарғонага олиб бормоқчи эди, бўлмади. Энди ота-онадан ҳам, Лелядан ҳам хат йўқ. Улар қайси кўчаларда сарсон-саргардон бўлиб юришибди?..

Унинг хаёлини Черницовнинг сўзлари бўлди:

— Душман вақтинча тантана қилмоқда,— деди такроран Черницов.— Қизил Армия вақтинча чекинмоқда. Бу чекиниш куч тўплаб қайта ҳужумга ўтиш учун план асосида қилингапти...

Черницов «вақтинча тантана», «вақтинча чекиниш», «қайта ҳужумга ўтиш» деган ибораларни қийналиб айтди. Душман тантана қиласпти? Қачонгача, қаергача чекинами? Қайта ҳужум қаердан бошланади? Бу саволларга унинг ўзи ҳам аниқ жавоб беролмайди. Чекинниш плани ҳақида ҳам унда аниқ маълумот йўқ. Сводкаларга қараганда, чекиниша ҳеч қандай тартиб йўқ. Ҳозирги ҳолатни ифода қилиш учун Черницов ўзича «баҳтсизлик» деган иборадан бошқа сўз тополмади. Баҳтсизлик.

Бизнинг бошимизга тушган бу баҳтсизликка хотима бермоқ керак. Кон билан, жон билан бўлса ҳам, баҳтга эришмоқ даркор!

— Душманнинг қўйни пуч ёнғоққа тўла,— деб гапида давом этди Черницов.— Қизил Армиянинг вақтинча чекинишини у мағлубият деб, ўзининг баъзи ютуқларини ғалаба деб гердаймоқда. У, совет халқини, совет кишиларининг қудратини, жамиятимизнинг ҳаракатлантирувчи кучларини ҳисобга олмай, катта янглишди. Ҳалқ: «ё, ҳаёт, ё ўлим!» — дейди. Ҳалқ қўзғалди. Нима учун курашаётганини билган ҳалқ сира ўлмайди. Ҳақиқат бизнинг томонда, биз ғалаба қиласми!

Юрьев сўз олди.

— Душман маккор ва кучли,— деди у.— Унинг техникаси зўр. Техника бизда ҳам бор, аммо озроқ. Бунинг устига, баъзи жангчиларимиз фўр... Мана кечаги воқиани олинг. Самолётлар ҳужуми вақтида командирлар тажрибасизлик қилишди, жангчилар шошиб қелишди...

Юрьев блокнотидаги ёзувларни ўқигач, яна гапида давом этди:

— Нормат Жабборов деган солдат бузилган тяга тагига ётиб, ҳеч қандай мўлжалсиз, булутга қараб ўз уза берди...

— Нормат кимнинг жангчиси?— деб комиссар сўради.

— Менинг жангчим,— деди лейтенант Морозов.

Комиссар Жабборовнинг номини блокнотига ёзиб олди.

— Душман маккор,— деб тақрорлади Юрьев,— у, ҳийла билан тинкамизни құрнитмоқчи. Фронт парчаланыб, ўз чегараси, линиясими йүқотди. Эртага фронт Ильичёвкага ҳам келиб қолиши, Ильичёвка мустақия жаңг майдонига айланиши мумкип. Шу сабабдан буюраман: ҳар бир ротадан иккитадан взвод окоғ қазиша чиқсан. Йўл бўйлари, қишлоқининг чор атрофларида хандаклар қазилсин. Қолган взводлар қурол қисмларини ўрганишда давом этсин, отиш машқи кече ва кундуз баб-баравар олиб борилсан. Ҳар қандай кутилмаган ҳодисаларга қарши шайланиб турингиз!

Немислар босиб олган қишлоқлардан қочганлар Ильичёвкага келишди. Улар қишлоқда тунаб қолишли. Йўл бўйидаги уйга тунаш учун кирган кампир бурчакда сут ичиб ўтирган қорача йигит қаршисида тўхтади.

— Қаерликсан, болам? Русга ўхшамайсан?— деб кампир кўз ёшларини артиб, унга яқинлашди.— Отананг борми?

Нормат Жабборов ўзининг қаерлик эканини айтди. «Онам бор, сизга ўхшаш онам бор» деди у. Кампир оғир уҳ торти. Нормат деразадан қараган эди, кўчадаги хотинлар, болалар, чолларни кўрди.

— Мен Гомель областидан келдим.— деб кампир ўзи ҳақида ҳикоя қила бошлади.— Ўғлим ҳарбийда. У, олтинчи июль куни «Армияга қўшиламан» деб, уйдан чиқиб кетди. У, кетди-ю икки кундан кейин немислар келди.

— Айланай, у ёқда нима гаплар бор?— уй эгаси кекса аёл сўради.

— Гап кўп,— бечора кампир хўрсаниб олди.

— Айтинг.

— Айтмайин ҳам, кўрмайин ҳам, деб эдим. Айтсам тилим, айтмасам дилим куяди.

Кампир Норматнинг ёнига ўтириб олиб, гап бошлади:

— Бошимизга тушгунча ўзимиз ҳам бундай гапларга ишонмас эдик. «Немислар ваҳший» дейиши, «фашистлар одамхўр» дейиши, «улар ўғри» дейиши ниёнмадим. «Наҳотки, шундай бўлса... Немис ҳалқи маданиятли ҳалқку, православ ҳалқ-ку» дедим. Кейин тушунсам, немис бошқа, фашист бошқа экан. Фашист қишлоғимизга босиб киргандан кейин қилди қилғиликни, қилди қилғиликни... Ўйимизга бостириб кирнинди. «Фрау, фрау» деб чақири-

шади. «Ҳа» десам, «яйик» дейди, «шпик» дейди. Илоё таг-томири билан қуриб кетсин бу газандалар!. Биринчи куни уч солдат кирди. Боримни бердим. Яна кириши, яна тухум, ёғ бердим. Бу ажал торткурлар бермаганимга қўйишмади. Учинчи марта кириб, бу уйнинг эгаси борми, йўқми ҳам дейишмади. Сандинимни очиб, қизим Раисанинг тўйи учун атаган бисотларимни олиши. Гўрга тиқилгур очофатлар, мол талашиб, сандиқни ҳам синдириши. Бир манқа солдат автомати билан товуқларимни қириб ташлади. Яна бир солдат: «мени пан демадинг» деб белимга тепди. Қейин автоматининг қўндоги билан бошимга урганини биламан... Ҳушимдан кетиб қолибман. Үрнимдан турсам, бошимдан оққан қон соchlаримга ёпишиб, қотиб қолибди.. Икки кун деганда уйим шил-шийдам бўлди. Чолим фашистлар Гомелта яқинлашганида окоп қазигани чиқиб, бир ярим кунгина ишлаган эди. Илоё оғзингдан лахта қонинг келгурлар, уни ҳам «сен асир бўлдинг» деб олиб кетиши. Катта ўғлим печканъиг тепасида касал ётган эди... Уни «рюсь партизан» деб отиб ташлаши. Бу фашистлар етти пуштигача қирилиб битмаса, розимасман!. Мана бу қизим Раисани эски-тускиларга ўраб, ертўлада сақладим.

Нормат онасининг ёнида ўтирган соchlари жингалак қизга қаради. Оқ юзли Раиса индамай, разабидан чақнаган кўзларини катта очиб ўтиради.

— Одамхўрлардан дод, дедик,— деб сўзида давом этди кампир,— ҳеч ким эшифтади додимизни. Қизимни ертўладан чиқариб, қишлоқдан қочдим.

— Нондан олинг, овқатдан олинг,— деб уй эгаси мулоzимат қилди.

Кампирнинг сира гапи адо бўлмас эди.

— Қишлоқдан ҳамма кетди. Хотин-халаж, ёш-қари — ҳаммаси кетди. Итлар, мушуклар ҳам кўринмай қолди. Қани мақталган армиямиз?— Кампир Норматга қаради.— Қани лочинларимиз? Нега бизни фашистларта ем қилиб қўйдиларингиз?!

Нормат сўзга оғиз очмоқчи эди, эшикдан бир солдат кўринди.

— Сизни комиссар чақиряпти,— деди у Норматга.

Нормат кўчага чиққац, Ильичёвка қишлоғига келтган кампирга ўхшаш бечоралардан яна бир нечасини кўрди. Уларнинг юз-кўзлари чанг, ранглари заҳил, соchlари тўзиган эди. Улар яқиндагина касалдан бош кўтарган дард-

манд кишиларга ўхшардилар. Баъзилари ўтирган ўринларда мудраб қолишибди. Қагорлашиб ётган кексалар ёа тўдакларнинг юзида неча кунлик азоб-уқубат, «қочқоч» фамининг доги кўриниб турарди. Қишлоқ Советининг раиси Борисов шу ерда айланиб юрибди. У жой сўраганларга жавоб қиляпти:

— Ҳамма уйлар солдатлар билан банд...

Улар шу кеча кўчада, йўл бўйида ётиб қолишли. Узоқдан замбараклар ҳайқириғи, снарядларнинг портлаши эшитилмоқда. Аллақаерда пулемётлар тасирламоқда.

Қишлоқнинг кун ботиш томонидаги ўрмон бурчагидан икки марта оқ ракета отилди. Қаёқдантир душман самолётлари пайдо бўлиб, қишлоқ устида ва чодир тикиб ётган қочқинлар тепасида айланана бошлади. Биринчи бомба колхоз отхонасига тушиб, аланса бутун қишлоқни ёритди. Иккинчи, учинчи бомба хаталарта тушди. Бир неча уй ер билан яксон бўлди. Бомбалар бирин-кетин портлаг бутун қишлоқни ларзага келтириди..

Нормат Черницовнинг ҳузурида экан, кўчадаги шовқин-суронни эшитиб турди.

— Ўзбек халқи тинчлик кунларида катта меҳнат жангларини кўрди ва ғалаба қилди. Панама, Сувайш каналлари қурувчиларининг 34 йиллик ишини ўзбек халқи Фарғонада олтмиш кунда бажарди. Ўзбек халқи мард халқ. Унинг катта қаҳрамонлик тарихи бор.

Нормат комиссарнинг нима демоқчи бўлганини тушунди. Комиссар: «ана шундай қаҳрамон халқнинг вакили Нормат, сен нега бўшанглик қилдинг» дегандек унга қараб турарди. Унинг йўлда, ҳаво ҳужуми вақтида, довдираబ қолгани эсига тушди, баданини муздек тер босди.

— Мен ўзимни урушда кўрсатаман, ўртоқ комиссар,— деди у. ерга қараб.

Черницов мулойим товуш билан гапида давом этди:

— Урушда кўрсатасан, биламан. Лекин урушни билмай туриб, ўзингни кўрсатолмайсан. Агар сен душманни ўлдирмасанг, у сени ўлдиради, дўстларингни ўлдиради, уруғ-авлодингни қиради, Совет Ватанимизни талайди.

— Ўртоқ комиссар...

Унинг сўзи кесилиб қолди. Ҳаво тревогаси бошланди. Черницов босиқ овоз билан:

— Хандаққа киринг!— деди.

Қишлоқ ёнаёттир. Фарбдан келаётган шабада тутаган жүн, куйган гүшт, сүяк ҳидларини күтариб, узоқларга олиб кетмоқда. Колхоз отхонасидаги отлар, фермадаги сиғир-бузоқлар күймоқда, тирик қолғанлари даҳшат билан бўкирмоқда.

Нормат яқиндагина сут ичиб чиққан уйни танимади. Бу уйнинг фақат мўриси қолибди. Темир сандиқ ичидаги куйган бугдой иси анқимоқда. Ертўлада карам, пиёз турамоқда. Бурчакдаги ойнакли жавон куйиб, кул бўлган.

«Ёрдам қилинглар!» деган фарёд эшитилди. Нормат овоз чиққан боғчага югурди. Икки хотин инграб ётибди. Жингалак соchlари кўзларини тўсиб турган Раиса икки қўли билан онасининг кўксини ушлаб, йиғлаб ўтиради. Бечора кампир ер бағирлаб қолибди. Нормат унинг қонсиз, тиришган юзларига қаради: кампирнинг ўнг бетидаги холи ўз онаси Тўхта холанинг холига ўхшаб кетди. Нормат бир сесканди...

— Аравага ётқиз, аравага! — деди кимдир.

Нормат ярадорларни ташиётганлар орасида қишлоқ Советининг раиси Борисовни кўриб, унга кўмаклашди. Борисовнинг кучери беморларни қишлоқ касалхонасига олиб кетди.

Кун чиқди. Аммо Ильичёвка қишлоғи қоронғи: тутун ва кукун кўкка кўтарилиб, қишлоқ ҳавосини бўғиб қўйган. Қишлоқ олдида пайдо бўлган Ўртоқлар мозорига жафокаш кампирнинг ҳам жасади қўйилди.

— Буларни унутмаймиз! — деди Черницов, жангчиларга қараб.

Нормат Черницовнинг ёш филтиллаб турган тиниқ кўк кўзларига қаради. Қалин киприклари куйиб кетгани учунми, милклари қип-қизил гўштга ўхшарди. Доимо кулимсираб гапирадиган хушмуомала комиссар ҳозир дагал ва шиддатли кўринди. Унинг ғазабли кўзлари, қисқа-қисқа сўзларидан Нормат комиссарнинг руҳида қасос ўти аланталанаётганини сезди.

Нормат бугунги воқиалар ҳақида онасига, Адолатга, Эргашга хабар қилмоқ учун ренеңгга қофоз қўйиб, қўлига қалам олди.

Бешинчи боб
ДАСТЛАБҚИ ХАБАР

Кун қайтиш вақтида даштга велосипедда почталъон келди. Қизлар уни ұраб олиши. Уни велосипеддан тушиб, чангини артиб олишига ҳам қўймай шоширдилар:

— Хат олиб келдингми?

— Менга борми?

— Менга-чи?

Почталъон сумкасини очиб, уч бурчак хатни олдида, қаламда йўғон-йўғон қирқма ҳарфлар билан ёзилиб, таги чизиб қўйилган жойини кўрсатиб қичқирди:

— Бегимхон, қани битта ўйнаб юборинг!

Бегимхон ўқдек отилиб, почталъон қўлидаги хатга ташланди. Почталъон хатни баланд кўтариб: «Ўйнамсангиз бермайман» деб туриб олди. Бегимхон бир-икки сакраб, унинг қўлидан хатни илиб ололмагач, ўйинга тушди. Унинг оёқ-қўллари ҳаракатда бўлса ҳам, иккى кўзи хатда эди. У, қизлар оллидан эгилиб ўтди-да, уват тепасидан бир айланиб, почталъон қўлидаги хатни илиб қочди. Шакархон унинг орқасидан югорди. Бегимхон хатни очди-ю нима ёзилганини ўқий олмади. У хатни бошдаи оёғигача шошилиб қарап, ниманидир қидирап, аммо нима қидираётганини ўзи ҳам билмас эди.

— Упкангни бос,— деди Шакархон,— ўқи, яхшилик хатга ўхшайди.

Бегимхон уруш бошлангандан бери эридан хат олмаган эди. Эралишинг ҳам, Бегимхоннинг ҳам қариндош-уруғлари ташвишда эдилар. Ким билсин, уруш тўсатдан бошланди, анчайин уруш эмас. У чегарада биринчи ўққа дуч келган бўлиши мумкин, эҳтимол, 22 июнь кечаси учган самолётлар... Ана шу хаёллар Бегимхонни безовта қиласди. «Ўн гулимдан бир гулим очилмай туриб, тул бўлиб қолдимми?!» деб ўксинарди у. Шунинг учунми, салгина гап, салгина ҳазил дарров унга тегиб кетарди. Шу қадар зиқ, нозик табиат бўлиб қолгани учун Бегимхон кўп дакки эшилди. Дугоналари: «биргина сенинг эринг фронтдами, бир сенинг эрингдан хат йўқми, нега заҳарлик қиласан?» дер эдилар унга. Мана энди кўпдан бери кутилган хат келди. Бегимхон ёш қизчалардек қип-қизариб, хатни бағрига босди. Бу хат унга киши баҳт чироғининг сўнмаслиги, умид қу-

ши қанотининг букилмаслигидан бир нишона бўлиб кўринди. Хатдаги солда, ёқимли сўзлар, унинг таниш имзоси, дала почтасининг беш рақамли адреси — буларнинг ҳаммаси Эралининг соғ-саломатлигидан далолат бериб туради.

Бегимхон хатни бағрига босди-да, нафасини ростлаб олиб, ўқишига тушди. Мактуб автори ўзининг камхатлиги, дараксиз кетганини сабабларини айтиб, энди тез-тез ёзиб туришга ваъда қилган, хат кутаман, деган ва колхоздаги ишларни сўраган. Ушбу мактубнинг охирида: «Белоруссиянинг Витебск деган шаҳридамиз, Фарбий Двина дарёсида мудофаада турибмиз» — депти.

Бегимхон кечаги можароларни ҳам унутиб, Адолатнинг олдига югурди.

— Адолат, харитангни ол, Витебск қаерда экан?

Қизлар Бегимхонни ўраб олишди.

— Ўқи хатингни, Эрали ака нима депти?

— Менинг акамни кўрмабдими?

— Кимлар билан бирга экан?

Бегимхон қизларнинг саволларига жавоб бермас, унинг хаёли харитада эди.

Адолат сумкасини очиб, ундан бу кланган харитани олди-да, гўзалар устига ёзиб қўйди.

— Мана, Фарбий Двина...

— Мана, Витебск...

— Қани, қани?

Адолат бармоғи билан Фарбий Двина дарёсининг икки қирғогига жойлашган шаҳарнинг харитадали мошдек белгисини кўрсатди. Бегимхон узоқ тикилиб қолди. Унинг кўзлари живирлашиб, қаршисида қора мунчоқлар пайдо бўлди, кейинча бу мунчоқлар катта-катта ҳалқачаларга айланиб, бир оз пилдирагач, йўқолиб кетди. Бегимхоннинг кўз олдида харита эмас, Эрали жонланди. Қандай totli эди уларнинг турмуши! Эралининг эшикдан қучоқ очиб киришини, доим қулиб туришини унутиб бўладими! Уша лаззатли ҳаёт қачон қайтади? Қайтадими, ёки ширин хаёл бўлиб қола берадими? Хатда бу саволга жавоб борми?

Бегимхон хатни қайта-қайта ўқиди. Гўё хатда ҳамма нарса ёзилган, аммо дил ўртаниб қидираётган, «план куни бораман» деган бирдан-бир гап йўқ эди. «Қачонгача интизор қиласан мени, э, парвардигор?»— деди-да, Бегимхон ҳўнграб йиғлашга тушди. Агар атрофида қизлар бўлмаса, Бегимхон шу чоқ овозининг

борича дод солиб йиғлар, юрагини бўшатиб, оларди.
Лекин қизлар уни чуғурлашиб чақира бошладилар:

— Бегимхон!

— Ҳо Бегим!..

— Бегимхон, жон ўртоқ, хатингни менга бер, мен
ҳам бир ўқий, жон ўртоқ.

— Сен ҳам куйдирма мени, Бодомхон.

— Хатдаги гаплар Одил акамнинг гапига ўхшайди.
Бу гаплар менга айтилганга ўхшайди... Сен ҳаммасини
яхши ўқимадинг. Ке, ўртоқ, менга бир кўрсат!

Бегимхон конвертни зарда билан унинг олдига таш-
лади.

— Ол!

Бодомхон конвертни олди-ю, қўли титраб, кўзи
тинди...

— Менини! Менга экан бу хат!

— А!— деди Бегим ўрнидан туриб, кўзларини олай-
тириб.

— Мана, қизлар, ўқинглар!— деди Бодомхон, уч
бурчак конвертни кўрсатиб.— Бодомжонга тегсин, де-
ти. Мана, отамнинг оти муҳрнинг тагида қолипти... Хат
ташувчимиз қурсин, доим чалғитгани чалғитган. Бо-
домхон билан Бегимхоннинг фарқини билмайди.

Бодомхон уватга ўтириб, хатни ўқий бошлади.
Унинг кўзидан ёшлари учқунлаб турипти...

Бегимхонни сира сўраманг. У ўзини қаерга қўярини,
кимга ёпишиб, кимни юмдалашини билмай, фигони фа-
лакка чиқди. Ким уни масҳара қилди, хат ташувчининг
ишими бу, ёки тангрининг? Еки Адолатлар атайлаб уни
йиғлатгиси, кейин кулги қилгиси келдими? Қандай шар-
мисорлик бу!

2

Адолат фронтдан хат келганига хурсанд бўлди.
Хурсанд бўлди-ю, Норматни, Олимжонни эслаб ўқинди.
Акаси Олимжон, севиклиси Нормат икки энлик қоғоз
тополмайдими? «Софмиз, саломатмиз» деб ёзиб юбо-
ришдан эринадиларми? Ҳаммага келаётган хат нега
Адолатга келмайди? Ахир, фронтга кетганлардан хат-
хабар келиб турибди-ку?

Лекин Адолат умидсизланиб, ғамга, кулфатга қул
бўлгани йўқ. У хат кутади, газета титади. Адолатнинг

назаридагазета — фронтта кетган қадрдонларнинг колектив мактуби. Уни ўқимоқ, ўқиб бошқаларга эшилтирмоқ Адолатнинг кундалик иши бўлиб қолди.

Адолат бугун ҳам газетани олиб, қизларга кулиб қаради:

— Ўтиринглар, фронт хабарларидан ўқиймиз.

Аммо, Адолат нимагадир бугун газетани шошилмай, ютиниб-ютиниб ўқиди. Бодомхон газета хабарларини диққат билан тинглаб ўтириди, Совинформбюронинг бугуни хабарини қайта-қайта ўқишни сўради. Нега? Негаки, унда кўлгина шаҳар, қандайдир станциялар, аҳоли яшайдиган пунктлар, дарёларнинг номи ёзилган эди. Совинформбюро ахборотида жойларнинг номи ҳар куни ўзгариб, янгиланиб туради. Бодомхон қанча эътибор бериб эшилса ҳам, Одил ёзган шаҳарнинг номи чиқмади. «Бизнинг қўшинлар Могилёв шаҳрини ташлаб чиқдилар» — деб ўқиди Адолат ва бу шаҳарни ҳаритада қидириб топиб, бармоғи билан кўрсатди. Европа сиёсий харитасининг ярмидан кўпини безаб турган қизил раинг — СССР территориясида Могилёв шаҳри денгиз томчисидек кичик бир нуқта бўлиб кўринди. Дастлаб бу кичик нуқтага Бодомхон парвосизгина қаради. Кейин у, ҳар ҳолда шу кичик бир нуқта ҳам бизники, ўзимизники-ку, деб ўйлади-да, юраги ачишиб, ҳаритага яқинлашди. У Могилёв атрофларини қараб, қичқириб юборди: «Ия, бу Витебскдан бери-ку! Вой, шўрим, душман Одил акамлар турган шаҳарни ҳам босиб ўтипти-да? Одил жоним, қаердасиз?» Бодомхон ҳаритага ёпишиб олиб, гўё ундан севикли эрини қидириб топиб оладигандек, нуқталар, чизиқлар, квадратларни бармоғи билан санаб чиқди. Чегара қаерда, Москва қасерда эканини аниқлагач ва душман Могилёвни олиш учун қанча йўл босиб ўтганини кўргач, Ватац бошига тушган хавфни чуқурроқ сезиб, ҳозиргина қўлига қўнган бахт қушини ҳам учирниб юборгандек ўзини йўқотиб қўйди...

— Москвага яқинлашиб қолишибди-ку... — деди-да, Бодомхон кўзи тиниб, боши айланиб ўтириб олди.

Адолат ҳам кейинги воқиалар қандайдир катта баҳтсизликдан хабар берадётганини тушуниб, бўшашиб кетди. Кейин қизлар унинг оғзига тикилиб, ундан қандайдир хушхабар кутиб тургани учун, ўзини ўнглаб:

— Менинг бир таклифим бор, қизлар,— деди у, ўрнидан туриб.— Фронтдаги жангчиларга совфа юбориш

керак. Мева сероб. Ундан кейин каштали рўмольча, маҳорка ҳалтачаси тикиш кимнинг қўлидан келмайди? Ҳамма қизнинг бисотида ҳам бундай нарсалар кўн!

— Рост, қизлар,— деди Бегимхон,— майли, ўзимиз камроқ есак ҳам, ўшаларга юборайлик!.

— Совға ҳам юборайлик,— деди Адолат,— ўзимизни ишда ҳам кўрсатайлик!

...Адолатнинг «ўзимизни ишда ҳам кўрсатайлик» деган сўзлари бригада қизларининг жанговар шиори бўлиб қолди. Бригадада ғўзанинг ҳозирги ҳосилини тутиб қолиш, мавжуд ҳосилга ҳосил қўшиш учун кураш бошланди. Аммо, фақат чопик билан бу вазифани бажариш қийин. Гулни кўсак қилиш учун сув керак. Сув эса йўқ...

Адолат кечалари ухламай, сувчилар ёнида юрди. У, чанқаб, қовжираб турган ҳар бир гўзага қараб ачинар ва тунги сувни шимириб тирилаётган ҳар бир гўзани кўриб қувонарди. Бироқ озгина сув ҳам тақа-тақ тўхтаб қолди. «Сув» деб навбат кутиб ётган ғўзаларнинг барглари қорайиб шона ташлай бошлади. Шошилинч чора кўриш зарур бўлиб қолди. Адолат ариқ бошига югуриб борди. Қайтарма ариқда сув жилдираб оқарди. Чархпалак кўрачалари сувга ботмай, парраклари айланмай, тўхтаб турибди. Адолат колхоз миробидан, правление раисидан ҳам «сувни бошқа ёққа буриб юборишли, у ёқда ғўзалар қуриб қолаётган эмиш» деган бир хил жавоб эшилди. Адолат қайтарма ариқ ёқаларида парвонадек айланиб, чархпалак кўрачаларидаги сувни кўзига суртгудек бўлди. Ариқ суви бир хилда, жимгинча, шарпасиз ва шабадасиз жимиллаб оқмоқда. Ариқ неча-неча метр чуқурликда, уни бўғиб сувни буриш мумкин эмас. Иложи йўқ. Сувни кутиш — ҳосилни қўрга кўмиш деган гап. Нима қилмоқ керак? Ҳовучлаб келсанг ҳам, пақирлаб ташисанг ҳам, сув тол, ғўзани ўлимдан сақла!

«Булоқ! Булоқни буриш мумкин эмасми?»

Дашт бригадаси ерларининг тахминан иккى-уч чақирим жанубидаги Бургандада азалдан бир булоқ қайнаб ётарди. Бу булоқдан кетмон сопидек сув отилиб турарди. Қушлар унинг атрофидан аримасди. Йўловчилар ҳам шу жойда дам олиб кетар эдилар. Асрлардан бери отилиб турган бу сув ердан чиқиб, ерга сингиб ётарди. Нега уни пахтазорга оқизиш мумкин эмас,

Адолат кетменини елкалаб, булоқ бошига борди. Ажриқзор орасида қүёш нурида кумуш жұмракдек ярқираб сув отилиб турибди. Адолат энгашиб, уни түйганича шимириди. Үзи сувга қонгач, гүёғ ғұзалари ҳам ундан баҳра олғандек қувонди. Сув топилди, оз бұлса ҳам сув... Энди Адолат бу сувни ғұзага олиб бориш йүлини топиши керак. У капага бориб, қызларни бошлаб келгүнча, булоқ боши остин-устин бўлиб кетибди. Қайсиям бир колхоз яйловга катта пода ҳайдаб ўтады, чанқоқ пода булоққа ёпирилиб, уни деспизиб ташлабди. Натижада булоқнинг кўзи беркилиб, отилиб турган чашма ер қатламларига сингиб кетибди. Бу ерда гиёҳ ҳам қолмабди. Фақат мол туёқларининг тартибсиз изларигина кўринади...

Адолат бир неча жойни панжаси билан таталади, кетмона кавлади, аммо булоқ кўзини топа олмади.

«Булоқ суви силқиб кетдими кан? — деб ўйлади Адолат. — Бирор жойдан тешиб чиқиши шарт-ку. Лекин қаердан?»

Бурган булоқ деб аталған бу жилға дашт текислигига яқин жойга келиб, икки ёққа бурилиб кетарди. Адолат дастлаб жилғанинг ўнг, сўнгра чап пайровинни айланиб чиқди, қызлар ҳам кетмөн билан жуда кўп жойни ўйдим-чуқур қилдилар. Лекин сув отилиб чиқмади. Қош қорайиб қолгач, улар ночор шийпонга қайтишиди.

Адолат кечаси билан чанқоқ ғұзалар ташвишида ухлолмади, уйқу босиб, кўзи юмилиб кетаётган пайтларида ҳам тушига булоқ кириб, уйғониб кетарди. Фира-ширада у яна жилғага йўл олди. Бу сафар у чап пайровдаги пастқам жойларни қидирди. Унинг кўзига тўсатдан нимадир ярқираб қолди: ғажиб ташланган ажриқ таги бўртиб турибди. Адолат ажриқ тагини қўли билан кавлаган эди, бармоғи лой бўлди. «Топдим!» деб қичқириб юборди у. Кетмени билан бир чим кўчирди, аммо сув балқимади. Яна бир кетмөн урганда ажриқзордан билқиллаб суюқ лой чиқди-да, кейин кучли тиниқ сув тикка стилди.

— Топилди!

Адолат севинганидан булоққа ётиб олиб, шимириб-шимириб сув ичди, лабларнда қолган томчиларни енги билан артиб, енгил нафас олди. У шу қадар шод эдикни, бир ҳовуҷ сувни олиб, қызлар томонга ютурмоқчи бўлди. Аммо булоқнинг топилиши ҳали сувни эгатларга

оқизиш деган гап әмас әди. Бу сув Адолатнинг орқасидан әргашиб борадими, уни олиб бориш учун нималар қилиш керак? Адолат жилғаси айланиб чиқди. Булоқ суви жилғадан нарига бормай, шу ерда шимилиб кетадигандек туюлди. Эҳтимол, булоқдан чиқаётган тиник сувнинг бу ерда хуштори, күшандаси кўпдир: бу сув тоғу тошни тўлдириб юрган қушлар, кавак-кандикларда истиқомат қиласиган жониворлардан ортмас. Йўқ, шундай тиник, тоза сувнинг каламуш уясига қуялиб, кўкка булғаниб ётишига Адолат кўнмайди. Аммо бу ердан экинзор томонга ариқ тортиш қийин. Баландпастлик кўп. Булоқ жилғаси эса экинзорнинг қарамақарши томонига бурилиб кетган. Адолат ишнинг осон ва тез битадиган томонини ўйлаб, ўйига етолмади.

3

— Ҳамма булоққа!— деб қичқирди Адолат қизлар капасига яқинлашаркан.

Қизлар бирдан Адолатни ўраб олишди.

— Сув топилдими?

— Топилди.

— Булоқ кўзини очдингми?

— Йўқ, янгисини топдим. Бошқа жойга силқиб кетибди.

— Тескари жилғами?

— Ҳа.

Бегимхон қўл силтади.

— Овора бўлманглар, довон ошиб сув келтириш қийин.

Адолат қизларга ўз режасини тушунтирди.

— Довон ошмаймиз. Айланма йўл билан олиб келиб, эски изига соламиз.

Адолат кетмонни елкасига олиб йўлга чиқди, орқасидан чувалашиб қизлар жўнашди.

Жилғанинг пастқам жойлари шағал, сагиз әди. Биринчи кун бутун бригада икки юз метр келар-келмас ариқча қазиди.

— Булоқ бурамиз деб гўздан қуруқ қолмасак,— деди кимдир.

Қизлар бу гапни эшитиб, кетмонга суюнишди.

— Чопик, чеканка қолиб кетмасмикан?.

— Ҳамма иш мұхим,— деди Адолат, қатыйлик билан,— аммо сув мұхимроқ!

Бригадирнинг шу гапидан кейин ҳеч ким гап құшмади. Қимдир құшиқ бошлади, бошқалар құшилишди...

Әртасига кексалар бригадаси, кейин құшни бригададан кетмөнчилар ҳам ёрдамға келишди. Қолхоз хұжалик мудири бир арава лом келтириб ташлади.

— Иүқотиб қўйманглар. Заводдан тилхат билан олиб келдим,— деди ҳўжалик мудири,— районнинг қоғози билан зўрға беришди.

Бешинчи кун деганда ариқча янтоқзор, бурганзор, баланд-пастликлардан ўтиб, эски изига тушди. Тепадан қараган кишига бу ариқча илон изидек әгилиб, букилиб, ўзининг ўқидан ўзи айланадётганга ўхшаб кўринарди.

Булоқ суви ариқчага бурилди. Кетмон дастасидек сув шағални шифиллатиб, тупроқни тұзитиб, илондек билқиб олға интилди. Юз метрча ўтар-ўтмас сувнинг шашти қайтди, бир жойда қалқиб, димиқиб тураверди. Адолат уни киш-кишлаб ҳайдагудек бўлди. Бир оздан кейин пилтадек сув йўлга тушди... Нечача йиллардан бери сув кўрмаган адир бўшлиқлари сувни шимиб, оқимини тобора сусайтиради. Гоҳи жойларда сув кавак-кандинкларга, чумоли, қаламуш уяларига кириб йўқолиб кетар ва уларни тўлдирмагунача олдинга юрмас эди. Адолат шошилар ва сувни ҳовучлаб бўлса ҳам ғўзаларга етказгиси келарди.

Янги ариқчанинг эрталаб очилган суви пахта майдонига кечқуруи етиб келди. Тагидан сув ўрмалаган ҳар туп ғўза тирилмоқда. Аммо туюни чўмич билан тўйдириб бўлмагандай, шунча ернинг ғўзасини шугина сув билан тирилтириб бўлармиди! Тонг отгунча бир танобча ернинг ғўзаси сув ичди. Қирқ гектар ер қақраб ётибди. Бошқа чора топиш керак эди. Бу чорани Шакархон топди.

— Қайтарманинг сувини чиқаришдан бошқа илож йўқ,— деди у Адолатга,— бунинг учун икки йўл бор. Е ариқни бўғиб, сувни чархлалак билан кўтариш керак, ёки чархпалакни сувнинг нишобига етадиган қилиб бошқатдан қуриш зарур.

Адолатга унинг қайтарма сувини бўғиб чиқариш ҳақидаги фикри маъқул тушди. Эртасига эрталаб қизлар замбил ва кетмон кўтариб қайтарма бўйинга келдилар. Қайтарма галахирмонининг янги ери қирғоғидан тўрт-

беш метрча пастда жилдираб оқмоқда. Чархпалак күрачалари ариқ ўртасида, сувдан анча баландда шабадан ҳуштак чолиб беиш, анқайиб турибди.

Бегимхон Адолатга қараб лабини бурди.

— Бу зимистандан сув чиқади, деб ўйлама!

— Нега ундей дейсиз, Бегимхон,— деди Бодомхон, унинг олдига келиб,— сув чиқади. Чиқмаса, чиқарамиз.

Бегимхон чархпалакнинг күрачасини чертиб-чертисиб қўйди.

— Буни занглатиб қўйғунча, илгарироқ шу гапни айтсанг бўлмасмиди, игна билан қудуқ қазиб булоқ чиқаргунча, қайтармани қайтарар эдик.

— Ҳали ҳам кеч эмас!— деди Адолат.— Қизлар, тош териб келинглар. Шакархон кўтарма жойини танласин, Бодомхон, замбилчиларга бош бўлинг.

Қизлар тарқалишиб кетгач, Адолат пастликка қараб ўйланиб қолди. Бегимхон тўғри айтади. Нега илгарироқ ўйламадик шу ишни? Қанча вақт бекорга кетди. Ҳали ҳам кеч эмас. Лекин бўшашма, майдагаплардан қўрқма, сув керак сенга, сув!

Тушга яқин Шакархон танлаган ерга қизлар тош, тупроқ ташлай бошладилар. Кўтарма кўзга кўриниб, сув баландлаб борди. Қизлар шу куни кечаси билан ухламадилар. Чунки сув димланиб, тўғон тупроқларини юваб, ялаб турибди, хавф зўр, меҳнат зое кетиши мумкин. Эртаси кечга яқин ариқ тўсилиб, сув кўрачаларга кирди, лекин чархпалак айланмади. Бунинг сири шу эдики, чархпалак сув нишобидан анча нарида қолган эди.

— Бу ишингдан ҳеч нарса чиқмайди, демабидим!

Бегимхон белини ушлаб, Адолатга терс қараб турибди.

Адолат бир хўмрайди-да, унинг гапини шартта кесиб қўйди.

— Чиқади, дедик, чиқади!

— Қани чиққани? Чархпалакнинг пинагини бузмай туришини қара!

— Бе! Шунга ҳам ташвишми? Тоғ Муҳаммаднинг олдига келмагач, Муҳаммад тоғнинг олдига борган экан. Чархпалакни нишобининг олдига кўчирамиз қўяшимиз-да.

— Кетмон билан дурадгорлик қиласиз, дегин?

— Нега кетмон билан бўлсин. Ана, пастки бригададан Ҳолмат акани чақирамиз. Ўзи қурган чархпалакни ўзи кўчириб беради.

Шу куниәк Холматни бошлаб келдилар. У, қошларини чимириб, суви шовиллаётган нишобга қаради-да, кўттарманинг қирғонига қозик қоқди. Қизлар ҳам бекор турмадилар. Кечаси чархпалак янги жойга кўчирилди ва тонготарда даштга бир жўяк сув равон оқди. Адолат севинганидан Бодомхон билан Шакархонни қулоқлаб ўпди, сўнгра барча қизлар бир-бирлари билан қулоқлаша кетдилар. Холмат қизларнинг бу қувончини кўриб, офарин дегандай, мўйлабини силаб қўйди.

Адолат сувчиларга:

— Шу сув бўлмаса, ғўздан ажрар эдик... — деди.

Адолат беҳад шодлигидан далада кезарди. Сув шимб яшараётган ғўзалар яйрарди. Ўн беш кунлик тўлин ой ва саноқсиз юлдузлар чанқоқ ғўзалар тагида жимиб оқаётган сувга тикилган Адолатни тамоша қилиб турарди.

* * *

Холмат дашт бригадасидан тўппа-тўғри қишлоққа келди. Қишлоқ сув сепгандай жимжит. Онда-сонда уй деразаларидан чироқ кўринади, баъзи мўрилар туто-моқда.

Тўхта хола тандирга ўт қўйганга ўхшайди, кўча томонга гоҳ-гоҳ учқун учнуб турибди. Холмат онамдан ҳол-аҳвол сўраб ўтай деб остоидан хатлаган эди, укаси Эрматнинг хотини рўпара келди. Тугунини бошига қўйиб, қўлида чойдиши билан кўчага чиқаяпти.

— Далагами?

— Шийпонга кетяпман. Августгача далада тунаймиз.

— Онам қани?

— Секинроқ гапиринг, болалар эшитиб қолмасин. Бувим болаларни алдаб, овутиб ўтириптилар. Айтмоқчи, Эргашвой сизни сўраб юрувди, кўрдими?

Холмат келини билан изига қайтди. Уни колхоз партия бюросида Эргаш билан Қодир ака кутиб олишиди. Холмат стулларни кўздан кечирди. Кўпгина коммунистларнинг ўрни бўш... Бутун бошлиқ қишлоқда уч коммунист қолибди. Шу бугундан эътиборан Эргаш партбюро секретари эмас, колхоз партгруппасининг ташкилотчиси, Холмат партбюро аъзоси эмас, оддий коммунист. Энди аввалгидек ҳафтада бир марта партбюрога тўпланиш йўқ, уларнинг жойи далада бўлади. Эргашнинг назарida ҳозирги пайтда авангардликнинг

роли ҳам, шакли ҳам ўзгарди. Колхознинг асосий кучи хотин-қизлар бўлиб қолди ва аста-секин, уруш кучайиб борган сари, бутун иш кексалар, хотин-қизларниң қўлига қараб қолиши мумкин. Фақат «Гулистан»да эмас, бутун районда, обlastda, республикада шундай бўляяпти. Газеталарнинг ёзишига қараганда, завод ва фабрикаларда, муассасаларда ҳам урушга кетаётганинг ўрнини кексалар ва хотин-қизлар эталламоқдалар. Эндиги асосий иш кексалар ва хотин-қизларнинг активлигига боғлиқ.

Нима қилмоқ керак?

Уч коммунист кичкинагина стол атрофида бошини бошига текизгудек ўтириб, ўйга чўмган эди. Ишни нимадан бошламоқ керак?

«Гулистан» қишлоғида партия ташкилоти тузилган вақтдан бери биринчи марта партия йигилиши музокараларсиз ўтди. Уч коммунистнинг ҳар бири ўз ўрни, ўз бурчини ҳар қачонгидан ҳам яхши тушунар эди. Бизнинг жойимиз далада, одамлар орасида, дейишди улар. Шу кундан эътиборан Эргаш ҳам, Холмат ҳам, Қодир aka ҳам дала шийпонига кўчиб чиқдилар. Чопиқ тонготардан кунботаргача давом этадиган бўлди. Суғориш кеча-ю кундуз олиб борилди. Булардан ташқари, уч коммунист уч участкада туриб олиб, чолларнинг кучи билан кечалари маҳаллий ўғит тўплатиб, далага ташитиб турдилар. Орадан бир ҳафта ўтар-ўтмас, колхозда фақат икки коммунист қолди. Холматни ҳам районга чақириб, меҳнат фронтига олиб қўйдилар. У Уралга кетди.

* * *

Ўн уч кун деганда Қайтарма ариқда сув кўпайиб, кўтартмани оқизиб кетди. Аммо чархпалак аввалгидаи ҳам жадал айланиб, кўрачалар даштга мўл-кўл сув тўка бошлади. Чанқоқ гўзаларни сувга қондирив олгач, Адолат шона ташлаб, гул тўкиб юборган гўзаларни тирилтириш пайига тушди. «Ўғит керак. Анча ўғит керак!» деди у, шип-шийдам бўлиб қолган баъзи гўзаларга тикилиб. Гўзалар бир марта ўғитланганича ётарди. Ёзги парвариш даврида чопиқ, культивация олдидан солинадиган ўғит солинмади. Бурган булоқ пастлигидаги қўй қийи уч кунга етди, холос. Яхшиси, Адолат раисдан ўз бригадасининг ўғит нормасини талаб қилиши керак.

Адолат қишлоққа келиб, идорада ҳеч кимни учрата олмади. У күчага чиқиб, катта тол тагида ҳайрон бўлиб турган эди, тўсатдан таниш овоз эшишилди.

— Адолат!— деди район томонидан келётган отлиқ раис. У бир неча кундан бери ухламаган, ҳорғин кўринарди.

— Салом, Қодир ака!

Раис эгардан гушиб, отини толга боғлади.

— Мен кеча даштга боролмадим, каналга одам жўнатдим,— деди раис,— ҳозир райондан келяпман.

— Районда қандай янгиликлар бор?— деб сўради Адолат.

— Ўғит келяпти, ўғит!— деди қувониб Қодир ака.— Ҳукуматимизга балли. Фројт «бер-бер!» деб қистовига олиб турган шундай оғир пайтда ҳам биз деҳқонларни унутмади. Пахтакорларга азот юборибди. Станцияга арава чиқаришимиз керак.

— Бизга қанча берасиз? Тўкилган шоналарни тўлатиб олмасак, ютқизиб қўямиз.

— Бу гал сенга йўқ.

— Нега, биз пахта бермаймизми?

— Сен ҳам пахта берасан, кўп пахта берасан, аммо еринг кучли, янги ер. Азот керак эмас. Фосфор янаги ҳафта келади. Иккинчи чопиқни тамомладингми?

— Йўқ,— деди Адолат хомуш,— ғўза ҳам тракторга ўрганиб қолган экан, кетмон билан улгуриб бўлмаяпти.

Қодир ака ўйланиб қолди. Ўтган иили бу вақтда колхоз далаларида «универсал»лар гумбурлаб, бутун қишлоқни бошига кўтараётган эди. Уруш бошланиши билан МТС ҳам сийраклашиб қолди. «Гулистан»даги трактор бригадасини чақириб олдилар. Мана энди уч колхозга бир бригада...

— Эртага икки «универсал» келади,— деди Қодир ака, от устида бир оз қаддини ростлаб,— ишларимиз анча чаққонлашади.

— Бори-йўғи иккитами? Яна бизга йўқ экан-да?

— Ношукурчилик қилма, қизим. Шундай оғир уруш бўлаётган вақтла бир қишлоққа икки трактор қайтиб келгани — баҳт қушининг қайтиб қўлингга қўнгани. Ўйлаб қара. Николай замонида бундай урушда сенга трактор юбориш у ёқда турсин, уйингдаги бузоғингни ҳам бричкага қўшарди. Яхши ҳам Совет ҳакимиияти бор экан, ҳам фронтни, ҳам шаҳарни, ҳам

қишлоқни таъминлаяпти. Ҳукуматимизнинг бардошига баракалла, уруш деб шошиб қолгани йўқ, ҳамма ёқин баб-баравар бошқаряпти!..

Бир оз жимликтан кейин Қодир ака Адолатга қарб буйдай деди:

— Станциямиага янги завод кўчиб келяпти, «Кўчиб келиши биланоқ ишга тушириш керак» деди райком секретари! Ушанга одам сўраяпти.

— Неча киши?

— Бизнинг колхозимиздан беш киши.

— Биз бир киши берамиз. Сувни қизлар эплайди.

— Сувчига тегмайман,— деди раис ва дўпписини чертиб, бошини қашлади,— қизлардан талабгор чиқадими?

— Қизларданми? Нега чиқмасин? Қайси йигитдан кам улар! Чаксаки кетмон билан даштни гуллатган қизлар завод қуришдан қочадими?

— Кунимиз қизларга қолгандаи кейин, қизларни юборишга мажбурмиз-да. Майли, бир қизни эртага идорага юбор.

Улар идорага киришди. Ҳисобчи ва бош табелчи ҳарбийга чақирилгач, идорада фақат бош бухгалтер қолган эди. У чойнак кўтариб идорага кирди ва бир пиёла чойни олдига қўйиб, қалин дафтардан бошини кўтартмай, нималарнидир ҳисоблашга тушди.

— Сиздан яна бир нарсани сўрамоқчи эдим, Қодир ака,— деди Адолат.

— Хўш, нимайди, қизим?

— Қачонгача шундоқ бўлади?— деди Адолат.— Қачонгача чархлалак кўраларига кўз тикиб ўтирамиз? Туяни чўмичлаб сүғоряпмиз. Үн уч кунда қовжираб кетди далаларимиз. Катта сой каналини нега тўхтатиб қўйдингиз?

Қодир ака ўн йилдан бери раис бўлса ҳам, колхозчиларнинг бу йилгидек жонкуярлигини ҳеч қачон кўрмаган. Улуғ Ватан уруши бошланиши билан оддий колхозчилар ҳам, сира кўэга кўринмай юрган «индамас» аъзолар ҳам колхоз раиси олдига турли таклифлар билан кела бошладилар.

— Ким билан кавлайман бу канални? Канал кавлайдиган кетмончиларимни олиб кетиши. Техника жангда. Иложим йўқ. Бугунги гапдан гапир, қизим, канал эртанинг иши.

— Бўлмаса битта арава беринг бизга.

— Ана холос, ана холос,— деди Қодир ака таажжубланиб.— Қанал қур эмиш, канал құрмасанг арава бер эмиш... Қанал қайда-ю, арава қайда? Қандоқ гап бўлди бу, Адолат?

— Бугунги гапдан тапир, дедингиз-ку, сувни ҳовучлаб сепиб, қийни уч чақирим жойдан замбилда ташияпмиз. Қизларнинг қўллари қийилиб, беллари букулиб кетди. Ўғит бермазганга яраша, арава беринг-да!

— Арава дейсанми? Нимадан арава ясаб, кимни қўшиб бераман? Арава йўқ. Борларини ўғит ташишга юбордим. Қаналга жўнатдим. Учта арава қолган. Талаб кўп. Чоллар, биз чолмиз, кам қувватмиз, бизга бер, дейди. Юқори маҳаллаликлар бўлса, биз хотинқиз бригадасимиз, от-арава бизники, дейншади. Бошим қотиб қолди. «Бер-бер» деган гапни эшиятмасам, дейман. Нормат неча йил бригадир бўлди, аммо «палон нарса бер, раис» деганини эшиганим йўқ. Уша сенга кўрачада ҳовучлаб сув чиқараётган чархпалакка мендан ақалли битта мих сўрамаган. Билдингми?

Қодир аканинг бу гапи Адолатни ўйлатиб қўйди. «Норматнинг ўрнида қолганингдан кейин, унинг ўрнини бос, билганини бил, қилганини қил!»— деганими бу раиснинг?

Нега сен Нормат қилганини қилолмайсан? Ўзингни бос, ақлингни росла, кучингни тўпла, Адолат! Масъулиятинг катта. Шу масъулиятга яраша ишлар

4

Адолат қош қорайганда даштга қайтиб келди. Қизлар далани бошга кўтариб чилдирма чолиб, ашула айтиб ўтиришибди. Адолат капага кириши ҳамон ашула тўхтаб, қий-чув бошланди:

— Вой шўрим, Адолат, орқангдаги нима? Ерга соладиган ўғитни бир ўзинг орқалаб келдингми?

— Шошма, шошма, ўзимиз оламиз...

— Вой ўлганим яхши, чироқ... Ҳай, бу пилта саватларни нега орқалаб юрибсан, капада чоркасон қиласанми?— деди Шакархон, хохолаб кулиб.

Адолат бошидаги тугунни, орқасидаги қопчиғини ерга қўйиб, Шакархонга қаради.

— Тунов кун фронтга совға юборайлик, деб керилган ким эди, ойимча? Тикиб қўйган қийиқча-ю гулдор халтачаларинги қани?

— Ҳай, Адолат, менинг уялтиrolмайсиз. Бисотингни кўрсат, Шакар, деб кўринг-чи, ўшанда биласиз...

Адолат қопчиини очди. Унда ангишвонадан тортиб ип, ипакларгача бор эди. Қизлар ўз буюмларини таниб, уни бир бошдан тортқилай бошладилар.

— Вой, мана бу парча сатин менини, дўппилигим.

— Қийиқча қилмоқчи эдим буни...

— Ҳаммангнинг уйингда бўлдим,— деди Адолат.— Ҳаммангнинг пилтасаватинг шу ерда. Кўзи ўтмаганинг чироққа яқин ўтири, кўзи ўткириинг ойдинга чиқ, ҳунарингни кўрсат ҳамманг!

— Ҳали кўздан қолганим йўқ,— деди Шакархон,— ойдин менини.

— Биз ҳам ойдинда тикамиш.

Кўкда ой қоқ тепага келиб, гўё қизларнинг чокини атайлаб ёритаётгандек, нур сочиб турибди. Атрофда чигирткалар бир-бирига навбат бермай, басма-басга чириллашмоқда. Онда-сонда якка беданаларнинг битбидиги эшитилиб қолади. Қизлар кападан чиқиб, супачага тизилишгач, уларнинг гурунги яна қизиб кетди. Қўшиқ учи учига, кети кетига уланиб бораверди. Агар Шакархоннинг ангишвонаси тешилиб, бармоғига нина кириб кетмаганда қўшиқ тонг отгунча янграши турган гап эди. Шакархоннинг тўсатдан дод солиб юбориши қўшиқни тақа-тақ тўхтатиб қўйди.

— Нинага ҳам дод-войми, Шакархон!— деди Бегимхон, унинг чийилдоқ овозидан волиб.— Мен сени бирор пойлаб юрган йигит тишлаб олдимикан, дебман.

— Мени пойлайдиганим ҳам, тишлаб оладиганим ҳам йўқ, тузукми! Тишлатиб қўядиган қизлардан эмасман. Пойлаганига тишлатиб қўйғанинг бири сенми, оҳ деганингда оғзингдан чўғ тушади...

Бегимхон хохолаб кулиб юборди.

— Ҳушёр бўл, Шакар, оғзимдан чиқсан ўт сенга туташмасин, бафинг куйиб кетади.

— Куймайди менинг бафrim.

— Ҳа, додҳо, бафинг тошми сенинг, эркакка ўртамаса?..

— Эркак шунақа бўладиган бўлса, гўрим кўрсин уни, деганман.

Қизлар бирдан шарақлаб кулиб юбориши.

— Эркакни гўрим кўрсин деганини қаранглар,— деди Бегимхон, унинг қўлидаги махорка соладиган

халтачани күрсатиб,— духобага зангори ипак билан мана ман, деб номини ёзиб қўйибди-ку, тағин бағри куймасмиш. Халтача фронтга боради. Уни маҳорка чекадиганга беришади. Маҳорка чекадиган ўша йигит менинг номимни билиб қўйсин, тезроқ урушни тамомлаб ёнимга келсин, дегани бу! Индамасдан ишини битказадиган Шакарсан сен!..

— Тезроқ урушни битириб келсин йигитлар десам ёмон ният қилибманми?

— Ийи-ийи, бу ойимчанинг гапида туз борми ўзи? Ҳо, Адолат, тузлуқни бер, Шакарга жиндек туз сепиб қўяй, жуда ширин бўлиб кетибди!..

Яна кулги кўтарилди.

— Кулманглар, қизлар, бунинг гапига,— деди жимгина ўтириб, кўк баҳмалга пушти ипакдан атир гул тикаётган жувон.

У димоғида галирар эди. Унинг овози пінғиллаб эшитилгани учун Бегимхон пиқиллаб кулиб юборди.

— Сизни онангиз кулгига туққан экан, Бегимхон. Йигидан галирса ҳам куласиз, севгидан галирса ҳам...

— Севгидан гапиряпсанми ҳали? Сенга ким қўйибди! Муҳаббатинг бўлса эрдан чиқармидинг?

— Ишқи йўқ эшак, дарди йўқ кесак, билдингизми? Севмадим ман ўша эрни! Биронкида эшакдек ишлаб, кесакдек гезариб юргим келмади. Ўз иhtiёrim билан талоқ хатимни олдим. Нега бетимга соласиз шуни, Бегимхон?

— Бошқани севармидинг?

— Бор эди бир йигит. Қариндошроқ. Ҳарбийга бориб, дараксиз кетди. Эрдан чиққан бўлса ҳам майли, деган экан онасига...

— Ўйнашга ишониб эрсиз қолдим, дегин?

— Қандоқ қилай, уруш кимларни тул қилмаяпти.

Бегимхон бошқа гап тополмагандай жимиб қолди. Бошқалар ҳам оғзига толқон солиб олишгандай, индамай қолдилар. Кимнинг дилида нима гап борлиги номаълум. Аммо Адолатни «уруш кимларни тул қилмаяпти» деган гап азобламоқда... Қандай мудҳиш бу жувоннинг гапи... Йўқ-йўқ! Оғзингни юм, тилингни тишила, Адолат, урушга боргандарнинг ҳаммаси ҳам ҳалок бўлавермайди, фақат ҳижрон... Чин муҳаббат ўти...

Унинг хаёlinи Бегимхоннинг дўриллаган овози бузуб юборди.

— Нега жимиб кетдиларинг, қизлар, оғзиларингга толқон солиб олдиларингми? Ҳай, Адолат, нега индамас бўлиб қолдинг, ёки «муҳаббатниш» саройи кенг экан, йўлни йўқотдингми?»

Муҳаббатдан бошланган гап яна давом этди.

— Шунча ёшга кириб муҳаббат нималигини билганим йўқ,— деди, ипак эшиб ўтирган озғин қиз, Раъно.— Муҳаббатдан гапиришиб, оҳ-воҳ қилишса, кулгим келади. Муҳаббат бор нарсами ўзи, а қизлар? Бор нарса бўлса, нега менга бирорта чўлоқ-мўлоди бўлса ҳам келиб ёпишмайди? Чиройига ош қуйиб ичармидим? Рўзгоримга яраса бас.

— Ундаи бўлса, муҳаббатга мубтало бўла кўрма! Муҳаббат шундай нарсаки, дунёни кўзингга чўғ қилиб кўрсатиб, ўзингни оташга ташлайди. Ишонмасанг, ана, Адолатдан сўра.

Адолат Бегимхоннинг бу гапини мазақ деб тушунди-да, унга хўмрайиб қараб қўйди. Бегимхон унинг жаҳли чиққанини сезиб, гапни Шакархонга ошириб юборди.

— Шакархон опа, муҳаббат нима ўзи, айтиб беринг бу қизга!

— Муҳаббатми?—деб тақрорлади Шакархон, ангишвонани бармоғидан чиқариб.— Муҳаббат шармандалик!..

Қизлар қулиб юборишли.

— Кулманглар, қизлар. Мен ҳақ гапни айтдим. Ичимда кўмилиб ётган сир эди. Қўпчиликка айтадиган гап эмас ўзи. Майли, иштибоҳ қолмасин сизларда, айтаман. Бундан уч йил бурун, ҳу, апрелда қор ёқсан йили, мактабга келган математика муаллимини севиб қолдим. У менга кулиб қараб юрди. Ўзи яхши дуторчи эди. Бир куни ўтиб кетаётсам, мактаб олдидаги сада қайрагоч тагида ўтириб олиб, «Муножот»ни чоляпти. Куюи бирам эшиляпти, ҳар бармоғи остида тор йиглаяпти. Ўтиб кетишимни ҳам, тўхтаб туришимни ҳам билмай қолдим. У менга қараб кулди-да, яна бармоқларини ўйнатиб, торини йиглатиб, бошини тебратади. Мени чақиряпти, деб ёнига бориб қолганимни биламан, юзимга тарсаки тушиб, қулоғим чинқириб кетди. Қўзимни очсан: «Ҳа, мочагар, нега эримни оғдириб оляпсан, эр ўғриси!» дейди бир хотин. Тек турсам, яна тарсакисини ўнглаяпти. Ер ёрилмади, мен кириб кетмадим. Ўлим афзал бундан! Сочимдан тортиб,

тупроққа буламоқчи мени у хотин. Муаллим қип-қизарыб индамай ўтирибди. Хотини худди Бегимхоннинг тунов куни Адолатга ташланганидақа чўғ бўлиб кетибди. Ҳеч нарсани кўрмайди. Ҳеч нарсани эшитмайди. Қўлидан чиқиб қочдим. Икки ой аммамницида номусдан беркиниб ўтиридим. Муаллим қишлоқдан кўчиб кетибди, деб эшитгач, қайтдим. Неча вақттага отамга кўринолмай, кўчага чиқолмай юрдим. Шу-шу бўлдики, эркак бетига кулиб қараган кўзимга оқ тушсин, деганман.

Шакархоннинг ҳикояси тугаши билан ой ҳам ботди. Бир зумда қизларнинг каштаси, майнин чоклари кўринмай қолди. Ҳасратлашишга жуда қулай фурсат туғилди. Кимнинг дарди йўқ, дейсиз! Ҳар бир қизнинг айтса адо бўлмайдиган қиссаси бор, кези келганда ёрилиб олмаса, қачон ёрилади? Бири севгани ҳақида гапирса, иккинчиси севмагани ҳақида қисса бошлайди, яна бири биринчи учрашувдан сўз очса, унинг сўзи тугамай, сўнгги хайрлашув воқиаси тўғрисидаги ҳикоя бошланиб кетади. Хуллас, бу қизларга қўйиб берса, ҳасрат билан тонг оттириб юбориши ҳеч гап эмас. Адолатнинг ўзида ҳам уч кечаю уч кундузлик ҳасрат йиғилиб ётибди. Қани унга вақт?

Адолат қизларни супадан ҳайдади.

— Бас энди, қизлар, ётинглар, эрталаб барвақт турамиэ!

5

Эрталаб қизлар замбил кўтариб, яна қўй қийи ташибшга тушдилар. Кечаси бошланган суҳбат кун бўйи давом этса ҳам, охирига етмади ва яна неча кеча ойдинда давом этди.

Қизлар: «ана энди чокнимиз тайёр» деганларидан кейин, Адолат яна Қодир аканинг олдига борди.

— Битта арава беринг, раис ака.

— Яна аравами?— деди Қодир ака, кўзининг пахтаси чиқиб.— Замбильда ташияпсанлар-ку ўғитни! Замбиль қўлингни қавартирган бўлса, қопда орқала!

— Далага эмас... Қизлар совға тўплашди. Даشت бригадасидан фронтчиларга.

Қодир ака хурсанд бўлиб кетди.

— Шундай демайсанми, қизим! Бу ишингга арава берсам арзийди. Отхонага кир, аравакашлар чой ичиншиялти.

Адолат куннинг иккинчи ярмида қўқон арава устида совға-салом ортиб гузарга келди.

Дашт бригадаси фронтга совға юборяпти, деган гап звеноларга, бригадаларга, бутун қишлоққа ёйилди. Ҳар бир бригада ўз номидан совға ортиб кела бошлади. Эргаш буларнинг ҳаммасиши гузарда тўплаб, карвон ташкил қилди. Ҳамма йигилганда, Эргаш олдинги арава отига минди.

— Кетдик,— деди Эргаш,— раис станцияда кутиб турибди.

Адолатлар араваси ўрнидан жилиши ҳамон, узоқдан бир хотиннинг: «Тўхта, тўхта!» деган овози эши-тилди. Бу Тўхта хола эди. У, неварасининг чопонини бошига ёпиниб, қўлида бир халта билав ҳаллослаб келарди.

— Нега меникими ташлаб кетяпсизлар?— деди у нафаси бўғизига тиқилганича. Қейин, Адолатхоннинг олдига бориб, унга оқ сурупдан тикилган совға халта узатди.— Норматимга тегсин бу халта, жон болам, Норматимга тегсин!

Карвон жўнади. Юкнинг оғирлигиданми, ёки гулчаклари ёғсираганиданми, аравалар тиричиллаб, ўз музикаси ўзи билан жадал бормоқда. Кўчада кўринган кишилар бир тўхтаб, қизил алвонга ёзилган: «Гулистон»ликлардан фронтчиларга совға карвони» деган сўзларни мароқланиб ўқиди. Айниқса, болаларни қўяверинг. Болалар узоқ-узоқларгача араваларнинг орқасидан эргашиб, бир-бирига дам шиор, дам совғаларни кўрсатиб, ўзларича нималарнидир чуғурлашиб борардилар. Баъзи болалар Адолатга қараб: «Ҳӯ, опа, тўппа-тўғри фронтгами? Ўзингиз ҳам фронтгами?» деб қичқириб сўрашар, баъзилари: «Мени ҳам олиб кетинг, разведчик бўламан» деса, бошқалари: «Тўхтаб туринг, мен ҳам халтacha олиб чиқай, акамга бериб қўясиз» дер эдилар ва ҷарчагуича аравага эргашиб борардилар. Баъзан болаларнинг соддалигидан катталарнинг соддалиги ошиб тушади. Оналар ёки оталар аравани кузатиб бораётган болаларга: «Опаларнингдан сўра, болаларим, бизнинг совғамизни ҳам олиб кетармикин» дер эдилар, араванинг олдини тўсиб: «Бизнинг ҳиссасимизни ҳам қўшиб кет!» деб туриб олар эдилар.

Станцияга боргунча ана шундай бўлди. Станцияда карвонни бир чеккага чиқариб қўйишди.

— Платформа банд, ленинчилардан кейин сизларга навбат тегади.

Навбат келиб, «гулистан»ликларнинг совфаси ҳам вагонга ортилгандан кейин, платформа яқинига яна бошқа колхозларнинг аравалари кела бошлади. Кечки пайт райком секретари келиб, қайси колхоздан қанча арава келганини аниқлагач, совғалар эшелонига паровоз берилди.

Адолат гүё совфаси фронтга етиб боргандек, Нормат унинг рўмолчасига пешона терини артаётгандек ва Адолатни эслаб кулиб тургандек ҳис қилди-да, севинчи юрагига сиғмай уйига қайтди.

«Нега хат ёзмайди менга? Нега?..»

Адолат станциядан уйига етгунча фақат Норматни ўйлади. Кўпдан бери Норматдан хат йўқ. Ундан фақат иккита хат келди. Онаси Тўхта холага: «Машқ қилиб юрибмиз, соғ-саломатмиз» деб ёзибли. У, хатида япа: «Кекса рус аёлининг уйила турибмиз. Менга жуда меҳрибон. Ўғлидай кўради»— дебди.

Адолат муҳаббат нима эканлигини энди сезди. Нормат фронтга жўнаб кетгандан кейин, Адолатнинг юраги ғаш бўлиб қолди, унга нимадир етишмаётганига ўхшайди. Кунлар йил каби узоқ кўринади. Фақат Нормат ҳақидаги ширин хаёллар уни юпатади, унга тасалли беради.

Адолат уйига келгач, супачада ўтириб, ширин орзуларга берилди. У, Норматнинг, дадаси Соҳиб қорига ёзган хатиши чўнтағидан топиб олиб ўғирликча ўқиган ва яна ўз жойига қўйған эди. Норматдан Адолатнинг ўзига хат келмади. Қиз кутди, кутди... «Олдин йигит ёзиши керак, кейин қиз... Нега ёзмайди, қани унинг аҳди? У мени севадими, йўқми, ёки бошқа қиз билан танишиб, севишиб қолдими? Қандай бўлса ҳам, совғамни олар, хатимни ўқир».

Адолатнинг юзи дастлаб қизариб, кейин оқариб кетди... У юрак ҳаяжонини босиб, Норматга хат ёза бошлади. Кейин уни хаёл етакладими—у ўзини боғда кўрди. Боғни айланиб, анор гуллари, бодом баргларани ўйнаб юриб, ариқ бўйидаги атир тул тагига борди. «Шу ерда, худди шу жойда ўтирган эдик...» Норматнинг ҳаяжон билан гапириши, унинг кўзларига умидвор тикилиб туришини эслади. «Нега Тўхта хола бизни қувиб юборди?.. У қувламаган эди шекилли, мени

ўзим қочдим. Нега қочдим? Үтираверсам бўлмасми! Нормат акамнинг гапи чала қолди, яхши ниятлари кўксіда кетди...»

Адолат ариқча сувининг ҳалқа-ҳалқа бўлиб ашула айтиб оқишига тикилиб турди. Қирлардан оқиб тушаб, ариққа сиғмай ўтаётган тип-тиниқ сув. Ариқча бўйидаги атир гул, қизил гул, напармон гуллар очилиб ётибди. Қирлардан эсаётган майнин шабада ана шу гулларнинг ғунчаларини ёзмоқда, япроқларини учирив келиб, Адолатнинг бошига сочмоқда.

Қиз хаёлинин кўча дарвозасидан кирган икки кишининг шарпаси бўлди. Уларнинг бири — Адолатнинг дадаси Соҳиб қори, иккинчиси Бозоров эди. Адолатнинг назарида Бозоровнинг бўйи янада пасайиб, қорни тагин ҳам қалпайиб кетганига ўхшайди... Соҳиб қори меҳмонни боғнинг ичкарисига бошлади. Меҳмон икки кўзини қиздан узолмай, юрган йўлида қоқилиб-қоқилиб борарди.

— Дастурхон олиб чиқ, қизим,— деди Соҳиб қори, Адолатга.

Адолат ичкари кириб патнус тузаб, дастурхонга ўраб чиқди. Соҳиб қори унинг қўлидан дастурхонни олиб, боравер, дегандек имо қилди. Бозоров Адолатга ютиб юборгудек сук назар ташлади.

Адолатнинг бошига бир парча муз югуриб чиққандек туюлди. «Ростдан ҳам менинг отам — Соҳиб қорими шу!..» деб ўйлади Адолат. Хотинини «номаҳрам кўради» деб кўчага чиқармаган, «овозини номаҳрам эшигади» деб уйда қаттиқ гапиртиргаган, қизини ўғил болалар билан бирга бир партада ўтқизгани учун муаллим билан уришган ота шуми? Нега энди у бўйига етган қизини Бозоровга кўз-кўз қиляпти?..

Соҳиб қори бир вақтлар Гузарбоши мадрасасида таълим олган муллавачча, эндиликда эллик ёшлардан ошиб қолган киши эди. У, мадрасани тамом қилгач, «қори» деб ном олган бўлса ҳам, унга бирор жойда қорилик ёки имомлик қилиш насиб бўлмади. Бунинг сабаблари ҳам бор эди. Аввало, «Гулистан» қишлоғидаги масжиднинг имоми бор эди. Қолаверса, Соҳиб қори ёш бўлгани учун, бошқа қишлоқлардан ҳам уни имомликка чақирмадилар. Кейин у ёзиш-чизиш иши билан шуғулланди; зориқканларга дуои салом ёки ариза ёзиб бериб, шундан чой чақа чиқариб юрди. «Гулистан»

да колхоз тузилган йили шу колхознинг саркотиби бўлди. Қишлоқда сельпо ташкил қилингандан кейин у ўзини магазинга урди ва ўша вактдан бери савдо ходими Соҳиб қори, ўз таъбири билан айтганда, илонга ҳам тилининг учидаги шакар берадиган киши. Аммо қишлоқ Соҳиб қорини тамагир, очкўз деб билади. Бу жихатдан Адолат баъзи дугоналаридан дашном ҳам еди. Лекин Адолат отасига бирор нарса дейишга ботинолмайди. Отасининг бугунги иши уни айниқса разаблантириб юборди. Шу сабабдан Адолат дадасининг гапига жавоб ҳам қилмай, боғнинг ичига кириб кетди. Бозоров унинг орқаси тўла майда ўрим қора соchlарининг қўнғирларига, чертиб-чертуб қадам ташлашига сеҳрланганча тикилиб қолди.

Олжанича боб ТУНГИ ТҮҚНАШУВ

/

Черницов армия қўмондони генерал-лейтенант Погодиннинг штабс-квартирасига Юрьевдан кейин кирди. Генерал Погодин Ҳарбий Совет аъзоси бригадний комиссар Смирнов билан чой ичишиб ўтиради.

— Уртоқ генерал! Батальон комиссари Чернизовман...

— Ўтиринг, ўтиринг,— деди генерал Погодин, унга қўл бераб.

Черницов Юрьевнинг ёнига ўтиради.

Генерал Погодин ўрта бўйли, ёши элликларга бориб қолган киши. Унинг барваста қомати, кенг елкалари, узун қўллари худди ҳарбий хизмат учунгина яратилган дек келишган. Ҳарбий форма унга худди қўйиб қўйгандек. Погодиннинг юзи чўзиқ, бурни қирра, кўкиш кўзлари кулиб турарди. У жангчилар, командирлар билан гаплашганда улардан тик қараб туришини талаб этарди. Бошқаларнинг гапини ҳам кўзни кўзга тикиб туриб тингларди. У, Чернизовнинг қизарган кўзларига тикилди:

— Нега кўзингиз қизарган?— деди ва олма гулли пиёладаги чойни хўплади.

— Киприкларингиз, қошларингиз ҳам куйибди,— деб сўз қўшди бригадний комиссар.

— Ўт ўчирдик...

Смирнов қовурилган қўзиқоринлардан оларкан, Чернизовга кулиб қаради.

— Олинг, қўзиқоринлардан олинг. Ширин. Бундан кейин қўзиқорин пиширишга вақт бўлмас. Ёки, сизлар қўзиқоринга тўйиб олдиларингизми?

Смирнов гражданлар уруши давридан бери Қизил Армияда хизмат қиласди. Унинг сочи армия хизматидаги оқарган. Смирнов узун бўйли, қотма, аммо вазмин киши. У камгап, аммо бошқаларнинг ҳар қанча узундан-узоқ гапларини ҳам дикқат билан тинглайди. Шунга қарамай, Смирнов бугун Чернизовнинг камгапроқ бўлишини истади. Чернизов жангчиларни витамин билан таъминлаш учун кўрган чораларини гапириб берди.

Генерал Погодин чой ичиб бўлди-да, адъютантидан сўради:

— Нега шу чоққача начштаб келмаяпти?

Адъютант «ҳозир чақириб келаман» деганича чақон бурилиб, эшикка чиқди.

Армия штабининг бошлиғи полковник Снегов штаб харитасини кўтариб келди.

Снегов фўлага ўхшаб кетади. Семизликдан бўлса керак, бақбақаси осилиб тушган ва гапирганда тез-тез нафас олиб туради. Снегов уйга киаркан, полнинг тахталари унинг қадами остида фирчиллаб кетди.

— Ўртоқ генерал, оператив харита,— деди Снегов, харитани столга ёзаркан.

Генерал Погодин харита устига эгилди.

Снегов аввал Ғарбий фронт штабидан олинган вазият тафсилотини айтиб берди. Душман Москвага уч томондан кирмоқчи. «Марказий», «Шимолий», «Жанубий» группаларининг армиялари бугун эрталаб 80 дивизия билан ҳужумга ўтди. Танк ва мотодивизиялардан йигирма иккитаси катта ҳаво кучларининг ёрдами билан Калинин, Орёл, Тулага қараб бормоқда. Бизнинг Ғарбий фронтимиз душманнинг асосий зарбдор кучи бўлган «Марказий» группаси армияси билан жанг қилмоқда.

Снегов урушнинг бориши тўғрисидаги оператив сводкалар, авиация ва агентура разведкаларининг сўнгги маълумотлари ҳақида ҳам доклад қилди. Штабдагиларнинг кўзлари кўк ва қизил чизиқлар билан

бўялган харитага михланиб қолди. Қўк чизиқларнинг ўткир учлари шаҳарлар, дарёлар ва катта йўлларга санчилиб турарди. Бу — «Марказий» группа қўшинларининг иккинчи октябрда Москвага бошлаган ҳужум йўли эди. Қизил чизиқлар эса, кўндаланг-кўндаланг бўлиб интилиб турарди. Булар — Погодин армиясининг мудофаа линиялари. Қўк стрелкаларнинг шаҳарга, тепаликлар ва катта йўлларга қаратилган найзалири миљтиқ найзасидай, ханжар нишидай армия мудофаасига санчилиб турарди.

— Душман уч томондан босиб келяпти,— деди Снегов.— Унинг ўнг қанотимиздаги қисмлари Чайка дарёси бўйига чиқиб, қўшинларимизнинг алоқа йўлларини кесиб қўйди. Чап қанотда ҳам аҳвол шундай. Полкларимиз ўртада пона бўлиб қоқилиб турибди... Қўшниларимиз радио сигналларимизга жавоб беришмаяпти. Агар фашист қисмлари Чайка дарёсига чиқкан бўлса, биз қуршовда қолган бўламиз. Душманни қуршов билан қўрқитиш — фашистларнинг энг севган тактикаси...

Генерал Погодин Снеговнинг елкасига қўл ташлади:

— Фашистлар,— деди генерал ва қутисидан папиро олиб ёнидагиларга узатди, ўзи зажигалка ёндириб, қуюқ тутунини ютиб, лабидан бураб чиқарди,— бутун Европа шаҳарларини бронепоездларда, танкларда, машиналарда саёҳатдагидек кезиб ўтди. Европанинг машҳур қалъалари, катта истеҳкомлари таслим бўлди. Ҳозирча уларнинг техникаси зўрлик қилиб турибди. Ўлар ўз техникасига ишониб, Россияни ҳам танк устида айланиб ўтмоқчи бўлишибди. Лекин Россия ўзини депситиб қўймайди! Гитлер Москвани етмиш кунда олмоқчи эди. Бугун етмиш тўртинчи кун... Фронт Ҳарбий Советининг аъзоси телефонда: «Ваҳима — душманнинг кўмакчиси» деди, хавф катталигини уқдириди, бардош қилишга чақириди. Ўзимизни қуршатиб қўймаймиз, агар қуршовга қолган чоғимиизда ҳам...

Жиринглаган телефон унинг гапини бўлди. Штаб оператив бўлимининг бошлиғи сўнгги ўзгаришларни айтди. Генералнинг рангги бироз оқарди-ю, ўзини босиб олди. Фашистлар туширган десант, танкеткалар ва олти оғизлик миномётлар Чайка дарёси кўпригига қараб юрибди. Душманнинг Ельня томонидан чиққан

танк группаси қўшни қисмлар жойлашган заводга яқинлашиб қолибди. Душман самолётларининг ҳужумлари кучаймоқда. Юрьев батальони уч марта бомбардимон қилинди. Аҳвол оғир...

— Тушундим,— деди Погодин,— ҳозир қўмондондан буйруқ олдим.

Юрьев қўмондоннинг буйруғини эшитиш учун ҳозирланиб ўтиради.

— Армия қисмлари,— деди генерал, папиросини тутатиб,— душманнинг сиқуви билан чекипяпти. Душман ёриб ўтиб, кўприкка етиб олиш учун шошилмоқда. Агар немис кўприкни, паромни эгалласа, дарёning ғарбий қирғоғидаги қисмлар қуршовла қолади. Биз дарёning нариги юзини мудофаа қилиш ҳақида буйруқ олдик.

— Чекиниш қачон бошланади?

— Кечаси тамом бўлиши керак.

Узоқ гаплашиб ўтиришга вақт йўқ эди, генерал буюрди:

— Хариталарингизни олингиз!

Юрьев ўн олти марта букланган — «бир минглик» харитани чиқарди. Черницов кўк ва қизил қалам учларини қаламтарош билан ингичка қилиб йўнди. Генерал айтиб турди, улар шу куни кечаси қилинадиган ишларни ёзиб олишди. Генерал Погодин армиясининг қисмлари Чайка дарёси бўйига тўпланиши ва эрталаб соат 5 да дарёдан ўта бошлиши керак. Армия қўшинларининг орқасида аръергарт қисмлар қолдирилади. Улар дарёдан энг кейин ўтадилар.

— Сизнинг вазифангиз,— деди генерал Юрьевга қараб,— 119-тепаликка маҳкам ёпишиб олиб, Варшавка йўлини тўсиб туриш. Душман кўприкни эгаллаш учун десант туширса, ёки унинг танклари фронтни ёриб ўтиб, кўприк томонга юрса, йўлини тўсасиз, энг охирги взвод кўприкдан ўтиб олмагунча, тепаликка ёпишиб турасиз!

Генерал Погодин Юрьевни яхши билади. Юрьев гражданлар урушидан бери ҳарбий хизматда. У Москвада ҳарбий академияни битириб, икки йилдан бери алоҳида ўқчи батальонга командирлик қилаётиди. Погодин унга «ўт юракли командир» деб ном берган. Погодин унинг қоматига ҳавас билан тикилиб қолди. Юрьевнинг кенг елкаси ўзига ярашиб, чўзиқ юзи кулиб

турибди. Юрьев генералнинг сўзи тугаши ҳамон честь берди:

— Бажараман, ўртоқ генерал!

— Саволингиз борми?

— Илтимосим бор, ўртоқ генерал. Танкка қарши тўплар батареяси керак. Варшавкада хавф кучли.

Генерал ўрнидан туриб, қўлини орқасига олиб, у ёқ-бу ёққа юрди, кейин Юрьевнинг рўпарасига келиб тўхтади.

— Икки артбатарея ва бир зенит батареяси юбораман. Етадими?

— Етади, ўртоқ генерал!

— Сизларга ишонаман,— деди Погодин.

Юрьев билан Черницов баб-баравар жавоб қилишди:

— Ишончни оқлаймиз!

Генерал-лейтенант бериладиган буйруқни айтиб турди, полковник Снегов ёзди. Погодин имзолагач, Смирновга узатди. Смирнов буйруқдаги қандайдир икки сўэни ўчириб, ўрнига бошқа битта сўз қўшди ва генерал ҳам маъқуллагач, буйруқ тагига исмининг бош ҳарфи билан фамилиясини ёзид қўйди.

Юрьев билан Черницов ўрниларидан туриб, «буйруқни олдик» деб қўл қўйишди.

Улар чиқиб кетаётганларида генерал қўл узатди:

— Муваффақият тилайман. Сизларга катта масъулият юкланди,— деди генерал.

Черницов батальонга келгунча ана шу масъулият тўғрисида ўйлади. Бу масъулиятгина эмас, катта ишонч ҳам эди. Ватан ишончини оқлашдан ҳам каттароқ шараф борми!

2

Юрьев командирлар билан бирга арьергарднинг бўлажак позициясини айланиб чиқди. Бу жой мудофаа жанглари олиб бориш учун жуда қулай эди.

Погодин қисмлари чекиниши лозим бўлган йўл қалин ўрмон ичидаги бўлиб, Чайка қирғонига келгандага 119 тепалигини кесиб ўтар эди. 119 тепалиги Чайканинг чап қанотида бир неча километрга чўзилиб ётади. Бу жойдан тўрт атрофни қўриқлаб туриш мумкин. Бу тепаликнинг мудофаага қулай бўлган яна бир хусусияти шуки, у қалин ўрмон ичидаги, атрофи ўйдим-чу-

қурлар, ботқоқликлар билан қуршалган бўлиб, техникинг бостириб келиши учун қийин, ҳаво ҳужумига ҳам анча ноқулай. Тепадан қараган киши тепаликни ўрмондан ажрата олмас эди. Тепа ён бағирликлари ҳам гўё жангчиларни бомба ёки снарядлардан сақлайдиган блиндажлар учунгина яратилгандек. Фашистлар Юрьев батальони мудофаасига фақат кўприкка олиб келадиган йўлдангина ҳужум қилиши мумкин. Июль, август ва сентябрь жангларининг тажрибаси шуни кўрсатдики, фашист қисмлари ўрмон жангларига чидаётмайдилар. Агар душман солдати ўрмонга кириб, тепалик гарнизонининг бирор қанотидан атака қиладиган бўлса ҳам, фақат талафотга учраши мумкин.

Йўлга ҳушёр бўл, Юрьев, мудофаангнинг тақдирини ана шу йўл ҳал қиласди.

Москва обlastининг ғарбий районларини Смоленск обlastининг чегара районига уладиган ва қачонлардир Варшавка деб аталган бу торгина шағал йўл катта қўшинларнинг ҳужум жанги олиб боришига ноқулай эди. Юрьев бу йўлнинг ана шу ноқулайликларидан усталик билан фойдаланди. Унинг мудофаага ўтиши биланоқ биринчи иши йўлнинг икки томонидаги дарахтларни йиқтишдан бошланди. Погодин қисмларнинг техникаси ўтиб бўлгач, йўл йўғон дарахтлар ғови билан кўмилиб, атрофларга мина кўмилди.

Бу ерни тепаликдан бемалол кўриб туриш мумкин. Шунинг учун ҳам энг яхши артбатарея ва икки пулемёт йўлдаги ғовларни қўриқлашга қўйилди. Артиллеристлар ва пулемётчилар 119 тепалигининг йўлга яқин бўлган дўнгларида қулай позицияларни эгаллаб, тўптарни, пулемётларни қалин блиндажга ўрнатдилар. Ғовларга яқин жойлардаги йўғон дарахтларнинг шоҳларида бир нечта автоматчилар пости ташкил қилинди, қулай жойларга пистирмалар қўйилди.

— Йўлни Морозов ротаси қўриқлади,— деди Юрьев, тўртинчи рота командирига.

Морозов ротаси халқ лашкарлари кавлаб қўйган окопларга икки взводни жойлаб, қолган икки взвод билан танкка қарши мудофаа чораларини кўра бошлади. Юрьев бошқа роталар, артиллеристлар, минамётчилар ва пулемётчиларнинг позицияларини белгилаб бергач, кўприк олдида икки танк турибди.

Танкистлар Юрьевдан ё газоль ёки машина топиб беришини илтимос қилишди. Танкларда ёнилғи қолмабди.

— Газоль ҳам йўқ, машина ҳам.— деди Юрьев,— яхиси, танкларни мана шу дўнгликка кўминглар. Сизларнинг позицияларингизни «Пўлат қалъа» деб атаймиз...

Танкистлар елкаларини қисиб, иккиланиб турган эдилар, Юрьев Қизил Армия интизоми уставининг тили билан қатъий буюрди.

— Тездан танкларни мудофаага тайёрлангиз. Буюраман!..

Танкистлар танкларидан белкуракларини олиб, йўлнинг икки юзида окоп кавлай бошладилар.

Погодин қисмлари кўприкдан ўтиб олгандан кейин, Юрьев кўприк остига учта фугас, атрофларига мина кўмдириб, уни истаган дақиқада портлатишга ҳозирлаб қўйди.

— Ерга чуқурроқ кирингиз! Ерга қаттиқроқ тираннингиз!— деди Юрьев, жангчиларга. Мудофаанинг биринчи кунидан бошлаб бу сўзлар Юрьевнинг оғизидан тушмайдиган бўлиб қолди.— Биз шу ер учун курашяпмиз, ана шу ернинг кўкси сақлайди бизни!..

Кундузи соат тўртларда немисларнинг учта бронетранспортёри пайдо бўлди-да, йўлда дараҳт йиқитиб ғовтикаётган жангчиларни ўқقا тутиб, қайтиб кетди. Бир оздан кейин учта енгил танк пайдо бўлди. Тепаликдаги батарея ўт очиши билан бир танк тутаб, кейин ёниб кетди. Икки танк орқасига қайрилиб, жадал жўнаб қолди. Шу чоқ танклар колоннаси етиб келди-да, йўлда туриб олиб, тепаликка тўп ота бошлади. Тепаликдаги тўплар ҳам жавоб қайтара бошладилар. Йўлнинг аввал ўнг томонида, кейин чап томонида ўн-ўн бешга яқин кўк шинелли солдат кўриниб қолди. Пистирмадан ўқقا тутилиши билан, улар ғойиб бўлдилар. Юрьев роталарга телефон қилиб, «ҳушёр бўлинглар!» деб такрорлаб турди. Кечқурун, йўлдаги биринчи ғовлар олдида бир ротага яқин солдат пайдо бўлди. Улар танк тўпларининг паноҳида ғовларни бузиб, йўл очишига уриндилар. Уч томондан ёғилаётган ўқ ёмғири уларнинг бошини кўтарғизмай қўйди. Кейин улар йўлнинг ўнг томонидан танкларга йўл очиш учун дараҳтларни йиқита бошладилар, аммо бадтарроқ даҳшат юз берди: биринчи дараҳт йиқилиши билан иккита мина портлаб,

бир неча кишини учиреб кетди. Энди немислар Чайкадан ўтишга бошқа йўл қидира бошладилар. Эфирда немисларнинг рациялари: «Тез бўл!..» «Тўхтама!..»— деб шовқин кўтарарди. Сўнгра моторларнинг шовқини кучайиб, бир оздан кейин жимлик чўкди.

Эрталаб ҳавони туман босди, сал ўтмай, ёмғир ёға бошлади. Шунинг учун ҳам бугун ҳавода «Мессершмидтлар», «Юнкерслар» кўринмади. Бизнинг самолётларимиз ҳам учмади. Душман ёмғир тинишини кутган бўлса кепрак. Варшавкада ҳужумга ўтмади. Шу сабабли Юрьевнинг батальони Ильичёвкадан келиб, бутун кун ва кечаси билан тепаликни мудофаага тайёрлади.

Дарёдан ўтиб олган қисмлар ҳалқ лашкарлари тайёрлаган окопларга жойлашди ва бир оздан кейин яна шарққа қараб йўлга тушди. Кейинги икки кун ичиди Фарбий фронтда катта ўзгаришлар юз берди. Погодин қисмларининг чап қанотидан Чайка дарёсини кесиб ўтган душман қўшинлари темир йўл станцияларини ва катта йўлларни жуда тез эгалладилар, телефон ва телеграф симларини узиб, алоқа йўлларини буздилар. Москва яқинидаги кўп шаҳарлар ва темир йўл станцияларига ҳаво десанти туширилди. Самолётлардан тинмай ташланаётган ва бошдан оёқ иғводан иборат варақаларда душман пропагандаси — «Октябрь ойида Москва олиниди ва уруш тамом бўлади, сув ғамла, туз ғамла, уйдан кўчага чиқмай ўтири» деб аҳолига ваҳима солди.

Аҳвол борган сари оғирлашди. Погодин қўшинлари ярим ҳалқа ичиди қолди.

Дарёдан ўтилган куни кундузи генерал Погодин фронт Ҳарбий Советига чақирилди. У, фронт штабининг опергруппасини илгариги жойидан тополмади, алоқа офицерининг броневигини учратди, холос. Алоқа офицери унга Ҳарбий Советнинг қисмларни «тезлик билан Брянск томонга кўчириш» тўғрисидаги буйругини топширди. Погодин Чайка дарёси бўйидаги ўз қисмига ўрмон ичи, пана йўллар билан қайтди ва машинадан тушиши биланоқ, янги дислокация ҳақида дивизияларга буйруқ юборди.

— Юрьев жилмасин! Буйруқ кутсин! — деди генерал машинага ўтираётуб, мудофаадаги батальоннинг вакилига.

— Есть!

Кўкда саёҳат қилиб юрган ой булутлар орасида қолди. Бутун ўрмон ва кенг далалар қоронғилашди. Фақат жимирлаб оқаётган дарё сувлари йилтилламоқда. Отиш малар ҳам тўхтади. Жимжитлик ҳукм сурарди. Шу дақиқаларда шалоплаган сувгина 119 тепалигидаги жимжитликни бузиб турарди.

119 тепалигини ёнлаб ўтган йўл жангчи Ражабовга таниш эмас. Кимдир уни бир вақтлар Наполеон лашкари ўтган эски Смоленск йўли деди, яна кимдир бу йўл тўппа-тўғри Варшавага олиб боришини айтди. Жангчилар унинг ҳақиқий номини аниқламасданоқ унга «Варшавка» деб ном қўйдилар. Улар шу йўл билан шарққа эмас, ғарбга томон, Варшавага ва ундан ҳам нари — Берлингача боришини орез қиласар эдилар. Шу сабабдан юриевчилар тепаликдан жилмасликка қасамёд этдилар. Эминжон, мана энди, қайилма атрофини қўриқлаб турибди. Унинг назарида тепалик пастидаги ярим оролни айланиб ўтадиган қайилмада қайвқлар сузаётганга ўхшайди.

Ражабов окопи дарёning қайилмасида, тепаликнинг чап қанотидаги ўнг қирғоқча жойлашган бўлиб, дарёга жуда яқин эди. Эмин қаради: автоматчи немислар дарёning кун чиқиши қирғоғидан, яъни Ильичёвка томондан резина қайнқда шу томонга тўппа-тўғри босиб келяпти...

— Қуршовда қолибмиз... Командирга хабар беришим керак,— деди Эмин.

Ражабов околнинг нариги четидаги симнинг учини тортиди. Взводдан ҳеч ким келмади. Бу сим Эминнинг окопидан тўппа-тўғри взвод блиндажига борарди. Блиндажда шу сим учига зенит тўпининг сариқ гильзаси ва унинг ичига эса темир осиб қўйилган эди. Сим тортилса, гильза жаранглаб, тревога кўтарарди. Бу гал ҳам шундай жаранглади. Аммо взводдан одам келавермади. Қайиқ аллақачон кўздан ғойиб бўлди. Нима қилиш керак? Эмин мудофаа постида, душман рўпарасидаги окопда биринчи марта турибди. Взводдан хабар келмагандан кейин, унинг назарида, кечаги қисмлар каби, унинг ўз взводи ҳам кетиб қолганга, бу жойда фақат Эминнинг ўзи қолганга ўхшаб кўринди.

— Нима қилсам экан?

У, дарёга разм солиб қараган эди, қайиқ иккита булиб кўринди. Эмин санади: бир, икки, уч... ўн бир киши... Эмин ўн бир немис орасида ўзини якка сезди. «Отайми отмайми?...» Ўнг қўлининг бармоғини милтиқ тепкисига юбориб, уни босаётган жойида яна тўхтади. У: «взвод кела қолса эди, буларни ушлаб олардик...» деган хаёлда траишеялар билан взводга жўнади.

— Ким келяпти?— Нормат Эминни тўхтатди.

— Мен, мен, Эмин,— деди у.— Кетиб қолганларинг йўқми, Нормат?

— Жинни бўлдингми, қаёққа кетамиз?

— Немислар келяпти!...

— Маъқул,— деди Нормат.— Дарров орқангга қайт. Немисларни кузат.

— Взвод шу ердами?

— Шу ерда. Тезроқ бор! Тезроқ қайт!— деб такрорлади Нормат.

Норматнинг сигнали билан сержант Тургенев блиджаларда дам олиб ётган жангчиларни олиб қайилмага келди. Милтиқ овозлари хандақларнинг ичкарисидаги запас пистирмаларгача етиб борди.

Жангчилар отишма бораётган томонга қараб ўқ уза бошлидилар. Кеча қоронғи. Икки юз, уч юз метр наридан туриб стилаётган ўқлар бировга тегдими, йўқми, билиб бўлмайди. Немис разведкачиларига ўқ отаётган Эмин мадад келганини кўриб, қувонди.

— Келингиз!— Ана, фашистлар!..— деб қичқирди у.

Шу маҳал бир ўқ унинг бошидан визиллаб ўтиб кетди. Эмин ётиб олди ва анча вақтгача ўрнидан туромади. Худди ўқлар уни қидириб юрганга, салгина бош кўтарса, тегиб кетаётганга ўхшади. У яна ерга ёпишди.

— Ким бор?— деди сержант Тургенев, ерда ётган одамга қараб.

Эмин ўз командирининг овозини таниди.

— Мен, менман...

— Яраландингми? Қаерингдан?

Эмин индамай, секин ўрнидан турди.

— Қаерингга ўқ тегди?

— Бошимга... Бошимга тегиб кетай, тегиб кетай деди...

— Тур ўрнингдан!— деди Тургенев жиддий.

Эмин ўрнидан туриб, атрофга қаради. Немислар аллақачон ўз қирғоқларига қайтиб кетган эди.

— Немис қаёқда-ю, сен қаёқда, омон бўл-эй!

Сержант Тургенев урушгача слесарь эди. У, илгари ҳам уруш кўрган. 1939 йили Фарбий Белоруссияни озод қилиш жангларидаги қатнашган, сўнгра Финляндиянинг Маннергейм линиясига штурм вақтида ярадор бўлиб, уруш тамом бўлган кунлари ҳам Ленинградда госпиталда ётган эди. Тургенев фин урушидан кейин Тошкентга келиб, шу ерда ҳарбийдан бўшаган ва Ворошилов номидаги «Сельмаш» заводида ишлаб қолганди. У ўз ғайрати, жасорати билан ишчиларнинг севимли мастери бўлиб қолган эди. У ўша ердан фронтга чақирилди. Сержант меҳнатда қандай ўрнак бўлган бўлса, жангда ҳам жангчиларга ўрнак бўляпти.

— Нега дарҳол хабар қилмадинг?— деб сўради Тургенев Эминдан.

Эмин сержантнинг кўзларига қарай олмас эди.

— Лапашанг!..

Сержантнинг бу сўзи Эминга жуда қаттиқ тегди. Бунинг ўрнига сержант уни муштлаб, милтиқ қўндоғи билан уриб бошини ёргани минг марта афзал эмасмиди?..

У Норматга яқинлашиб, ундан кўмак сўрагандек бўлди.

— Нега мени лапашанг дейди бунинг?..

— Айб ўзингда,— деди Нормат.— Сўкиш эшитмайдиган иш қилсанг, ҳеч ким сени койимайди... .

4

Капитан Юрьев тўққизинчи ротадан ахборот олгандан кейин, Черницовнинг ёнига борди. Комиссар ҳозиргина роталарни айланиб келиб, шинелини ҳам ечмай, бир оз дам олиш учун ёнбошлаган эди.

— Душман қутуряпти,— деди Юрьев, шинель остидан бошини чиқараётган Черницовга қараб.

— Нима гап?— Черницов сакраб ўрнидан турди.

— Душманнинг разведка бўлинмаси тўртинчи ротанинг мудофаа майдонига кирипти... Резина қайиқда дарё томондан келишилти.

Черницов қошини чимирганча ўйланиб қолди.

— Демак, душман орқа томонимиздан ҳужум қилмоқчи. Биронтасини ушлашолмаптими?

— Йўқ,— деди Юрьев, қўлидаги қаламини харитага уриб.— немисларнинг сайрини тамоша қилишипти...

— Аттаинг, бизга «тил» керак эди.

— Немислар Ражабов пости олдидан ўтган эмиш.

— Мен яқинда постларни текшириб юрганимда, у жангчи шарпани эшишиб, олдимга югуриб келган эди. Ҳушёр солдатга ўхшаб кўринувди...

— Ҳар ҳолда бу яхши хабар эмас,— деди Юрьев, қаламини ўйнатиб.

— Эҳтимол, немислар қисмларимизнинг кетаётганини билиб қолишгандир... Ҳар ҳолда бу яхши хабар эмас...

Черников планшетидан харитасини чиқарди ва генерал Погодин қўйған белгиларни кўздан кечирди.

— Демак, ёв ҳужумга ўтмоқчи. Бизни янчидан ташлаб, катта йўлни тозаламоқчи... Шошилинч чора кўришимиз керак!

Юрьев билан Черников мудофаа районини айланиб чиқишиди.

— Мудофаамиз бўш, орқа томонимиз, қанотларимизда куч сийрак. Ҳар томонга баравар куч қўйишимиз лозим.

Юрьевнинг фикрича, бу тепалик — мудофаа жангларидагина эмас, балки, Қизил Армиянинг бўлғуси ҳужум жангларида ҳам катта роль ўйнаши керак. Бу тепаликдан туриб, дарё кўприкларини, кечувларини кузатиб туриш, ўққа тутиш мумкин. Бу жиҳатдан 119-тепалик жуда муҳим стратегик объект.

Юрьев бешинчи ротани бир батарея билан гарбий ён бағриликка қўйди. Бу ротанинг чап қаноти жанубий ён бағриликкача чўзилиб, унинг ярмини эгаллаши керак эди. Тепаликнинг шимолий томонига олтинчи ротанинг икки взводи қўйилди. Унинг қолган икки взводи дарё қирғоғига жойлашган бўлиб, пулемёт взводи билан бирга кўприкни мудофаа қилиши керак эди. Юрьев тўртинчи рота билан ПТРчиларни* батальоннинг чап қанотига — жанубга қўйди. Бу томонда танклар ҳужумини кутиш мумкин эди. Қолган икки ротанинг бири дарё қирғоғига, иккинчиси батальоннинг орқа томонига жойлаштирилди. Юрьев тўпларни шундай қулай жой-

*ПТР — Танкка қарши яроқ.

ларга қўйдикى, улар бу жойлардан туриб, зарур вақтларда батальоннинг барча қанотларига, ҳатто мудофаанинг орқа томонларига ҳам ўт очиши мумкин эди. Батальон миномётчилари икки групага бўлиниб, шимолий ва жанубий қанотларга ташланди. Улар биринчи рота фронтини миналар билан тўсиб туриш ҳақида топшириқ олдилар. Бундан ташқари, ҳар бир групага иккитадан кўчиб юрувчи минамёт билан душманя тепасига муттасил мина ташлаб туриш мажбурияти юкланди. Взвод, рота ва батальонлар бир-бирларининг позицияларига ёрдам бериб туриш мақсадида ўз мудофаа районларини қайтадан қурдилар. Жуда кўп хандақлар, ўт очиш нуқталари, артпозициялар бошқатдан жойлаштирилди.

— Ерга чуқурроқ киришимиз, тепаликка маҳкамроқ ёпишишимиз керак!

Юревнинг бу фикрини Черницов тўла маъқуллади.

5

Черницов тўртинчи ротага ионушта вақтида келди. Жангчилар пана жойларда ўтириб, угра ош ичардилар. Комиссар овқатнинг сифатини суриштира кетди:

— Тами қалай?

— Мазали.

— Етарлими?

— Етарли.

Черницов жангчи Азимовнинг қўлидаги куйик нонга разм солди...

— Старшина!

— Лаббай! — Рота старшинаси Куценко югуриб келди.

— Бундан кейин куйган нон олиб келманг, нонвойхонадагиларга «нонни куйдирма» деб айтинг. Агар ҳар килограммда 50 граммдан нон куйикка чиқса, ҳар куни ротамиизда кўп киши нонсиз қолиши мумкин.

— Тушунаман, ўртоқ комиссар.

Комиссар иккинчи взвод блиндажи олдида уграсига нон тўғраб, хомуш ўтирган жангчи Ражабовни кўрди. Унинг ранги сарғайиб, нимадандир қаттиқ ранжиганлиги билиниб турарди. Черницов унинг ёнига келиб ўтириди-да: «Қалай, бугунги угра ёмон эмасми?» деб сўради.

Ҳамма жангчиларнинг оғзи овқатда бўлса ҳам, кўзи Эминда эди. Нормат комиссарнинг Эминнинг кечаги лапашанглигига қандай ҳукм чиқаришини билиш учун, унинг ҳар бир сўзини уқиб олишга уринди. Эмин ўз олдида ўтирган комиссарга қарай олмай қизарди ва пешонасига чиққан совуқ терни енги билан артди.

— Қани, ошга марҳамат, ўртоқ комиссар,— деди Эмин, котелогини унинг олдига суриб.

— Раҳмат, мен овқат едим,— деди Черницов, Эминга мулойимгина кулиб қараб.

Комиссарнинг у ёқ-бу ёқдан гаплашиб ўтириши Эминга тасалли берса ҳам, унинг нима учундир кечаги воқиадан гап очмаганига ҳайрон бўлди ва «менинг ишим ҳали буларнинг қулогига етмабди, шекилли» деб ўйлади. Эмин овқатини еб бўлгандан кейин, Черницов сўз бошлади.

— Ўйдан хат олмаяпсизми?

— Йўқ. Кўп хат ёздим, жавоб йўқ.

— Уйингизда кимингиз бор?

— Дадам, онам ва икки укам бор. Улар колхозда.

— Менга адресингизни беринг, колхозга ўзим хат ёзаман, уйингиздан хабар олишади.

Эмин «айбимни колхозга ҳам маълум қиласи, шекилли» деб ўйлаб, яна ҳам қизарди. Аммо Черницов бу ҳақда бошқа сўз очмади. Аксинча, у ўз атрофини ўраб олган жангчиларга траншеядан келаётган икки солдатни кўрсатди.

— Бизнинг батальонимизга бугун яна икки жангчи келиб қўшилди,— деди у.— Улар кадровик жангчилар. Икковини ҳам сизларнинг ротангизга тайинладик. Кутуб олинглар!

Ҳамма траншея билан келаётган икки жангчига қаради. Уларнинг бири йигирма ёшлардаги қотма, хипча йигит эди. Устидаги гимнастёркаси ёмғирда ювилиб, офтобда ўнгиб, оқарив кетган эди. Оёғидаги ботинкаси йиртиқ, обматкаси юлиниб кетган. Иккинчиси қораҷадан келган, ўрта бўйли йигит, қора кўзлари ўйнаб турибди. Улар ўзларини кутуб олиш учун саф чеккан жангчиларга салом беришди-да, кимга рапорт беришни билмай, иккиланиб қолишли. Кейин қотма йигит шеригини туртди. Қораҷа йигит Чернизовни кўриб қолиб, дарҳол честь берди.

— Ўртоқ комиссар...

Черницов унинг нима демоқчи эканини тушундида, дарҳол унга Қуценкони кўрсатди.

— Мана, старшина ҳам кутиб турибди сизларни. Ўтиинглар, кейин қабул қилиб олади. Қорин қалай? Овқатланасизларми?

— Раҳмат, штабда овқатландик,— деди қораҷадан келган жангчи.

Нормат уни овозидан таниб қолди.

— Эрали!— деб қичқирди Нормат. Эрали ҳам ўзини унга ташлади. Ҳамқишлоқлар қучоқлашиб кетдилар. Истроил, Эминлар ҳам у билан бошқатдан қучоқлашиб кўришдилар. Нормат қопчиғини очиб, бугунги норма иони, шакарини ўртага қўйди.

— Қапи олинглар.

Жангчилар янги сафдошларини ўраб олишиди.

— Қаерларда бўлдиларишгиз?

— Қаердан келяпсизлар?

Чегарада фашистлар билан биринчи бўлиб тўқнашган, олтмиш куну олтмиш кечада душман орқасида юрган бу жангчилар фашистларнинг бутун ваҳшийликларини ўз кўзлари билан кўрган эдилар. Эрали ўртадаги майдалаб қўйилган иондан бир бурдасини олди-да, ушатиб оғзиға солгач, ҳикоясини бошлади:

— Чегарага яқин жойдаги бир тепаликда уч кун жанг қилдик. Душман тепаликка чиқа олмади. Охири, икки томонимииздан ўтиб кетаверди. Биз яна ўн кун тепаликка қизил байроқ тикиб турдик ва ҳеч қаердан мадад келмагач, Қизил Армия қисмларига қўшилиш учун йўл олдик... Чекиниш кўп машаққатли бўлди. Ўрмон ичи билан юришга мажбур эдик. Ўқдори юкланган араваларнинг кўплари ўрмон балчиқларида қолиб кетди. Ўқдориларни отларга ортиб, қолганларини ўзимиз елкалаб олдик.

Арава тортган, юқ кўтарган отлар бўйинларини эгиб, шарпа чиқармасдан борардилар. Полкнинг чекинишидан қайғираётгандек, отлар ҳам кишинамасди. Қадрдан дублар, арчалар, қайнинлар ғамгинлик билан бош эгиб орқада қоларди. Ўрмон қушлари ҳам сайрамасди. Қишлоқлардан оҳу зорлар эшитилар, йўллардан қон ҳидлари келарди.

Полкимиз гоҳ душман қисмлари билан ёнма-ён, гоҳ уларнинг олдида, гоҳ орқасида юрарди. Гоҳо тўқнашиб,

Қаттиқ жанглар қиласы. Смоленск яқинида, ана шундай жангларнинг бирида, полк иккига ажралиб қолди. Кеинчалик кичик-кичик группаларга бўлиниб, шарққа йўл олдик.

— Қачонгача чекинамиз? — деди жангчилар.

Орқада, ёв қўлида қолаётган ўрмонларга, кенг дала, куркам қишлоқлар, айниқса у ерлардан кетолмай қолган аҳолининг тақдирига ачиниб, ўртанаардик.

Мен чекиниш машақатига бардош беролмай, политрукдан сўрадим:

— Яна неча кунгача чекинамиз?

— Номаълум, — деди у.

Шу дарё ёқасига келганимизда яна душманга йўлиқдик. Дарёдан ҳар ким ўз ҳолиша сузиб ўтди. Мана бу дўстим билан мен дарёдан ўтолмай қолдик. Шу яқиндаги қишлоққа нон сўраб бордик. Раиса деган бир қиз бизни шу тепаликка йўллади...

— Қаёққа? деб сўрасалар айтгани оғиз уялади, ўртоқлар, — деди Эралининг шериги — Ҳусейн, — қаергача ва қачонгача чекинаётганимизни билмаймиз. Одамлар, бизни ташлаб қаёққа борасизлар, дегандай тикилиб қарайдилар. «Қайтиб келамиз!» десак, кўплари: «Тезроқ!» «Тезроқ!» дегандай орқамиздан термулиб қолдилар. Одамнинг бадани живирлашиб кетади...

Ҳусейн Оға ўғли қўшимча қилди:

— Бахтимизга сизларни учратиб қолдик. Бўлмаса қўшинларни қидириб топгунча фифонимиз чиқар эди. Орқада қолаётган ҳар бир қарич ерга қовурғалар қайишиб кетади. Ҳеч ким ўз еридан чекиниш азобини тортмасин. Бас энди чекиниш! Тўйдик!

Жангчилар жим қулоқ солишиди. Черницовнинг хаёлида ҳам аллақандай тушунмовчилик, аллақандай ноаниқ мулоҳаза айланиб юрибди. Лекин ҳозир сабаб қидирадиган пайт эмас. Унинг олдида катта масъулият кўндаланг турибди. Яхиси у, комиссар Черницов, ана шу тўғрида гапирсын.

— Биз чекинмаймиз! — деди у, жангчиларга қараб, — Ватанимизнинг шу бир парча ерини қўриқлаш учун қолдирилганмиз. Биз шу ерда туриб, Москвани мудофаав қиляпмиз. Масъулиятимиз катта!

Шу чоқ тепаликнинг шимолий қанотидан бир мина чинқириб келиб ён бағирликка тушлида, ёрилди, темир парчалар тепадан визиллаб ўтди. Унинг орқасидан

яна икки-уч мина окоплар олдида портлади. Черницов миналар ёрилаётган томонга қараб сўзида давом этди:

— 119-тепалик биз учун биринчи ва охириги марра! Шу ерда ё қурбон бўламиз, ёки Москвани сақлаб қоламиз. Шу ерда барчамиз Ватан тупроғига қўшилиб кетсак кетамиз-ки, аммо душманни тепаликка чиқармаймиз. Кўприкни бермаймиз. Бу кўприк ҳужумга ўтадиган қўшинларимиз учун керак.

Черницовнинг сўнгги сўzlари жанчиларнинг қасамёди бўлиб жаранглади. Комиссарнинг хитобига рота жангчилари хор билан жавоб қилдилар.

— Қасамёд қиласми!

* * *

Черницов жангчилар олдидан узоқлашгац, Эмин Норматга:

— Кеча юрагимни ёрган эдинги, комиссар индамади-ку? — деди. Нормат унга бир хўмрайиб қаради-да:

— Комиссар айтмаган гапни мендан эшиш: агар яна шунақа қўрқоқлик қиласан, каллангни оламан! — деди.

— Даҳном бераверманг, Нормат ака,— деди Эмин,— ҳозиргина қасамёд қилдим! Қасамхўр эмасман!

Еттинича боб

СЛАВИК ТЎХТА ХОЛАНИНГ КЕНЖАСИ

I

Тўхта хола Холматни Уралга кузатиб қўйиб, сўрига ўтирди. Уйда ҳеч ким йўқ. Келинлар далада, неваралар боқча ва яслида, ҳовли жимжит. У ўзини эгаси кўчиб кетган ҳовлига кириб қолгандек ҳис қилди.

— Битта Холматимни қолдиришса нима бўларди?..

Холмат Тўхта холанинг тўнгич ўғли бўлиб, қирқ беш ёшларда эди. У отасидан йигирма ёшда қолиб, укаларини қўйинчилик билан боқдан. Тўхта хола чинакчиликдан йиққан паҳтасини кечалари йигирав, чарх олдида тонг оттиради. Холмат онаси йигирган ипдан кечалари пешма-пеш бўэ тўқиб, эрталаб бозорга олиб борар, гоҳ пуллаб, гоҳ нонга алишар ва гоҳ каппонда юриб мардикорлик ҳам қиласади. Холмат Совет ҳокимияти ўрна-

тилгандан кейин ер олди ва икки укаси билан ишлаб, хўжалигини тузатиб олгач, 1929 йили қишлоқда тузилган артелга кирди. Ўша вақтдан бери у колхозда. Укасининг бири фронтга, иккичиси канал қурилишига юборилди. Бугун эрталаб Холматнинг ўзи ҳам жўнади. Қишлоқ Совети раисининг: «Холмат, қалинроқ кийиниб ол, Уралга борасан» дегани кампирнинг ҳамон қулогида. «Уроли қаерда» дейди кампир, лекин ақли етмайди. У одамларнинг гапидан Урал фронтдан узоқ эканини ва тўнғич ўғли у ерга ҳунар ўрганишга кетаёттанинингина билади.

Бутун бошлиқ ҳовлида эркак қолмади.

Тўхта холанинг хўрлиги келиб, болаларининг отаси марҳум Жаббор акани эслаб йигига тушди. Жаббор ака ўлган вақтларда қора кийиб, аза тутиб юрган чоғларида ҳам у ўзини ҳозиргидек якка-ёлғиз сезмаган эди. Ҳамма унга: «Уч ўғлинг бор, нима ғаминг бор? Йиглама, болаларингни шукрини қил!»— дерди. Тўхта хола, болаларим отасиз ўксимасин деб, уларни ейиш-ичишдан кам қилмасликка тиришди. Мана, энди уч ўғил ҳам кетди. Улар қачон келишади? Қаерда юришса ҳам соғ бўлишса, қачон бўлса ҳам қайтиб келишса бас. Аммо, она кексайиб қолди... «Дийдор кўришамизми? Кўришамиз, ноумид шайтон!..»

Шу чоқ кимдир дарвозанинг ҳалқасини тақиллатди.

— Тўхта хола! Ҳой, Тўхта хола!

— Ҳа болам, келавер.

— Кўприк бошига чиқинг. Чақиришяпти.

— Холматнинг ўрнига ишга чақиришаётган бўлса керак.

Тўхта хола кўчада узоқдан бирин-кетин кетаётган икки кишининг қорасини кўрди. Улар шу қишлоқнинг кексалари эди. Тўхта хола уларга етиб олиш учун шошилди. Аммо қанчалик ошиқмасин, чолларга ета олмади, улар идорага кириб кетишли.

Тўхта хола кўприк бошига келиши билан раиснинг овози эшитилди.

— Юраверинглар, мана бу ёқда гаплашамиз.

Катта кўчани кесиб ўтадиган ариқ бўйида сершох тол тагига сув сепиб, бордон тўшаб қўйилган эди. Ҳамма шу ерга тўпланди. Баъзилар ёнбошлаб олишган, баъзилар чўкка тушиб ўтирибди. Тўхта хола бир чеккада ўтириб, тўпланганларни кўздан кечирди.

«Хеч ким қолмабди. Қексалар ҳам келишиби. Қодирали бу чолларни нима қиларкин-а?..»

— Сизларга маслағатим бор,— деб сүз бошлади Қодирали.— Маслағатим шуки, мана ўзларингиз кўриб турибсизлар, йигитларимизни фронтга узатдик. Үн киши каналга кетди. Кеча тўрт кишини Уралга жўнатдик. Кўчиб келган заводларга қизларни юбордик, кучимиз озайиб қолди, вазифамиз катта, юкимиз оғир...

— Ўша юкингдан пичасини бизга ҳам юклаб қўй, ўғлим,— деди ҳассаси билан ер чизиб ўтирган бир чол.— Кўтарамиз. Кўтармай иложимиз йўқ. Бошга тушса — кўз тортади, дейдилар. Юрт тинч — сен тинч. Юрт бошига тушган кулфат — сенинг кулфатинг. Анои уруш бўлаётгани йўқ, ўғлим. Ватаннинг вайронаси — умрнинг ғамхонаси. Аммо ойнинг ўн беши қоронғи бўлса, ўн беши ёруғ. Қоронғи кун мангу бўлмас. Ёруғликка чиқиб кетамиз. Ўша юкингдан пичасини менга ҳам юклаб қўй, ўғлим, кўтараман!

Унинг гапи қарияларни қитиқлагандек, ҳамма баббаравар қўзгалди. «Гулистан» қексалари, гўё кечаси билан маслағатлашиб чиққандек, бир-бирини қувватлаб гапира бошладилар.

— Бобонинг тол эккани — ўзига ном эккани,— деди иккинчи қария, ўрнидан туриб.— Ишингни кўрсатавер, ҳол-бақудрат қила берамиз. Дарё сувини баҳор тоширади, одам кучини меҳнат оширади. Ҳукумат бизни аяб, салқинда сақлаётган эди. Офтобга чиқсан, яна елкамиз исийди. Ахир, одамни пўстин эмас, иш қиздиради. Қекаликни унутиб, яна кучга тўлиб кетамиз.

Иккинчи чол гапини тугатар-тугатмас, учинчи чол ўрнидан турди.

— Бир тариқдан бўтқа бўлмас. Мен уйда қолганим билан бўрдоқи бўлармидим,— деди у, соқолларини оғзида ямлаб.— Мени ҳам ёз! Неварапаримга бош бўлиб, гўза чопиғига чиқаман. Кетмон кўтаролмасам ҳам, ёввойи ўт юлишим мумкин. Ҳеч бўлмаса, чой қайнатиб бераман уларга.

— Менга ҳам сўз бер, ўғлим.

Қодирали сўя сўраган ўз дадасига ўгирилиб:

— Марҳамат, марҳамат, гапиринг, ота!— деди унга. Ҳамма: «раиснинг отаси, саксонга сакраб, тўқсонга тирмашаётган чол нима дер экан» дегандай унга қулоқ солди.

— Султон сугини хўрламас, дейдилар. Мени сугим ана шу ишда қотган. Отхонани менга бер, бир амаллаб эпларман. Отбоқаринг бардам, бошқа ишга қўй уни.

Бу чол «Гулистан»дагина эмас, бутун водийда «чавандоз» номини олган улоқчи эди. Усиз улоқ қизимас эди. Нечаки марта от тагида қолиб, неча марта улоқда қамчидан қаншари ёрилиб, қанча марта қовурғаси синиб, бели букилса ҳам, отдан тушмаган эди бу чол. Отхонани унга топширмай, кимга топширади раис? От одамига тушса, олов бўлади, демаганмиди унинг ўзи?

— Мени пахтага ёз, болам,— деди яна бир чол,— ўлсан ҳам пахта ичидан ўрай!

Қодирали икки нарсадан беҳад хурсанд бўлди. Биринчидан, бўш қолган жойларни тўлдириш учун катта резерв топилди. Иккинчидан, чоллар кутилмаган даражада активлашиб кетдилар. Саккиз қават кўрпода оёғини узатиб ётган кексаларнинг бел боғлаб далага чиқиши — бошқаларга ўрнак. Колхозни тебратадиганлар ана шу кексалар улғайтирган жигарлар эмасми? Чолларнинг меҳнати унум бермаса ҳам, салобати, маслаҳати унум беради-ку!

— Раҳмат, отахонлар! — деди Қодирали. — Кўнглим тоғдай кўтарилди. Қаторда норинг бўлса, юкинг ерда қолмайди, деганлари шу. Сизларга суюнмасам, кимга суюнаман? Аммо, оғир ишда ўзларингизни олдириб қўясиzlар. Яхвиси, енгилроқ иш берайлик. Сизларни қариялар бригадаси деб атаймиз. Боғ, сабзавот, полиз сизларнинг ихтиёрингида бўлади. Маъқулми?

— Қани, бошла, раис! — деди Тўхта хола, ўрнидан қўзғалиб.

2

— Тўхтанглар! Тарқалманглар!

Эргашнинг овозини эшитиб, ҳамма катта кўчага қаради. Икки отли автокачка қишлоқнинг ўнқир-чўнқир йўлидан силкиниб-силкиниб келди-да, катта тол тагида тўхтади. Автокачкада бир нечта бола ўтирибди.

Нотаниш қишлоқнинг томи, деворлари ва дарахтига ҳайронликда қараб турган болалар бирин-кетин ўринларидан туриб, уюшган оёқларини ишқалаб ёзиб, ерга туша бошлидилар. Эргаш: «кел укам, тушариб қўяй» деди-да, тўрт ёшлар чамасидаги жажжи қизни бағрига ол-

ди. Кейин бошқалар ҳам болаларни аравадан бирин-кетин тушира бошладилар.

— Буларви нима құлмоқчисан, Эргаш?— деб сүради, оқ соқоли күксінга тушган бир чол.

— Бөгча очамиз. Райкомга неча марта ялиниб, колхоздан кафолат, тилимдан тилхат беріб олиб келдім. Эң яхши колхозға берамиз, дейишди. Үнча-мунча одамларни яқын йўлатишмади бу болаларга.

— Боғчанг-ку яхши-я,— деди салмоқдор оҳанғда ҳалиги чол,— лекин, ҳар ҳолда, ота билан онанинг меҳри бошқа. Бизга бер, болаларимиз қатори униб-ўссиң булаар!

Тўхта хола ранглари заҳил, кўзлари ич-ичига тушиб кетган болаларга ачиниб қаради.

— Булар кимлар?— деб сүради у Эргашдан.

— Етим болалар,— деди Эргаш,— фронтда ҳалок бўлганларнинг болалари...

Тўхта хола, ўзларининг тақдирини нима бўлишини билмай ҳомуш ўтирган болаларга қараб, кўзларига жиққа ёш олди. «Булар кимга нима гуноҳ қилибди? Қирон келсин ўша Гитлерга!» деди-да, одамларни ёриб ўтиб, чеккада бўйнини қисиб, бир нуқтага қараб ўтирган боланинг олдига борди.

— Юр, болам, мен сенинг онанг бўламан. Сен менинг болам бўласан, хўлми? Хўп де, болам!

Бола кампирнинг сўзларини тушунмаса ҳам, унинг иссиқ оналик меҳридан эриди-да, қувончдан сакраб ўрнидан туриб, кампирга ёпишди. Тўхта хола уни қучоқлаб, ўпди.

— Юр, уйга кетамиз, болагинам!

— Тўхтанг, тўхтанг,— деди қишлоқ Советининг секретари — чўлоқ Мамадали.— Бутун бошлиқ одамни юр деб, олиб кетиб бўларми? Ариза беринг. Ўзимнинг боламдек тарбия қиласман, деб тилхат беринг.

Кампирнинг жаҳли чиқди.

— Оппоқ сочим билан менга ишонмайсанми, болам. Мен сендақа болалардан қанчасини катта қилдим!

— Ишонаман, лекин ҳукуматга «бошим билан жавобгарман» деб тилхат беріб келгандман. Болаларни менга бер, менга бер, дегандан кўпи йўқ.

— Сенга ишонган ҳукумат менга ҳам ишонади. Тилимда бол беріб боқаман бу болани. Хўп десанг ҳаммасини олиб кетаман.

— Майли, Морозов сизнинг ўғлинигиз... шундай деб ёзиб қўямиз.

— Невараларим қатори ўсаверадилар.

Кампир йўлда кетаётиб меҳмон боланинг жингалак соchlарини силаб, аста сўради:

— Отинг нима, болам?

Бола тушунмай, Тўхта холага ҳайроц тикилиб қолди. Хола нмо-ишора билан тушунтира бошлади:

— Отинг... номинг... ҳалиги... нима десам экан-а?

Бола тушунди шекилли, жилмайиб жавоб берди:

— Славик.

— Нима, нима?

— Славик.

— Қўй, болам. Тилим келишмайди. Солижон деб қўя қолай, майлими?— Тўхта хола шу гапни айтди-ю, ўйланиб қолди.— Нега мен уни ота-онаси қўйган номдан жудо қиласканман? Иўқ, ўз номи билан ўссин, улғайсин!

Тўхта хола уйга келгач, Славикни сўрига ўтқазиб, олдига дастурхон ёзди; сутга ион тўғраб, олдига қўйди.

— Буни еб тур, болам, мен ака-укаларингни боғчадап олиб келаман.

Боғчадан келгап болалар уйдаги меҳмон болани кўриб, унга бир оз ётсишиб тикилиб туришида, кейин яқинроқ келиб, унинг овқат ейишини тамоша қилишди.

— Катта она, катта она, бу бола ким?— деб сўради Холматнинг ўғли Шерали.

— Уканг.

— Қанақа укам? Бупақа укам йўқ эди-ку?

— Илгарни йўқ бўлса, энди бор. Буларният уйини фашистлар тортиб олибди. Номи Славик. Менинг кеяжка ўғлим.

— Славик? Вой соchlари мунча чиройли! Қўзларини қаранг-al.. Жуда яхши бола экан. Қе, ўртоқ бўламиш!

Шералининг меҳрибонлигидан кампир жуда хурсанд бўлиб кетди.

— Славик уканг шунақа чиройли бола. Хафа қилмай ўйнанглар, хўпми?

— Хўп, ҳозир тўппончамни олиб чиқаман, фашистларни отиб ташлаймиз,— деди-да, Шерали уйга югуриб кириб кетди.

Тўхта хола боғ бригадасида бир неча кун ишлагандан кейин, бир куни кечқурун Славикни етаклаб Қодиралининг олдига келди ва ундан уч кунга жавоб сўради.

— Йўқ демагин, болам, Эрматни бир кўриб келай. Норматимга боролмайман. Холматимга боролмайман. Эрматимни кўрсатгин, худо хайр бергур, умрингдан барака топкур!

Қодирали, кампир болаларини жуда соғинганини сезиб онага илтифот қилди:

— Эрталаб гузарга чиқинг, станцияга борадиган аравага тушиб кетасиз.

Тўхта хола раисни дуо қилди:

— Умрингдан барака топ, болам илоё ғам кўрма!

Онасининг юзи-кўзидан қувонч тўкилаётганини кўриб, Славик ҳам севинди. Славикнинг назарида колхоз раиси унинг онасига қандайдир катта нарса илтифот қилгандек ва бу илтифотдан Славик ҳам манфаатдор бўлгандек эди. Қодирали кўзлари кулиб турган Славикнинг икки қўлидан ушлаб:

— Славка, акангнинг олдига борасанми? — деб сўради. Славик онасига бир қараб олгач, бораман, дегандек бош қимиратди.

— Бор, ўғлим, бор,— деди раис,— қариндошларингни кўриб, уларга ҳам ўзингни танитиб келасан.

Раиснинг яхши гапидан суюнган Славик икки қўлини чўнтакларига солиб, қизиқ туфлисининг учидаги майда тошларни тўл қилиб тепа бошлади.

— Юр, ўғлим, тараддулимизни кўрайлик.

Тўхта хола тонг отгунча кир ювди, супрасининг тагини қоқиб, озгира патир ёпди, кейин Славикни жомдаги илиқ сувда чўмилтирди. У тонг ғира-ширасида тугунини бошига қўйиб, Славикни етаклаб, гузарга жўнади. Катта келин қайнонасининг йўлига чиқиб:

— Йўл узоқ, кун иссиқ, ўзингиз ҳам қийналасиз, Славик ҳам, яххиси болани менга ташлаб кета қолинг, деди.

— Нега ташлаб кетаман буни,— деди кампир, келининг сўзини рад қилиб.— Белимнинг белбоги энди бу. Кўнгллам тўладими бусиз! Акасини кўриб, ёзилиб келади қўзичогим!

Гузарда аравакаш отини кўприк устида тўхтатиб қўйиб, араванинг ғилдирагига сув сепмоқда эди; Тўхта

холани кўриши билан сувдан чиқиб, пақирни араванинг тагига осиб қўйди-да, кампирнинг бошидаги тугунини олиб, аравага жойлади.

— Аравага чиқинг, хола!

Аравакаш араванинг шотиси, гилдираклари, гупчакларига қизиқиб тикилиб турган Славикка қўл чўзди:

— Ке, шер йигит, сени отга миндириб оламан. Отга минганимисан? Бошингни чайқашингдан от минмаганига ўҳшайсан. Ке, мин отга!

Славик эгарга ўтириб, «мана мен киммани!» дегандек дарҳол онасига қайрилиб қаради-да, чавандозлигини кўз-кўз қилди.

— Йўлингиз бехатар бўлсин, болам,— деди кампир, аравакашни дуо қилиб,— шу етим боланинг кўнглини шунчалик кўтаряпсиз! Илоё болаларингизнинг орзусига этинг!

Славик бир оз «аравакашлик» қилгач, эгарни ҳам, тизгинни ҳам, қамчинни ҳам эгасига топширди. Аравакаш уни тиззасига ўтқазиб олиб, отини қамчилади.

Арава чанг қишлоқ йўлидан чиқиб, катта тош йўлга тушиб олди. Станцияга олиб борадиган бу йўл серқатнов: арава, машинадан кўпи йўқ. Ҳаммасида оғир-огир юклар. Станцияни таниб бўлмайди. Поезд йўлнинг икки томонида аллақандай ускуналар ғарамланиб ётибди.

— Булар нимаси, болам?

— Завод, холажон. Үруш бўлаётган жойдан кўчириб олиб келишибди.

— Ҳай, болам, завод бўлса, шундай тўкиб-сочиб қўядими буни!

— Бу ерга адаш тушиб қолибди. Пахта заводи ёнига тиклашмоқчи экан, анжанликлар зўр чиқиб, ўша ёқقا олиб кетишаётган эмиш.

Пахта заводига яқинлашгач, арава тўхтади.

— Энди тушинг,— деди аравакаш, Тўхта холага қараб,— шу ерда ўтирангиз, каналга борадиган арава чиқиб қолади.

Аравакаш Славикни эгарга ўтқазиб, ўзи пастга тушди. Тўхта холани аравадан тушириб, тугунини тол тагидаги сўрига қўйди, сўнгра Славикни кўтариб олди.

— Ҳозирча хайр, йигитчал

Тўхта хола атрофга олазарак қараб турган эди, ўрта яшар бир жувон келиб қолди. Сочини иккита қилиб ўриб олган, икки чаккасига гажжак қўйган бу олифта жувон

түгүннин сүрига ташлаб бир «сұх» тортиб олғаң, Славик-ка қараб бақрайнб қолди. Кейин Тұхта холага қаради, яна Славикка тикилди, дам онага, дам болага қарайверди.

— Уят бўлса ҳам бир гап сўрасам майлими?— деди жувон, ниҳоят.

— Сўраңг, ўргулай, сўраганинг айби йўқ.

— Бу бола ўзингизни кими, ё...

— Ўзиминки. Кенжака ўғлим.

Жувон бир оз жимиб турғач, яна сўради:

— Исми вима?

— Славик...

— Славик? Кенжам дедингизми? Ўғил қилиб олдингизми?

— Ўғил қилиб олдим.

— Болангиз турмаганмиди?

— Худога шукур, уч ўғлим, икки келиним, уч неварам бор.

Нотаниш жувоннинг ранги оқариб, ҳасрат дафтари очилиб кетди.

— Боласизга тангриси ҳам, бандаси ҳам бермас экав. Йигирма йил турмуш қилиб, бола кўрмадим. Фарзанд деса жонимни бергим келади. Бормаган жойим, кўрсатмаган табибим қолмади. Тандирни қизитиб, ичига ҳам кириб ётдим. Электр дўхтирга ҳам кўрсатдим. Пешона экан, бола бўлмади. Бойимни кўп йўлдан уришди, бошқа хотин олиб беришмоқчи бўлишди, мени ҳам аврашди, «рози бўл, хотин олиб беришинг фарз» дейишди. Майли, олсан олиб берай, деб оғиз очиб, бойимдан балога қолдим: «Шунча йиллик рўзгоримга ўт ташлайманми!»— деди у ғазабланиб. Тилимни тишладим. Ўзганики бўлса ҳам ўғил қилиб олайлик, деган умидда бола қидириб юрибмиз...

— Узингиз қаерликсиз?

— Оқтепаликман.

— Районга ариза бердингизми?

— Кечикиб қолибман. Райкомга кирдим. Энг яхши колхозлар болаларни олиб кетишибди. Аризангизни Тошкентга юбордик, меҳмон болалар Тошкентда кўп, дейишди. Яхши ният билан аризамнинг кетидан Тошкентга ҳам бордим. Бола талаш. Бирам казо-казолар бола сўрашиб юрибдик! Менга йўл қаёқда! «Навбатингизни кутинг» дейишди. Навбатимни ўқиттирсам, яномимни бир соат

Қидиришди. Мен борган куни бир поезд етим бола келген экан-у тошкентликлар талашиб кетишибди. Қимлар дөң? Сатта беш-олтитадан боласи борлар. Ҳафсалам пир бўлиб, «пешонамнинг шўри қурсин, ўгай бола ҳам насиб қилмади» деб йиглаб-йиглаб қайтдим. Хат ёзамиз, деб қолиши. Ноумид шайтон. Келиб қолса, мени ҳам болалик бўлиб қоламан, деган умидим бор.

Шу чоқ заводдан бир буш арава чиқиб, канал йўлига қайрилди.

— Тўхта, болам, каналгами? Каналга бўлса, олиб кет бизни, худо хайр бергур.

Арава тўхтади.

— Чиқиб олинглар.

Тўхта хола тугунини бошига олиб, Славкани қучоқлаб аравага югурди. Аравакаш, кампир аравага чиққунча от устида хаёлга чўмиб ўтираверди. Кампирни аравага чиқариб қўймади, Славикни ҳам: «отга мис, шер йигит» демади. «Бегона одам экан бу амаки» деб ўйлади-да, Славик канал қурилишига етгунча снасининг тиззасида унинг бағрига бошини қўйиб, индамай борди...

4

Канал қурилиши урушдан икки ой илгари бошлангач эди. Уруш чиқиши билан қурилиш бир ой чамаси тўхтаб қолди. Июль охирроғида каналда иш яна қизитиб юборилди. Тўхта хола бу ерга келганида август охири бўлиб, авжি қурилиш кучайган пайт эди. У канал қурилишини биринчи марта кўриши. Катта тик ариқ. Икки лаби тог-тоғ тупроқ. Тўхта хола аравадан тушиб, каналнинг чап қирғонига уйиб қўйилган тупроқ тепасига чиқди. Чуқурликда, ҳар жой-ҳар жойда одамлар тўп-тўп бўлиб ер қазимоқда. Узоқдан одамлар чумолиларга ўхшайди. Кампир ҳар қанча тикилса ҳам, Эрмат кўринмайди. Бошида тугуни, қўлида кенжаси билан Тўхта хола тупроқ ўюмидан пастга туша бошлади.

— Ҳорманглар, болаларим! «Гулистон»ликлар борми шу ерда?

— «Гулистон»ликлар андек нарида,— дейишиди, кампирнинг саломига алик олган кишилар.

Кампир яша йўлда давом этди. Ҳали топталмаган ҳўл тупроқда юриш қийин эди. Унинг қадами остида тупроқ чўкиб, кампир бир-икки ерда муккасидан йиқилаётди. У терга пишиб кетди. Кейин Славикни билқил-

лаган тупроққа қўйиб, етаклаб олди. Славик югуриб юраман деб, тупроққа чўкиб, ортиқ юролмай қолди.

— Утири, бир оз дамингни ол,— деди кампир, Славикни бағрига олиб.

Улар энди ерга ўтириши билан, кимдир «она!» деб чақирди. Бу Тўхта холанинг ўртанча ўғли Эрмат эди. Эрмат онасининг келганини қулоқма-қулоқ эшитиб, шутомонга югурган эди.

Кампир ҳориганини ҳам унутиб, ўзини ўғлига ташлади, уни қучоқлаб ўпди, андек йиғлаб ҳам олди. Славик онасининг нега йиғлаётганини тушунолмай, хомуш ерга қараб турарди.

— Бу ким, она?

— Уканг, болам, уканг!

Эрмат онасининг гапига тушуниб, Славикни қучоқлаб олди.

— Ке, катта йигит бўлиб юрибсанми?

Славик Эрматнинг қалин соқол босган япалоқ юзига тикилиб қолди. Таниш одамга ўхшайди... Славик бу кишини қаерда кўрган? «Гулистан»дами? Йўқ-йўқ, боғчада мураббия ўқиб берган эртакдаги одам шу змасми? Суратини ким олган экан? Ўъла! Худди ўша паҳлавон шу! Қўлларининг йўғонлигини қара, белини кўр, камар калталик қилиб, чойшапни чирмаб bogлаб олипти...

Кампир Славикнинг ҳайрон қолганини кўриб, унга тушунтира кетди:

— Эрмат акант шу бўлади. Соқолидан қўрқма. Дадаси серсоқол эди. Дадамга ўхшайман деб ёшлигидан соқол қўйган. Қўрқма!

Славик Эрмат акасининг йўғон билакларини ҳавас билан силаб кўрди, кейин тупроқ уюмларини кўрсатиб сўради:

— Мана шуларнинг ҳаммасини сиз кавлаб ташлангизми?

— Йўқ. Озгинасини...

— Нега? Шундай полвон экансиз-ку!

— Бу ерда мендақа полвонлар кўп. Қани юр, шер йигит, капага кирайлик.

Тўхта хола билан Славик шу куни канал бўйинда, Эрматнинг капасида тунаб қолишибди. Она-бала кечаси билан гурунгланишиб чиқишибди. Славик уларнинг има ҳақда гаплашаётганини билмаса ҳам, «Гулистан», «Нормат», «Холмат» деган таниш номлар қайта-қайта

тилга олинганини эшитиб ўтириб, ўз-ўзича қувонарди. Кампир аллақандай нотаниш кишиларнинг номини ҳам тилга олди. Бозоров... Адолат... Соҳиб қори... У неңундир пиқ-пиқ йиглаб ҳам олди. Нимагалир Славикнинг ҳам йиғлагиси келиб, ўпкаси тўлиб, хўрсинди. Лекин онасига берган сўзи эсига тушиб, кўз ёшини ютиб, акасининг чопони устида ухлаб қолди.

Кечаси билан она-бала яна инималар тўғрисида гаплашганини Славик билгани йўқ. Аммо эрталаб Эрмат онасини уйга жўнатиш олдида айтганлари Славикининг эсида қолди.

— Қийин, жуда қийин,— деди Эрмат.— Фронтда бундан ҳам қийин бўлса керак, дебгина ўзимизни юпатяпмиз. Бир неча йигит кетмонини каналга ташлаб, фронтга жўнади. Овқатнинг танобини тортиб қўйишди. Канал чиқариб, сув очасан, янги ерларга пахтадан ташқари шоли, буғдой экамиз, ана ўшанда қорнинг нонга тўяди, деди райондан келган вакил. Кеча-кундуза ишланамиз. Бу ишдан фронтда жанг килган осоироқ, она Мени фронтга юборинглар десам, кўнишмади: «Сен яхши каналчи бўлиб қолдинг, қурилишни тамомлагач, Тошкентга кетасан» дейишияпти. Тошкентга яқин жойда катта канал, электр станция қурилади, деган гап бор. Мени фронтга кетмайдиган қилиб хатта солишибди.

— Худога шукур, болам,— деди кампир, кўз ёшлини артиб.— Ҳеч бўлмаса, сен ёнимда юр.

Агар канал бригадири Эрматни чақириб қолмаганди, она-боланинг гапи адо бўлмасди.

— Хайр, болам, энди биз кетайлик,— деди Тўхта хола ўғлита.— Келган-кетгандан дарак бериб тур. онангни ўртантирма!

Улар эрталаб юк машинада уйга қайтдилар. Эрмат уларнинг орқасидан: «Норматдан хат келса, менга хабар қилинг, она!» деганча қўл силкиб қолди.

Саккизинчи боб

ДАСТЛАБКИ ТУҚНАШУВ

I

З октябрь куни кечаси душман «Марказий» группасининг авангард қисмлари Чайка дарёси бўйига чиқиб, Қизил Армия кучларининг аръергарди билан тўқнашди. Ярим соатча давом этган отишув тўсатдан тўхтади. 119

тепалиги районида кечаси душманнинг ҳеч қандай ҳаракати сезилмади. Эрталаб, Москва вақти билан соат олтиларда, бир полкка яқин немис солдати ҳужумга ўтди, аммо бу ҳужум ҳам узоқ давом этмади, отишма яна тўсатдан тўхтади. «Марказий» группанинг қўмон-дони генерал Бюок: «Ҳеч қаерда тўхталмай, қаршилик қаттиқ бўлган жойни айланиб ўтинглар!» деб буюрган эди. Авангард қисмлар тепалкни четлаб, Юрьев батальонининг икки томонидан дарёни кечиб ўтдилар. Эрталаб етиб келган асосий кучлар ҳам тепаликка ҳужум қилмай, авангард кучлар орқасидан Орёлга етиб олишга шошилдилар. 119 тепалигининг қаршилигини синдириш ва иккинчи эшелон етиб келгунча кўприкни қўлга олиш вазифаси Генрих Грейдер полкига топширилди.

Полковник Грейдер 119 тепалигидаги рус аръергардига атака бошлиш олдидан ундаги кучларни, мудофаа системасини, унинг ўт очиш қурдатини ўрганмоқчи бўлди. У, катта гулкўрпага ўхшаган харитани столга ёзиб, унга энгашди. Генрих янги мундирининг чап чўнтағи тепасига қатор-қатор орден ленталари тақиб олган, узун бўйли сўйлоқроқ одам эди. У харитага энгашаркан, қотма юзи жиддийлашиб, қандайдир ташвишли кўринарди.

У, кўк қалам билан ўрдак тухуми шаклида ўраб қўйилган жойга тикилиб турди-да, оқиш соchlарини силкитиб, бошини столдан кўтарди.

— Нима қилар экан бу ерда улар? — деди у, ўз-ўзига.

Ажаб, шунча жойни ташлаб келиб энди шу бир парча ерга тирмашиб нима қилар экан улар? Москва яқини. Большевиклар Москва бўсағасида бор кучи билан бардош бермоқчи! Шу бир ҳовуҷ ерга хандақ кавлаб, юронқозиқдек бурканишидан, улар тепаликни бугун-эрта ташлаб кетмайдиган кўринади.

Генрих яна харитага энгашди. 119 тепалиги тактика жиҳатидан ғоят муҳим тепалик бўлиб, унга рўпарадан ҳам, ён томонлардан ҳам, орқа томондан ҳам атака қилиш қийин эди. Уч-тўрт километрга чўзилган тепалик ҳарбий-инженерлик санъати билан узоқ йиллар давомида қурилган мустаҳкам қальъага ўхшарди. Шу сабабдан Грейдер тепаликни кечаси ва эрталаб разведка қилдирди. Разведка маълумотига қараганда, бу тепаликни бир ҳамма билан қўлга олиш мумкин эмас эди.

Генрих Грейдер Берлин ҳарбий академиясида ўқиб юрган вақтида рус тилини, Россияни ўрганган эди. У

айниңса рус дарәлари, ўрмөнлари, ботқоқлик ерлариниң қызмети үргаади. У ҳарбий-инженерлик санъатининг энг сүнгги янгиликларини эгаллади, айниңса, дарә ва ботқоқлик ерлардан қўшишларни төз ва заарсиз олиб ўтиш усуулари билан танишди. Грэйдер «Барбаросса» плани тузилаётган чоқлардаёқ «большевиклар Россиясига қарши урушга тайёрман» деган барча офицерларни тўплаб, эсесчи қисм тузди. Мана энди ана шу кучлар ўша планни бугун тарозига солиб кўриши керак.

Грэйдер Фюрернинг таваккалчилик тактикасидан ўзгача тактика тадбирларини узоқ ўйлади. У тарозининг икки палласини ҳам баб-баравар кўздан кечириб, шундан кейингина тош қўядиган тактиканинг тарафдори эди. Бу жиҳатдан у ўз тенгқурлари ичидаги ажралиб турарди, Грэйдер 119 тепалигига ҳужум қилишда ҳам ана шу тактикани қўлланмоқчи бўлди. Аммо бу гал унинг планини ҳеч ким маъқулламади. Энди эса иккинчи эшелон яқинлашмоқда. Кўприк зарур, вақт зиқ. Грэйдерни шошилтиromoқдалар. Генрих оёғи тортмаётган жойга қадам ташлашга мажбур.

— Адъютант! — деди у, ёнбошдаги хона эшигига ўгирилиб.

Тумасидан этигининг қўнжигача ярқиратиб, ёшкина адъютант югуриб кирди.

— Шнапс!

Генрихнинг бир заиф томони шу эдикни, ёшлигидан ичкиликка муккасидан кетган эди. Айниңса, бирор нарсалан ранжиса, бошига бирор ташвиш тушса, шишага тикилиб қоларди. Унинг ҳозир тўсатдан ароқ сўраб қолганидан адъютант келгуси жангнинг шу чоққача ўтган жанглардан оғирроқ бўлишини тушунди. «Грэйдер жаноблари бекорга асабийлашмайдилар» деб ўйлади у. Адъютант ўз навбатида полковникнинг ординарецини чақириб топшириқ берди. Сал ўтмай, ичкарига ингичка бўлиб чўзилиб ординарец кирди-да, қўлидаги патнусни столга қўйиб, изига қайтди. Патнусда гулли биллур графин ва платина қадаҳ туради. Генрих графикидан қадаҳга ароқ қўйиб ичмоқчи бўлаётганда, қўзи Гитлерга тушиб қолди. Грэйдер бу уйга кирмасдан олдин унинг адъютанти Дашковка қишлоғининг энг яхши гиламини деворга қоқтириб, тўрга Адольф Гитлер портретини илиб қўйган эди. Гитлер полковника нима учундир қовоғини солиб, юзини буришириб қа-

раб турибди. Нега? Нега шоширяпти у? Фурсат, бир оз фурсат бер. Фюрер... Генрих иккинчи марта портретта қараганда Гитлер кулиб турганга ўхшади.

— Хайль Гитлер! — деди Генрих, қадаҳни баланд күтариб.

У, қадаҳни бўшатиб, яланиб-яланиб, яна қўлларини орқасига олди, кнопкани босди, олдида ҳозир бўлган адъютантнинг рапортидан кейингина, бармоғини кнопкадан олди.

— Шнапс!..

Графина бўш эди. Адъютант ҳайрон бўлди. Полковник ҳеч вақт бунчалик кўп ичмаган. Бир графинани бўшатиб, тағин ичмоқчи, «кутилматаң ҳодиса» дегандек, адъютант аграйиб қолди.

— Янами?

— Менгамас, солдатларга,— деди Грейдер.— Кўпроқ шнапс! Бўлмаса, тепаликка чиқиш қийин!

Атака эрталаб соат роппа-роса саккизда бошланди. Атакани олти оғизлик миномётлар ва артдвизион бошлаб берди. Соат тўққиздан ўн беш минут ўтганда дарё тепасида қоп-кора булутдек самолётлар пайдо бўлди. Полковник Грейдер ўз кузатиш пунктида туриб, стреотруба орқали жангни кўздан кечирди. Олти оғизлик герман минамётлари Грейдернинг энг севған қуроли эди. У Krakовни олишда, Витебскка ҳужум қилишда ана шу минамётларга қойил қолган. Шунинг учун ҳам у, генерал Шмидтдан узоққа отадиган замбараклар ўринига ҳам олти отарларни сўраган эди. Грейдернинг назаридаги, бу олти отарларнинг йигирма минутлик ҳужуми дарё қирғонини шудгор қилиб юборади. Ўрмон орқасидан кўтарилиб чиқсан бир группа самолёт 119-тепаликка яқинлашуви билан Генрихнинг ординареци ҳовлиқиб тилга кирди:

— Рюсь... капут...

Генрих нимагадир хурсанд бўлмай, ординареца га хўмрайиб қаради.

Бомбардимончиларнинг ҳужуми 15 минут давом этди. Бомбалар зарбидан дарё суени кўтарилиб қирғоққа чиқди, кўкка сачраган сувни шамол чангга аралаштириб узоқ-узоқларга учирив кетди. Бомбардимончилар қайтиб кетгач, қиравчи самолётлар пайдо бўлди ва бирин-кетин шўнғиганича окоплар тепасида пулемётлардан ўта оча бошлади. Самолётлардан сўнг танклар

ұужумға кирди. Үнинг орқасидан пиёда роталар құзгалди.

Генрих Грейдер стреотруба орқали жанг майдонига қаради. 119-тепалик үнинг бежо күзларынгүз катта темирбетон қалъата үхшаб күринди, гүё Грейдер әмас, балки худди апа шу тепаликкінде үзи ұужум қилаётганга, үнинг үзини босиб келаётганга үхшарди.

2

Қайилманинг чап ёнидаги окоплар олдида портлаган бомбалар түртта окопни бир-бирига құшиб юборди. Үртадаги окопдаги жангчиларнинг бири осмонга қараб чүзилиб ётарди. Қайилма атрофидаги окопларда ҳам учкиши ярадор бұлды. Душман артиллериясینинг снарядлари, ҳаво бомбардимони бир неча траншея ва окопни бир-бирига улайдиган йўлларни кўмиб юборди. Взвод билан ротани боғлаб турувчи телефон симлари узилиб қолди.

Немис қўмондошлиги артиллерия ва авиация ұжунидан кейин танкларни ишга солди. Тепалик яқиңида тутуни бурқсаб, шиддат билан югуриб келишаётган қопкора танклар күринди. Нормат танкларни санади: беш... олти... Уларнинг ерни ларзага солиб келиши жуда даҳшатли эди. Танклар орасида пулемётлардан ўқ узин, мотоциклли солдатлар келардилар. Танк ва мотоциклларнинг овози еру кўкни титратди... Гүё ҳамма ёқни душман танки ва мотоциклли босиб кетган, дарё ёқасидаги батальон олов ичиде қолган эди.

Танклар дабдаба билан яқинлашиб келаверди. Олдинги окопда кимдир: «бизни ўраб олишмоқда». деб қичқирди, лекин ҳеч ким унга қулоқ солмади. Бутун батальоннинг ғайрати, жасорати олдида бир-икки ваҳимачининг ноласи нима қила олар эди? Ваҳимачини ҳеч ким қувватламагач, үнинг үзи ҳам үз сўзига пушаймон еган бўлса керак, жимиб қола қолди.

Нормат танклар ұужумини кузатиб турди. Олдинда келаётган танк тўсатдан гир айланди-ю, кўндаланг бўлиб тўхтаб қолди. Қолганлари даҳшат билан ўрмалаб келаверди. Нормат танкка қарши гранатасининг капсиюни солиб, иргитиш учун қўл чўзган эди, кимдир уни тўхтатди:

— Шошилма!

Нормат траншеяда келаётган кишини таниди. У Черницов эди: комиссарнинг шу минутларда бу жойда пайдо бўлиши Норматнинг юрагига мадор бўлди. У яна олдинга, немислар томонга ўгирildи.

— Гранатангиз қани?— деб сўради комисsar, Норматнинг ёнида турган Эмин Ражабовдан.

— Шеригим гранатага кетган эди, дараги йўқ.

Эмин Ражабовнинг рангги оқариб кетган эди,

— Қўрқяпсизми?— деб сўради Чернизов.

— Йўқ, ўртоқ комисsar, қўрқмайман, аммо гранатам қолмади. Танкларнинг кети кўринмайди...

— Анови танкни кўрмаяпсизми?— деди комисsar.— Унга катта радио карнайини ўрнатиб қўйишибди. Танклар юрганда, ўқ отганда, уларнинг шовқин-сурони радио карнайи орқали узоқ-узоқларга тарқалади. Худди ўн-ўн беш танк келаётганга ўхшаб ваҳима солади... Баъзи бир чумчук юраклиларни қўрқитиш учун қилинган иш бу!

— Бизда битта ҳам танк кўринмайди-ку...

Нормат унга: «ваҳима қилмасантчи, Эмин!» демоқчи эди, немислар кўриниб қолди.

— Огоны!— деди Чернизов.

Нормат душманга ўқ уза бошлади. Бутун взвод, рота ўқ узди. Душманни яхшилаб қарши олиш пайти келган эди. Танклар орқасидан эргашиб келаётган душман солдатларига икки томондан ўт очилди.

Кимdir, артиллеристлардан бири, 76 миллиметрлик тўпни судраб келиб, Нормат окопининг ёнига ўрнатдила: «биринчи танкка оғопы!» деб қичқирди. Тўп командирининг кейинги командаларини мутлақо уқиб бўлмади, артиллеристларнинг шовқини, снарядларнинг портлаши билан Норматнинг қулоғида тўхтовсиз чинқириқ пайдо бўлди. Норматнинг назарида кўкнинг бир парчаси ерга қулаб тушгану ундаги булувлар яна фалакка кўтарилиш учун интилмоқда эди. Тўплар оғзидан отилган ўт парчалари осмонинг момақалдириғи, чақмоқларига ўхшарди.

«Кўзингни очиб қара, Нормат, сен жанг майдонидасан». Нормат пешонасига ёпишган лой юқи терларини артиб, атрофга қаради. Унинг кўзига ўрмон тутаб куяётгандек бўлди. Шарқдан, Чайка томондан эсган шабабда тутунларни ҳайдагач, яна жанг майдони кўринди... Душман пиёда аскарлари танклардан ажралиб ерга ётиб олиди, бош кўтаролмайди.

Шундан кейин Нормат янада ўзини дадиля сезди. Узи ёғдирган ўтдан ер тишләб ётгас солдатларни ўз күзи билан күрди. Радио карнайи осимб олгас танк түхтади-да, бир оздан кейин алангаланди. Шовқин бўшашди. Эмин ҳам бу манзарани кўриб жилмайди. Ў кўзи билан кўриб, қулоғи билан эшитиб, комиссарнинг айтгапларига ишонди.

Жанг кечгача давом этди. Ҳужум қилган танклардан фақат иккитаси орқага қайтди. Қолгавлари дарё ёқасида қолди. Мотоциклли солдатларнинг ярмиғияна орқасига қайтиб кетолди.

Жангдан кейин Черницов яна Эминнинг ёнига келди.

— Ким кучли экан? — деди у, Эминга қараб.

Эминнинг буғдой ранг юзига шодлик нурни ёйилди.

— Мард кишидан ўлим ҳам кўрқади, — деди комиссар, — ўқ ҳам қайтади. Биз бугун, ўлим олиб келаётгани танкларга кўндаланг турдик. Ажал биздан қочди. Биз яна ўз окопларимизда қолдик. Ўтган сафар немисларни кўриб ўзими йўқотиб қўйган, тажрибасизлик қилган Ражабов бутуя ёмон жанг қилмади. Мана, Нормат Жабборовни олайлик: бир фашистни мотоциклдан афдарди, яна бир солдатни ер тишлатди. Бу менинг ўз кўзим билан кўрганларим, холос...

3

Черницов штабга келиб, Юрьевнинг тажанг бўлиб ўтирганини кўрди.

— Юқори штаб билан алоқа йўқ. Бомбардимон вақтида телефон симлар узилиб кетибди.

— Радио-чи? Радиони ишга солиш керак.

— Энг яхши радиостларимиз ишдан чиқди. Бошқалари «ту-ту-т-ту» қилади-ю армия штабини тополмайди. Юрьев тобора тажанглиги ошиб, сўзида давом этди:

— Душман дарёдан кечиб ўтибди. Кўприкнинг нариги томонида ҳам немис... Иўл берк! Москва — Смоленск йўли ҳам, биз турган йўл ҳам кесилиб қолибди.

Юрьев палиросини тутатиб қуюқ тутунларини ютаркан, харитадан кўзини олмай, гапида давом этди:

— Демак, батальонимиз қоп ичидаги қолган бўлиб пикади...

— Қўмандонликдан буйруқ борми? — деб сўради Черницов.

— Кўмондон: «Тепаликни қўлдан бермангиз!»— деди.

Черницов кўк ва қизил қаламлар билан безаб ташланган харитага қаради.

— Душманин бу жойдан ўтказмаймиз. Қечаги жанглар менда ана шупдай ишонч ҳосил қилди.

Черницов генерал Погодиннинг айтганларини эслади. Ҳақиқатан ҳам батальон зиммасига катта масъулият юкланган.

— Чекинмаймиз. Охирги томчи қонимиз қолгунча курашамиз! Нима дейсан, Иван Петрович?

— Чекинмаймиз!— деди Черницов.

4

«Хат ўқигани қўл тегмайди» дер эди Нормат. Мана энди бугун у бемалол мириқиб ўқиши мумкин. Батальон душман атакаси тақрорланишини кутиб, оғир ва тенгсиз жангларга бардош беришга, ўзи контратакаларга ўтиб, ёвга оғир талафот еткзишга ҳозирланиб турди, мудофаани соат сайин мустаҳкамлай берди. Фашистлар эртаси кун атакани тақрорламади. Улар қаттиқ қаршилик кўрсатилган жойларни орқада қолдирив, унинг атрофидан айланиб ўтиб кетавериш билан ўзини юпатди. Хуллас, Юрьев батальони фашист қўшинларининг анча орқасида қолиб кетди.

— Наряддагилардан бошқаларга дам берилсин.— деди Юрьев, тепалик гарнизонини айланиб чиққандан кейин.

Тургенев отделениеси бугун кечаси билан блиндажда дам олиши керак. Аммо ҳеч кимнинг кўэзига уйқу келмайди. Ҳар ким ўз иши билан машғул. Нормат бундан бир ой илгари қадрдан дўсти Эргашдан келган хатни ўша кунлари неча марта ўқиган бўлса ҳам, ҳозир яна ўқимоқчи бўлиб, гимнастёркасининг чап чўнтағидаги конвертни олди. Ёмғир сувида ва терда ивиган қофоз сарғайиб, ҳарфлари ёйилиб кетган. Бу хат Норматга қишлоқдан келган бирдан-бир дарак. Эргаш хатида, Нормат фронтга жўнагандан кейин, унинг ўринини Адолат эгаллаганини, дашт бригадасига бошлиқ бўлиб, Норматнинг ишини давом эттираётганини ёзган. Адолат Нормат ўстирган ўззаларни вояга етказиш учун куч аямаётгани хатда алоҳида айтилган. Хатнинг охира: «Адолат ғалаба билан қайтишинги кутаётир» дейилган.

Нормат фронтга келгандан бери мәҳрибон онаси ва қадрдан акаларидан хат олгани йўқ. Шу чоқ Норматнинг хаёли довонлар оша кекса онаси, севимли Адолатни қидириб кетди...

«Меваларни йигиштириб олдимикан, онаи зорим?— деди у. ўз-ўзига.— Узумни узиб олгандир, ёнгоқни келин ойилар қоқишиб бергандир. Беҳининг иши осон. Анор қийнайди онамни. Анор серташвиш нарса: уз, сарала, ташиб ол, анор тупини ерга кўм... Хотин кишининг иши эмас бу. Шу кунларда ташвиши зўрайиб кетди онамнинг. Акамлар ҳам йироқда. Ҳеч бўлмаса, Эрмат акам уйда бўлганида эди, кампирни букилтириб қўймасди. Қийин, қийин онам бечорага. Менинг ташвишим ҳам еб ташлайди уни! Бундай қарасанг, кимга осон шу кунларда... Адолатга ундан ҳам қийин. Қипяланғоч қақирда қизларнинг ўзи қолди. Уларнинг гамхўри ҳам ўшанинг ўзи. Қизлар унга қулоқ соладими, ёки энсасини қотирадими? Бегимхоннинг ноз-карошмаларига бардош бериб, уни ишга сололадими Адолат? Эргаш, Адолат ишни яхши эплаяпти, депти-ку! Бирорга сўзини ўтказадиган қиз у! Сўз бермаганини йўлга солиб берадиганлари ҳам бор. Аммо Соҳиб қори билан Бозорвлар унга киshan бўлмасалар бас эди! Эҳ, Адолат, Адолат, ваъдангда турибсанми? Бошингни Бозорвлар айлантириб қўйишмадими? «Фақат сизни кутаман!.. Фақат сизни кутаман!..» Ёдингдами шу сўзларнинг? Сенинг бу сўзларинг ҳозир ҳам қулоғимда жараинглаб турибди. Кут! Фақат чидам билан кут!»

Тўсатдан «салом, ўртоқлар!» деган овоз эшистилди. Бу Черницовнинг таниш овози эди. Жангчилар қатори, Нормат ҳам сакраб ўрнидан турди.

— Салом!

— Ўтиринглар.

Комиссар жангчилар ўртасига келиб ўтирди. У, Тургенев отделениесининг блиндажини кўриб севинди...

— Одам қўли гул. Мана энди олти отари тугул мартери ҳам ололмайдиган бўлти!

— Бу, ҳам уй, ҳам қалъа!— деди Тургенев.

— Тўғри, ҳар бир қарич жойни қалъага айлантириш керак!— Черницов бу сўзларни алоҳида уқтириб айтди ва ҳаммани бир-бир кўздан кечирди.— Бугун кавлаган окопларингизни кўрдим. Агар ҳар куни мана шунчадан кавлайверсаларингиз, 7 ноябргача хандақлар

орқали ер ости йўл билан Берлинга бўриб қолишимиз
ҳеч гап эмас!

— Берлингача дейсизми?

— Берлингача!

— Демак, энди чекинмаймизми?

Черницов мамнун жилмайди.

— Буйруқ бор... Олий Бош Қўмондонлик жангчиларни ташаббусчи бўлишга чақиради. Бу — мен фақат солдатман, деб ўйлама, сифир пайтларда ўзингни генерал деб бил, маршал деб бил, бутун мамлакат учун, жавобгар кишинман деб бил, мамлакатнинг хўжайини сенсан, дегани!

— Ҳақ гап шу! — деди Тургенев.— Мамлакатнинг хўжайини ким? Ишчи! Яна ким? Деҳқон! Ишчи ким? Мен, Тургенев! Деҳқон ким? Нормат, Эмин! Давлатни тиқлаб, суюб турувчи ҳам, уни кўкларга кўтарувчи ҳам ўзимиз. Ўнинг нонини еб, тузини ичаётган ҳам ўзимиз. Шартия биздан нима талаб қиласа ҳам ҳақли!

— Партия: «Тўхта!» деб талаб қиляпти. Бу «Тўхта!» винг маъноси буюк. Фашистлар тўсатдан ҳужум бошлиди. Биз мамлакат ичкарисидаги қисмларни чегарага тўплай олмадик. Биринчи кунларда тенгсиз жанглар бўлди. Ҳозир аҳвол бошқача. Ичкаридаги қисмлар етиб келяпти. Бизга ўхшаган сал илгарроқ келган қисмлар душманни тўхтатса, ўша янги қисмлар келиши билан партия: «қўзғал!» дейди. «Фарбга қараб, фақат олдинга қараб қўзғал!» дейди. Орқамизда Москва турибди. Агар биз гов бўлолмасак, душман наизаси Москвага санчилади. Москва эса мамлакатимизнинг юраги. Юраксиз яшаб бўлмайди!

— Севимли Москва учун бир жон эмас, ўн жон берсан ҳам майлига! — деди Нормат ўрнидан туриб.

— Севимли Москва учун ўлишга тайёрмиз! — дейишди жангчилар.

— Ўлимдан гапирманглар! — деди Черницов ҳар бир сўзини чертиб.— Москва ҳимоячилари ўлмайди! Москвани ҳимоя қилишдек масъулиятли ва шарафли иш турганда, кимнинг ўлгиси келади! Фронтда ўлиш осон гап, аммо биз осонликча ўлмаймиз. Биз осонликча ўладиган кишилардан эмасмиз!

Мен ёшлигимда боксёrlикни яхши кўрадим. Ҳавас қилиб тўгаракка кирдим. Тренер менга қўлқоң берәтиб: «юрагингни сақла!» деди. Машғулот вақтида ҳам, ҳақиқий кураш вақтида ҳам «юрагингни сақла!»

дер эди у. Гоҳ маҳалларда кучли ва бадтарин «душман»га рўпара келиб қолардим. Уриб ҳамма ёғимни шиширади, бурнимдан қора қон келарди. Аммо юрагимга мушт тегизмас эдим.

Черницов чўнтағидан папирос қутисини олиб, секин очди, бир дона папирос олиб, икки томонидан пуфлаб, лабларига босгач, гугурт чақди. Папиросни چекиб бўлгач, унинг сўнишини кузатиб туриб, деди:

— Москва — Ватанимизнинг юраги!

Тўққизинчи боб НОРМАТНИНГ ФОИИБ БУЛИШИ

/

Нормат блиндаждан чиқиши билан кўкда чалқанча ётиб олган уч кунлик нафис ойни кўрди. Кўкни қоплаб олган саноқсиз юлдузлар қозонга ёпишган учкушлардек йилтираб турибди. Тун жимлигини самолёт моторининг узоқдан келаётган бўгиқ товуши бузмоқда. Нормат бир оз қулоқ солиб турди. «Овози таниш, ўзимизнинг совет самолёти!..» Нормат осмонга тикилиб, самолётнинг қаердалигини аниқлай олмади. Бир оздан кейин Ильичёвкада, сўнгра қўшни қишлоқларда немис гарнizonларининг зенит тўплари тилга кирди. Ҳавода моторнинг уни ўчди, яна пайдо бўлди, яна ўчди. Нормат блиндаж тепасига чиқиб олиб, зулмат қўйнига тикилиб қаради, диққат билан қулоқ солди. Мотор яна гуриллай бошлади. Бу гал зенит тўпларининг снарядлари тепалик устида портлади.

— Совет самолёти! Ўзимизнинг самолётимиз!

Норматнинг бу овози яқин блиндажларга етиб борди, постлардан ҳам сигналлар келди. Бутун батальони самолётнинг тепаликни қидираётганини билди, душман зенитига чап бериб манёвр қилаётганини тушунди.

— Оқ чойшап олиб чиқинг! — деб буюрди Морозов, ёнидаги жангчи Великанга.

Великан старшина блиндажидан офицерларга атаб олиб юрилган иккита оппоқ чойшапни кўтариб чиқиб тепаликнинг очиқ жойига ёзди. «Т» ҳарфини ташкил қилган оқ сигнал атрофида айланган самолётга қараб штаб томонидан кимдир ракета отди. Самолёт душман зенит снарядларидан ўзини панага олиб, баланд кўта-

рилди-да, ости чироғини ёқди-ю яна дарҳол ўчириди. Бу — совет самолётларининг Қизил Армия қисмлари устидан ўтаётганда берадиган сигнални эди.

Жангчилар севингланларидан чапак чолиб, самолётга қўл чўзиб имо қилиб, уни пастга таклиф эта бошладилар. Учувчи буни кўрдими, йўқми, ҳар ҳолда, шу маҳал самолётдан бир оқ нарса узилиб тушди-да, шамолда чайқалиб, пастга интилди. Кейин снарядлар 119 тепалигига интилаётган парашют атрофида ёрила бошлади. Бир оздан кейин оқ шойи сўниб, ғужмайди, сўнгра қорайиб кўрингган юк тошдек пастга шўнгидида, гурс этиб ерга тушди.

— Қаерга тушди?

— Қаерга?

Кўпrik олдидаги постларнинг хабарига қараганда, самолёт ташлаган юк немислар мудофаасининг чап қанотидаги окоплардан бирига тушган. Юрьев бу хабарни аниқлаш учун барча постларга телефон қоқди. Тепалик мудофаасининг шимолий қанотидати постлар: «парашют бетараф зонага, Варшавканинг нариги ёғига тушди» деб хабар қилдилар.

— Координатини айт! — деб Юрьев телефон трубка-сига қичқирди.

— Шоҳи синган катта қарағайдан ўн метр ғарбда...

Юрьев телефон орқали бўйруқ берди:

— Парашют яқинига ҳеч кимни келтирмал! Ўша ерни тўхтовсиз ўқса тут! — Кейин у, чап қанотдаги тўплар батареясига, сўнгра минамёт взводига буюрди: — 26/36 районига огоны!

Олдин минамётлар, кейин тўплар тилга кирди. Юрьев мина, снарядларнинг қаерларда ёрилаётганини аниқлашни буюрди.

— Методичний огоны! — деди Юрьев ва ёнидаги Морозовга буюрди: — Взвод олиб бор!

Сўнгги командадан кейин снаряд ва миналар навбатма-навбат, сийракроқ, лекин тўхтовсиз портлаб турди.

— Взвод тайёр! — деди Морозов, капитанга рапорт бериб.

Юрьев ўрнидан турди-да, қўли билан парашют тушган томонни кўрсатди.

— Юк душман қўлига тушмасин. Операцияни шахсан ўзинг бошқар. Ўлжасиз қайтма!

— Есть!

Морозов бир взвод билан парашют тушган бетараф зона томонга жүнади. У, йўлда парашют тушган жойни бинокль билан кузатиб борди. Тўсатдан оптикада немис солдатлари кўриниб қолди. Улар ҳам ўлжани олишга шошилар эдилар. Морозов уларнинг йўлини тўсиш учун қичқириб команда берди:

— Огоны! Огоны!

2

Полковник Грейдер совет самолётидан парашютда ташланган юкни дарҳол штабга келтириш тўғрисида олдинги позициядаги бўлинмаларга буйруқ берди. Капитан Краузе ротаси окопларидан кўтарилиб, ўша томонга эмаклаб кетди. Штабла саросималик бошланди...

— Улжа олиндими?

— Совет самолёти нималар ташлабди?

Грейдер тепаликдаги совет кучлари тўғрисида аниқ маълумотга эга эмас эди ва шу сабабдан қамалдаги совет солдатларининг фронт билан қандай алоқаси борлигини билишга қизиқарди. У самолётдан ташланган юкни ўқ-дори, озиқ-овқат билан бирга, албатта, қамалдаги кучларга бирон қўлланма бўлса керак, деб ўйлади. «Большевикларнинг қўлига тушган ҳар бир ўқ герман империясини яралashi мумкин, совет солдатига бериб қўйилган ҳар бир плитка шоколад бизга қарши қўйилган батарея билан тенг»— дер эди Грейдер.

119-тепаликнинг самолёт орқали мунтазам қисмлар билан алоқа боғлаши айниқса Грейдерга қўрқинчли бўлиб туюлди. Шунинг учун у, бетараф зонага тушган юкни олиш операциясига шахсан ўзи раҳбарлик қилди. У, рота қўзғалиши билан, рация олдида туриб олди. Грейдер:

— Вазиятни айт!. Нима ҳодиса?. Вазиятни айт!— деб бақирав ва ҳар сафар бир хилда жавоб оларди:

— Алангада қолдик, қаршилик зўр...

Грейдер папиросини тутатиб, ташвиши зўрлигиданми, адъютантга яна бақирди:

— Шнапс!

Грейдер бир рюмка ароқни ютиб, яна рацияга қичқира бошлади:

- Вазиятни айт!.. Юк олиндими?
- Рация минбрамидан Краузенинг бўғиқ овози эши-тилди.
- Жа... жаноб полковник!..
- Дудуқланма, буйруқ бажарилдими, йўқми?.. Уят! Бутун бошлиқ рета битта яшикни қўлга ололмаса, уят!
- Тупроққа қоришиб кетяпмиз..
- Ҳозир танклар боради. Қаттиқ тур, ўлжани берма!

* * *

Капитан Юрьев бастараф зонада икки немис танки пайдо бўлгани тўғрисида хабар олгач, 76 миллиметрлик бир тўпни прямой наводкага қўйишни буюорди.

- Тургенев қаерда?
- 26/36 координатда, душман взводининг йўлни тўсиб турибди.
- Шу координатга яна бир отделение ташла!
- Есть!

Лейтенант Морозов Тургенев отделениесига ёрдам юборолмади. Унинг чап томонидан ўтган бронетранс-вортёр йўлни тўсиб олиб, Морозовнинг авангардини ўқ-қа тута бошлади. Иккита танк пана жойдан тўп отмоқда. Морозов яна телефонга келиб, вазиятни Юрьевга гапириб берди. Юрьев аҳволнинг оғирлигини сезиб, тўртинчи ротанинг яна бир взводини жангга солди.

- Битта ҳам патрон душман қўлига тушмасин!
- Жанг узоқ давом этди. Парашют тушган жой неча марта қўлдан қўлга ўтди-ю, аммо азбаройи ўтнинг даҳшатидан ундаги ўлжани ҳеч ким ўрнидан қимирлатолмади. Юрьев вазиятни ўз кўзи билан кўриш учун олдинги позициядаги взводга келди.

— Ана, ана ўша!..— деди взвод командири Кузенко, қўлини чўзиб, ўша ерда ётган икки яшикни кўрсатаркан.

Юрев окоп лабига суюниб, икки қарагай оралигидан рўпарадаги майдончага қаради. Шохлар синиб, пўстлоқлари арчилиб кетган, ўқ ва снаряддан танаси титилган қарагайлар тагида икки нарса қорайиб турибди. Юрьев биноклни филофига солди-да, Кузенкога қаради.

— Оламизми?

— Оламиз! Менга чап томондаги танкнинг унини ўчириб берсангиз бас!

Юрьев телефон трубкасини олиб:

— «Ураган!» «Ураган!» Мен «Москва», мен «Москва» — деб қичқирдида, керакли кишининг овозини эшигач, буюрди: — Яна бир тўпни ишга сол!

Бир оздан кейин Куценко жангчилари атакага кўтарилиди...

3

Капитан Юрьев қўлини орқасига қилиб, кузатиш пунктининг блиндажини айланиб юрибди. Морозовнинг телефонда берган хабарига қарагандан Куценко взводининг тақдири номаълум. Немислар контратакага ўтиб, взводни ротадан ажратиб қўйган. Узоқ-узоқларда бир қанча вақтгача отишмалар эшитилиб турди-ю, кейин тиниб қолди. Бу жимлик хатарли эди. Грейдер Морозовнинг энг яхши взводини қуршаб олиб, тор-мор қилиши мумкин эди.

— Батальонни оёқقا турғизиш керак,— деди Юрьев, блиндажга кириб келган Черницовга.

Черницов гўё ҳеч қандай хавф-хатар йўқдай, шинелини аста счиб, эшик олдидаги тўсинга қоқилган михга илиб қўйди, гимнастёркасининг чап чўнтағидав майдатишли тим қора тарогини олиб, сочини таради. Кейин, стол ёнига келиб, комбат ёйиб қўйган харитага ўйчан тикилиб қолди. Унинг мунчалик вазминлиги Юрьевга ёқмади. Вақт зиқ, вазият хавфли. Юрьевни безовта қилаётган нарса нега уни ташвишлантирмайди энди? Бундай пайтда салмоқдорлик кетмайди. Нега тушуммайди буни комиссар? Черницов Юрьевнинг безовта бўлаётганини, тез жавоб кутиб, узоқ пойлаб қолганидан ранжиётганини тушунди. Аммо Черницов командир ўртага ташлаган масалага очиқ-ойдин жавоб беришга тайёр эмас эди. Бутун батальонни ҳозир жангга кўтариш керакми, йўқми, деган масала уни ўйлатиб қўйди. Лекин Юрьевнинг феъли унга маълум. Агар унинг саволига дарҳол жавоб қилмаса, Юрьев ўт бўлиб кетиши мумкин.

— Андек сабр қиласилик, Федор Петрович,— деди Черницов ва яна харитага тикилди.

Юрьев ўзича «ҳарбий харитадан нимани қидиряпти бу одам» деди-да, чўнтағидан папиросини олиб, тутаби чека бошлади. Черницовнинг бу ишини у «ортиқча қайсарлик» деб тушунди ва кечагина шинель кийган Черницов, ҳарбийда тиши чиқиб, ҳарбийда балоғатга етган капитанга тактикадан дарс бермоқчи, деб ўйлади. Бу унга алам қилди.

— Нега қайсарлик қиласиз, ўртоқ комиссар?..

Черницов харитадан кўзини олиб, Юрьевга боқди.

— Ўтилинг,— деди Черницов, унга мулойим қараб.— Ўтилинг, вазиятни аниқлаб олайлик.

— Нимани аниқлаймиз, ҳамма нарса аралашиб кетди. Бир взводимиз душманга ем бўлиб ётибди. Уни Грейдер икки оёғининг ўртасига олиб ғажияпти.

Черницов столга хиёл әнгашиб ўтирган эди, Юрьевнинг қийналётганини кўриб, ғозланди, унга тик боқиб, қатъий бир вазиятда гап бошлади:

— Аҳвол сиз ўйлагандан ҳам оғир, ўртоқ капитан. Борди-ю, ҳужумга ҳам ўтдингиз, у ҳолда ҳар қадами-игизда минг хил кутилмаган ҳодиса пайдо бўлади. Ҳамма иш чаппасига айланаб кетиши мумкин. Чап қанотимиз ҳам нотинч. Ким билади, Грейдер нима қилмоқчи? Қўли-мизда ҳеч қандай маълумот йўқ. Батальонни кўтариб ўнгга бурилсангиз, Грейдер чапдан тепаликка чиқиб олади... Унда нима қиласиз? Ўйлаб қадам босиш керак, ўртоқ капитан!

Юрьев ўйланиб қолди. У, Черницовда бутун батальонни, шу жумладан Юрьевнинг ўзини ҳам ушлаб тураладиган қандайдир куч борлигини сезарди. Бу куч Черницов тарбиялаётган, кундан-кунга кўпайиб бораётган батальон партия ва комсомол ташкилотларининг авангардлигидами, ёки унинг кўп ёшия яшаб, партия ишида чиниқиб, идрокли, иродали бўлиб етишганлигидами, ҳар ҳолда, Черницов ҳарбий киши бўлмаса ҳам, тадбирли киши бўлганидан, Юрьев унинг қудратига ишонарди. Шунинг учун ҳам Юрьев унинг маслаҳатига қулоқ солишга мажбур бўлди.

Юрьевнинг бундан чиқарган хулосаси шу бўлдики, у дарҳол разведка уюштиришга жиришди, кузатув пунктларининг хабарларили тўплади, Морозовнинг сўнгги маълумотини синчиклаб ўрганди. Шу вақт унинг бахтига партизанлар отрядининг рациясидан хабар келиб қолди. Партизанлар, немисларнинг бир баталь-

онча аскари чап қанотдан күчиб, Ильичёвка орқали шарққа томон йўл олганини хабар қилдилар.

Юрьев югуриб блиндаждан чиқди-да, кузатув пунктидан дурбинда қараб турган Черницовнинг олдига борди.

— Янгилик! Янгилик! — деди Юрьев қувониб. — Генерал Шмидтнинг қуюшқони тор келиб қолганга ўхшайди. Чап қанотимиздаги солдатларини Москва фронтига чақириб олибди...

— Бу бизга иснод,— деди Черницов, капитанга маъюс тикилиб.

Юрьев бу гапнинг маъносини тушунолмай, Черницовга тикилиб қолди. Ҳозиргина чап қанотдаги яотинчликдан хавфланган Черницов, энди унинг тинчланишдан хафа. Ахир, чап қанотдаги душман кучларининг кетиши батальоннинг операциясини енгиллаштирамайдими?

— Бутун бошлиқ бир батальонни осонгина кетказиб ўбордик,— деб афсусланди Черницов.— У батальон Москвага ҳужум қилаётган дивизияларга қўшилиши турган гап. Партизанларга хабар қилиш керак, дарҳол ўша батальоннинг йўлини тўсишсан. Батальонни Москва йўлидан қайтарайлик. Бунинг учун уларнинг нозик жойига — паромига ҳужум бошлаш керак. Ана шундагина батальоннинг йўлини тўсоламиз.

Немислар 119 тепалиги районидаги кўприкни ололмай, ундан айланиб ўтиш вақтида дарёнинг икки томонида паром-кўприк қурган эдилар. Бу паром уларнинг ўқ-дори, озиқ-овқат ташишга ҳам хизмат қилиб турди. 119 тепалигидаги кўприк олинмаган чоқда ҳам Грейдернинг полки мана шу паромларни партизанлардан, фронт орқасида қолган рус солдатларининг ҳужумидан сақлаши, фронт юкларининг партизанлар районидан бехатар ўтишини таъминлаб туриши мумкин эди. Батальоннинг паромга ҳужум қилиши — Грейдернинг озигини суфуриш билан барабар эди. Шу сабабдан Черницовнинг таклифи Юрьевга маъқул тушди. Юрьев дарҳол радиостга буюрди. Радист партизанлар рациясининг сигналини тақрорлаб, эфирга қичқира бошлади.

Юрьев разведка взводини чақириб, душманинг паром кўприги томонида нима воқиа бўлалётганини, сўнгра капитан Краузе батальони қаерда турганини аниqlаб келишини буюрди. Сўнгра Юрьев учинчи рота

командирига ўнг қанотдаги душман ротасининг жанго-вар позициясини аниқлашни топширди. Дарё бўйидаги ва катта йўл атрофидаги пиистирмаларга кузатув натижасида кўзга чалинган ҳар бир шарпа тўғрисида дарҳол шахсан комбатнинг ўзига телефон қилиб туриш буюрилди. Юрьев Күценкони телефонга чақириб, Морозов взводи билан қўшилиш ҳақида буйруқ берди. Артеллеристлар бошлиғига ҳам телефон орқали: «снарядни эҳтиёт қил, фақат кўзга кўринган мўлжалгагина сарфла!» деди комбат. Юрьев ҳамма бўлинмаларга тегишли йўл-йўриқ бериб бўлгач, эрталабки жангга тайёрлана бошлади.

Тонг отгунча разведкачилар взводдан, қанотлардаги роталардан, кузатув пунктларидан, пиистирма постларидан керакли маълумотлар тўплади. Эрталаб соат еттиларда Күценко Морозов группаси билан қўшилгани ҳақида, сўнгра Морозов ротанинг асосий кучларини жамлаб, Краузе батальонининг йўлини тўсиб олгани ҳақида рапорт берди. Бир оздан кейин партизанлар рациясидан ҳам Ильичёвка йўлида бораётган душман солдатларига пиистирмалар тўсатдан ҳужум бошлагани ҳақида хабар келиб қолди. Шундай қилиб, эрталабгача Чайка атрофидаги вазият ойдинлашди. Душманнинг асосий қисмлари бу ердан узоқлаб, Орёл, Тула, Серпухов ва Нарофонинска яқинлашиб қолган эди. Шу сабабдан у ёқда бораётган жангларнинг шарпаси сезилмас, фақат ярим кечада ёки эрта тонгдагина онда-сонда оғир тўпларнинг овози эшитилиб қоларди. Демак, Генрих Грейдер асосий қисмлардан анча узоқда, юрьевичлар билан партизанлар ўртасида қолган. Унинг фронтдан тез ёрдам олиши амри-маҳол. Юрьев дадил ҳаракат қилса бўлаверади.

— Харитада қоронги жой қолмади,— деди Юрьев Черницовга.

Черницов кулимсираб жавоб қилди:

— Мана энди ишни дадил бошлайверишимииз мумкин.

Эрталаб соат 7.30 да Юрьев бир ротани тепаликда қолдириб, қолган кучлар билан душман паромига ҳужум бошлади.

Юрьев тузиб, Чернипов маъқуллаган жан- планига мувофиқ, Морозов ротаси, пулемёт ва миномёт взводларининг ёрдами билан, душман паромига рўпарадан дужум қилиши жерак эди. Унинг жанговар ҳаракатини 76 миллиметрлик тўплар батареяси ва миномёт ротаси бошлаб берди. Учинчи рота автоматчилар взводи билан бирга ўнг қанотдан келиб, паром-кўприкларни эгаллаши лозим.

Морозов буюрилган соат ва минутда ҳаракат бошлиди ҳамда йигирма минутлардан кейин: «Паромларни кўриб турибман. Чап қирғоққа артиллерия залпи берилсин!» деб телефон қилди.

Юрьев душмая пароми атрофидаги вазиятни аниқлагач, батареяларга тўплардан, миномётлардан залп беришни тақиқлади.

— Методик ўт очилсин. Снарядлар, миналар эҳтиёт қилинсин! — деди у.

Морозовнинг «паром-кўприкка яқинлашиб қолдим» деган сўнгги сигналидан кейин учинчи рота ўнг томондан атакага ўтди. Бу рота паромларга яқинлашиб қолганда ўрмон орқасида пайдо бўлган самолётлар дастлаб Ильичёвка қишлоғини, кейин Чайканинг ўнг қирғоғини пулемётдан ўққа тутди. Икки самолёт келиб паромларга бомба ташлай бошлиди. Юрьев батальонининг атакаси, совет самолётларининг ҳужуми, гўё аввалдан келишиб қўйған план асосида олиб борилаётгандек, бир-бирига мос келиб қолди. Бу ҳол Грейдернинг бутун планини ўзгартириб юборди. Унинг назарида, Кизил Армия мунтазам қисмлари генерал Шмидт қўшинларини тор-мор этиб, энди бу ёққа ёпирилиб келаётгандек эди. Генерал галдираб қолди.

— Краузел Краузел — деб бақиради у телефонда.

Краузе унинг овозини эшиитмас, телефондан кучли шамолгина ғувилларди.

Грейдер кузатиш пунктига чиқиб, жанг майдонига қаради. Ильичёвкадаги немис омбори ёнмоқда, паром-кўприкнинг чап қанотидаги запас паромлар тутамоқда. Кўприк бутунми ёки мажақлаб ташландими, бу унга коронғи. Кўприкка икки томондан атака қилинаётганинига аён.

Грейдер армия корпуси штабига рация орқали сигнал бериб, ёрдам сўради. Унга штабдан: паромни ўз

кучларнинг билан сақлаб қолниглар деган қатъий буйруқ берилди.

Грейдерга маълум бўлишича, Боекниш асосий қўшинлари ўтган катта йўлда ҳам, асосий кўпrik — кечув райопида ҳам жанг бормоқда эди. Шмидт қисмлари неча кундан бери олга жилолмай, қаттиқ контратакаларин қайтариш билан овора. Демак, Грейдерга ёрдам берадиган вақт эмас. Шундай бўлса ҳам, Грейдер бўш келмади.

— Бўлмаса, авиация! — деб қичқирди у. — Биламен, у срда ҳам қийин, аммо бу ерда ундан ҳам қийин. Юрьев партизанлар билан бирга тепамга ёпирилиб келяпти, ҳеч бўлмаса бир звено учирив юборинг!

Рация буяга жавоб бермади...

Грейдер яна дурбинни олиб, жанг майдонига қарди.

— Краузе! Елғончи Краузе! — деб қичқирди у. — Юрьевнинг бир вазводини қириб ташлаганинг ёлғон экан. Ана, ўша кирилган вазвод эски блиндажлардан шикиб, қоқ биқинимга соляпти.

5

Эрталаб соат тўққиздан ўттиз минут ўтганда иккала рота ҳам кечувнинг чап қирғогига чиқди. Паром-кўпrikдан қочиб кетаётган охирги солдатлар орасида немис капитанининг мундири кўринниб қолди.

— Битта ҳам фашист Чайканинг чап қирғогига ўтмасин! — деб қичқирди Черницов.

Кўпrikка икки томондан ўқ ёғилди. Черницов автоматининг дискасини янгилаб олгач, сакраб баландликка чиқди-да, ўқ уза бошлади. Унинг ўқи тегдими, ёки пулемёт ўтига учдими, Краузе кўпrikка муқкасидан ўйқилиб, паромга осилиб қолди. Кўпrikдан беш-олти солдатгина ўрмалаб ўтди...

Шу вақт ҳавода душманнинг икки звено бомбардимончи самолёти пайдо бўлди. Улар ким қаердалигини суриштирмай, Чайканинг ўнг қанотидаги Грейдер солдатларини, кейин паром кўпригини бомбардимон қилди. Бир оздан кейин ўзига келган учувчилар жаҳл билан чап кирғоқча ёпишди. Лекин қилар иш қилиб қўйилган эди. Паром парчалари, кураклари, тахта ва резиналар сув сатҳида сузиб юради.

— Энди ерга чуқурроқ жириб олишимиз керак,— деди Черницов, рота командирлариға,— Грейдер бизни бу ерда тинч қўймайди.

— Яшикларни олиб кетайликми?— деб сўради Морозов,— парашютдан ташланган яшиклар шу ерда, Күценко олиб келяпти.

— Қани Күценко?

— Ана, ана!— деди Морозов, сўқмоқча қўл чўзиб кўрсатиб.

Күценко Черницовни кўриши билан югуриб келиб рапорт берди.

— Уртоқ комиссар, буйруқ бажарилди.

Күценко жангчилари икки яшикни судраб келиб, Черницов олдига қўйишди. Иккала яшикда ҳам патрон бор эди.

— Мана, энди Грейдернинг адабини берамиз!— деди қувониб Черницов. Кейин, ҳалок бўлган жангчиларнинг ҳисобини олди-да, Күценкодан сўради:

— Ярадорларнинг ҳаммасини олиб чиқдингизми?!

— Олиб чиқдик. Аммо бир кишини тополмадик,— деди Күценко, афсусланиб.— Яхши жангчи эди.

— Ким?— Черницов ташвишланиб сўради.

— Жабборов Нормат. Жангчи Отступнийнинг айтишича, унинг окопини танк босиб ўтган эмиш... Қидирдик, қидиряпмиз...

Черницов Күценко взводи жангчилари дам ола-ётгаи жойга борди. Улар бўлиб ўтган жангни қизғин муҳокама қилишмоқда эди. Отступний снаряд тегиб узилиб тушган қарағай ёғочга ўтириб, ҳаммага гапини маъқулламоқда. У муболагага шундай берилган эндики, жангдан хабарсиз киши уни бутун бир немис ротасини якка ўзи қириб ташлаб, ўлжани ротага судраб келган деб ўйлаши турган гап эди. Черницовнинг келганини ҳеч ким сезмай қолди. Отступний бўйини чўэшиб, қўлларини арра қилиб гапиаркан, лаблари дўрдайиб, кўзлари ола-кула бўлиб, кекирдагидаги томирлари бўртиб чиқиб кетган эди. Жангчиларнинг бири ёнбошлаб олган, бири эътиборсизлик билан милтиқ тозаламоқда. Баъзилари Отступнийнинг ҳикоясини бўлиб, лоф жайларига эътироҳ билдиришарди. Эмин Ражабов жим. У, пўстлоқлари арчилиб кетган қарағайга суюниб, шапкаси билан кўзларини тўсиб, паришон ўтирибди. Исроил Азимов ҳам ғамгин, боши қўйида. Хуллас Норматнинг

Нүқолғанлиги ҳамма учун оғир ташвиш бўлиб қолгани сезилиб турарди.

Черницов жангчилар даврасига кириб келди.

— Салом, ўртоқлар!

Тургенев комиссарнинг овозини эшишиб шошилиб қолди шекилли, ўтирган жойидан сапчиб туриб қичқириди:

— Смирно!

— Вольно, вольно,— деди Черницов.— Утираверинглар. Қани, Отступний, ҳикояни давом эттиринг.

Комиссарнинг бу таклифи Отступнийни рағбатлантириб юборди. Отступний даврадагиларга «кўрдиларингми» дегандек қараб олди-да, автоматни тиззасига олиб, шапкасини тузатиб, гапида давом этди:

— Салгина қолди, танк ёнидаги окопни мажақлади-ю, танкист мени кўрмади..

— Нормат қаерда эди?

— Ўша окопда эди. Мен танк билан овора бўлиб қолиб, кузата олмадим. Кейин қарасам, жойида йўқ...

— Мажақланган окопни қарамадингми?— деб луқ ма ташлади Дронов.

— Бронетранспортёр келиб қолди...

Тургенев Отступнийга хўмрайиб қаради:

— Жабборов яраланди, орқага жўнатиб юбордим, демадингми?

Отступний қўлинни бир силтаб, бўйини чўэди.

— Ажаб гапни гапирасан-да, сержант, тепасидан танк ўтади-ю, яраламмайдими?

Тургенев қўлларини арра қилиб, бўйини чўзиб, чақчайиб турган Отступнийнинг кўзларига бақрайдида, қатъий сўради:

— Қани ўша ярадор?

Отступний Тургеневнинг ёниб турган ўтли кўзларидан кўзларини яширишга уринди-ю яшиrolмади, киприклари пирпираб, довдираб қолди, ўзини ростлаб олиб, Тургеневга ўшқирди:

— Нега мунча тикиласан, сержант, кўзларимдан нимани қидиряпсан, а?

Тургеневда ҳам, Черницовда ҳам уши айблаш учун асос йўқ эди, аммо Отступнийнинг галдираши уларни шубҳалантириб қўйди.

Ўнанчи боб
ДАШТДАГИ ҲАНГОМА

1

Куз кирди. Пахта очилди.

— Даштга ҳайда! — деди Бозоров, извошга ўтириб.

Изъошли узун қамчисини бошида баланд ҳаволатиб қарсиллатди да, отларга қараб қичқирди:

— Қани, бокувда орттирган ҳунарингни кўрсат, лочинлар!

Кулоқ чимириб турган отлар бирдан олға ташланди.

Бозоров даштта туш пайтида етиб келди, узоқдан қизларнинг қорасини кўриб, извошдан тушиди.

— Извошнинг чангини арт, — деди у извошчига. — Менга қара, ярақлатиб юбор, хўпми!

— Ҳозир, хўжайин, айтганингиздан зиёда бўлади.

Извошли латталарини ариқдаги сувга ботириб ишга тушган эди, Бозоров чақириб қолди.

— Шошма, кел, чангимни қоқиб қўй!

Извошли хўжайиннинг чангини қоқиб, яна ишга тушди. У, кичик банкадан мой олиб, извошини мойла-ётганда, Бозоров яна чақириб қолди.

— Этигимнинг креми қаерда?

Барча «тайёргарлик таҳт» бўлгач, Бозоров «ландиш» атиридан юзига, сочига, кителининг ёқасига суртди.

— Қани энди, чу де! Менга қара, юганин калтароқ ушла, отлар гажжак бўлиб отилсин!

— Хўп, хўжайин, айтганингиздан зиёда бўлади.

Ҳақиқатан ҳам отлар дала шийпонига Бозоровнинг айтганидан ҳам зиёда бўлиб, кумуш жабдуқларини шалдиратиб, қўнғироқларини жаранглатиб етиб келди. Извош тўхташи билан қизлар югуришиб келиб, ўраб олишди.

— Нима олиб келдингиз?

— Бу нима?

— Чулкиси борми?

— Атиричи?

— Вазелинчи?

Қизларнинг қизиқишлигини кўриб, Бозоров қувониб кетди. «Мана энди қўлга туширмасам, қачон тушираман?..» Қизлар Бозоровни ўраб олиб: «сотмайсизми?» —

деб қистай бошладилар. Бозоров яшикларни очиб қўйди: оқ қанд, шоколад, конфет, совун, атири, упа... Буларнинг муаттар ҳиди гуркираб димоққа уриб, қизларни қувонтириб юборди.

Бозоров ўзини бозорга солди.

— Кимга нима берилишини Адолатхоннинг ўзи айтсин.

Адолат пайкалда энгашиб пахта термоқда эди. Шакархон югуриб бориб, уни шийпенса бошлади: «Юр, Бозоров чақиряпти. Ўзинг олмасанг ҳам бизга олиб бер».

Адолат келиши билан Бозоров унга мулозамат қила бошлади:

— Ҳорманг, Адолатхон! Колхозда биринчи бўлиб теримга тушибсиз, табриклиман. Сизга совға олиб келдим. Шуларнинг ҳаммаси сизники. Буюринг!

Адолат извошдаги тансиқ моллар, зеб-эйнат буюмларни кўриб, шуларнинг ҳаммаси бир бригадага тешини эканига ишонмади.

— Қанчаси бизники?

— Ҳаммаси сизники, яхши қиз,— деди Бозоров, қўлларини қовуштириб.— Етмаса яна келтираман.

— Жуда кўп-ку, бироннинг ҳақи бўлмасин, тағин?

— Иўқ-йўқ, сизники!— деди Бозоров ва қизларга қаради:— Бу кишига кўп мол келтирасак ҳам ёқмайди.

Қизлар бир-бирларига қарашиб, қўзларини қисишиб қўйишиди.

— Менинг тегишимни бераверинг.— Бегимхон Бозорвоннинг олдига келиб, икки қўлини белига тираб, нозкарашма қилди.

— Вой ўлмасам, ановнинг кўз сузишига қара-я,— деди Шакархон, Адолатни туртиб.

Адолат Бегимхоннинг қилиғига парво ҳам қилмай, қизларга:

— Керакли нарсаларни олаверинглар, қизлар!— деди.

Қизлар извошда келган молларни талай кетдилар.

— Менга атири.

— Менга совун.

— Менгаям...

— Шошманглар-шошманглар,— Бозоров яна Адолатта хушомад қилди.— Энг олдин бригадир олсан. Мана, Адолатхон, олинг: шоколад, конфет, чулки, упа, «Кристалл»...

- Ол, ол! — деди Шакархон.
Адолат қызларнинг қистови билан майда-чуйда олди.
— Пули қанча бўлади?
— Бепул.
— Нега? Нега бепул бўлади? Олмайман бўлмаса!
— Пулинни дадангиз тўлаб қўйдилар. Олматеганингизни эшитиб қолсалар, бетим шувут бўлади. Олаєеринг, яхши қиз.

Адолат қўлига олган нарсаларни извошга отиб, пахтазорға кириб кетди.

2

Бу гап Тўхта холага етмай қолмади.

Кампир кўпдан бери Адолатни кўргиси келиб юрган эди. Адолатни кўрса, Норматни кўргандай бўлар, юраги андак таскин топар эди. Адолат ҳам кампирни соғиниб юради.

Кампир қишлоқда, Адолат даштда.

Тўхта хола қизариб қолган беш-олтита анорни рўмолчага тугиб, даштга борди. Адолатнинг юраги севинчдан ёрилгундай бўлди. Қиз ўзини онанинг бағрига отди. Кампир унинг кунда қорайган пешонасидан ўпди, шабадада тўзиган соchlарини силади. Бир зумда қизлар уларни ўраб олишди. Бегимхон Тўхта холанинг қўлидаги тутунчани олиб, ўртага ёёди...

— Сизларга атаб олиб келдим, қизларим! — деди кампир ва бир жуфт қўшалоқ анорни рўмолдан олиб Адолатга узатди: — Буниси сенга, қизим!..

Адолат қўшалоқ анорни қўлига олиб, бағрига босди.

— Нормат аканг эккан анор бу, болам! — деди кампир. — Қўшалоқ тушиб, пишяяпти. Яхшиликдан нишона бу, Адолат.

Қизлар рўмолчадати анорни ёриб, талашиб-тортишиб, емоққа тушдилар. Адолат индамай капага кириб, қўшалоқ анорни яшириб қўйди.

Октябрь кунларининг бирида, кечқурун Эргаш Тўхта холадан ҳол-аҳвол сўраш учун Норматларнинг уйнинг кирди. Тўхта хола ишдан қайтиб, болаларини ўйнатиб ўтирган эди. Холматнинг кичик ўғли Шерали осмонга қараб:

— Учма пойиз, учма пойиз, оппоқ акамни ташлаб кет! — деб қичқирарди. Унинг атрофидаги болалар ҳам осмонга қарашиб:

— Оппоқ ака-юв! Ҳо... оппоқ ака!.. Баққа бир ту-

шинг!..— деб қичқирадилар. Славик болаларга қўшилиб, қўкка қараб қичқиради:

— Нормат ака, Нормат ака, туша қолинг!

— Кела қолинг, данак чақиб қўйдим...

— Туша қолинг, бодом териб қўйдим!..

Шу вақт ҳовлида Эргашнинг тзниш овози эшитилди:

— Салом, она!

— Кел болам, кел!— Тўхта хола ўрнидан туриб, Эргашнинг елкасига қоқди.— Эсон-омон юрипсанми, Эргашвой?

— Даладан келаётисиб, сизни кўриб ўтайин, дедим.

— Ажаб қипсан, болам. Сени кўрсам, Норматни кўргандек бўламан, онагинанг айлансин!

Эргаш айвон пешига ўтириши билан, Тўхта хола яна Норматдан гап очди:

— Ўртогингдан хат оляпсанми? Кетганига неча ойлар бўлса ҳам, бизга фақат биттагина хат келди. Ушанга ҳам биркам етмиш кун бўлди. Уйда ҳам, дала-да ҳам Норматжонимдан хабар кутаман. Эшик тиқ этса, бирор келяптимикин, Норматимдан хушхабар келтиряптимикин, дейман. Дарак йўқ...

— Почтальондан тез-тез сўраб тураман. Норматдан хат келса дарров менга айтади,— деди Эргаш.

— Почтачининг бурни кўтарилиб қолибди. «Хат борми?» десам, «йўқ» деб кетаверади. Қайрилиб ҳам қарамайди. Менинг назаримда у Норматдан келган хатни ютиб юбораётганга ўхшайди.

Эргаш кампирнинг кўнглини кўтаришга уринди.

— Үзоқ йўл. Хат неча довондан ошиб, неча поездга тушиб келади. Бизнинг қишлоқча етгунча неча идорага кириб, неча тешикдан чиқади. Хат келаётгандир. Хафа бўлмай.

— Кошки эди, болам, Норматим соғ бўлса, тирик бўлса бас.

Шу гапни айтди-ю кампир рўмолининг учи билан кўз ёшини арта бошлади. Неваралар ўйинни йигиштириб қўйиншди. Улар дам онанинг, дам Эргашнинг оғзи-га қараб қўйишар, Эргаш гапирганда: «Оппоқ аканинг қаҷон келишини айтармикин?» деб тикилишарди.

Эргаш Славикнинг жингалак, оқиши соchlарини си-ларкан, онага тасалли берди:

— Нормат соғ. Кеча тушимда кўрдим. От миниб юрибди. Карнай қашқа от устида кўрдим.

— От яхшилик,— деди кампир,— илойим, мартабаси баланд бўлсин!

Эргаш хайралашиб чиқиб кетаётганида, Тўхта хола уни тўхтатди-да, четроққа чақириб, секин сўради:

— Норматни «ўлди»га чиқаришяпти. Қурвондодҳо шундай овоза тарқатибди. Қурвондодҳога Чуқур кўчадан келган бир хотин айтган эмиш. Суриштиридим. У хотинга ҳам бирор айтганмиш. Бир боладан хат келган эмиш. «Нормат деган йигит ўқ еб ўлди» деганиш... Ҳамма ёқда миш-миш гап...

— Бекор гап!— Эргаш кампирнинг сўзини кесди.— Бирор нарса бўлса, қофоз келади. Анови отинойиларнинг ўғли ҳалок бўлган экан, қофоз келди. Додавой тўгрисида ҳам «дараксиз йўқолди» деб хат юборишиди. Нормат жуда ҳам ўзини йўқотиб қўядиган ландовур эмас!

— Кеча фол очдираман десам, «урушдаги кишини фол кўрмайман» деди отинойи.

— Адолат келиб турадими?— Эргаш гапни бошқа ёққа бурди.

Кампир кўз ёшларини артиб, аччиқ ютипиб олга, бир хўрсиниб қўйди.

— Қам келади.

— Нега, бориб турибман, деди-ку менга?

— Қиз шўрлик шу кунларда ғамгин юрибди. Ҳар келгanda менга ниманидир айтмоқчи бўлиб, оғзини ўнглайди-ю, айттолмайди...

— Отаси ээмарақ одам экан... Бўлар-бўлмас гапларга қулоқ солманг, хола!

— Отасини қўявер, анови савдо мудири унинг бoshини калава қилиб қўйибди. Қори икки гапнинг бирида ўшанинг номини тилга олармиш. «Бир кун туз ичган жойга қирқ кун салом» деганлариdek, пул чиқсан жойга боқади-да, у зиқна Қори! Қизини ўша чайқовчига бераман деб ваъда қилган эмиш... Куйиб-куйиб тутупларим чиқяпти. Совчиликка борай десам, мана бунда-қа гапларни эшишиб хуноб бўляпман. Бу кунларнинг келишини билсам, Норматни урушга кетмасданоқ бoshини иккита қилиб қўярдим. Қўэзимнинг тиригида орзу ҳавасини кўрсам дейман, болагинамнинг!

— Албатта орзу ҳавасини кўрасиз. Адолат қизларга: «сочим оқариб кетса ҳам Нормат акамни кутаман»—депти. Кутади. Бир сўзлик қиз.

— Кошки эди... Лекин отасига ишонмайман. Соҳиб қори молпараст, очкӯз одам. Уруш бошланиб, ҳамма нарса тарозига тушгандан кейин, у айниқса пулпараст бўлиб қолди. Бозоровдек одам унга куёв бўлса, албатта, Қорининг магазини молга сероб бўлади, куёвнинг нафи тегади-да... Бўлмаса, Қори икки хотин қўйган кишига шундоқ қизини ваъда қиласмиди? «Ҳамма йигитлар урушга кетяпти. Қиз бўйига етди. Энди нима бўлса ҳам, ёғлироқ жойга узатиш керак. Уруш қачон тамом бўлиши даргумон» деган эмиш Қори. Кўргани кўзим, эшитгани қулоғим қолмади.

Эргаш дала йўлида кетаётуб: «Ҳамма гап Бозоровда экан-да» деб ўлади. «Бетамизнинг бети бўлмас, безорининг уяти. Нега Бозоровни уялтириб бўлмайди. Қани Эргаш, маҳкамроқ боғла белингни!..»

3

Бозоров Адолатни кўргандан бери бир жойда ўтиролмайдиган бўлиб қолди. У кун ора дашт бригадасига қатнайди. Энди у: «мен қишлоқ советининг вакили бўлиб келдим» деб юрибди. Бригадага боргач, дала ишларини текширган киши бўлиб юради. Ҳар сафар Адолатга дуч келиб: «Дори етадими? Кийим-кечак керакми?» деган бир хил саволларни такрорлайди. Тунов куни «текширишлар» тугагач, бригада бошлиғи «Адолатхонга мукофот» деб яна совға қолдириб кетди. Аммо Адолат Бозоровнинг ниятини сезиб қолгач, унинг совғасини қабул қилмай қўйди. Буни сезган қув Бозоров келтирган совғасини Адолатнинг капасига ташлаб кетди.

— Ана, яна вакил келяпти,— деди қизларнинг бири Адолатга, катта йўл томондан келаётган Бозоровни кўриши билан.

Бозоров бу гал ҳам қўлида тугун билан пайдо бўлди.

— Ҳорманглар, қизлар! Ҳорманг, Адолатхон!

Адолат сурбет Бозоровни кўриши билан ғазабдан қалтиради ва титроғини босиш учун пахта тераверди.

— Мана сизларга,— деди кулимсираб Бозоров,— бригадангиз пунктга ҳаммадан кўп пахта топширгани учун сельподан мукофат.

Адолат гезариб кетди. У ҳеч қачон қилмаган иши-
ни қилиб, ҳеч вақт тилга олмаган аччиқ гапини айтги-
си келиб, бошини кўтарди.

— Кетинг бу ердан!— деди жон-жаҳди билан у.—
Қаёқдан келган бўлсангиз, ўша ёққа кетинг!

Кутулмаган ғазабга учраган Бозоров нима дейи-
шини билмай, тилсиз, ҳаракатсиз, ёғочдай қотиб ту-
рарди.

— Сиз вакил эмас экансиз,— деди Шакархон.—
Тезроқ кетинг, бўлмаса, Эргаш акамни чақираман!..

Эргаш Норматнинг жонажон дўсти эканини Бозо-
ров яхши биларди. У анов куни Бозоровни йўлда уч-
ратиб: «Пашшахўрда бўлаверма! Оёғингни синдириб
қўяман!» деди. Шу сабабдан ҳам Бозоров Эргашнинг
номини эшитиши ҳамон секин орқасига бурилди ва
бир оз юргач, Адолат пахта тераётган томонга қараб:
«сени қараб тур!» дегандек иягини силади-да, катта
кўчага юриб кетди. Бегимхон уни тўхтатмоқчи бўлиб
белини ушлаб, гажжагини силкиллатиб турган эди, Бо-
зоров қайрилиб ҳам қарамади. Бегимхон ушинг орқа-
сидан лабини буриб қолди:

— Шу ҳам эрқак бўптими!..

Эргаш дашт бригадасига келганда ҳамма қизлар
пахта тераётган эдилар.

— Ҳорманглар-ҳо!..

Қизлар индамай пахта теравердилар, фақат ким-
дир узоқдан «бор бўлинг» деб қўйди. Унинг овози Эр-
гашга зўрға эшитилди. Қизларнинг сукути Эргашни
ҳайратга солди. «Бу жимлик бежиз бўлмаса керак»
деб ўлади Эргаш ўзича.

— Нима гап?— деб сўради у, Бегимхоннинг яқинига
бориб.

Бегимхон пиқир-пиқир кулиб, ер остидан Адолатга
қараб олди-да, «ҳеч» деб қўя қолди. Эргаш ҳайрон бў-
либ, Адолатни кўздан кечирди. Адолат нимадандир
қаттиқ ранжиган кўринарди.

— Нима гап?

Эргашнинг саволига Адолат ҳам «ҳеч гап» деб
жавоб берди. Эргаш қандай сир ўтганини тушунол-
май, ўйланиб қолди. У бир-икки чаноқдаги пахтани
териб, Адолатга узатаётган эди, катта йўлда кўтарили-
ган чангга кўзи тушди. Йўлниш икки томонидаги мираз-
тәраклар орқасида извош кўринди. Бозоровнинг извоши...

Воқиа эпди унга аён бўлди... «Қочиб юрибди мендан. Қувиб етолмайди, дейсанми?..»

— Хайрлашгани келдим,— деди у Адолатга қараб,— Уралга кетяпман. Ҳамқишлоқларимизга иссиқ кийим, мева-чева олиб боряпман.

— Совға-салом тўплаб берайликми?— деб Адолатлинг чеҳраси сал очилди.— Урал ҳам фронтдай бир жой. Оғир меҳнат фронти.

— Совға етарли. Вақт ҳам зиқ. Баъзи бирорлар Уралдан кетамиз, дейишаётган эмиш.

— Холмат акани ҳам кўрарсиз?

— Албатта кўраман.

. — Биздан салом айтинг.. Ҳа, ундан кейин, сўраб кўринг-чи, Нормат акамдан хат олятилармикин?

— Хўп, албатта сўраб келаман.

Эргаш кетди.

Адолат бармоқларини чаноққа югуртиаркан, яна Норматни ўйлаб ўртанди.

Қачонгача шундоқ давом этади унинг ҳаёти? Бирорвга кулги, бирорвга эрмак бўлиб ўтадими унинг кунлари? Ёки унинг пешонасига шулар ёзилганми? Фақат нимадир етишмаётганга ўхшайди унга. Уша етишмаётган нарса нима? Емоқ-ичмоқнинг камлигими? Адолат ҳам эл қатори еб-ичяпти, оч қолгани йўқ. Уни яккалик хўрлаяптими? Ота-она шу ерда, эгачи-сингиллар, дугоналар ёнида, нега якка бўлсин у? Яккаликка-ку, якка эмас, лекин ҳимоячиси қани унинг? Отаси Адолатни ҳимоя қилиш у ёқда турсин, бир абраҳга ‘пулга сотмоқчи. Онаси умрида эрига тик гапирмаган хотин: Эрининг измидан чиқмайди, эрининг айтгани — айтган, дегани — деган. Дугоналарининг қўлидан нима келсин, жуда кўп деганда «вой, бечора Адолат...» деб ачинишлари мумкин, холос. Умид Эргашдан. Лекин Эргаш оқинга қарши якка туроладими? Нега ундай дейман? Ота билан Бозоров... Икки кишининг тил биринтириши қандай оқин бўлсин? Кўпик. Эргаш бу кўпикни учирив юборадиган шамол. Аммо, у ҳам мени шуларга ташлаб кетяпти. Қачон қайтади у? Қачонгача чидайман бу азобларга? Бор-э, деб юборсан, бу гап отамга бориб етади. Отанинг юзига оёқ қўйиш осонми? Отага қарши отилиш қўлингдан келадими? Қўлингдан келмаса-чи? Унда сен қул, чўри бўласан, оналаримиз яшаган чордевор насибанг бўлади. Йўқ-йўқ, тобутинг

кўрсип бундай бахтсизликни! Ваъдангга вафо қил. Адол! «Фақат мени кутади!» деб юрибди Норматинг. Эҳтимол шу ишонч унинг қалбини илитиб тургандир, эҳтимол, шу ишонч билан у жангга кираётгандир. Сочинг оқариб кетса ҳам, севганингни кут. Ҳайда Бозоровни ўзингдан нари!

4

Эргаш велосипедга миниб, Бозоровниг орқасидан қувиб кетди. Отларнинг туёғи, извош фиддиракларидан кўтарилиган чанг кўчани кўрпадай ёпиб турибди. Эргаш чанг булатини ёриб, извошга стиб олишга шошилади. Велосипед гоҳ тупроққа чўкиб, гоҳ тошга қоқиниб, эндигина чўкаётган чангни тўзгитиб бормоқдаг. Йўлда ҳеч ким йўқ. Йўл бўйидаги ерларда теримчилар юрибди, лекин ҳамма жим, ҳеч кимнинг овози эшитилмайди. Илгари бундай эмас эди. Кўчадан ўтган извошли, аравакашга ҳам, велосипедчи тугул эшак минган кишига ҳам гап ташлашиб, ҳазил қилмай қўйишмасди бу теримчилар. Энди улар Бозоров извош чоптириб ўтса ҳам, Эргаш велосипедида кўча чапгитиб бораётган бўлса ҳам, қайрилиб қарамайдилар. Қизларнинг қўшифи ҳам эшитилмайди...

Эргаш Бозоровга қишлоққа кираверишда етиб олди. У, извошнинг олдига ўтиб, йўлни тўсади. Извошли тизгинни тортиши ҳамон отлар бошини баланд кўтариб, охирги оёқлари билан ерга тираниб, тўхтади.

— Жуда чопқир отлар экан, велосипедни еткизмайди-я!..— деб кулди Эргаш.

— Ишим зарур эди,— деди Бозоров,— қани, извошга чиқинг, Эргаш ака!

Эргаш: «Бозоров билан бўладиган гапни унинг извошида ҳам давом эттириш мумкин, ҳатто қулайроқ бўлади» деб ўйлади-да, велосипедни извошчининг олдига ўнгариб, ўзи Бозоровниг ёнига ўтирди. Бозоров унга кенгроқ жой бўшатиб, ўзи бурчакка бикиниб олди.

— Ҳа, Эргашвой ака, қаёқдан келяпсиз, чанглаб кетибсиз?

— Даشت бригадасига борган эдим...

Эргашниг бу гапидан Бозоровниг дами ичига тушиб кетди.

— Үзингиз қаёқдан келяпсиз, ўртоқ Бозоров?— деб сўради Эргаш.— Узоқча борганга ўхшайсиз, отлар куйиниб кетиби.

— Кўчма савдо билан юрибман. Теримчиларга хизмат. Даастлабки савдони сизнинг колхозингиздан бошласам-ми, деб турибман. Шунга нима дейсиз, Эргашвой ака? Олдингизга кириб маслаҳат олмоқчи эдим. Иқболимга ўзингиз учраб қолдингиз. Хизирни йўқласам бўларкан!

— Дашт бригадасидан бошласангизмикан...

— Менга ҳам ўша бригадани яхши дейишиди.

— Адолатдан бошласангизмикан...

— Ихтиёр сизларда, Эргашвой ака, қаерга, кимга бер десангиз, ўшандан бошлаймиз...

— Даштдаги савдони биздан сўрамаган эдингизку?— деди Эргаш, ғазаб чақнаб турган кўзларини Бозоровга тикиб.

— Ҳа, уними?.. Уни ўз ташаббусимиз билан, камоли «Гулистан»га ихлосимиз зўрлигидан. Нормадан ташқари...

— Адолатга ҳам нормадан ташқарими?..

Бозоров тулкилик қилди:

— Ҳа, биринчи бўлиб пахтага тушгани, сўнгра пунктга ҳаммадан кўп пахта топширгани учун...

Эргаш унинг безовталанаётган кўзлари, кўкараётган лабларига разм солғач, сўради:

— Чиройли қиз бўлгани учун эмасми?

— Ҳе, Эргашвой ака-ей, жуда ҳазилкаш йигитсиз-да. Тўғри гапни ҳазилга олиб, шоирлик қиласиз. Үзимизнинг Қори акамизнинг қизига, синглимиздек Адолатхонга кўз олайтирамизми? Уят бизга бу ишлар!..

— Уят сизга бу ишлар, Бозоров!— деди Эргаш, Бозоровнинг тер босаётган юзу пешонасига истехзо билан қараб.— Уят!..

— Биз уят иш қилмаймиз, Эргашвой ака, хотиржам бўлинг.

— Ишонса бўладими?

— Менга давлат бутун бошлиқ сельпони ишониб қўйибди. Қўлимда миллион сўмлик мол, Эргаш ака. Дунёда одам таниган йигитмиз...

— Шу чоққача таниб келган бўлсангиз эҳтимол, аммо шу кунларда одам танимай қолибсиз. Адолатнинг эгаси бор. Эгасини танимасангиз, танитиб қўяй— жангчи Норматники у қиз!

— Нормат акамни яхши танийман, Эргашвой ака, фронтга ўзим жүннатганман, фронтдан кутиб олиш ҳам насиб қылсина. Түйида ўзим хизмат қилай...

— Ишонсам бўладими?

— Қасам ичаман...

Эргаш извошдан сакраб тушди-да, велосипедига миниб, колхоз идорасига йўл олди.

Ўн биринчи боб

ДУШМАН ОРАСИДА ТАНҲО

/

Нормат ўрнидан туриб, қаерда ва қачондан бери ётганини билмади. Атроф зим-зиё. У қўллари билан ёнверини сийпалаб кўрди: ҳеч ким йўқ. Наҳотки, дўстлари уни блиндажга қамаб, устидан беркитиб кетишган бўлса? Нега ён ойнадан ёруғ тушмаяпти, нега қора чироқнинг иси димоққа урмаяпти? «Уйқисирайпманми, ёки тушимми?» Нормат енги билан кўзларини артди, мушти билан ишқалади. Унинг тинган кўзлари бирор очилиб, атрофдаги нарсаларни пайқай бошлади; дараҳт, синиқ арча, тупроқ ўюмлари. Нарироқда нимадир қорайиб турибди. Ўйми, ёки тошми? Тошга ўхшамайди, уй ҳам эмас. Нормат кўзларини ишқалаб-ишқалаб яна қаради. Танкі Душман танки! Нормат сесканиб тушди. Нима гап ўзи? Наҳотки, немис танклари тепаликни топтаб, батальонни эзиб-янчиб юборган бўлса?.. Бу фикр унинг хаёлига келган ҳамон юраги орқасига тортиб, нафаси ичига тушиб кетди. Кейин у ўзига-ўзи танбиҳ берди: ёмонликни тилга олма, Нормат, бундай бўлиши мумкин эмас. Сен алаҳлаяпсан. Кошки эди бу ҳодиса воқе эмас, фақат туш бўлса! Тур ўрнингдан, ҳушёр бўлиб атрофга қара-чи!..

У сакраб ўрнидан турмоқчи эди, гавдасини кўтаролмай йиқилди. Унинг чап ёнбошини гўё тегирмон тоши босиб тургандек бўлди; қўли билан секин ушлаб кўрди, аммо қўлига ҳеч нарса урилмади. Кейин оёғини ушлаган эди, қўлига лой ёпишгандек бўлди. Лойми, нима? Қўлини олиб бурнига тутди. Кон! Кон иси... Нормат ана шундан кейингина ўзининг қаерда, нима учун ётганини тушунди. Қундузги жанг, взводдан ажралиб қолиш, ундан кейинги юз берган ҳодиса эсига тушди.

...Парашиют... Жанг... Трос улаётганлар қани? Уларни бир томондан Дронов билан Оға ўғли, иккинчи томондан Отступний билан Нормат ҳимоя қилиб, душман йўлини тўсиб туришган эди-ку? Нормат бир оз ўзига келгач, бўлиб ўтган воқиани бирма-бир, раєшанроқ эслай бошлади.

— Танк...

Чап томондан қўққисдан пайдо бўлган енгил танк тўппа-тўғри Норматнинг тепасига келди. Нормат ячей-касига ётиб олди. Танкнинг бир гусеницаси ячейканинг тупроғи аралаш Норматнинг чап оёгини эзиз ўтди. Нормат тупроққа кўмилиб қолди. Гусеница зарбидан унинг оёғи қаттиқ уюшгандек караҳт эди. Дастребки паллада оғриқ сезилмади. Норматнинг боши, танаси, қўллари гусеницалар ўртасида қолгани учун шикаст емади. Танкчи Норматни кўрмаган эди. У яшикка трос боғлаётгандарни мажақлаб, ўлжани қўлга олишга шошиларди.

Нормат оёгини ушлаб кўриб, унинг уюшганини ячей-канинг оғир тупроғи босиб турганидан бўлса керак, деб ўйлади. У бутун кучини тўплаб, танк бостириб кетган тупроқ тагидан суғурилиб чиқишга уринди, аммо тупроқ жуда кўп ва оғир кўринди, кучи етмади. Ёнидаги Отступний йўқ. Нормат бир амаллаб чапга ўгирилиб, гранатасини қўли билан пайпаслаб топди ва Тургеневлар томонга келаётган танкнинг ўнг гусеницасига ташлади. Граната портлаши ҳамон сарфимтир тутун ичидаги ярқираб гусеница парчалари кўринди. Танк ўнг томонга қийшайиб қолди.

Шундан кейин бронетранспортёр кўринди. Унинг орқасида кўк шинелли солдатлар... Нормат тупроқ тагидан чиқишга уринди. У тобора мадори тугаётганини сезди, кейин баданида қаттиқ оғриқ пайдо бўлди. Аммо у қаери оғриётганини аниқ билмади. Шу чақ шовқин кўтарилиб, нотаниш овозлар тобора яқинлашиб келди. Кўк френч кийган, қора каскали киши шу ёққа келди-да, шохи синган қарағай олдида гурс этиб ерга йиқилди. «Немис!»— Норматнинг дами ичига тушиб кетди. «Демак, қўлга тушдим. Асири... Испод шармандалик!..» Нормат шошилиб брустверга қўл чўэди. Автоматнинг қўндоғигина қолган. У, қўндоққа қаради-да, «эҳтимол сен ҳам керак бўлиб қоларсан» деб ёнига сурис қўйди. Граната ҳам йўқ, фақат ўқлар қолган. Яна бир-иккита немис унинг атрофидан югуриб ўтди. Баъзилари йиқ-

либ, яна туриб кетар, баъзилари ётган жойида қимиirlамай қола берарди. «Мени кўрдими, йўқми? Афтидан, улар мени кўришмади, ёки ўлик, деб ўйлашди. Иложим йўқ. Узимни ўликка солиб ётаверайчи...»

Отишмалар тобора кучая борди. Отишмалар Нормат ётган ердан, узоқлашди-ю, бир оздан кейин яна яқинлашди. Кўк френч, қора каскали солдатлар яна қайтиб ўтишди. «Контратака,— деб тахмин қилди ўзича Нормат,— немислар қочмоқда». Унинг бу севинчи узоққа бормади. Қўлида автомати билан яланг бош бир немис тўппа-тўғри Нормат томонга югуриб кела бошлади. «Мени кўриб қолибди бу ит!..» Нормат бор кучини тўплаб, ёв билан олишувга ҳозирланди. Мажақланган автоматининг қўндоғини ушлаб, ғижиниб турди. Немис Норматга яқинлашиши билан ўзини тап этиб унинг ячейкасига ташлади-да, оғзиға тупроқ тўлиб, хириллаб ётиб қолди. Немис бошидан яралangan эди. Бор кучини тўплаб жон талвасасида шу жойга этиб келиб, окопга яширинмоқчи бўлганини Нормат пайқади. Унинг гавдаси Норматининг тепасига ташланиши билан Нормат сакраб ўрнидан туриб кетди. Унга қаёқдан, қандай куч пайдо бўлганини ўзи ҳам сезмай қолди. Норматининг оёғи остида чўзилиб ётган немиснинг нафаси тинган эди. Нормат оёққа туришга ҳаракат қилди-ю, яна йиқилди. У ўзининг қаери оғирётганини энди сезди. «Демак, танк эзиб кетган экан-да...»

Жанг тинган. Атроф қоронги, жимжит. Энди шерикларга этиб олиш керак.

Нормат шунча уринса ҳам, ўрнидан туролмади. Оғриқ тобора зўрайди. Кейин ёнбошлаб олиб, ёнбоши билан судралди. Ун минутча судралиб боргач, чарчади. Эрта қишининг совуқ нафаси унинг димогига гуп этиб урди. «Қаёққа кетяпман ўзим?» деб ўйлади у. Нормат шу турган жойини аниқлаш учун чалқанча тушиб, осмонга қарди. Кўкни булат қоплаган, милт этгап юлдуз йўқ эди. У яна бироз илгари силжиб, кекса қарағай тагини сийпалаб кўрди. Унинг қўлига ҳеч нарса уринмади. Шу чоқ унинг кўзига узоқдан нимадир ярқ этиб кўринди-ю, яна ўчди. «Чироқми, ракетами? Ракета бўлса ҳамма ёқни ёритиб юборарди. Чироққа ҳам ўхшамайди. Сигналмикан? Эҳтимол, мени қидиришаётгандир. Уша томонга силжиганим маъқул».

Нормат анча ергача қорни билан судралиб борди.

Сұнгра чалқанча ётиб олди. Учинчи дам олишида шарпа сезилди. Икки кишининг гаплашгани қулоққа чалина бошлади! «Немислар... бояги сигнал немисларники...» Нормат ер бағирлаб жим ётиб олди. Оёқ товушлари яқинлашиб, унинг ёнидан ўтиб кетди. «Мен немисга қараб кетаётган эканман, нақ бўлмаса, мана мен деб, ўзимни тутиб берар эканман...» Нормат йўлини ўзгартириб, чап томонга бурилди. У немисларнинг бузук танк олдида тўхтаганини фаҳмлади. У яна йигирма қадамча ўрмалагач, икки немис унинг тепасига келаётганини сезди. «Булардан қутулиш қийин экан...» Нормат ўзини ўликка солиб ётди. Немислардан бири яқинлашгач, алланима деб ғужурлади-да, унинг тепасига келиб, оёғи билан бир тепиб ўтиб кетди.

Норматнинг хаёлида фашистлар ҳамон унинг тепасида турганга ўҳшади. «Мени пойлаб туришган бўлса керак. Грейдер ҳар бир асир учун палон пул, темир крест мукофот эълон қилган. Мени асири қилиб судрашлари мумкин. Асири... Фашизм асири... Қандай мудҳиш! Дўстлар нима дейди? Онамга нима хабар боради. Адолат эшитса-чи? Ёздаги кузатув, она насиҳати, Адолат табасуми, «қаҷон келсангиз ҳам мен сизники» деган ваъдаси, унга аҳди-паймони, рўта жангчилари олдида ичган қасами!.. Майли, мени оссин, чопсин. Аммо асир тушмайман! Бошимга яқинроқ келса эди, кекирдагидан бўғардим, тишлаб узиб ташлашга қурбим етарди... Афуски...»

Нормат bemажол ётганича яна хаёл суриб кетди: «Бундай хавф туғилган чоқда большевиклар жаллоднинг болтасини кутмай, ўз-ўзини ўлдиришни афзал кўрган эдилар. Нега мен большевиклар қилган ишини қилмайман? Ахир, улар ўзларини қурбон қилиб, юргни сақлаб қолган эдилар-ку! Сен ҳам от ўзингни, Нормат! Ўзингни ўлдир! Улдир! Ҳа, вақтни ўтказма, чаккангни ўнгла, қўндоқ билан ур!.. Барибир ўласан, очликданми, қонсиэликданми, қийналиб, хор бўлиб ўласан. Нега бирорта ҳам ўқни сақлаб қолмадинг ўзингга? Қандай солдатсан, охирги патронни оғир кунингга сақламасанг? Қасамингни унуглибидинг? Қўндоқ билан миянгнинг қатифи чиққунча ур! Яхшиси кўзларинг кулфат, разолатни кўрмасдан, шаънинг, номусинг борида, уни юмиб қўя қол!..»

Нормат чўнтақларини титкилаб, ўлимини осонлаштирадиган ҳеч нарса топа олмади. Қўлига синиқ қўндоқни

олиб, унга анча вақттача тикилиб турди. Унинг кўзига мажақланган қўндоқ ўз эгасини ўлдиришга ожиз, жуда ожиз бўлиб кўринди. Даражатга урсинми шу азиэ бошини? Даражат узоқ. У, эмаклаб, сербутоқ қора қайин тагига борди. Бутоқларига қаншарини урсинми, пешонасими? Эҳ, Нормат, туғилганингда ўз-ўзингни мана шундай қийноқда ўлдиришингни билганимидинг? Туғилмоқ — ўлмоқ деганларининг боиси шуми? Шу қадар калтами сенинг умринг? Йўқ! Авжи яшайдиган вақting. «Ун гулингдан бир гулинг ҳам очилгани йўқ» демабими сенга меҳрибон онанг. Орзу ҳавасингни кўрай, демабими муштипар кампир. Нега энди сен унинг кўз ёшини оқизиб кетасан? Кўзлари кўр бўлиб кетмайдими шўрлик она сенинг догоингда? Адолат ҳам сени кутялти. Бағрини ўртаб, қора лиbosга чулғаб нима қиласан уни? Одам яаша учун туғилади. Яшашга, бир одамча яшашга ҳақинг бор! Ақлингни ростла, Нормат, ҳаёт курашсиз бўлмайди! Сен биринчи марта қийноққа дуч келдинг, умидсизланма! Ноумид — шайтон. Сен — инсон! Умидсизлик сени инсонликдан чиқармоқчи. Кимга керак сенинг ўлиминг? Душманга! Кимга керак сенинг ҳаётинг? Ўзингга, онангга, севганингга, улуғ Ватанингга! Қайт шайтоннинг гапидан, Нормат, сени ҳеч ким ҳозир, шу жойнинг ўзидаёқ жон бер деётгани йўқ. Яшашинг керак! Орқангга бир қара, дунёга келиб нимани кўрдинг, нима ишлар қилдинг? Ҳеч нарса! Сен яаша учун туғилгансан. Яшашнинг маъносини биласаними? «Яшамоқ — курашмоқ демакдир! Курашмоқ — ўрнак бўлиб яшамоқ демакдир!»— деган эди муаллиминг файласуфларнинг ҳикматини баён қилиб. Яшагинг келса, кучингни тўпла, туркураш! Қийинчиликка чида! Тур ўрнингдан, Нормат! Қатра қонинг қолгуича кураш! Яшашнинг маъноси—шу. Ҳали даҳшатли жанглар олдинда. Тепиб турган юракни тўхтатма, тур ўрнингдан, Нормат!

Нормат бор кучини тўплаб, ўрнидан турмоқчи бўлди-ю кўзи тиниб, яна йиқилиб қолди.

Аммо асирик даҳшатли ўлимдан ҳам кучлироқ эди. У, бор кучини тўплаб, чуқурликдан тепаликка тирмасиб, тепаликдан пастликка эмаклаб, судралиб, олдинга сурила берди. Ўрмон қирғонига олиб чиқадиган сўнгги ён бағирликда уни жуда ширин тонг уйқуси босди...

Ўн иккинчи боб
ДИЛ ХОҲЛАМАГАН ТУЙ МОЖАРОСИ

I

Эргашнинг Уралга кетиши ҳамон, Бозоров кўпдан берри ўйлаб юрган режасини амалга оширишга киришди. «Ўзи йўқнинг кўзи йўқ, қёқдан кўради у сени?» — деб ўйлади Бозоров.

— Зўрлик қилаётганинг йўқ, отаси беряпти сенга. Қонуний тўй, қонувий никоҳ. Қиз қўйнингга кирса бас, кейин уни бағрингдан тортиб оладиган қонун қайдада! Эргаш ўзининг коммунистларини тергасин. Қим уйланмаяпти шу кунларда? Хотин устига хотин олаётганлар озми районда? Колхоз раислари қўшхотинлик бўлишапти. Эргашнинг кучи етса, ўшалар билан олишсин. Қўшхотинни — хотин боқиш қўлидан келадиган кишилар олади. Сен, Бозоров, қайси раисдан камсан? Аммо Эргаш ичирган қасмадан қайтиш иложини топ. «Уят бизга бундай ишлар!» демабидинг? Уят ишми шу? Нега? Уят қолдими шундай уруш кунларида! Ҳар ким қўлидан келганича яшайдиган замон. Бу дунёда ўйнаб олганинг қолади кишига. Оёғингни ўйлаб бос, лекин қаттиқ бос. Соҳиб қорининг эшигига қўйган ҳар бир қадаминг остонасини тешадиган бўлсин. Қори молпараст. Унинг ёқаси сенинг қўлингда. Ёқасидан қаттиқроқ қис. Унинг бўғизи — сенинг омадинг. Ҳар қандай Эргашга ҳам унинг ўзи жавоб топади. Бўшашма, тарафдудни бошла!..

Қиз кўнмасачи? Унинг умиди Норматда. Нақадар сабр-тоқатли қиз экан бу Адолат! Норматнинг хатларини у эмас, мен ўқияпман. Тош эрийди бу хатларнинг ўтига! Аммо Адолат бу хатлардан маҳрум. Агар булардан биронтаси қиз қўлига тушиб қолсами, синмас қанот пайдо қилиб, қуш бўлиб учиб кетади у. Учирма уни, Бозоров, кейин оғзингга пашша қўниб қолаверасан... Норматнинг бедарак йўқолгани тўғрисидаги хат — сенинг баҳтинг. Хат ташувчини тақдирла бу ўлжа учун. Хатни кўп ушлама ёнингда, дарҳол тарқат қишлоққа. Адолат энди қуш бўлиб учолмайди, қаноти қайрилди унинг. У сеники. Норматнинг тақдирли Корига маълум бўлган кунин — Адолат сенинг қўйпингда. Қорининг қарғиши бир эмас, ўнта Адолатни қайиради. Ота рози — худо рози.

Шундай қилиб, Бозоров Соҳиб қорининг ҳовлисига тўй юборадиган бўлди.

Бозоровнинг совғаси келган куни кечаси Холида эридан тўй яқинлигини ва тараддудни тезлатиш кераклигиги эшитиб, ўзини йўқотиб қўйди.

— Дадаси,— деб гап очди Холида,— қизингизни сўратишга Бозоровнинг қандай бети чидабди?

Соҳиб қори одатдагидек хотинига ўшқириб гапирди:

— Сенга ким қўйди, эрнинг ишига аралашишни?..

— Умид билан оқ сут берган онасиман, ахир.

— Қиз етилгач, уни эгасига топшириш керак. Бошингга ёстиқ қиласанми уни? Қизинг тенглари икки бола кўрди.

— Берсак ҳам, ўзига муносибга берайлик, дадаси...

— Бозоровдан бошқа ким бор қишлоқда? Оғзингни юм, ишингни қил. Эсингни еб, сен шундай деб турсанг, қизинг нима дер эди?..

— Ҳай дадаси...

— Ҳайиллайверма ҳадеб!— деб Соҳиб қори бадтарроқ ўшқирди. Холида жимиб қолгач, гапида давом этди:— Талағингни кутмасдан тараддудингни қилсанчи!

Холида эрига бошқа гап қайтаролмади. У алла маҳалда ўрнига кириб ётди-ю, тоңг отгунча ухлолмай, тўлғаниб чиқди. «Пешонаданми, тақдирданми бу гаплар? Пешонаси шўрмикан бечора қизимнинг. Оҳ, Адолат... Отангга оғиз очолмайди бу бечора онанг. Уруш отангни бадтар айнитиб қўйди. Бу уруш сени ҳам занжирбанд қилмоқчи. Турмушимизга қалампир сепди бу уруш. Уруш қачон тугайди? Урушдан омон қайтадими Нормат? Қачон? Қандоқ қайтади? Чўлоқми, шолми, кўрми, карқулоқми? Абгор бўлиб қайтса ҳам кошки — ёшлиқда берган кўнгил топишиб кетар. Аммо келмасачи? Келмай қолса, умринг иснодда ўтади сенинг, Холида! Эрингдан сенга кун йўқ, буни билиб қўй. Яхшиси, билганини қилсан отаси. Минг қилса ҳам ота. Кўчада юради, кўпни кўриб, кўпни билади. Бирор нарсага ақли етганидан қилётгандир бу ишни!»

Кеча Бозоровнинг извоши Соҳиб қори ҳовлисига алланималарни ташлаб кетди. Бу хабар оғизма-оғиз кўчиб, чўлдаги Адолатга ҳам бориб етди.

Адолат хирмондаги пахтани четан аравага ортгач, тепасига ўтириб қишлоққа жўнади. Арава филдираги

тошлоқ йўлда тошдан тошга урилиб, тишга тегадиган даражада бир мақомда ғирчиллаб, Адолатнинг жонига тегди. Адолатнинг боши гўё бир кирмон пахтани сифдирган четандай шишиб, хаёли унинг ораларидан тўкилаётган пахтадай сочилиб кетди. «Отангга ҳаддинг сифмайди,— деб ўйлаб борарди Адолат.— Лекин отангнинг қилмишидан кимга дод дейсан? Исподга қолмайдими бу ёш бошинг! Узингдан чиқсан балога — қайга борасан давога? У сенинг қўл-оёғингни боғлаши, сочингдан бураб тортиши мумкин. Отангнинг қўлидан келади бу ишлар. Ота қаҳрини кўтаришга тайёрмисан? Нега оталар бемеҳр бўладилар? Нега оталар қизларининг дидига разм солмайдилар? Айниқса, сенинг отанг... Эскилик қули. Онангдан бошқа ғамхўринг, йигидан бошқа иложинг йўқми?..»

Холида кичик қизи Раъонони уйга ётқизиб, эрига жой солгани айвонга чиқди. Шу вақт ҳовлида оёқ товуши эшитилди, Холида, Қори келяптилармикан, деб ҳовлига қараган эди, сўриток тагида, ой ёғудусида Адолатни кўрди. Адолат ҳорғин қадам ташлаб келиб, айвон пешига ўтириди. Она унинг ёнига келиб, қизининг пешонаснни ушлади.

— Иссифинг борми, қизим!

Адолат қип-қизариб, тўлиқиб турибди. Айвондаги осма фонаръ ёруғида унинг қизариб кетган юзи янада товланиб кўринмоқда. Онанинг назарида қизининг юзига қизамиқ тошиб, шабадада сувланиб кетганга ўхшади.

— Ҳай қизим, нима бўлди сенга?

— Ҳеч нарса,— Адолат аясининг бағрига бош қўйиб ҳўнграб йиғлаб юборди.

— Ким хафа қилди сени, қизим?

Адолатнинг юзи ўт бўлиб, онанинг бағрини ёндиromoқда, кўз ёшларидан кўйлаги ивимоқда. Қизининг ҳасратини тушунган она унинг қалин соchlарини, қайноқ пешонаснин силай бошлади. Ҳозир унга зиғирдек гап ҳам оғир. Унинг юраги яраланган. Унинг дил кўзгусини ота тош отиб синдириди. Юракдан оқсан кўз ёшини тўхтатиб бўладими!

— Йиғлама, қизим, тақдир...

Онанинг бу гапи Адолатнинг яраланган қалбига отилган ўқдай бўлди. Унинг суюнган тоғи — меҳрибон онаси ўз бағридан узилиб тушган Адолатига шуни

раво күрдими? Қандай кунга қолдинг, Адолат? Нега она түнгич қизини жаҳаннамга ташламоқчи? Остин-устин бўлиб кетдими бу дунё? Ким остин-устин қилди уни? Уруш шунча мудҳиш нарсамики, тўрт ой ўтмай, ўқлари бағримизни тешяпти...

— Сизга ишонган эдим. Сиз ҳам...

— Койима қизим, ўзингни бос.

— Мен бошқани севолмайман... Тобутим кўрснін ўша Бозорвни!

Қайси она ўз қизининг кўэ ёшини оқизиб қўйгиси келади. Айниқса муштипар Холида. Унинг ўз дарди ўзинга етмайдими? Адолат ҳам у босган тиканни боссинми? Холиданинг ёшлик даврида аёлларнинг кўзи кўр эди, тиканни кўрмасдан босарди. Энди ҳамманинг кўзи очиқ. Адолат кўриб туриб, тиканни босадими! Агар ўша вақтда Холиданинг ҳозиргидек кўзи очиқ бўлиб, тўрт томонни кўрганда, Қорининг чангалига тушармиди!..

— Нима қиласай, қизим, иложим қанча?..

— Дадам овора бўлмасин!— деди Адолат онасиға.— Эл олдида уялиб қолади... Қизларни зўрлаб эрга берадиган вақт ўтиб кетган!

— Вой қизим, бу нима деганинг?

Адолат онасиға бошқа ҳеч нарса демади, ичкари хонага кириб, ўн йил дарс тайёрлаган столида хат ёзишга ўтирди. У тунда алламаҳалгача қалам тишлаб, Норматини ўйлаб, ўртаниб, унга қўйидаги мактубни ёзди:

«Нормат ака, хат кутиб кўзларим ниғорон бўлди.
Икки энлик мактубингизга интизорман. Вақт то-
полмадингизми, хат ёзмадингиз, ёки хатингизни бу
ердагилар тутиб олиб, яшириб қўйишияптими, ҳар
ҳолда, хат йўқ. Хаёлим ўзимда эмас, қулоғим эшик-
да, кўзим йўлда. Ёнимда бўлганингизда, дардимни
ўзингизга айтардим, зор кўнглимга тасалли берар-
дингиз. Ҳамма бало сизнинг бу ерда йўқлинингиз-
да. Узи йўқнинг кўзи йўқ, деганлари рост экан.
Нормат ака! Сиз менинг бу сўзларимнинг нақадар
очиқ ва аччиқлигидан койиманг. Менинг бошим му-
сибатда қотиб қолди. Сизни катта ваъдалар билан
кузатган кишилар хиёнат йўлига ўтдилар. Сельпо-
даги Бозорвни яхши биласиз. Ўша сурбет, отам-
ни қўлга олган. Отам мени унга сотмоқчи. Бозо-

ровнинг кимлигини билар эдим, аммо, отамнинг бу қадар пасткашлигини билмас эканман... Бу ерлардан бош олиб кетгим келяпти, лекин қаёқса боришимни билмайман. Сизни ўйлаган чоғимда кўзимга ҳеч нарса кўринмайди. Бу оғир ҳолатдан мени қутқазувчи биргина сиз. Эргаш акам Уралда, Олимжон акам фронтда... Уруш ҳаммани ўз ипига ўраб қўйди. Маслаҳатгўйим йўқ. Аммо сиз шунга ишонингки, станциядаги сўзим сўз. Сизга бўлган пок севгимни асрашга ўзимда куч тополаман. Кутинг, кутаман!

Сизни соғинган *Адолат!*.

4

Қишлоқ хат ташувчиси райондан келиши билан тўппа-тўғри Тўхта холанинг уйига борди. Дарвозани тақиллатиб, ҳар куни хат сўрай бериб жонга теккан кампирни чақирди.

— Мана сизга хат,— деди у.

— Норматданми? Айланай сендан, болам, қани уйга кир, чой ичиб кет!

— Ҳа... Ҳа... Норматдан...— деди хат ташувчи дудуқланиб орқасига қайрилиб кетаркан.

Кампир конвертни ўпди, бағрига босди, кўзларига суртди. У, Норматнинг хатини ҳар гал Эргашга ўқитарди. Энди у хатни кўтариб, бухгалтерга ўқитгани колхоз идорасига йўлга тушди. Гузарда сўрига гилам солиб, пар болишга ёнбошлаб ўтирган Бозоров кампирга гап ташлади:

— Ҳа, Тўхта хола, хат келдими? Соғ-саломат экани Нормат?

— Худога шукур... Эргашбойга ўқитай деган эдим, бу ерда йўқ, бухгалтер боламга олиб кетяпман,— деди кампир хатни кўрсатиб.

— Адолатхонга ўқита қолмабсиз-да, ҳозир уйига кириб кетди.

Бу маслаҳат кампирга ёқиб тушди.

— Нормат унга ҳам салом айтгандир. Адолатга ўқита қолай. Ҳурсанд бўлади болагинам,— деди-да, кампир Соҳиб қориникига бурилди.

Бозоров кафтларини ишқалаб, кампирнинг орқасидан чапак чолиб қолди.

— Ана энди тўйни бошласак ҳам бўла беради...

Тұхта хола катта дарвозага кириши билан оқ Адолатни чақира бошлади:

— Отинча қизим-жо, үзимнинг отинча қизим, қанисан?

Адолат уйдан югуриб чиқиб, кампирнинг қўлидаги конвертии олди-да, кичкинагина қайчиси билан қирғонини қўйди.

— Хатига муҳр ҳам бостириптими? — кампир қизиқиб сўради.

— Йўқ... — деди хатни кўздан кечираётган қиз, бирдан ранги оқариб, қўли қалтиради.

Адолатнинг бошига тош урилдими, ёки бирор унинг кўзларига қора чиммат тўсиб қўйдими, атроф қорон-филлашиб, кўзи тиниб кетди.

— Уқи-чи, қизим, ўқи! — деди кампир ошиқиб.

Киз ўқиди. Хат қисқа эди. Хатнинг бошида Норматнинг жангда қаҳрамонлик кўрсатгани айтилган. Тұхта хола унинг охирини кутмай, Нормат тўғрисидағи мақтov гапдан қувониб, «ўғлим қаҳрамон бўлибди» дегандек, қаддини ростлаб, Адолатга кулиб қараб қўйди.

Адолат ўқиша давом этди. Бу хат Эргаш билан Тұхта холанинг Норматни қидириб ва унинг тақдирини билиш учун фронтга ёзган хатларига жавоб тарифасида юборилган эди. Хатнинг охирода:

«...Нормат Жабборов, дараксиз йўқолди. Қидириётимиз» — дейилиби.

Хатга комиссар Черницов қизил қалам билан қўл қўйган эди.

«Дараксиз» деган сўзни эшитди-ю, онанинг ҳуши бошидан учди. Адолат ҳам кўзини бир нуқтадан узолмай қолди. Ҳарфлар унинг кўзига дараҳтдай йирик кўринди, кейин чумолидай ўрмалай бошлади. Уйдан чиқиб, хатнинг охирини эшитган Холида ҳам бармоғини тишлаганича қотиб қолди, кейин Тұхта холага таскин бермоқчи бўлди:

— Хафа бўлманг, опа... «Қидириятимиз» депти-ку, топилади. Сабр қилинг. Умидсизланманг.

Тұхта хола айвон олдидә ўтириб қолди. У устунга суюниб, куйиб йиғлади. Адолат ўзи изтироб чекаётган бўлса ҳам, Тұхта холага далда берди:

— Ноумид — шайтон, холажон. Үзингизни тутинг. Нормат акам топилади!..

Тұхта хола бир ақвонда ўрнидан турди. Адолат уни сүяб, күчага етаклаб олиб чиқиб кетди.

5

Адолат Тұхта холани уйига кузатиб қўйғандан кейин, тўппа-тўғри боққа кириб, ариқ бўйидаги Нормат билан кўришган гулзорига яширинди. Кечгача боғдан чиқмади, ҳеч кимга кўринмади.

Куз ҳавоси илиқ эди. Қечки гуллар очилиб турибди. Қўкда танҳо ой кезмоқда. Ариқ суви Адолатнинг суратини бошига кўтариб, қалқиб, шовиллаб оқяпти. Сув гўё Адолатга ҳамдард бўлиб, мунгли-мунгли куйлаётганга ўхшайди.

Адолатнинг йиғидан қизарган кўзлари шу гўзал гулзордан Норматнинг этик изларини қидириб тополмади. Нормат ҳам шу соатда Адолатни ўйлаётгандир, эҳтимол, яраланиб, азоб тортаётгандир. Эҳтимол, ана шу ой уни ҳам кўриб тургандир, йигит ноласини эшистаётгандир.

— Бошим қотиб қолди,— деди Адолат ўзига-ўзи.— Нормат акам ҳаёт бўлса эди... Вой, нега мен унинг ҳаётлигига гумон қиласман энди? У тирик!..

Адолатнинг кўз олдида Норматнинг йирик қора кўзлари, кенг елкалари, сокин кулиб боқиши жонланди...

* * *

...Эртаси куни ярим кечада Соҳиб қори дарвозасини кимdir қоқди. Дарвоза олдин секинроқ, кейин кучлироқ тақиллади, кейин, ҳалиги одам дарвозани оёғи билан тепа бошлади. «Ким бўлди бу?— деб ўйлади Соҳиб қори.— Қоровул номимни айтиб чақираарди, хат ташувчи бўлса хатни девордан ташлаб кетарди. Бозорвикин? Яна маст бўлиб келдимикин?.. Адолат шу ерда. Унинг хулқини кўриб қолса, нима бўлади? Унинг ўйлини тўсмоқ даркор...»

Соҳиб қори кийиниб эшикка чиқди-да, ўпкаси оғизига тиқилиб, дарвоздадан ҳовлиқиб қайтди.

— Холида, Холида, суюнчи бер!.. Адолат, аканг келди!

Адолат дадасининг шовқинини эшитиб, сакраб ўрнидан турди-да, кўйлагини бошига илиб, уйдан ҳов-

лига югуриб чиқди. Айвон олдида Олимжон кулиб турарди.

— Акажон! — деб Адолат унга ўзини отди.

Олимжоннинг Фронтдан қайтгани тўғрисидаги хушхабар бир зумда қишлоққа ёйилди. Аввал қўни-қўшнилар, кейин узоқ-яқин қариндошлар етиб келишди. Адолат чироғларни ёқиб юбориб, ёнғоқ тагидаги супага жой қилди.

Тўхта хола ҳам етиб келиб, Холидадан кўнгил сўради:

— Олимжон келиб, севиниб қолдингизми, эгачи?

Тўхта хола Олимжоннинг елкасидан силаб, юзидан ўпди.

— Эсон-омон қайтдингми, болам? Қадаминг қутлуғ келиб, зора Нормат ўртоғинг ҳам келиб қолса!

Ҳамма ёнғоқ тагидаги супага ўтириди. Олимжон Раъонни тиззасига олиб, севиб-севиб эркалади.

— Урушдан гапириб бер, болам,— деди Тўхта хола Олимжонга қараб,— душман енгилай дейдими?

— Урушни кўрганим йўқ,— деди Олимжон, бошини чайқаб.

— Нега бўлмаса бир енгинг осилиб турибди?

— Мана шунисига доғман-да, холажон. Хат ёзмаганимнинг сабаби ҳам шу бўлди. Ростимни айтсан, уядим. Урушга кирмай ногирон бўлганимга хафаман.

— Вой, нега шунаقا бўлди?

— Душманга қараб битта ўқ отсам — армоним йўқ эди. Порох ҳидламай урушдан қайтдим,— деб ҳикоя бошилади Олимжон.— Эшелонимиз кечқурун Москва яқинидаги Можайск станциясида тўхтади. Аллақаерда йўл тузатилаётган экан, станцияда яроғ-аслаҳа ортган эшелонлар жуда кўп тўпланиб қолган эди. Биздан олдин келган эшелонлар тунда бир бошдан жўнай бошлиди. Бизга навбат яқинлашиб қолганда, тўсатдан тасира-тусур бошланди. Вагон ёриғидан бундай қарасам, немис осмонга жуда кўп чироғ осиб қўйиб, тепамизга бомба ташлайти. Командирлар тревога кўтаришди. Мен милтиғимни олиб, вагондан пастга сакраганимни биламан, холос. Кейин ўзимни Москвадаги госпиталда кўрдим. Бомба парчаси ўнг қўлимни узиб кетибди. Тузалганимдан кейин қўлимга милтиғимни қайтариб беришмади, «сен урушиб бўлдинг энди»— дейишди. «Ҳеч бўлмаса, ўқ-дори ташийман, чап қўлим билан

ҳам отавераман» десам, «йўқ, бўлмайди» деб туриб олишди. Госпиталь комиссари келиб: «Сиз қайсаарлик қилаётган эмишсиз, фронт орқасини мустаҳкамлаш иш эмасми, бораверинг, пахта далалари сизни кутиб турибди» деди. Мана, келдим. Уруш кўрмаган инвалидга нима иш берсаларинг, қила бераман!

* * *

Адолат кечаси билан кўз юммади. Кўзлари шифтдаги бир нуқтага тикилиб турса ҳам, хаёли олам-жонни айланиб чиқди. «Ижозат берсалар, ҳозир унинг қуролини кўтаргани борардим!..»

Олимжон эрталаб чой ичиб ўтирганда, Адолат ундан сўради:

— Фронтга қизларни ҳам олишадими?

— Олишади,— деди, ҳеч нарсадан хабарсиз Олимжон.— Кеча бир лейтенант шаҳарда бир неча қизни тўплаб, машқ қилдираётганини кўрдим. Улар орасида ўзбек қизлари ҳам бор эди. Ҳарбий кийим бирам яратибдики уларга... Сочларини турмаклаб, пилоткани бостириб кийиб олишибди. Мен уларнинг команда билан қадам ташлашларини анча вақт тамоша қилиб турдим. Йигитлардан сира қолишмайди.

— Қанақа машқ?— деб сўради Адолат қизиқиб.

— Лейтенант қизларнинг қўлига байроқчалар бериб, у ёқ-бу ёқка йўл кўрсатишни ўргатяпти. Бундай қизларни фронтда регулировшчик дейдилар.

«Ана шу қизлар сафида менга ҳам жой бордир,— деб ўйлади Адолат.— Бахтимни бир синааб кўрайчи?..»

6

Эртасига эрталаб дарвоза олдида яна извош қўнғироғи жаранглади. Соҳиб қори пешвоз чиқиши билан кимнингдир «тўй устига тўй бўлибди, Қори ака, мана ўғлингиз ҳам келиб қолибди» деган овози эши-тилди.

Адолат келган кишининг товушидан таниди. У, сельпо базасининг қоровули, Бозоровнинг яқин кишиси эди. Қоровул кечагина бир қоп ун, ярим қоп гуруч орқалаб кириб, айвон олдига қўйиб кетган эди. Адолатни қаттиқ титроқ босди. У онасини қучоқлаб, яна йиғлай бошлади.

— Бағринг әзилиб кетди, болам, кечадан бері,— деди она, қизининг елкасини силаркан.

Соҳиб қори извошдан яна нималардир күтариб кираётган эди, Холида югуриб борди-да, ўрта эшикда унинг олдини тұсады.

— Товутым күрсін бу сарполарни. Киритмайман уйимга!

— Ийи, ийи, ахмоғ-эй. Буларнинг ҳаммаси қизинга. Бор, күйлагини кийдириб, зеби-зийнатини тақиб қўй!

— Ҳеч нарсаси керак әмас. Қайтаринг, дедим, қайтаринг!

Холиданинг ранги оқариб кетган, кўзлари бежо эди. Соҳиб қори унинг бу ғазабини пасайтириш учун бўлса керак, унга паст тушиброқ гапира бошлиди.

— Извош кетиб қолди, хотин. Ҳозирча уйда турсин, кейин бир гап бўлар. Мана, ўғлиниг ҳам келиб қолди. Орзу ҳавасинг унга насиб этганига шукур қил, нодон хотин!

— Бундай орзу ҳавасдан бир газ гўр афзал менга!

Соҳиб қори хотинининг авзойига тикилиб қарали-да, ўшқирди:

— Йўлимни тўсма, понкўр!

— Шу сарполар ўлигимни босиб ўтиб уйга киради!— деди Холида, оstonага ўтириб олиб.

— Бетинг қурсин!— деди Соҳиб қори ғазабланиб.— Эндиги хотинлар эрини ҭанийдими! Ма, ол буни, сандифингга солиб қўй!

Холида рўмолининг учини тишлаганича оstonада бақрайиб тураверди.

— Нега бўзраясан, олмайсанми буни?!

Хотинидан сазо чиқмагач, Соҳиб қори қўлидаги сарполарни Холиданинг бошидан ошириб, ичкарига отди.

— Йўлимга кўндаланг бўлсин, деб бир ёстиққа бош қўйган эканман мен бу билан. Қўзингни очмасант, қорачиқларини қовогинг билан бирга ўйиб оламан, беюз хотин!

Холида қимирламай, оstonада тек ўтира берди. Қорининг жаҳли чиқиб, лабини тишлади-да, хотинининг биқинига бир тепди. Холиданинг кўнгли озиб, йиқи-либ тушди. Буни кўрган Адолат онасининг бошига югуриб келди.

— Тепманг аямни, дада, бир тепкилил ҳоли бор бечоранинг!..

Кори жанжал чиқмасин деб, қизига ёлворди:

— Онанг ақлдан озибди, қизим, ол, йиғишириб қўй буларни!

— Дадажон, хўрламанг мени,— деди Адолат,— тириклай ўтга ташламанг!..

Корининг ғазаби яна тошди.

— Нима деганинг бу, уятсиз? Отага бундоқ гапиришни ким ўргатди сенга?

Соҳиб кори айвондаги қопларга, ҳовлида сочилиб ётган тўёналарга қараб, агар буларни қайтариб берса, гўё унинг бошидан тожи, қўлидан давлати кетиб қолаётгандек, юраги орқасига тортиб кетди.

— Якшанба куни тўй!— деди у биркесарлик қилиб.— Қизнинг изми отада!

— Овора бўласиз!— деди Адолат отасига тик бўқиб.

Соҳиб кори яна пўписа қилди:

— Гапимни иккита қилсанг, сендай қизим йўқ! Билиб қўй шуни!

— Майли. Кетаман. Бу зиндондан қутулганим яхши!

Адолат уйидан қандай отилиб чиқиб кетганини ўзи ҳам сеzmай қолди.

7.

Адолат район комсомол комитетига келиб, «мени фронтга жўнатинглар!» деб илтимос қилди. Комитет секретари унинг қўлидан аризасини олиб, қайта-қайта ўқигач, «Ватанпарвар қизларнинг аризалари» папкасига солиб қўйди.

— Бориб ишлайверинг,— деди секретарь,— керагида чақиртирамиз.

— Йўқ, мени шу бугуноқ жўнатинг.

Секретарь ўжар қизга ҳайрон бўлиб тикилди.

— Шу бугуноқ? Яхши. Аммо биз аризаларни бурода кўрамиз, кейин военкоматга ўтказамиз... Бориб ишлайверинг!

Адолат далага қайтиб келиб, хирмонда тунади. Даштдаги қизлар Адолатнинг авзойи бузуқлигини кўриб, кечаси билан фолбинлик қилиб чиқдилар. Бе-

гимхоннинг тили узун бўлиб кетди. Энди у нима деса, дея олади, қани, Адолат унинг оғзини ёпиб кўрсинчи! Адолатнинг тили қисиқ. Қани энди оғзини очиб кўрсинчи, ўша майда тишларини қоқиб олади Бегим! Қани Адолат энди уни тергаб кўрсинчи, Бозоровнинг номини эшитиши билан дами ичига тушиб кетади. Ҳолинг шуми, Адолат, даштга келган кунингдаги дабдабанг қани?

Қизларнинг ғийбатига Шакархонгина қўшилмади. У, Адолатга ёрдам қилгиси, иложини топса, уни Бозоров чангалидан қутқаргиси келди. Қандай ёрдам керак унга? Отаси уни оқ қиласман, депти. Адолат ўз уйидан бошини олиб чиқиб кетибди. Бу қизлардан ҳеч нарсанни сир тутиб бўлмайди!

Бугун Адолат районда юрган вақтида унинг онаси Холида даштга келиб, юм-юм йиглаб, ҳасратини айтиб кетди. «Сойга ташламаса эди ўзини, ўтга ташламаса эди ўзини» деб йиглади у. Қўшни қишлоқлардан бирида кимнингдир қизи бевафоликка бардош беролмай, бошидан керосин қуйиб, ўзини ёндириб юборган эмиш, деган гап тарқалгандан бери, Холиданинг хаёли ўзида эмас. Бутун бир оила тўзиб юрибди...

Шакархон Адолатнинг юрагига қўл солиб кўрмоқчи бўлиб, хирмонга борди. Адолат ухламай, ўй суриб ётган эди. «Дарди оғир бечоранинг» деб ўйлади Шакархон.

— Адолат, хафа бўлма, ойнинг ярми қоронги бўлса, ярми ёруғ. Ҳаммаси изга тушиб кетади...

Адолат индамай ётаверди.

— Эргаш aka келсин, маслаҳатлашайлик. Сени ёмонга ёндоштириб қўймаймиз...

— Яхшига кун йўқ, ёмонга ўлим йўқ,— деди Адолат, пиқ-пиқ йиглаб.

Шакархон дугонасининг ёнига чўкди.

— Йиглама, кўз ёшидан фойда йўқ. Отанг ҳайдаган бўлса, бизникига бориб тур. Уйимнинг тўри сенини!

— Раҳмат, Шакархон, яхшилигинги сира унумайман...

Шакархон Адолатни уйига бошлаб кетди. Икки қиз тонггача фронтдан, севишганларидан сўзлашиб чиқишиди.

...Кунлар ўтаверди. Адолат аризасининг оқибатини кутиб юрди. Ҳадеганда жавоб кела бермади. У райкомга, военкоматга яна хат юборди.

Адолат ота қарғиши, Бегимхоннинг таънасидан бош кўтаролмай қолди. Бунинг устига, қишлоқдан келувчилар ҳар куни ҳар хил гап топиб кела бошладилар. Кимдир, Бозоровнинг: «Қизнинг ўзи кўнмаса, кўндирадиган тузофим кўп» деб чиранганини айтди. Яна бирор Бозоровнинг: «Шийпонга икки отлиқни юбориб, Адолатни отга ёппа қилиб, Аравонга олиб қочаман, никоҳ кечасидан кейин кўнишиб кетади» деган гапини олиб келди. Соҳиб қорининг ўз қизини икки қўлидан боғлаб, Бозоровнинг қўйнига солиб берадиган режалари ҳақида миш-мишлар тарқалди. Қишлоқдан келиб далага тарқалаётган бу хил гап-сўзлардан Адолат тарс ёрилиб кетгудек бўлди. Аммо бу адолатсизлик ҳақида Адолат бирор жойга арз қилишни ўзига эп кўрмади.

У уч кунгача Бозоровнинг «тузофига»ни, кечаси кела-диган аллақандай отлиқларни ўйлаб, ухлолмай тонг оттириди. Райкомолга берилган аризанинг оқибати маълум бўлавермагач, тўртинчи кун эрта тонгда яна сўқмоқ йўллар билан районга жўнади.

Райкомолда унинг аризаси военкоматга ўтказилганини айтдилар, военкоматда эса, Адолатни жуда совуқ қарши олишди. «Бригадирни фронтга юборолмаймиз» деди военком.

Адолат отасининг кўзига кўринмаслик учун, қишлоқ ораламай, яна сўқмоқ йўллар билан даштга қайтди. Фира-шира пайтда, шийпонда қовун еб ўтиришган қизларнинг ёнига келди. Уни кўриши биланоқ Бегимхон гап ташлади:

— Нега кечикиб келдинг, Адолат? Мен сени гўшангода ўтириптимикин депман.

— Вой, нега ундей дейсиз, Бегимхон?— қизларнинг бири гапга аралашди.— Бизни тўйга айтмай, гўшангага кирагиди Адол!

— Бошқа гап қуриб кетибдими?— деди Адолат, ўзини босиб. Кейин орадан ҳеч гап ўтмагандек, Бегимхонга тик қараб:— Райондан келяпман,— деди.

— Райондан?— деб қизлар бир-бирларига қарашиб олишди.— Хоҳладимга бордингизми?

— Ҳа, хоҳладимга. Фронтга кетишни хоҳладим.

— Вой-вой, тентак бўлганми бу қиз?— деди Бегимхон, лабини буриб.— Шундоқ иссиқ жойдан эр чиқаётганда, бу нима қилганинг? Мен сен бўлсам, Бозоровга

аллақачон тегиб олардим. Ҳуэурингни билмас экансан үзинг!

— Ҳуэурни ўшандақаларга тегишида деб билсанг, бор, тегиб ол! Менинг Ватанга хиэмәт қилишдан бошқа ҳуэурим йўқ!

8

Шакархоннинг уйи қишлоқдан анча узоқда бўлиб, катта ариқ бўйидаги якка қўрғонда эди. «Бу ерда эканимни ҳеч ким билмасин» деди Адолат Шакархонга. Адолат энди даштга ҳам, ўз уйига ҳам бормай қўйди. Қишлоқда: «Адолат Бозоровга тегмайман, деб фронтга кетиб қолган эмиш...» деган гап тарқалди. Кимdir бу гапни ёлғонга чиқаргач, қишлоқдагилар: «Адолатни Бозоровнинг одамлари Аравонга олиб қочган эмиш» деб юришди. Яна кимdir: «Нормат Адолатни самолётда фронтга олиб кетган эмиш» деган гап топиб келди... Бу гап Холиданинг қулорига етган куни Соҳиб қорининг уйида яна можаро бошланди. Она: «қизимнинг бoshing нима кунлар солдинг?» деб эрига осилди. Аламда авзойи бузилиб юрган Қори хотинини тутиб олиб урди. Уртага Олимжон тушди, жаҳл чиқса, ақл кетади, деганларидек, Қори кечагина фронтдан келган инвалид ўғлини ҳам тепиб юборди. Шундан кейингина Олимжоннинг кўзи очилди. Шу дамгача отанинг юзига тик қарамаган ўғил, Соҳиб қорининг қўлидан маҳкам ушлаб, кучининг борича сиқди-да, етаклаб олиб бориб, айвондаги сўрига ўтқизиб қўйди.

— Шу чоққача раъйингизга қараб юрган эдим. Энди Адолат учун мен жавоб берай. Бозоровга берадиган синглим йўқ. Тенг тенги билан, тезак қопи билан! Бозоров бир қоп тезак! Адолатнинг тенги Нормат!

Соҳиб қори сўрининг бўшаб турган тахтасини суғуриб олиб, ўғлига ўхталган эди, Олимжон тахтани ҳам тортиб олди... Раъно дод солиб кўчага қочди-да, йўловчи араваларга осилиб, кечга яқин даштга етиб келди. Хирмонда қизлар уни ўраб олишди. «Опанг келмадими? Қани Адолат? Нега йигаляпсан?» деб уни саволга кўмиб юборишли. Қизларнинг бу хил сўроқларидан опасининг чиндан ҳам йўқолганига ишонган Раъно узвос солиб йиғи бошлади. Унга қизларнинг раҳми келди. Шакархон уни юпатмоқчи бўлиб, алдаб-сулдаб капага олиб

кирди-да, бир қарич «чайнаманг-шиминг»дан синдириб берди, «үтириб тур, опанг келади» деди-да, яна пахта теришга тушди. Ҳаял ўтмай, қош қорайиб, пахтани кўриб бўлмай қолди. Раъно: «Опам қаёқдан келар экан?» деб хирмондан ҳар томонга қарайвериб, кўзлари тинди. Тўрт томонни кеча зулмати босди. Шакархон этакдаги пахтасини тўкиб келди-да, Раъононинг қўлидан этаклаб, катта ариқ бўйига бошлади, сўнгра сўқмоқ билан олиб кетди.

— Жон опа, ростини айтинг, қаёққа олиб боряпсиз мени? — деб сўради Раъно, йўлда тўхтаб. — Қўрқяпман.

— Қўрқма. Етай деб қолдик.

Раъно юрагини чанглаб, қўрққанидан қалтираб борар эди.

— Мана келдик. Опанг бизнинг уйимизда.

Шакархон Раъонони ўз уйига бошлаб кирди.

Адолат Шакархоннинг безатиб қўйган уйида китоб ўқиб ўтиради. Раъно югуриб бориб, опасининг бағрига отилди ва хафалигини ҳам унутиб, қишлоқдаги мишишларни ҳикоя қила бошлади:

— Биласизми, опа, сизни Бозоров олиб қочиб кетди дейишди. Аям сочини юлиб йиглаляпти. Мана мен қидириб келдим. Нега беркиниб олдингиз бу ерга? Тўйдан қочдингизми-а, опа?

Адолат синглисини бағрига босиб, кўзига жиққа ёш олди. Раъно унинг нега йиглаётганини тушунмаса ҳам, опасига қўшилиб йигига тушди.

— Йиглама, Раъно,— деди опаси, унинг бошини си-лаб.— Сен йигламайдиган бўлиб ўс. Мен кетаман. Сен қоласан. Менга хат ёзиб тур.

— Қаёққа, опажон, қаёққа кетасиз? Мени ҳам олиб кетинг!

— Сен борадиган жой эмас, фронт.

— Фронт? Фронтда нима қиласиз? Олимжон акамга ўхшатиб, бир қўлингизни чўлоқ қилиб қўяди фронт, борманг опа, бормант!

— Энди бормай иложим йўқ.

Бир нафасда ювиниб-тараниб келган Шакархон гапга аралашди:

— Нормат Москвадами?

— Москва атрофида. Москва остонасида...

— Тополасанми уни?

— Топаман... Кечалари ухлатмас экан бу муҳаббат ўти. Муҳаббат пима ўзи, билмас эдим. Муҳаббат — ор-

зиқиб кутиш, ўкиниш, ўртаниш экан. Мұҳаббат — азоб-уқубат, қийноқ экан. Бегимхон айтгандек, оташ, жағаннам экан. Сиз айтгандек, шармандалик экан. Нега бир-бирини севади кишилар? Нега бир-бири учун жон беради, заңар ичади? Тоҳир билан Зуҳра, Фарҳод билан Ширин, Лайли билан Мажнун ҳикоялари, энди билсам, афсона эмас экан. Чин севги экан ўшаларнинг севгиси! Мен жоним борича севгимга хизмат қилгани кетяпман. Тирик бўлса — ёнида юрай. Шаҳид ўлса — ёнида ётай. Аҳдим шу!

Адолатни Тўхта хола ҳам қидириб юрган эди. У, Раъононинг изидан бориб, уларни Шакархонларнидан топди. Адолат унинг бағрига отилиши ҳамон, кампир ўзини тўхтата олмай йиглаб юборди.

— Йигламанг, онажон! — деди Адолат, кампирни юпатиб. — Үғлингизнинг олдига кетяпман. Нормат акам чақирипти.

— А? Нормат чақирипти?

— Шундай. Нормат акамнинг ёнига кетяпман! — деди тақрорлаб Адолат.

— Баракалла, қизим! — деди кампир ўзини дадил тутиб. — Қиз бола бўлсанг ҳам йигитлардай идрокинг бор экан! Оқ йўл берсин сенга, қизгинам!

* * *

Адолатни фронтга жўнатиш маросими қишлоқни иккига бўлиб қўйди. Бир тараф Соҳиб қорига, иккинчи тараф Адолатга ён босди. Соҳиб қорининг тарафдорлари — ўзбекларнинг ота-бобоси амал қилиб келган эски анъаналарнинг ҳимоячилари эди. Улар қиз боланинг иффати, ор-номусини ана шу анъана иплари билан ўлчайдилар. Уларнинг фикрича, отанинг измидан чиқкан қиз жазога лойиқ.

Адолатнинг тарафдорлари — ёшлар: унинг синфдошлиари, дугоналари. Улар ҳаётга бошқача қарайдиган кишилар. Улар: «Қиз бола одам эмасми? Одам бўлса, қиз боланинг орзусини ўлдирма!» дейдилар. Шунинг учун ҳам улар Шакархоннинг уйнга тўпланиб, Адолатнинг Үлуғ Ватан урушига кузатиш маросимини ўтказмоқдалар. Катта дастурхон ёзилган. Қизлар чилдирма чолиб, ашула айтиб, базм қилмоқдалар.

Соҳиб қори ўз қизини бу қадар биркесарлик қилади, деб ўйламаган эди. У, қиз бола ота-онасига эркалик қи-

лади, йиғлайди, аразлайди, лекин отага барибир тобе бўлади, деб юрарди. У, қизининг фронтга жўнайдиган бўлганини эшитиб, оёғи куйган товуқнинг аҳволига тушди. Элга ҳам кўринмади, уйда ҳам ўтиrolмади, ўзини қаёққа қўйишни билмай, аламини яна хотинидан олди...

Адолатни ота уйидан фақат Олимжон билан Раъно кузатмоқда. Адолат сингилчасини эрталабдан бери қуҷоғида олиб ўтирибди...

Қоқ тушда колхоз араваси Адолатни дугоналарининг қуршовида станцияга олиб кетди.

— Тўхта! Тўхта! — деб қичқирди Тўхта хола, аравакашга қараб: — Нега мени ташлаб кетяпсан? Мен ҳам кузатгани бораман!

Кампир аравага чиқиб қизларнинг ўртасига жойлашиб олгач, Шакархонни қистади.

— Нега жим ўтирибсизлар? Оғзиларингизга толқон солиб олдиларингизми? Чирмандани чолиб, қўшиқни бошланглар!

Бодомхон чирмандасини вадаванглатиб юборди. Шакархон «Яхши бор!» деган қўшигини бошлади. Кейин «ёр-ёр» айта бошладилар. Қизларнинг ёр-ёрига Тўхта хола ҳам қўшилиб кетди.

— Мана, қизим, йўлингга. Патирини еб бўлгач, рўмолини белингга боғлаб ол, белинг бикир бўлади. Нормат акангга дуо деб қўй, қизим... — деди Тўхта хола станцияга келганда.

Адолат Тўхта хола узатган тугунни илиб оларкан:

— Раҳмат, холажон,— деди.— Нормат акамга албатта сиздан дуо деб қўяман!

Ўн учинчи боб БЕГИМХОННИНГ БЕОРЛИГИ

1

Соҳиб қори оиласида юз берган ҳодисани эшитган Бозоров дастлаб бунга унча эътибор бермай, «тизгини қўлимда, қаёққа қочиб қутулар эди» деб бепарво юрди. Адолатнинг ҳаракатлари, интилишлари тўғрисида турли миши-мишлар эштила бошлагандан кейин, «куёв» Соҳиб қорининг олдига борди. Қори уни иззат-икром билан кутиб олди-ю, лекин қизи тўғрисида гап очмади, Бозо-

ров ҳам Адолатнинг қишлоқдан кетиб қолгани ҳақида ҳеч нарса демади. «Қўлингдан учган қушни қайтариб қафасга солиш қийин,— деб ўйлади Бозоров.— Аммо қишлоқда қиз қуриб қолгани йўқ. Далага чиқ, соғ ҳавода етилиб юрган сўлимлардан бирини танла!»

Бозоров извошга ўтириб далага жўнади.

Даштга кечки салқин тушиб қолган эди. Қирдан куз шабадаси эсмоқда. Қизлар этакларини бошларига ёпиб, хирмондан капага қайтмоқдалар. Бегимхон бир қовунни икки қўлида ирғитиб ўйнаб, ўқ ариқ ичидан шўх ашула айтиб келмоқда. Қизлар галасини кўрган Бозоров, от бошини ўша ёққа бурди.

— Ҳорманглар-ҳо, қизлар!

Шотут тагидаги супага тизилишаётган қизлар ичидан ҳаммадан бурун унга Бегимхон жавоб қилди:

— Бор бўлинг, Бозоров ака!

— Чойларингизни ширинлагани келдим,— деди Бозоров.— Мана, бир пакет новвот. Олинглар, қизлар.

Бегимхон сакраб ўрнидан турди-да, Бозоровнинг қўлидан новвотни олиб, катта бир парчасини ўзининг пиёласига ташлади, қолганини қизларга улашди. Бозоров атрофга олазарак аланглаб, Бегимхонни гапга солди.

— Синглингиз қанилар?

— Адолатми?— деб сўради, Бегимхон, Бозоровга ишва билан қараб.— Вой, хабарингиз йўқми ҳали?. Нормат акасининг олдига кетди...

Бегимхон гажжакларини силкитиб, оппоқ майдада тишлирини ярқиратиб сайраб кетди. Бозоров унга қарashi билан, Бегимхон ўзини янада қўйиб юборди. Унинг қопқора ўйноқи кўзлари Бозоровни маҳлиё қилиб қўйди. «Дарёга қармоқ ташлатан киши илинганини олади-да. Қайси бир балиқчи тўрига тушган лақдани ташлабди. Бегимхон лаққа эмасми?»— Бозоров Бегимхоннинг билагидан ушлаб, четга бошлади.

— Бегимхон, сизга бир гапим бор эди, гаплашсак...

— Нима гап экан?

Бегимхон майдада ўрим соchlарининг учини ўйнаб туриб, сўради:

— Айтинг гапингизни!..

Бегимхон билан Бозоровнинг нима тўғрисида пичирлашганини қизлар ўзларича бичиб қўйишган бўлса ҳам, Бегимхон шийпонга қайтганда ҳеч ким ундан гап сўрамади, аксинча, Бегимхоннинг ўзи сергап бўлиб қолди.

Тилидан Бозоров тушмади. Бора-бора уятни ҳам йиғиштириб, Бозоровнинг фазилатларини таърифлай кетди. Бозоров аввалданоқ Адолатни эмас, Бегимхонни севиб қолган эмиш. Бозоров Бегимхонсиз туролмайман деган эмиш...

Шу кундан бошлаб Бозоров тез-тез даштга келадиган, гоҳ кунлари Бегимхонни извошга тушириб, қаёқларгadir олиб кетадиган бўлиб қолди. Қизлар бунга олдин парво қилмаган бўлсалар ҳам, Бегимхон ҳаддан оша боргандан кейин, уни ўртага олдилар.

— Шу қилиғингни ташлайсанми, йўқми, Бегим?— деди Шакархон, Бегимхоннинг бетига тик қараб.

Бегимхон рўздан бошини кўтариб, ўсмали қошлирини чимириб, бобиллаб берди:

— Қандоқ қилиқ экан? Оғзингга қараб гапир! Мен рўзгор кўрган жувонман. Оёғимни қандай ташлашни биламан.

— Бобиллама, Бегим!— деди Шакархон.— Бригадамизга иснод келтиряпсан. Ҳаммамизнинг опамиздек бўла туриб, бегона эркак билан извошга тушиб юришинг яхшими?

— Извошга тушиб нима қилибман? Бозоров акамни бир-икки марта кузатиб қўйсам, нима бўпти? Алам қилдими сенга? Кекчилик ҳам эвида-да!

— Ҳар ҳолда яхши эмас шу ишинг,— деди унга Бодомхон.

— Одамлар нима дейишади?

— Тергайдиган қайнонам йўқ, билдингми, додҳо!— деб Бегимхон таъна қилган Бодомхонга ўшқирди.— Сен менга қайнонаям, кундошам бўлолмайсан. Тергама мени!

— Тергаётганим йўқ, уят, деяпман.

— Бирорларнинг ўртасига тушганинг учун ўзинг уял, қақажон. Бетинг эртароқ очилиб кетибди.

Бодомхон бошқа ҳеч нарса демай, пиқ-пиқ йиғлади. «Ҳа, мулзам бўлдингми!..» — деб қўйди ўзича Бегимхон. Унинг назарида, бригадада энди унга бас келадиган киши қолмади.

* * *

Олимжон далага кечга яқин келди. Қизлар хирмонда тумтайишиб, бир-бирларига тескари қараб ўтиришибди,

— Ҳорманглар, қызлар!

Унга фақат Шакархон жавоб қилди.

— Келинг, Олимжон ака! Бошлиқсиз қолиб, ҳамма ўз ҳолича бўлиб кетди...

— Бугундан бошлаб мен бригадирман,— деди Олимжон.— Даشت бригадаси фронтчи бригада бўлади, деб ваъда бериб келдим.

Бегимхон лабини буриб пўнғиллади:

— Ошиғи кетиб, мошиғи қолган эди, энди униси ҳам жўнаб, чўлоғи келибди...

— Ҳай, нега бундоқ деяпсиз?— деди Шакархон унга эътироэ билдириб.— Бошлиғимиз эркаклардан бўлгани яхши.

— Яримта эркак бизга нима қилиб берар эди...

— Лабингни бурма, Бегим. Мен сенга икки чўқиганингда қочадиган қизлардан эмасман, фронтчи йигитман. Энди сен солдатсан, мен командирман. Билдингми? Шу бугундан эътиборан: тур десам, турасан, ўтира десам, ўтирасан! Билдингми?

Олимжон айтганини қилиб, бир варақ дафтар муқовасига «Дала шийпонининг режими» ни ёзиб қўйди. Эрталаб қуёш билан баравар туриш, қош қорайгунча иш. Бир маҳал овқатга танаффус. Овқат ҳам далада бўлади. Тартибни бузганинг бештадан йигирма бештагача меҳнати қирқилади...

Бегимхон Олимжоннинг капага ёпиштириб қўйган қонун-қоидасини кўриб, лабини бурди.

— Адолатдан қутулиб, касофатга учрадик, шекилли...

2

Бозоров бир неча кундан бери даштга келмади. Бегимхон бу ҳолни бригада қизларининг фисқи-фасодидан ва Олимжоннинг бригадир бўлиб келишидан кўрди. У кечқурун, терган паҳтасини табелчига ўтказиб, юви нибтараниб, Олимжондан жавоб ҳам сўрамай, қишлоқ-қа жўнади. Қишлоқ гузари жимжит эди. Шундай катта гузарда фақат уч ерда: колхоз идорасида, сельпо магазинида ва Бозоровнинг ҳужрасида чироқ ёниб турибди. Бегимхон ҳужра қаршисига келиб, деразадан қаради. Ичкарида ҳеч ким кўринмади. Бир оз кутмоқчи бўлди-ю, лекин нимагадир юраги ҳовлиқиб, шошилиб ичкари кирди. Қип-қизил гилам тўшалган хона ўртасига катта дастурхон ёзилган. Дастурхонда қавоб сихлари, ичиб

тугалланмаган коňяк, вино шишалари туребди: кара-
вотда кимдир хуррак тортомоқда.

— Бозоров... Бозоров ака...

Каравотдаги киши унинг овозига парво қилмади,
аммо хуррак пасайиб, кейинча бутунлай тұхтади. Бегим-
хон унинг елкасидан туртди.

— Бозоров ака, мен... мен келдим. Туриңг.

Бозоров күзини очиб қаради-ю, тепасидаги жувонни
танимади шекилли, индамай ётаверди. «Қаттиқ учыб қо-
либди, бечора» деди-да, Бегимхон уни яна үйғотишига
харакат қилди, лекин үйғотолмади.

— Сизни күргани келган эдим,— деди Бегимхон,
маст Бозоровнинг бўйнидан қучоқлаб.

Бозоров ғулдиради.

— Мен... м.е.. ҳам соғиндим...

Унинг бу гапи Бегимхоннинг енгилтак табиатига
еңдек ёқиб тушди.

— Қачонгача соғинишиб юрамиз, Бозоров ака? Ту-
риңг, гаплашиб олайлик!

Бозоров Бегимхонни қучоқламоқчи эди, у ўзини олиб
қочди.

— Йўқ, йўқ. Сиз менга номаҳрамсиз. Бошқага қи-
линганди фотиҳани бузмай туриб, менга яқинлашманг.

— Э... кечганиман улардан...— деди Бозоров, Бегим-
хоннинг қўлидан тортиб.

— Қани кечганингиз? Юборган тўйингиз Холида ая-
нинг сандигини тўлдириб ётиби-ку!

— Эртагаёқ қайтариб оламан. Үшаларнинг ҳаммаси
сизга, жонидан...

Бегимхон қувониб кетди: «Ҳаммаси меники... Ҳам-
маси менга...». У «номаҳрам» лигини ҳам унутиб, ўзини
Бозоровнинг қучогига ташлади.

3

Бозоровнинг извоши Соҳиб қори дарвозаси тагида
тўхтаганда, ичкаридан чиқиб келаётган Қори йўлида
тўхтаб, ўйланиб қолди. База қоровулининг:

— Қорака, ҳў Қорака!— деган таниш овози эшитилди.

Соҳиб қори «ҳў, лаббай!» деб жавоб қилиши ҳамон,
дарвозадан оқсоқланиб, қўлида таёғи билан қоровул
кириб келди.

— Анов куни қўйинб кетилган омонатга келдим,— де-
ди қоровул.

Соҳиб қори піма дейнішини билмай, әнсаси қотди-да, үсмоқчилади:

— Қанақа омонат?

— Үн, гуруч солиған қоплар.

— Ҳа, ҳа, хўп, хўп, садағанг, ҳозир...— Соҳиб қори ишқарига кириб, бўш қопларни кўтариб чиқди.— Мана, ўша қоплар, садағанг, чангини қошиб қўйдим. Үн, гуручлар ишлатилиб кетди, садағанг. Келди-кетди кўп бўлди. Қорига тўй келибди деб, узоқ-яқиндан одамларнинг оёғи узилмай турибди.

База қоровули зарда билан қопларин олди-ла, Қори билан гаплашиб ўтиришдан фойда чиқмаслигига кўзи етиб, унинг ҳовлида кўринган хотинига мурожаат қилди:

— Сарполарни олиб чиқинг, ая!

Холида айвонга чиқиб, бисот сандигига яқинлашган эди, унинг орқасидан югуриб борган Соҳиб қори биқинини чимдилади ва қоровулга эшилдириб: «Қара, хотин, қарагинчи, қизинг ҳаммасини олиб кетмагандир» деди. Соҳиб қорининг ҳозирги чимчиласи бир оздан кейинги катта калтакпинг шабадаси эди. Шунинг учун Холида бисот сандиги олдида шамдек қотиб қолди. Соҳиб қори: «Нега ўшшаясан, хотин, ёки қизингнинг сирини очгани ҳўрқяпсанми?»— деб лўттибозлик қилди. Холида ўзини шу ерда, ўз уйида, куппа-кундуз куни бирорвонинг бисотини ўғирлаётгандай сезди-да, эрининг ҳар қанча ғазабига дуч келса ҳам, сандиқ устидаги кўрпаларни ола бошлиди. Соҳиб қори бир-икки бор томоқ қирса ҳам, хотини пинагини бузмади. Бунинг олдини олиш учун Соҳиб қори: «Мунча имиллайсан, қоч нари!» деди-да, хотинини четлатиб, сандиқни ўзи очди ва уни қанчалик тез очган бўлса, шунчалик тез ёпди. «Мана, мана кўрдилгми, сандиқда хонаки камзул билан, ўлимлик салламдан бошқа ҳеч нарса йўқ»— деди айвон олдида ҳайрон бўлиб турган қоровулга бақрайиб қараб.

База қоровулининг икки қўлини бурнига тиқиб, қупқуруқ чиқиши кўчада кутиб турган Бегимхоннинг тепа сочини тик қилиб юборди.

— Вой ўлай, қани сарполар?

— Қоридан бир нарса ундириб бўладими? Ўзи муло-йим кўрингани билан, чанталидан чаён ҳам омон чиқмайдиган бургуту бу Қори!

— Нима деди?

— Сарполарни Адолат кийиб кетган эмиш.

— Бекор гап! Адолатга тұнкашмасин. Адолат ший-пойдаги қутичасини ҳам қызларга ташлаб кетган. Сар-поларни ўзи сотиб емоқчи бу хасис Қори!

Бегимхон извошдан сакраб тушиб, ичкарига кирди. Хотинини айвонға ётқизиб тепаётган Соҳиб қори дарҳол ўзини ўнглаб тулкилиқ қилди:

— Ие, ие, кел, қизим, Бегимхон. Холида, мәхмонга қара!

Бегимхон чойшап ёпиб қўйилган сандиққа тикилиб туриб:

— Бозоров акамнинг омонатларини беринг!— деди.

— Қанақа омонат? Омонат йўқ...— деб Соҳиб қори, ўзини сандиққа ташлаётган Бегимхоннинг йўлини тўсди.

— Бозоров юборган тўй қани? Қайтаринг ўшани, Қори ака!

Соҳиб қори, бетга чопар Бегимхон билан пачакилашиб ўғиргиси келмай, ташқарига чиқа бошлаган эди, Бегимхон уни этагидан судраб, яна айвонга олиб чиқди.

— Нима керак сенга, Бегим?— деб Қори энди ҳужумга ўтди.— Бозоров билан ўйнашгани уялмайсанми? Уял! Уятни билмасанг, бетингнинг терисини сидириб, чирманда қоплаб ол!

Ишнинг чаппа кетишини сезган Бегимхон, Соҳиб қори айтгандек, «бетининг терисини сидириб», бобиллаб берди:

— Оғзингизга қараб галиринг, Қори ака. Ўйнашдан худо асрасин. Бозоров менинг шаръий эрим.

— Бозоровни эрим дедингми? Бозоров неча хотиннинг эри?!— деди Қори заҳарханда билан.— Энди сени ҳам ҳарамига қўшмоқчими!? Бор, ўша ўйнашингга бориб айт, сарпо йўқ. У аввал келди-кеттига қилган чиқиммни тўласин!

Ана шу ерга келганда Бегимхон нима дейишини билмай, лабини тишлаб қолди. Аммо бир фикр унинг бошига ялт этиб келди-да, гажжакларини силкитиб, Қорига таҳдид қилди:

— Эргаш акага чақаман,— деди Бегимхон, кўзларини чақчайтириб.— Қори ака қизини орқаворотдан қалинга сотиб еб қўйди, дейман. Қани, парткомга нима жавоб қиласр экансиз!.. Ҳолингизни ўшанда кўраман!..

Соҳиб қори бўзрайиб, беюз Бегимхоннинг орқасидан тикилганча қолди.

ЭРГАШ УРАЛДА

/

Эргаш саккиз кечаю, саккиз кундуз деганда керакли станцияга етиб келди. У вагон деразасидан қараб, темир йўл майдончаларида узун-узун составлардан юк туширилаётганини ва баъзиларига юк ортилаётганини тамоша қилди. Яна бир состав келиб, пассажир поезди билан ёнма-ён тўхтади-да, Эргашнинг станцияга тушадиган йўлини тўсиб қўйди. Очиқ платформаларда запгор бўёқлари ярқираб танклар турарди. Афтидан, улар эндиғина заводдан чиқсан бўлса керак, бўёқ иси гупиллаб димоққа уриб турибди. Эргаш вагондан тушиб, икки состав ўртасида бир оз аланглаб тургач, ўз олдида кетаётган кишиларга эргашди ва туннел орқали перронга чиқди.

Узундан-узоқ перронда одамлар у ёқдан-бу ёққа югуришиб юрибди.

Эргаш қаёққа боришини билмай, ағрайиб қараб қолди. Перрон баландликда эди. Энди унга бу жойдан теварак-атроф барала кўринди. Станция шаҳарпинг ўртасида эди. Тўрт томонда баланд-баланд трубалардан қуюқ қора тутун бурқсаб чиқиб, кўкка интилмокда.

— Металлургия заводи қаёқда? — деб сўради Эргаш, пакгауздан чиқиб келган юкчиларнинг бирини тўхтатиб.

— Қайси металлургия заводи? — деб юкчи ҳайрон бўлиб сўради.

— Қайси бўларди, Уралдаги металлургия заводида...

— Уралда нима кўп — металлургия заводи кўп. оғайнин! — Юкчининг иши зарур бўлса керак, «ана бу кишилардан сўра» деб, зинадан перронга чиқаётгандарни кўрсатди.

Эргаш перронда чамадон кўтариб турган тулки тел-пакли йигитнинг ёнига борди.

— Металлургия заводи қаерда, биродар?

Бу йигит ҳам ҳалиги йигитдек таажжубланди.

— Қайси металлургия заводи?

— Қайсиси бўларди. Ўзбекистондан келган йигитлар ишлаётган металлургия заводи-да!

— Ўзбекистондан келганлар ҳамма заводда ҳам бор.

Эргаш чўнтағидан конверт чиқариб, телпакли йигитга кўрсатди:

— Мана бу хатдаги адрес...

— Пастга тушиб, 17-автобусга ўтириңг, тўғри олиб бориб қўяди,— деди ҳалиги йигит, конверт орқасидаги завод номерини кўриб.

— Раҳмат, биродар, барака топинг.

Эргаш вокзал зинасидан тушиб, майдонга чиқди. Бу ердаги кўчаларнинг асфальти офтобда ҳовуз сувига ўхшаб тиниқ ярқирамоқда. Троллейбуслар майдонни айланниб ўтмоқда, трамвайлар у ёқдан-бу ёққа физиллаб юрибди. Эргаш шу ерда тўхтаб турган автобусга ўтириди. Автобус обод кўчалардан ўтиб шаҳар чеккасига чиқди. Аммо шаҳар орқада қолиши билан яна янги иморатлар, завод корпуслари кўрина бошлади. Машина дараҳтзор ичига киргач, чапга бурилиб, тош йўлга чиқиб олди. Бу ерда ҳам қатор-қатор иморатлар, заводларнинг юксак мўрилари... Гўё заводлар ердан униб чиқаётгандек, трубалари дараҳтлар билан бирга ўсаётгандек эди.

— Урал деганича ҳам бор экан,— деб қўйди Эргаш, кенг, чароғон посёлкани тамоша қилиб бораркан.

2

Холмат янги ишга анча вақтгача кўниколмай юрди. Бу ерда ҳам ҳарбийча қаттиқ интизом ўрнатилган эди: ҳамма гудок билан уйқудан туради, гудок билан ётади: Қечалари баракда сўзлашиш ман этилган. Бу режим Холматга ёқмади. У, келган куниданоқ туғилган қишлоғини, кенг далаларини қўмсай бошлади. У бир куни ўз шериклари билан бирга: «Қишлоғимизга қайтаринглар, ёки фронтга юборинглар» деб завод раҳбарларига ариза ҳам берди.

Завод раҳбари оғир касб, нотаниш ҳунар жанубдан келган дехқон йигитларга сингмаётганини сезиб, цехга агитатор юборди. Агитатор аризачиларга Уралнинг Ватан аслаҳонаси эканлигини батафсил тушунтириб берди. Холмат шундан кейин ариза берганига пушаймон бўлди. Аммо унинг баъзи ҳамроҳлари шундан кейин ҳам «кетамиз»ни қўймадилар.

— Сен кетмасанг, биз кетамиз,— деди Сотти ияги-

нинг учидағи сийрак сарғиши соқолини силаб.— Нариги заводдан уч киши кетибди-ку, нега биз кетолмаймиз?

— Үзим ҳам кетмайман, сизларни ҳам кетклизмайман!— деди Холмат қатъй.

— Нега?— деб Сотти күзларини чақчайтириб сұра-ди,— Сен кимсан ўзинг? Сен ҳам бир мардикорсан-да.

— Мардикор, дедингизми?

— Ҳа-да, бу ерга мардикорликка келгансан.

— Йўқ!— деди Холмат, юрагида Соттига нисбатан тошган ғазабини босиб.— Мен мардикор эмасман. Сиз ҳам, бу ерга келган бошқа ҳамма кишилар ҳам фронт орқасининг жангчиларимиз!

Холматнинг авзойини кўриб, Сотти бошини әгиб, аста:

— Ким эканлигимни билолмай юрибман, ўргатиб қўй,— деди.

— Дехқон эдингиз, энди ишчисиз. Ана, рус ишчилари-ни кўрдингизми, ўт ичида чўғ бўлиб ишлашяпти. Ушалардан ўрганинг!

— Ўрганишимга кўзим етмайди. Қўй, жавоб олиб бер, ука, кета қолай. Синглим бева. Эри ўлибди, деб эшитдим. Ахир, фронтга ҳам пахта керак-ку. Нима қиласан мени бу ерда бўйнимдан боғлаб?

— Пахта ҳам ташлаб қўйилгани йўқ.

— Вой биркесар-эй! Бўпти бўлмаса, начальникка ўзим кириб, жавоб олиб кетаман.

Холмат унга тикилиб туриб, калта жавоб қилди:

— Кетмайсиз!

— Кимсан ўзинг, йўлимни тўсадиган?.. Мен билан ишинг нима?

— Ишим бор,— деди Холмат кескинлик билан,— мен коммунистман. Партия мени бекорга юборгани йўқ. Қўйинг кетишни. Сотти акал Яхшиси, ҳунар ўрганишга бел боғланг. Қани, юринг-чи, ошхонага кирайлик. Мастерим билан гаплашиб кўраман. Эҳтимол сизни ўзига шогирд қилиб олар. Жуда ўткир мастер.

Эргаш Оқтепа районидан келган ишчиларни ошхонадан топди. Улар тушки овқатдан чиқаётган эдилар. Унинг олдига биринчи бўлиб Холмат югуриб келди-да, қулочини кенг ёйиб, бағрига босди.

— Кел-эй, Эргаш, бормисан, ошнам!

Ҳамқишлоқлар Эргашни саволга кўмиб юборишли.

— Бизнинг бола-чақалар омонми?

- Бизнида бўлдингми?
- Хат-хабар олиб келдингми?
- Пахта қалай?

Эргаш ҳамманинг саволига жавоб қила-қила, чамадонини оча бошлаган эди, Холмат чамадонни унинг қўлидан олиб:

— Ётоққа юринглар,— деди ҳамқишлоқлариға,— ўша ерда гаплашамиз.

Улар ётоққа боришли. Баракнинг бир томонига зич қилиб каравот терилган, иккинчи томонига икки қават сўри қурилиб, уларга оппоқ ўринлиқ тўшалган эди.

Эргаш кираверишдаги каравотга ўтириди, бошқалар уни ўраб олиши. У қопини очиб, аввал «гулистон»ликларга, кейин бошқаларга қариндош-урӯғ, ёр-биродарларининг совға-саломларини, хатларини улашди. Бир оздан кейин ҳамма ўз ҳолича бўлиб, барак жимиб қолди.

— Жуда соз, жуда соз,— деди Холмат, онасидан олган хатни ўқиб бўлгач.— Хайрият, болалар соғ-саломат экан. Онамнинг Славикни боқиб олгани яхши бўлиди. Бечора кампир... ҳамма ташвиш ўшанинг бошида.

— Менинг отамни айтмайсанми?— деб севиниб кетди Сотти.— Етмиш тўққизга кирди. Буни қаранг-а: «Сенинг ўрнингга далага чиқдим, болам, рўзғорингга ўзим қараб турибман, кўнглингни тўқ қилиб, ишлайвер»— депти.

— Ана, кўрдингизми?— деди Холмат, унга қараб.— саксон яшар чол ҳам сизни: «Уралдан кетма, ўғлим!»— деяпти. Уйдан хотиржам бўлаверинг. Сизни шунча жойга юбориб қўйган ҳукумат бола-чақандизни унутиб қўярмиди?

— Тўғриси, нотаниш касбга қовушмай зериккан эдим. Мана энди бир оз қўлим қовушиб қолди. Холмат этагимиздан маҳкам ушлаб қолмагандан баъзи бирларимиз қочиб кетишдан ҳам тоймас эдик...

— Уралдан қочганга Узбекистонда ҳам ўрин йўқ!

Эргашнинг бу гапи Соттига қаттиқ ботди.

— Э, мусоғир жойда ўлигим қолишини истамайман. Эшикка чиқсам совуқ бурнимни узиб оламан, дейди.

— Шайтонинг зўр сенинг, Сотти! Шайтон сени ҳар куни осмонга олиб чиқиб турибди. Ҳушёр бўл, тепадан ташлаб юбормасин.

Баракда кулги кўтарилилди.

— Энди Эргашдан эшитайлик,— деди кимдир.— Шупча йўл юриб, бизни йўқлаб келибди, раҳмат!..

— Қани, қани, гапириб бер, Эргашвой! Ўзбекистонда нима гап, қишлоғимиз қалай? Ким қолди, ким кетди? Фронтга кетганлардан хат-хабар борми?

— Ўзбекистонда, давлатга мўл-кўл пахта берамиз, деб курашяпмиз. Районда биринчи бўлиб «Гулистон» теримга тушди. Айниқса дашт бригадаси олдинда. Адолатхон Норматнинг йўқлигини билдиримаяпти, ишин боллаяпти.

Холмат укасининг номини эшитиши билан Эргашдан сўради.

— Норматдан хат борми?

— Мен сендан сўрамоқчи эдим, қишлоққа анчадан бери хат келгани йўқ...

— Менинг бир отахоним бор, унинг ўғли ҳам фронтда,— деб гап бошлади Холмат.— У бир ойча илгари юборган хатида ўзбекистонлик йигитлар билан биргамиз, менда бир Жабборов деган жангчи бор, деб ёзибди. Отахоним мени чақириб, ўша бола сенинг ака-укалагерингдан эмасми, деб сўради. Отанинг ўғли Жаббороевниг фамилиясини ёзибди-ю, отини айтмабди. Мен отахондан Жабборовнинг отини билиб беришни сўрадим. У ўғлига хат ёзиб юборди. Аммо жавоби келгани йўқ. Бугун унинг уйига борамиз, сени у билан таништириб қўяман.

— Яхши...— Эргаш гапида давом этди.— Фронтдан хат келиши сал қийинроқ бўляпти. Аммо Уралдан кўп хат боряпти. Райком секретари мени чақириб, Уралдагиларга бориб айтгии, ҳадеб «мени чақириб олинглар» деган ариза юборишавермасин, деди. Кейин яна шуни ҳам айтиб қўйгинки, деди у, бола-чақалари, уй-рӯзғорларидан хабар олиб турибмиз. Улар фронтга кўпроқ қурол етказиб бериш билан бирга, ҳунар ўрганишсин. Уларни Ўзбекистонга кўчиб келаётган ва республикамизда янги қурилаётган заводлар кутиб турибди.

Ўзбек ишчилар Эргашнинг сўзларини эътибор билан тинглашди. Улардан бирни ўзини тутолмай:

— Раҳмат, партиямизга!— деб юборди. Шу чоқ гудок чолинди, ҳамма ишга шошилиб қолди.

— Бориб райкомга айт,— деди Холмат,— фашизм устидан тўла ғалаба қозонгунча, Уралда қоламиз ва Ўзбекистонга уста пўлат қуювчилар бўлиб борамиз!

Кечаси Холмат ишдан қайтгунча Эргаш унинг кара-вотида қотиб ухлади. Холмат йўлдан чарчаб келган дўстини уйғотгиси келмай, анча вақтгача тепасида турди, аммо буларни уйда кутаётган отахон устасини ҳам кутдирив қўйгиси келмади-да, Эргашнинг елкасидан ушлаб қимирандатди.

— Тур, Тургенев ота кутяпги.

Пўлат қуювчи Тургеневнинг квартираси заводнинг орқасидаги икки қаватлик уйнинг биринчи қаватида эди. Холмат электр қўнғироқ кнопкасини босиши билан, хона ичкарисидан ёқимли овоз эшитилди:

— Киринглар, киринглар, марҳамат!

Булар кирган хонанинг тўрт томонида каравотлар. Уртасида стол. Унинг ёнида одам қисилиб зўрға юради. Уй эгаси изоҳ бера кетди:

— Шунаقا тиқилянишб қолдик. Квартирамизнинг икки хонасини кўчиб келганларга бердик. Улар биздан ҳам зичроқ яшаяптилар. Босқинчиларни янчид олгунча бир оз қийналамиз-да. Қани, столга!

Эргаш Холматнинг устаси билан қуюқ сўрашди. Никита Григорьевич Тургенев анча ёшга бориб қолган бўлса ҳам, кексаликка сўз бермаган. Унинг қўл қисишидан Эргаш сал бўлмаса инграб юбораёэди. Отахон буни сезиб, кулиб қўйди. Эргаш қўлтиқлаб кирган кичкина халтачасини унга узатди:

— Мана бу сизга ўзбек колхозчиларидан совфа.

Никита Григорьевич унинг қўлидан халтани олиб, столга қўйди, қайчи билан чокларини сўкиб, ичидагиларини олди.

— У, менинг севган меваларим: ўрик, олма, ёнғоқ... Майизи ҳам бор экан. Буларни кўриб, ўғлим эсимга тушибди. Бунаقا нарсаларни менга ўша юбориб турарди. У «Сельмаш»да ишлаган, ҳозир фронтда. Сержант.

Ўйга чолнинг хотини кириб, меҳмонлар билан қўл бериб кўришибди ва тарелкада юпқа қирқилган озгинанон, иккита селёдка, бир оз шакар олиб келиб, ўртага қўйди-да, чой келтиргани чиқиб кетди.

— Уруш рўзгоримизни ҳам бир оз сиқиб қўйди,— деди чол, Эргашга жилмайиб қараб.— Лекин оч эмасмиз. Халқнинг гайрати дарёдай тошапти. Уралда қилинёттан ишлар фронтдагидан қолишмайди!

Никита Григорьевич бир дона ўрикни оғзига солдида, гапида давом этди:

— Одамлар ғалаба учун ишляпти. Нижний Тагиллик бир машинасоз ўз жамғарган пулига танк сотиб олиб, фронтга юборибди. Унинг уч ўғли фронтда экан. Қўмондоннинг бўйруғи билан учала ўғилдан бир экипаж ташкил этилибди. Ана шу ураллик ишчининг пешона терига сотиб олган танкида унинг ўғиллари Москвани мудофаа қилаётган экан. Кеча газетада уларнинг суратлари босилиб чиқибди.

Эргаш чолдан сўради:

— Танк сотиб олиш мумкиними?
— Мумкин.
— Колхозчиларга ҳам сотиладими?
— Фронтта совға қиласман деган ҳаммага сотилади.
— Демак, биз ҳам колхозимиздан фронтга танк совға қиссан бўлар экан-да?
— Албаттa бўлади.

Эргаш Тургенев отанинг фронт ҳақидаги, ўғли тўғрисидаги ҳикояларини мароқланиб тинглади ва унга миннатдорчилик билдириб, Холмат иккаласи хайрлашиб чиқди. Улар баракка яқинлашганларида Холмат ундан сўради:

— Сотти сенга ҳеч нарса демадими?
— Йўқ. Нима демоқчи эди?
— Унинг дарди зўр. Қишлоққа кетмоқчи. Зўрға ушлаб турибман.
— Бошқалар-чи?
— Бошқалар ғалабагача Уралда қолишга қатъий аҳд қилишди. Фақат Сотти...
— Мен у билан ўзим гаплашаман. Хотиржам бўл!

4

Эрта тонгда завод гудоги Эргашни ҳам уйғотди. У баракдан ишчилар билан бирга чиқиб, шу посёлкада доиғи чиққан «ўзбек самовари»га йўл олди. У йўлда бораркан, қават-қават тиканли симлар билан ўралган цехларнинг қўриқчилари ундан пропуска сўрай бошлидилар. У, ниҳоят, «чойхона» ёзувлик баракка етиб келди.

Ўзун ва кенг баракда катта Тула самовари буғ чиқаруб турибди. Аммо ҳеч ким йўқ. Ёғоч уйга ердан бир газча баланд кўтариб тахта терилган, унинг устига қа-

нор қоллардан палос түшалган. Бурчакда икки күрпа, бир болиш юмалоқлаб қўйилган. Афтидан, бу — самоварчининг ўринидиги бўлса керак. Бир оздан кейин эшикдан кимдир ҳарсиллаб кирди-да, қўлтиғидаги ўтинни турсиллатиб самовар ёнига ташлади ва шу ерда бегона кишини кўриб:

— Келинг, меҳмон, келинг,— деди-да, шошилиб у билан кўришди.— Қайси заводсанси?

Эргаш кулимсираб жавоб қилди:

— Янги келдим. Уралда бир кеча тунадим, холос.

— Кечакелиб, бугун зерикиб қолганга ўхшайсиз,— самоварчи кўрпачани ёзиб, Эргашни ўтқизди, ёнига ўзи ҳам ўтирги.— Мен икки ойдан бери шу ердаман. Иккаки ой!

— Икки ойдан бери самовар қўясисми?

— Бе, қаёқда! Чойхона очилганига энди 27 кун бўлди. Бизникилар: карам шўрва ичмаймиз, тўнғиз гўшти солади, дейишган эди, гўшт-ёғни ҳам ўз қўлимиизга берадиган бўлишди; қозонда қайнаган чойнинг мазаси бўладими, дейишган эди, мана, чойхона ҳам қуриб бериши. Балли-е, ҳимматларига!

Эргаш, самоварчининг гапини тингларкан:

— Шу ерда ҳам ўзбекчиликни доли-гулига қўянимиз, денг?— деб киноя қилди.

Самоварчи қўлидаги пиёлани Эргашга узатгач, алланима демоқчи бўлиб оғиз жуфтлаган эди, эшикни елкаси билан очиб Сотти кириб келди. Унинг қўлида Эргаш келтирган кечаги оқ халта...

— Бу нима, Сотти ака?

Сотти изғириндан қотган қўлларини самовар ҳовурига тутди, Эргашни кўрмади шекилли, самоварчининг саволига жавоб берди:

— Ўрик. Синглум юборибди. Чақа қилиб юрибман...

— Неча пулдан сотяпсиз?— деб Эргаш ўтирган еридан сўз отди.

Сотти Эргашнинг овозини эшитиб, саросимага тушиб қолди.

— Ийи, ийи, сиз ҳам шу ердамидингиз? Ҳе, ҳе... бир оз чойчақадан зориқиб қолган эдим.

— Эрталаб ишга кетмабмидингиз?

— Станцияга бордим. Доналаб сотдим. Бу ерда ултуржи оладиган киши йўқ. Бирйўла қолганини ҳам пуллаб, кўнгилни тўқ қилиб тушамиз-да ишга, Эргаш-

вой ука. Синглим Бегимхон пулсиз ўтиргандир бечора..

— Бегимхон... Бегимхон түқ, ўйнаб-кулиб юрибди.— Эргаш самоварчидан сўради:— Чойхўрларингиз қачон тўпланади?

— Кун қайтганда, ишдан кейин.

— Яхши, мен келаман.

Эргаш чойхонадан чиқа туриб, Соттига деди:

— Ишга боринг. Ўзбеклар шаънига иснод келтирманг.

5

Эргаш чойхонага худди самоварчи айтган вактда— ишдан кейин, кун қайтганда келди. Чойхонага одам сиф-мас эди. Одамлар тўп-тўп бўлиб, гурунглашиб ўтирибди.

— Келинг, келинг, Эргашвой, келинг,— деди самоварчи, Эргашни кўриши билан.— Қўлингиздаги нима?

— Сизга совға. Репродуктор. Завод партия ташкилоти берди.

Эргаш репродукторни самоварчига бериб, Соттининг ёнига келиб ўтириди.

Эргаш Соттининг бугунги кирдикорини кўпчилик ҳукмига ташламоқчи бўлса ҳам, гапни нимадан бошлишни билмай ўйланиб қолди. Чойхўрлардан бирининг: «Эргашвой, у ёқ-бу ёқлардан гапириб берсангиз-чи, «Гулистон» чойхонасида айтиб берадиган ҳикояларингизни тусаб қолдик» дегани унинг хаёл чигалини ечиб юборди.

— Уралга келаётуб, поездда бир эртак ўқидим,— деб гап бошлади Эргаш.— Маъноси бундай: бир полвон бор экан, дунёни саёҳат қилмоқчи бўлибди-ю, қишлоқдаги бир донишманд олдига бориб, ундан маслаҳат сўрабди. Донишманд «саёҳатга ҳунар керак» деган экан, полвоннинг жаҳли чиқибди. У ўз кучига жуда ишонар экан, зўравонлик билан яшаяпман, зўравонлик билан саёҳат ҳам қиласман, деб ўйлабди. Донишманд унга: «ҳунарсиз кишининг қўли боғлиқ» депти. «Олим илми билан ҳурмат топур, ҳофиз хуш овози билан одамларнинг дилини хуш қилур, ҳунарманд эса кишиларнинг ҳожатини чиқарур. Сизнинг қандай ҳунарингиз бор?»— деб сўрабди. «Кучим бор» депти полвон. «Қуруқ кучдан кун ўтмас» депти донишманд. Полвон унга қулоқ солмай, узоқ сафарга чиқибди. У йўл юрибди, йўл юрса ҳам мўл юриб, бора-бора бир дарёга йўлиқибди. Кўп-

рик йўқ экан, дарёдан ўтай деб, қайиқчини чақирибди. Қайиқчи пул сўраса, полвон муштини кўрсатибди. Қайиқчи «ҳап саними!» депти-ю уни қайиққа ўтқазиб, айлантириб-айлантириб, бир чакалакка ташлаб кетибди. Аросатда қолган полвоннинг қорни очибди. Нон сотиб олай деса, бозор йўқ, тортиб олай деса, кимса йўқ. Ов қиласай деса, ҳунар йўқ. Охири, саёҳатнинг «с» ҳарфини ҳам кўролмай, қайтиб келиб, донишмандга сажда қилибди...

— Жуда маъқул эртак экан,— деди, ундан ҳикоя айтиб беришни илтимос қилган ҳалиги ишчи.

— Манманлик билан иш битадими?— деб гап ташлади иккинчи бир ишчи.

Эргаш пиёлани эгасига узатиб, ер остидан Соттига қараб қўйди. Сотти бу қамчин ўзига тегаётганини сезиб, бесаранжом бўлиб қолди. Эргаш сўзида давом этди.

— Худди шундай кишилар орамизда ўтирибди. Мана, Сотти акани олайлик. Қимсан Сотти полвон деб, ҳаммамиз ҳурмат қилар эдик. Полвонимиз леб ишониб, Уралга юбордик. Лекин бу киши Уралга келиб, ўз ўрнини тополгани йўқ. Келганидан бери ярим умри қайтиб кетиш можароси билан ўтган бўлса, ярим умри туршак-фурушлик билан ўтяпти. Заводдан берилган шакарни ҳам бозорда сотибди. Сотти полвон... Уралга пул тўплагани келибди, бу азамат. Топганини тўнининг пахтасига тўплаб тиқаятган эмиш..

— Мен ҳам неча марта айтдим унга шу гапни,— деди Холмат,— ранги хўроздаг-у, ишга чап беради.

— Ҳой, Холмат, юкли хўтиқ лойга ботиб қолса, кетидан кўтаргин-у, лекин кулма. Билдингми?— деб Сотти Холматга ўшқириб берди.

— Сен лойга ботган хўтиқмидингки, сенинг ҳолингга кулсам, сен қоқилиб юрган катта эшаксан.

Чойхонада барада кулги кўтарилди.

— Сенинг тилинг тошни ёради, Холмат. Мунча менга осилиб қолдинг? Нонимни ўзим топиб еб юрибман. Ўз нонини ўзи топган — Хотамга ҳам бўйин эгмас. Билиб қўй, шуни!

— Емғирсиз булутга ўхшаб хўмрайиб юраверганинг билан иш битадими?— деди Холмат яна.— Ҳалол меҳнат қил. Ҳунар ўрган. Ҳунарсиз қайтиб кетишни ўйлама, бояги эртакдаги полвондай пахтанг чиқиб қолади!

Бу ўткир таъналар Эргашнинг тилини янада узун қилди.

— Сотти полвон полвонлигини шу ерда кўрсатмаса қаерда кўрсатсин,— деди Эргаш, Соттини суюб.— Душман устидан қозонадиган ғалаба шу ерда қўйиляпти. Унинг қўрғошини бўлмасанг, нимаси бўласан? Полвон бўлсанг, куч кўрсат. Кучингни билагингда сақлаганингдан на фойда!

Холмат луқма ташлади:

— Ҳақ гап шу. Пўлат ўтда тобланади!

— Чивин кўплашса филни йиқитади деган гап бор,— деди Эргаш салмоқлаб.— Чумоли бирлашса, чаённинг шўстини титади. Нега кўпларишиб Сотти акани эгарлаёлмаймиз? Мени райком юборди. Уралга келганлардан партиянинг умиди катта. Шу умидни оқламаган киши ўз юртига қайси юз билан боради? Мен ана шу гапни айтгани келганман. Мен сизлардан: «Шу умидни оқлаймиз!»— деган чин ваъдани эшитмагунича кетмайман!

— Оқлаймиз! Оқлаймиз!— Чойхонани ишчиларининг шовқини босиб кетди.

6

Эртасига завод клуби одамларга тўлди. Никита Григорьевич Тургенев шу ерга тўпланганларга кўрганинг кечирганларини ҳикоя қилиб беришга келди. Никита Григорьевич ҳикояни 1905 йил декабрь қўзғолонидан бошлади. Уша вақтда у 22 яшар йигит эди. Баррикада жангларидан кейин чор охранкаси уни тюрьмага ташлади. Уни Москва ишчиларининг қайта-қайта такрорланган иш ташлашлари, сиёсий забастовкалари қутқариб олди. Унинг шундан кейинги умри химия заводрида оғир меҳнат билан ўтди. Октябрь социалистик революцияси Петербургда ғалаба қилган куннинг эртасига ёқ Никита Григорьевич Москва ишчилари билан революцион отрядларда бўлди. Москвада Совет ҳокимияти ўрнатилган кундан бошлаб, у социалистик саноатни ташкил қилишда қатнашди. Партия уни Уралга юборди.

Герман фашизми совет тупроғига бостириб кирганини эшитиши биланоқ, Никита Григорьевич қўлига қурол олиб, фронтга кетмоқчи бўлди. Аммо унга рухсат бермадилар. Фашист қўшинлари Москва атрофига

яқинлашиб қолган кунларда у айниқса хуноб бўлиб, ғазаби тошиб, кеча-кундуз вақтини заводда ўтказадиган бўлиб қолди. У, ишчиларга: «Душман устидан ғалаба қозониш учун сен бугун нима қилдинг?» деган шиор ташлади. Заводда унинг шогирдлари кўпайгандан кўпайиб борди.

Тургенев отанинг сухбатидан кейин завод клубида ҳаваскорлар концерти бошланди. Уч киши саҳнада ўтириб олиб баян чолмоқда. Шу баянчиларнинг бири — Никита Григорьевичнинг янги шогирди. Шу ёш музикачи (биринчи марта саҳнага чиқиши бўлса керак), тамошабинларнинг салобати босиб, куйни бузмоқда. Никита Григорьевичнинг кўнгли бузилиб кетди.

— Буларнинг ҳеч бири Великановга ўхшамайди,— деди Тургенев.— Баяни ўша чолсин!..

Концерт тугагандан кейин Холмат билан Эргаш Никита Григорьевични уйига кузатиб қўйишиди.

— Ота, Великандан хат келгани йўқми? — деб сўради чолдан Эргаш.

— Йўқ, келмади. Мен ҳам хавотирдаман.

— Келиб қолар, отахон,— Холмат Никита Григорьевичга тасалли берди.— Шояд бизнинг Норматдан ҳам хушхабар келиб қолса!

Чол индамади. Аммо уйга кириб кета туриб, Холматнинг қўлини қаттиқ қисаркан, унга шундай деди:

— Холмат Жабборович, эртага ишга барвақт чиқинглар, ғалаба вахтасида туриб ишлаймиз! Ғалаба вахтасида, ҳа!

* * *

Баянчиларнинг муигли куйидан қаттиқ таъсирланган Эргаш баракка хомуш кириб келди. Барак совук, деразалар яхлаб қолибди. У ечинди-да, каравотга ётиб, заводдан олган пўстинини устига ташлаб, бошини буркаб олди. У, алламаҳалгача ухлаёлмади. Каравот тахтлари биқинига ботди. У кўзларини юмиб, ўзини шунча уйқуга солса ҳам, хаёл ипни чўэила берди. Болалар қишлоқда нима қилишяпти экан? Нормат қаерда, Москва яқинида нималар бўлаётган экан? Никита Григорьевич эрталабдан вахтада турдимиз, деди, демак, аҳвол оғир...

Эргашнинг кўзи уйқуга кетар-кетмас, уни завод гудоги уйғотиб юборди. У шошилиб ўрнидан туриб, кара-

вот тагидан пиймасини оларкан, бошини күтариши билан Никита Григорьевични күрди. Чол соқолини қириб, янги комбинезон кийиб олган. Унинг чеҳраси очиқ, нимадандир хурсанд.

Тунука умивальникда Холмат ювиняпти. У сочиғи ни каравотга илиб, орқасига қайрилиши билан, девордаги плакатга кўзи тушди. Плакатда бир жангчи бармоғини ўқталиб: «Сен фронт учун бугун нима иш қилдинг?» деб, унга савол беряпти. Шу жангчи Норматга жуда ўхшаб кетади. Демак, Нормат фронтдан атайлаб, Уралга, акасини кўргани келиб, унинг фронт учун нима қилганини, душман устидан ғалаба қозонишга қандай ҳисса қўшаётганини суриштиряпти!

— Вахтагами? — деб сўради Холмат, коржомасини кияётган Соттидан.

— Вахтага! — деди Сотти. — Мени ҳам Тургенев ота чақириб келди...

Эргаш мамнун жилмайиб, Соттининг елкасига қўлини ташлади.

— Раҳмат, Сотти aka!

— Вахтага! — деди кулиб Тургенев ота. — Ҳамма вахтага!

Бир оздан кейин баракда ҳеч ким колмади.

Эргаш шу куни Ўзбекистонга жўнаб кетди.

Ўн бешинча боб ПАРТИЗАНЛАР ОРАСИДА

1

Нормат юзига тегаётган мулойим қўлни сезди. Кимдир унинг оёғини боғлаб, пешонасидан силаб уйғотарди. У кўзини очиб, бошида турган икки кишини кўрди. Уларнинг бири ўрта ёшлиқ, соқоли қирилган, иккинчиси ёш бўлса ҳам, соқол-мўйлаб қўйиб юборган, пахмоқ сочили йигит эди. «Булар кимлар? — деб ўйлади Нормат. — Қандай одамлар? Дўстларми, душманларми?»

Нормат чап тирсагига тиранниб, ўрнидан турмоқчи бўлди-ю, туролмади. Ҳалиги, соқол қўйган йигит кўмаклашгач, қаддини кўтариб, қарағайга суялиб олди. Кўмакдоши флягасидан унга сув ичирди. Сув ичаркан,

унинг бадани қандайдир ором топгандек бўшашиб кетди. У меҳрибонининг кўзларига тикилиб сўради:

— Ким? Кимсизлар?

— Партизанлармиз,— деди унинг кўмакдоши.— Биздан қўрқма. Менинг отим Руслан, шеригимнинг иоми Бульба...

— Отрядга кетамиз,— деди Бульба, Норматга,

— Майли.

Партизанлар Норматни суяб кўтаришди. Нормат бор кучини ўнг оёғига тўплаб, ҳаккалаб юрди. У ўнг оёғида ҳаккалаган сари, чап оёғи сирқираб оғрий бошлади, кўзи тиниб, ҳимоячиларига беҳол суяниб қолди.

— Тўхтанглар... Тўхтанглар...— деди Нормат.— Сизларни қийнаб юбордим.

— Аксинча, биз сени қийнаяпмиз,— деди Руслан.

Шу вақт ўрмон четидаги шарпа сезилди.

— Немислар келяпти,— деди Бульба.— Бу ердан кетайлик.

Икки бронетранспортёр гириллаб келиб, уларга яқин қолганда чапга бурилди-да, ўрмонга кириб кетди: уларда курак ва ойболта ушлаган кишилар, афтидан, сапёrlар бор эди.

— Қаёққа кетиши?— деб Нормат шерикларидан сўради.

— Паром-кўприкка,— деди Руслан.— Паромни қизил аскарлар бузиб ташлашган, немислар ўзларига йўл солишга кетишяпти.

Бронетранспортёрлар ғойиб бўлгандан кейин, партизанлар йўлни тезроқ кесиб ўтиш учун Норматни қўлтиқлашган эди, у кўнмади:

— Ўзим. Ўзим юраман.

Нормат дараҳтга суяниб ўрнидан турди-ю, яна кўзи тиниб, боши айланиб йиқилди, партизанлар уни суяб қолишиди.

Нормат бошини кўтариб, катта йўлга қаради. Кўзига дараҳтларнинг орасидан кети йўқ колонналар кўринди. Колоннани броневик бошлаб келарди. «Москвага... Ҳаммаси Москвага ҳужумга кетяпти» деган фикр унинг миясига чақмоқдек урилиб, разаби қайнади. «Адабини берадиган пайт келди-ю, лекин ожизман. Қани куч, қани мадор?»

Партизанлар Норматни бомбадан пайдо бўлган чукурликка судрашди ва устига арча шохларини ёпиб,

ұзлары ҳам яширинишди. «Тиrikлайн күмилдім» деб үйлади Нормат, оғир ух тортиб. У анча вақтгача арчы иғналари орасидан катта йўлга тикилиб ётди. Броневик секинлаб ўтиб кетди. Колонналар ҳамон бир хилда қадам ташлаб ўтарди.

Қош қорайди. Колонналарнинг охири тугади. Партизанлар Нормат ётган чуқурлик тепасидан арча шохларини олиб ташлашди. Ўстидаги юк енгиллагач, Нормат ўрнидан турмоқчи бўлган эди, шериклари: «Етавер, қачон туришингни ўзимиз айтамиз» дейишди. Партизанлар қарагай шохларини бутай бошлади. «Қапа тикишади шекилли, бу кеча шу ерда тунамасак эди» деб ўйлади Нормат ва бир хўрсиниб олди.

— Кел, энди мана бунга ёт,— деди Бульба.

Нормат қарагай новдалари билан арча шохларидан ясалган замбилин кўриб, ўзини тирик мурда қилиб тобутга солинаётгандай сезиб, хўрлиги келди.

— Сизларга дардисар бўлдим...

— Ишимиз зарур,— деди Руслан.— Тезроқ бораб хабар қилишимиз керак.

Нормат суюниб кетди:

— Қисмимга хабар қиласизларми?

— Йўқ, сен биз билан қоласан,— деди Вульба.— Ҳалиги колонналарни кўрдинг-ку. Бутун бир дивизия, Франциядан келяпти. Клязьмага бориб тунаса керак.— Кейин у Русланга деди:— Ке, оғайини сужа, кетдик!..

Улар Норматни замбилга ётқизиб, қоронғи ўрмон ичига олиб кириб кетишиди.

— Тўхта! Қимсан?

Партизанлар мэррага етгунча неча жойда шу хил хитобни эшишиб, жавоб қилишди. Неча-неча жойда турли-туман кишилар замбилин очиб, Норматни кўздан кечирар, бош чайқаб қўйишаради. Блиндаж ёнида буларни тўхтатган охирги қоровул замбилни ичкарига киритмади. Кўтариб келганларнинг бири ичкарига кириб, бир зумда қайтиб чиқди. Норматни блиндажга олиб киришди. Руслан стол ёнида ўтирган пахмоқ соқолли кишига рапорт берди:

— Варшавкадан Клязьма томонга бир дивизия ўтди. Машиналарида Франция шаҳарларининг номлари ёзилган.

Харитани гугурт чўпи билан ўлчаб, қизил ва кўк қаламларда чизиб ўтирган соқолли киши дарҳол ўрнидан турди.

— Радист!— деди у. Радист югуриб келиши билан буюрди:— Фронтга дарҳол хабар қил, Клязьмага самолёт чақир.

— Отахон!— деди Руслан, яна солдатчасига честь бериб:— Ўрмонда учраган ярадор қизил аскарни ҳузыргизга келтирдик.

Отахон Норматни бошдан-оёқ кўздан кечириб, эшик олдида турган партизанга буюрди:

— Максимни чақиринг!

Бир оздан кейин блиндажга паст бўйли, қотмагина чол кириб келди.

— Ярадорни шифоланг, Максим,—деди унга Отахон.

— Хўп бўлади.

— Раисани чақиринг!— деб Отахон партизанга яна буюрди.

Капага ўрта бўйли, ёшгина қиз кириб, Отахоннинг буйруғини кутиб турди.

— Шошма,— деди Отахон унга,— телефон жиринглаб қолди.

Отахон телефон трубкасини олиб, отрядлардан ҳар хил маълумотлар қабул қилди.

— Аҳолидан талаоб олинган бисотлар солинган аравалар қаерда экан?— Отахон трубкада аллакимдан сўради.— Совет жангчилари тўсиб олибди, дейсизми? Жуда яхши!

Отахон группаларга айтадиган гапларини айтиб бўлгач, яна Раисага қаради:

— Сенга илтимос бор.

— Марҳамат.

— Аҳоли кўчиб келган ўрмонга бор. Менинг келинимга айт: курак, болта, арра, жами асбобларни йифсин.

— Буни мен ўзим ҳам қилоламан,— деди Раиса.

— Майли, биргалашиб қилинглар.

Раиса блиндаждан чиқиб кетаётуб ярадорга кўзи тушиб қолди-ю, ўзини тутолмай қичқириб юборди.

— Нормат!

— Раиса!

Немислар Ильичёвка қишлоғини босиб олғандан кейин, Раиса партизанлар отрядында құшилиб кетган эди. Отряд бошлиғи уни разведка взводига тайинлади. Раиса шу атрофдаги қишлоқтарға бориб, ақоли ўтасида варақалар тарқатар, душман ҳақида маълумоттар олиб қайтарды. Нормат уни күрди-ю Ильичёвкадаги bemor кампир күэ олдида жонланди.

— Онанг соғайдими? — деб сўради Раисадан Нормат.

— Вафот қилди,— Раиса кўзига ёш олди-да, блиндаждан югуриб чиқиб кетди.

Максим ярадорнинг билакларини, оёқларини ушлаб кўриб:

— Оёги синибди,— деди ва партизанлардан илтимос қилди:— Медпунктга олиб боринглар.

Қишлоқда ўттиз беш йилдан бери табиблиқ қилиб юрган ва кейинги йилларда колхоз амбулаториясида ишлаган бу чол медпунктда Норматнинг синиқ суюкларини топиб, пайванд улагандек улади-да, тепасидан ниманидир суркаб, сўнгра оёғини тахтакачлаб боғлаб қўйди.

3

Кечаси Норматнинг иссиги кўтарилди, алланималарни ўзича жавраб чиқди. Санитарларнинг қулоғида унинг фақат бир сўзигина қолди: «Адолат...» Норматнинг суюклари зирқираб оғриган чоғларда Адолаг унга ором бағишилгандек, кўэ олдидан нари кетмай турарди, кейин онаси, жиянлари, ўртоқлари, дашт бригадаси, бутун қишлоғи кўэ олдидан бир-бир ўтарди. Хаёл айланиб-айланиб, яна жанговар дўстлари ёнига — 119 тепалигига қайтарди... Нормат бир неча кун блиндаж ёғочларига тикилиб, шу аҳволда ётди. У блиндажда ётаркан, партизанлар ҳол-аҳвол сўраб, ха-бар олиб турдилар. Раиса ҳам бир-икки марта келиб кетди. «Раҳмат шуларга,— дерди, шифтга қараб ётган Нормат.— Шулар сени ўлимдан қутқариб қолдилар. Аммо қачонгача партизанларга боқим бўласан, Нормат? Үрмондаги турмушни ўз кўзинг билан кўриб турибсан. Ҳар бир қултум сув, ҳар бир бурда нон ҳисоб-

лик. Сен уларга оғир юксан. Тур ўрнингдан, оғинга боғланган тарашаларни улоқтири, қисмингга бор, сени дўстларинг кутяпти, Адолатдан келган хатлар кутяпти, Тур, шифтга қараб ётаверма!»

Нормат Максимни чақириб: «Тез мени ўз қисмимга жўнатинг!»—деди. Максимнинг ҳисобича, Норматнинг оёғидаги гипсни олишга яна бир кун бор эди. Шу сабабдан унинг Норматга насиҳат қилишдан бошқа иложи қолмади.

— Яна бир кун сабр қил, ўғлим, яна бир кун...

Норматга шу бир кун бир йилга ўхшаб кўринди, Яна бутун бир кун-а... Яна шу блиндаж ёғочларини туни билан ухламай санайдими! Ахир, неча мартадан санайди, бу ёғочларни? Бас шунча ётгани!

— Менга жавоб бермасангиз, ўзим туриб кетаман!—деди Нормат, Максим отага.

Максим қишлоқда табиблик қилиб юрган вақтларида бундай безовта бетобларни кўп кўрган. Максим ана шундай чоқларда, айниқса бетоқат болаларнинг синигини улаб, чиқигини солаётганда, уларни овунтириб, кўнглини топиб шифолар эди. Норматни тинчлантиришга ана шундай восита тополмасмикан? Уриниб кўр, Максим, йўқса, шунча меҳнатинг чипакка чиқиши мумкин..,

Максим Норматнинг ёнига ўтириб, унинг уйқусида кўпроқ тилига оладиган, унга энг азиз бўлган Адолатдан сўз очди-да, Норматнинг кўзларидан кўзини узмай, ундан нималарнидир сўраб, унга ҳамдард бўлиб ўтириб, беморни ухлатиб қўйди. Нормат шу ухлаганича эрталабгача уйғонмади. У эрталаб кўзини очиб, тушидаги севгилисини яна сўроқлай кетди:

— Қани? Адолат қани?

Норматнинг қаршисида Адолат эмас, Максим ўтиради... Нормат уялганидан, яна кўзини юмиб олди.

— Тур энди, туравер!—деди Максим.

Нормат бошини ёстиқдан кўтариб, ўтириди.

— Қани энди айт-чи, ўғлим, қандай туш кўрдинг?

— Жуда қизиқ туш,—деди Нормат, кўзларини ишқалаб,— қишлоғим, севгилим тушимга кириди.

— Хўш, хўш, айта бер!

— Мен худди шу ўрнимда ётган эканман. Адолат самолётда тепамга келиб, кабинадан бошини чиқариб қаради. «Мана мен шу ердаман» деганимни биламан...

бир «мессершмидт» ҳаволаб келиб унинг самолётига шўнгий бошлади. Шу он Адолат самолётдан ўзини тепамга ташлади... Қучоғимни очиб, ушлаб оламан, деганимда уйғониб кетдим... Қарасам, бошимда сиз ўтирибсиз.

— Жуда соз. Энди ўрнингдан туриб, оёғингни бир синаб кўр-чи!

Нормат ўрнидан пастга тушиб, оёғини босди... Чап оёғи ерга тегиши билан бадани живирлашиб, кўзидан ёш чиқиб кетди. Кейин у ҳассага таяниб, битта-битта юриб, блиндаждан чиқди. Бир неча одим оқсоқланиб юрди. Унинг юриши янги тета-поя боланинг биринчи қадамларига ўхшарди.

— Мана энди қаёққа борсанг ҳам ўз оёғинг билан борасан,— деди Максим Норматнинг елкасига қоқиб.

Нормат ўзини шифолаган чолни қучоқлаб ўпди.

— Энди ижозат беринг, қисмимга кетай!

— Ижозатни мендан эмас, Отахондан оласан. У сени кутиб турибди.

Нормат Отахоннинг олдига кира туриб унинг:

— Рига, Рига, Фарғонадан, отанг гапираётир,— деган сўзларини эшитиб қолди. Сесканиб тушди... «Менинг шаҳрим... Менинг отам? Қайси отам? Таажжуб...» Нормат блиндажга киаркан, Отахон ушлаб турган ер телефонининг трубасига ташланмоқчи бўлди. Қейинчалик, партизанлар бошлиғи махфий код билан жанговар топшириқ бераётганини тушуниб, шахтидан қайтди.

— Эшитяпсанми, лейтенант? Элликта картошка юбор. Аркашага икки қути конфет бер, «Эллик олти» билан «Қирқ тўққиз» ўртасидаги бодринглардан беш қопини «Лента» томонга жўнат,— деб буйруқ берарди Отахон.

— Ҷақирганингиз учун келдим,— деди Нормат, Отахон трубакни қўйиши ҳамон.

— Ўтиринг.

Отахон ўрнидан туриб, Норматнинг ёнига келди-да, уни, одати бўйича, бошдан-оёқ кўздан кечирди.

— Яхши... Ҳа, айтгандай, қайси қисмдан эдинги?

— Эҳтимол танирсиз, Юрьев батальонидан, комиссаримиз Черницов.

Отахон Норматнинг ҳужжатларини: «Қизил аскар книжкасига» билан номи, адреси ёзилган медальонни ўқиб чиқди.

— Бу ерга қандай қилиб келиб қолганингизни биласизми?

Нормат бўлган воқиани айтиб берди.

— Парашютни биз ҳам кўрган эдик,— деди Отахон,— афсуски партизанларимиз яқинлашолмади...

— Ротамиз уни душманга бериб қўймагандир. Жангчиларимиз яшикка ёпишаётганини ўз кўзим билан кўрганман.

— Хотиржам, бўл ўғлам,— деди Отахон кулиб,— юкни сенинг қисминг олди.— Кейин, у Норматга яна бошдан-оёқ разм солди-да, сўради:— Кўзимга иссиқ кўриняпсан. Қаерда кўрган эканман?.. Ҳа, Ильичёвка-да учрашмаганимидик?

Нормат Отахоннинг кўзларига тикилиб қараб қолди.

— Тўхтанг, тўхтанг, қишлоқ ёнаётганида... Эсинг-издами, ёнгинни бирга ўчиришмаганимидик?

— Тўппа-тўғри, ўшанда кўрган эканман. Қани, ўтири, гаплашамиз, гап кўп...

Нормат курсига ўтириб, Отахоннинг сўзига қулоқ солди. У партизанлар ҳаётидан галира кетди. Шундан кийин Отахон Норматга фронтлардаги аҳвол тўғрисида, севимили Москва тўғрисида ҳикоя бошлаган эди, блиндажга қўлида боласи билан бир хотин кирди-да, гурс этиб йиқилди. Бола қизил қонига беланиб ётарди.

Нормат сакраб ўрнидан туриб беҳуш хотиннинг юзига сув сепди. Хотин кўзини очиб: «Фашистлар... «мамма» деб йиғлагани учун фашистлар боламни отди-лар» деди. Унинг айтишича, кундузи фашистлар ротаси Дашковкага келиб, дам олиш учун тўхтаган. Улар қишлоқ уйларини эгаллаб олиб, ичкилик бошлашганлар. Шу хотиннинг уйидаги маст немисларнинг шовқинидан уйқудаги гўдак уйғониб йиғлай бошлаган. Бэланинг йиғисидан ғаши келган бир фашист ўтирган жойидан туриб, автоматини унга тўғрилаган. Гўдак қўрқитганинг биладими? «Қўй, йиғлама» деб ёлворган хотин. Аммо автоматдан потирлаб ўқ чиқиб, бола қора қонига беланиб қолган. «Мана, ўлигини кўтариб қочдим...»— деб йиғларди она. У ҳикоясини тугатаркан, ўзини тутолмай, боласининг устига йиқилди.

— Русланнинг хотини бу,— деди Отахон, соchlарини юлиб йиғлаётган онани таниб.

Нормат ҳассасига тиранниб ўрнидан турди-да, она-нинг бағрида қонга беланиб ётган болага қаради. Гў-

дакнинг жингалак соchlари пешонасига тушиб турибди. Унинг, витриналардаги қўғирчоқларнинг кўзларидек тиниқ кўзлари ҳали дунёда ҳеч нарса кўриб улгурмаганиданми, армон билан катта-катта очилиб ётибди. «Нима гуноҳ қилибди шу гўдак?— деб ўйлади Нормат.— Дунёга келиб нимани кўрди бу кичик кўзлари? Фашистнинг ўқи учун туғилганмиди бу кичик инсон? Яшашга ҳаққи йўқмиди унинг? Нега буни она сугидан маҳрум қилдилар? Курашишга қурби етмас эди-ку бу гўдакнинг? Нега уни гўрга тиқишга шошилди фашист? Қараб туриш етар энди, қараб турсак, уруғимизгача қурутади булар...»

— Қотиллар!..— деди Нормат ғазабланиб.— Ушлаб олиб қийма-қийма қилгим келяпти уларни!

— Партизанлар ўша одамхўрларни қирмай, кимни қирсин,— деди Отахон.— Тағин ана шу фашистлар «Партизанлар қоидасиз урушишяпти» деб нолийдилар.

Гўё одам ўлдириш учун қандайдир қонда ёзиб қўйилгандек! Ким, қачон ва қаерда одам ўлдириш қоидасини эълон қилибди? Уйига кирган ўғрини: «Сени қайси қоида билан дўппаслай?» деб сўраган одам борми, дунёда? Йўқ, бундай афандилар эртакларда ҳам йўқ. Мамлакатимизни босиб олиш, халқимизни қириш мақсадида бостириб келиб, шаҳар ва қишлоқларимизни яксон қилаётган ёвдан: «Сени қайси қоидага мувофиқ юртимдан қувлаб чиқарай» деб сўраб олиш керак эмиш! Фашистлар биз билан рингда боксга тушаётганий йўқ-ку! Ўз қотилини қайси йўл билан жазолаш, қандай қилиб ўз юртини ундан тозалаш халқнинг иши, Халқ қасосчиларининг муқаддас бурчи шу! Босқинчилар юртимиздан чиқиб кетмагунча биз улардан ўч оламиш! Халқ билан урушиш мумкин эмаслигини билиб қўйишин ўша қутурган итлар!

Борисов телефон трубкасини олиб, штаб бошлиғини чақирди:

— Лейтенант, отрядга тревога эълон қилинг.

Бу ердаги ҳаётни, ҳаяжонни кўрган Нормат кетиш тўғрисида бошқа оғиз очмади.

Отахон отряди Даշқовка қишлоғининг кун ботиш томонидаги қайназорга тўплана бошлади. Қайназор икки йўлнинг ўртасида бўлиб, теварак-атрофдаги да-

рахтзорлардан анчагина баландликда эди. Бу жойдан бутун Дашковка, унга кирадиган ва ундан чиқиб кетадиган йўллар бемалол кўриниб турарди.

Бульба Отахон буйруғини партизан постлариға стказиш учун кетаётганды, Нормат унга эргашди.

— Мен ҳам бирга бораман.

— Бор, ўғлим, бор! — деди Отахон.— Бульбага ҳамроҳ бўл!

Бульба қайназорни сўқмоқ йўллар билан айланиб чиқди. Нормат унинг орқасидан бориб, партизанларинг атакага шайланиб турган кичик-кичик группалари билан бир қаторда, ўт очишга ҳозир нозир турган пулемёт, минамёт взводларининг позицияларини ҳам кўрди. Норматнинг назарида, бу ерда оддий қуролларга эга бўлган партизанларгина эмас, мунтазам қисмларнинг бўлинмалари атака мэрраларида буйруқ кутиб турганга ўхшади. Аммо уларни мунтазам қўшинилардан ажратиб турадиган айрималар ҳам йўқ эмас эди. Партизанлар ҳозирги замон совет яроғ-аслаҳаларининг барча турлари билан бир қаторда, ов миљиқлар, немис автоматлари билан ҳам қуролланган эдилар. Ўқдорилар ҳам етарли эканлиги кўриниб турарди: баъзилар катта патронтажларини елкасига осиб, баъзилар белига боғлаб олган, баъзилар эса, обоймаларни противогаз сумкаси ёки алоҳида халталарга солиб олган эдилар.

Бульба билан Нормат қайназордан Дашковка яқинидаги буғдойзорга чиқдилар. Норматга бу ерда ҳар бир бошоқ тагида бир одам ётгандек туюлди. Руслан партизанлари буғдойзор ичига беркиниб олиб, Дашковкани кузатиб ётарди. Разведкачиларга ана шу ерда қишилоқ манзараси очилди: куйган хаталар, вайрона саройлар. Немис солдатларидан баъзилари уйларга похол ташиб киришяпти, баъзилари деразалардан плашч-палатка, кўрпа, чойшапларни қоқишияпти. Сарой олдида солдатлар бир-бирларига сўз бермай шовкин кўтаришяпти. Афтидан, улар қишилоқ самогонидан хийла стиб олишганга ўхшайди. Шулардан икки солдат том орқасига ўтди-да, нима тўғриладир ғужурлашиб, кейин икки томонга ракета отди. Ракета ёруғида Дашковка куппа-кундузгидек чараклаб кўринди, шу билан бирга буғдойзор ҳам кафтдек текис ярқиради. Партизанлар ерга ёпишиб олиб, тепаларига буғдой бошоқ-

ларини тортдилар, бошларига бўтакўз дасталарини тўсдишлар. Аммо ракетачиларнинг буғдойпоя билан ҳен қандай иши бўлмади. Ракеталар сўниб, атрофни қоронгилик босгач, солдатлар яна ғужурлашиб ғойиб бўлишди. Қишлоқнинг нариги чеккасида ҳам икки ракета отилди...

Бир оздан кейин қишлоқ жимжит бўлиб қолди.

— Энди фашистлар уйқуга ётишди,— деди Руслан.

Унинг юрагида ўғлининг қотилидан қасос олиш газаби тошди: ўша фашист қўлимга тирик тушса эди, деб ҳаяжонланарди Руслан.

— Битта-биттадан эмаклаб борингиз!— деди Руслан, партизанларга.

Отряд қўзғалди.

— Битта ҳам ўқчиқарилмасин!— деб буюрди Руслан.

Унинг бу буйруғи қулоқма-қулоқ ҳамма партизанларга етиб борди. Партизанларнинг биринчи қаторлари Дашковка чеккасидаги уйларга яқинлашганда, патруллар гурунглашиб келиб қолишли ва яна ракета отишди. Ракета ёруғида партизанлар қўзиқоринлардек бодраб кўринди, аммо гап билан овора бўлган патруллар уларни кўришмади. Ракета сўниши билан икки партизан патрулларнинг тепасига ташланди. Немислар хириллаб-хириллаб жимиб қолгач, Руслан қўл фонари билан сигнал берди. Партизанлар фашистлар жойлашган қишлоқ уйларига ёпирилдилар.

Нормат Русланинг кетидан қишлоқнинг энг чеккасида жойлашган Русланинг уйига кирди. Кираверишда бир солдат автоматини тиззасига қўйганча ухлаб ётган эди, Руслан унинг бошига милтиқ қўндоғи билан бир урди: немис мукка тушиб ётиб қолди.

Руслан ўз уйини танимади.

Ичкари хонада тахминан бир бўлинмага яқин солдат ерга похол солиб ухлаб ётибди. Бўш шишалар, консерва қутичалари, гажилган суяклар ерга сочилган. Русланинг кўзига ўғлининг қони кўринди-да, газабдан ёниб кетди, автоматдан бирйўла ўқ узиб, қотилларни ер тишлатди.

Руслан билан Нормат кўчага чиққанларида ўз вазифаларини бажарган партизанлар буғдойпояга қайта бошлаган эдилар.

Русланинг қўлида қўл фонари яна ярқиради. Отряд шу ондаёқ Дашковкадан ғойиб бўлди.

Эртаси кун Дашковкага немисларнинг жазо отряди келди. «Дашковканинг гўдакларидан тортиб кексала-ригача дорга осилсин» деган буйруқ билан келган отряд қишлоқда фашист солдатларининг мурдорларидан бошқа ҳеч кимни тополмади. Отряднинг ўликларни тўплаб, қайнизордаги қабристонни ёғоч бутлар билан тўлдириб кетишдан бошқа иложи йўқ эди...

— Дашковкадан нишон ҳам қолмасин! — деб буюрди жазо отрядининг бошлиги.

Ўт қўювчилар кўчани айланиб чиққач, Дашковка-ни тутунли аланга қоплади... Ана шу тутун ва ўт ичида жазо отряди ўрмонга — партизанлар устига юрди...

5

Жангдан кейин Отахон Норматни ўз ҳузурига ча-кирди:

— Раҳмат, ўртоқ Жабборов, яхши жанг қилдинг!

— Совет Иттифоқига хизмат қиласман! — деб бара-ла жавоб берди Нормат.

Фашистларнинг жазо отряди билан бўлган икки со-атлик жангда, Нормат граната ташлаб, танкеткалар-нинг йўлини тўсган эди. Унинг гранатасидан бир тан-кетка пириллаб ўрнида айланиб тўхтади-да, мажақлан-ди. Автоматчилар танкеткадан ўзларини ташлаб қочган эдилар, партизанлар ўтига дуч келдилар.

Отахон партизанларга ҳикоя бошлади:

— Мен ўзбекларни илгари ҳам кўрганман. Лекин узоқдан кўрганман. Ўтган жаҳон уруши вақтида минг-лаб ўзбеклар шимолий темир йўл қурилишида ишлаз-ди. Тупроқ ишларини ўзбеклар бажарди. Подшо ҳуку-мати ўзбекларни урушга киритмади, уларнинг қўлига қурол беришдан қўрқди. Орадан чорак аср ўтди... Ўт-ган йил Қишлоқ Хўжалик виставкасига келган ўзбек-ларни кўрдим. Уста пахтакорлар экан. Ана энди сени кўриб, ўртоқ Жабборов, ўзбекларга муҳаббатим яна ҳам ошди! — деб Борисов Норматга қулиб қаради-да, ун-дан сўради: — Сенга нима мукофот берсам экан, ўртоқ Жабборов?

— Мени ўз қисмимга юборсангиз — шу мукофот,— деди Нормат. — Бошим осмонга етади.

— Майли,— деди Отахон,— қисминга бор, дўстла-рингни қувонтир.— Кейин у ўз милтигини Норматга

узатди.— Мана шу рус милтиғи сенга мұкофот бўлсин. Бу милтиқ менга отамдан мерос қолган. Мен бу билан биринчи жаҳон урушида немисларга қарши урушган эдим, партизанлар урушини ҳам шу билан бошладим. Милтиқ энди сеники. Шу милтиқ билан Ватанини ёвлардан асрарган ота-боболаримиз анъанаси, рус солдати-нинг анъанаси сенга — ўзбек ўғлонига мерос бўлсин.

Нормат Отахоннинг милтиғини қабул қилиб олар-кан, кўкрагини баланд кўтариб:

— Совет Иттифоқига хизмат қиласман! — деди.

— Черницовга, Юрьевга салом айт,— деди Отахон, Нормат билан қучоқлашиб хайрлашаркан.— Бизнинг ўрмондаги ҳаётимиизни, жангларимизни уларга сўзлаб бер.

— Албатта сўзлаб бераман, Отахон!

— Оқ ўйл бўлсин!

Нормат партизанлар билан хайрлашиб, блиндаждан ўрмонга чиқди. Блиндаж рўпарасидаги кекса қарагай тагида икки партизан қопчиқларини тагига қўйиб, махорка ўрашиб ўтиришибди. Улар Норматнинг Қадрдонлари Руслан билан Бульба эдиладо.

— Қани, юр,— деди Бульба,— ўзимиз олиб келган эдик, ўзимиз кузатиб ҳам қўямиз.

— Раҳмат, дўстлар!..

Уч оғайнини қайнзорнинг сўқмоқ йўлларига кириб кетишиди.

Ўн олтинчи боб

ХУШХАБАР

/

Капитан Юрьев ўрнатган тартибга мувофиқ ҳар бир жангдан кейин взвод ва роталарда жанговар эпизодлар ёзилиб, батальон штабига тақдим қилинар ва жангларда алоҳида ботирлик, қаҳрамонлик кўрсатган кишилар Ҳукумат мұкофотига тақдим этилар эди. Бу рўйхатлар баъзида ҳеч қаёққа юборилмаса ҳам, расмийлаштириб қўйила берарди.

Черницов Ҳукумат мұкофотига лойлиқ топилган кишиларнинг батальон штабида тайёрланган қаҳрамонлик эпизодлари ва характеристикаларини ўқиб, унга қўйл қўяр экан:

— Великанов тузалдими? — деб сўради адъютантдан. — Тузалган бўлса, чақириб қўйинг.

Великанов пулемётчи эди. Вания походларда қўл пулемётини бир ўзи кўтариб юради. Иккинчи номер: «Менга бер, мен ҳам кўтарай» деса, унга дискаларни берарди-да: «Иккинчи номернинг вазифаси таъминотчилик, у пулемётга ўқ-дори, пулемётчига озиқ-овқат ташийверсин» деб ҳазиллашарди.

Великанов ўз оти билан Великан — паҳлавон. Узун қайиш камар унинг белига учма-уч зўрға етарди. Шунинг учун ҳам жангчилар уни Вания Великан деб чақирадилар.

«Вания Великан навбатсиз наряд олибди. Балиқларни пойлаб, бақаларни қўриқлаётган эмиш» деган гап тарқалди. Бу гапни ким чиқаргани номаълум, аммо ҳамманинг оғзида шу гап.

Воқия бундай бўлган эди.

Черницов душман паромига ҳужум қилингандан кейин жангчиларни тўплаб, бундай деди: «Душман биздан ўч олиш учун куч тўпламоқда. Бу бир жиҳатдан хавфли бўлса, иккинчи жиҳатдан фойдали. Биз шу ерда бўлганимиз учун булар жилолмай турибди. Бўлмаса, булар ҳам Москвага ташланади. 119 тепалигидаги Қизил Байроқ душман армиясининг биқинига найза бўлиб санчилмоқда. Душманга бир дақиқа ҳам тинчлик бермаслигимиз лозим! Аммо мудофаада туриш — кутиб туриш, муштласагина мушт қайтариш эмас, балки актив ҳаракат қилиб, душманнинг қўзини очирмасликдир».

Черницовнинг бу сўзлари батальоннинг жанговар шиори бўлиб қолди. Ҳар кун актив операциялар олиб борилди. Варшавка йўлларига пистирмалар қўйилди, миналар кўмилди, бу йўлларни патруллар назорат қилиб турдилар.

Паром кўприги тор-мор қилингач, душман дарёдан паромнинг ўзи билан ўтиб туришга мажбур бўлди. Ана шу паромларга бир неча марта ҳужум қилинди. Партизанлардан олинган хабарларга қараганда, душман карво ни бугун ҳам паром кутиб Ильичёвкада тунаб қолибди.

— Қарвон қўлга олинсин. Иложи бўлмаса, тор-мор қилинсин! — деб буюрди Юрьев.

Бу вазифа Куценко взводига топширилди. У взвод душманга маълум бўлмаган сўқмоқ билан ўтиб, атака

маррасига түпланди. Карвон турган ерга разведкачилар юборилди.

Емғир эндигина тинган, кече қоронғи зди. Ҳавода битта ҳам юлдуз күрінмайды. Разведкачилар Ильинчевка қишлоғини ўраб турган ўрмон чеккасіда йилтиллаб күринган ўт яқинига бориб, шу ерда иккі немис солдати ўтирганини күрдилар. Демак, бу соқчилар озиқ-овқат юкландын карвонни қўриқлаб турибидилар.

Разведкачилар шу хабарни топиб келишлари билан, Күценко ўт милтиллаб турган томонни кўрсатиб, жангчиларга ўша томонга ўт очишни буюрди.

Бир неча дақиқалик отишмадан кейин, взвод немис карвони тепасига ташланди. Тўсатдан бошланган ҳужум яхши натижа берди. Қора ҷодирили фургонлар, отлар олдида бир неча немис ер тишлилаб қолди. Фургонларда офицер, унтер-офицер ва солдатларнинг кийимлари, этик ва ботинкалари тартибсиз сочилиб ётарди: тўсатдан ҳужумга учраган босқинчилар саросимада кийимларини киёлмай, яп-яланғоч қочган здилар. Уч юзга яқин аравали карвон қўлга туширилди.

Күценко араваларни кўздан кечирди:

— Асал... печенье... ўқ-дорилар... этиклар... ботинкалар... қайышлар...

Ким нима топса, баланд овоз билан эълон қила бошлади. Күценко жангчиларнинг олдига бориб: «Фельдшер кўрмаган нарсани еманглар» деди. Жангчилар ўлжа олинган карвондаги озиқ-овқатларни, кийим-кечакларни, ўқ-дориларни тўплай бошладилар. Арава ичидан гулдор белорус камзуллари ҳам чиқди.

Рота фельдшери ўлжа олинган озиқ-овқатларни текшириб чиқди. Бочкалардаги асал, сут, қаймоқ, гўштларнинг ҳаммаси ҳам колхоз фермаларидан, қишлоқ аҳолисидан босиб олинган зди. Асал уяси билан кўчириб олинган...

Немис озиқ-овқат карвонига ҳужум бошланган вақтда Вания Великан биринчи бўлиб душман тепасига ташланган, гулхан атрофига ўтирган немисни таппа босиб, бўғиб ўлдирган зди. Жангдан кейин Вания Великаннинг иссиғи чиқибди. Черницов шуни эшишиб, уни ўз ҳузурига чақиртирди.

Бир неча дақиқадан кейин Вания Великан Черницов ҳузурига оқсоқланиб кирди.

— Нима бўлди? — деб сўради Черницов.

- Ҳеч нарса бўлгани йўқ, ўртоқ батальон комиссари,— деди Великан, кулимсираб,— соппа-соғман.
- Нима учун қип-қизариб кетдингиз?
- Кўпроқ асал еб қўйибман...
- Нега оқсоқланяпсиз?
- От тепди...
- От?
- Ҳа. Аравага келиб асал оламан десам... немис оти бир тепди. Мен бир муштладим. От яна бир тепди... Кейин мен ҳам тепдим.
- Борди-ю сизни старшина қилиб тайинласак, унда нима бўлади? Биронта отни тепиб ўлдириб қўйсангиз, поход кухнясини ким тортади?
- Ўзимизни от билан тепишмайман, ўртоқ комиссар,— деди Великан шошиб.
- Эплаб кетасизми?
- Эплайман, ўртоқ батальон комиссари!..

2

Ваня Великан старшиналикка астойдил киришиб кетди. У, ротанинг аравага қўшиладиган баъзи бир отларини ўлжа олинган немис отлари билан алмаштирди. Немис отларининг кучини синамоқ учун, уларни бир-бир тебратиб кўрди.

— Немисларнинг оти катта бўлгани билан кучи йўқ бўларкан,— деди янги старшина, отбоқарга кўз қисиб.

Ваня Великан аравакашларни ҳам янгилади. Факат Исройлни ўз ўрнида қолдирди. «Нормат бўлса ўзимга капитнариус қилиб олардим,— деб ўйлаб кетди Великан.— Жуда шинаванда йигит эди-да. Қаерда экан-а?»

Ваня тўртта аравани карвон қилиб, атрофдаги қишлоқлардан бирига жўнади. Тонг отарда араваларни тўлдириб қайтган Великан ошпазни чақириб навбатдан ташқари овқат пиширишга буюрди. Биринчисига қўзиқорин солинган картошка шўрва, иккинчисига ээилган картошка билан бир бурдадан гўшт, учинчисига бир кружкадан сут тарқатди. У, комбатнинг ординарецини чақириб, Юрьев билан Черницовларга алоқида овқат юборди.

Черницов мазали ҳид таратиб турган хилма-хил овқатларни кўргач:

— Бу Великаннинг иши,— деди.

Штабдан келган чопар, комиссар чақираётганини айтгач, Вания «ширин овқатим учун раҳмат билдира керак» деб ўйлади ва штабга чопқиллаб етиб борди.

— Ўртоқ батальон комиссари! Тўртинчи рота старшинаси Великанов, чақирганингизга мувофиқ ҳузурингизга келдим!

— Гўштни қаердан олдингиэ?

— Колхоздан, ўртоқ комиссар!— деди Великанов қувониб.

— Қайси колхоздан?— деб комиссар сапчиб ўрнидан туриб кетди.

— Ҳозир колхоз эмас-ку... илгари колхоз бўлган...— Великан дудуқланиб қолди.— Бизники эмас.

— Кимники?

— Немисларники... йўғ-эй, немислар турган жойдаги колхоздан олдим...

— Демак, у жойдаги колхозларни ҳам немислар, ҳам великанлар талаяпти, шундайми?

Старшина ўнгайсизланди, кейин ўзини оқлаш учунми шошиб-пишиб тушунтира кетди:

— Ўғирлаб олганим ҳам, тортиб олганим ҳам йўқ, ўртоқ комиссар! Колхозчилар ўзлари беришди. Йўлдан четдаги колхоз бўлгани учун немислар кам борар эмиш, борса ҳам, танкда, броневикда борармиш. Танкка нимани ҳам юклайди... Колхоз фаллани тўла йиғиб олиби, давлат планини ҳам ортиғи билан бажариби.

— Қандай қилиб бажариби.

— Пешма-пеш янчилган фаллани ўрмонга, ертўлага кўмишибди. Давлат ҳақи битгач, қолганини ўзлари бўлиб олишибди. Энди картошка мажбуриятини бажаришяпти.

Черницовнинг чеҳраси очилди.

— Совет кишилари бор жойда, Совет давлати ҳаёт! Бир кун бўлса ҳам, бир соат бўлса ҳам совет байроғи остида яшаб, совет тузини ичган киши Совет давлатини унутмайди!

Великанов комиссарнинг чеҳраси очилаётганини кўриб, фахрланиб гапида давом этди:

— Ўрмонда тўртта бричка турибди. «Булар қаёққа?» десам, «Москва учун, севимли Москва учун!» де-

йишиди. «Қавдай қилиб ўтказасизлар?»— десам, «Ўтказамиз, ўтказиб юборамиз!» дейишиди. Кейин мента: «Аравангни түғрила!»— дейишиди. Бир нафасда түртта аравани түлдириб беришиди. «Тилхат берайми?» десам, «Йўқ, керакмас» дейишиди. «Отахон» деганинг партизан отряди бор экан. Ўша отрядни ҳам шу колхоз боқармиш. Ўртоқ комиссар, интендантда муҳр босилган чеклар бор, бу чеклар давлат ордери ҳисобига ўтаверади. Колхознинг давлат мажбуриятини ўзимиз қабул қила қолайлик-да. Нимани ўйлаб қолдингиз? Барибир, немислар колхоз симборларини топса, ҳаммасини олиб кетишади.

— Колхозчилар ғаллани колхознинг ўзида сақлашяптими?

— Ҳа колхозда, ўрмонда, ер остида сақлашяпти. Мен улардан: немислар билиб қолишига, нима қиласизлар?— деб сўрасам, «Ўт қўйиб юборамиз» дейишиди. Яхиси, ўзимиз ола қолайлик. Иложи бўлса, Москва-га юборамиз. Эҳтимол, Москва ишчилари ҳам нонга муҳтожидир.

— У колхоз қаерда экан?

— Бу ердан 40 километр шимолда. Харитани қаранг, ўртоқ комиссар, «Победа Октября» колхози.

Чернилов колхоз қишлоғини харитадан қидириб топди. Ҳақиқатан ҳам, бу колхоз ўрмон ичидан бўлиб, катта йўллар унинг икки ёнидан ўтар эди. Агар немислар колхоз қишлоғини эгалласа, иккала йўлнинг ҳам хўжайини бўлиши мумкин...

— Немислар бор эканми?

— Қишлоқнинг ўзида йўқ экан, аммо катта йўлда патруллар юрибди.

— Сиз қандай ўтдингиз?

— От-аравалар немисники бўлгани учун, немис плашч-палаткаларини ёпиб ўта бердик. Бир патруль бизни узоқдан кўрди-ю тўхтатмади, тўхтатганида ҳам бир мушт билан ер тишлишиб қўя қолардим, ўртоқ комиссар!

— Сизга жавоб,— деди комиссар, Великаннинг ҳушиёрлигидан мамнун бўлиб.

— Есть!— деб Вания Великан честь бериб чиқиб кетди.

Биринчи самолёт ташлаган совға олинди, деб хабар берилгандан кейин, шу куни кечаси тепаликда яна бир совет самолёти пайдо булди. Самолёт дараҳтлар тепасида жуда паст учиб келиб, очиқ жой қидира бошлади.

— Сигнал берилсін! — деди Юрьев.

Тепаликда жуда күп окоп, траншея ва бошқа истекхомлар қурилғани сабабли, самолёт құнадиган текис жой қолмаган зди.

Тун қоронғи. Тепалик устида күндүз куни пайдо бўлган булатлар ҳалигача тарқалмасдан, пастга нам пуркаб турибди. Ёмғир томчиламоқда. Шунинг учун ҳам пастдан самолётга одатдагича сигнал бериш мумкин бўлмади.

— Ўт ёқилсін! — яна буюрди Юрьев.

Лейтенант Морозов блиндаждан чиқиб самолётта қаради. Самолёттинг тагида учта қизил лампочка кўринди-ю учди.

— Уч жойта ўт ёқилсін! — деди Морозов, тулхан учун шоҳ тўплаётган жангчиларга.

Турғеневнинг бўлинмаси уч жойга ўт ёқди. Исройл Азимов аланга атрофида туриб, тепада айланадиган самолётга қаради.

— «У — 2»...

Самолёт ўт атрофида бир неча минут айлатиб юргач, пастга юмалоқ бир нарса ташлади. Морозов блиндажининг олдига тап этиб туштан қөп тарс ёрилиб кетди. Уни йиғишириб олаётган жангчилардан бири:

— Шоколад экан... — деди.

Самолёт яна бир нечта қол ташлади. Бу қолларда концентрат, сухари ва шакар бор зди.

Морозов қолларни очирмай, батальон штабига юборди. Юрьев қондаги шоколадлардан бирини тишлаб, оғзишининг сувини келтириб сўрди.

— Ватан бизни унутмайди!

Черницов қолларнинг ичини кавлаб, шоколад солинган қопнинг тагидан Сир қоғоз олди. Ҳарбий фронт Ҳарбий Совети номидан оқ қоғозга машинкада ёзилган хатни Черницов овозини чиқариб ўқиди:

«Жанговар ўртоқлар! Биз сизлар билан биртамиз. Сизларнинг қаҳрамонларча курашингиздан миннатдор-

миз. Душманнинг жонли кучлари ва техникасини қирингиз! Эгаллаган жойингизни қўлдан бермангиз ва Қизил Армия ҳужумга ўтгунча сақлаб турингиз!»

Хатнинг охирида радио алоқаси ўрнатиш зарурлиги ва бошқа алоқа воситаларининг сигналлари айтилган бўлиб, унда: «Ҳар куни кечқурун Москва вақти билан соат 22.00 да самолёт кутингиз» деб иловга қилинган эди.

— Кўрдингизми!— деди Юрьев қувониб,— бизнинг ишимизни фронт қўмондонлиги кузатмоқда...

— Унумтапти бизни Армия. Унумтапти Ватан!— деди Черников, севинчдан кўзлари чақнаб.

Шу кундан бошлаб 119 тепалиги устида ҳар куни кечаси «У—2» лар учадиган бўлиб қолди. Улар фақат озиқ-овқат эмас, ўқ-дори, яроғ-аслача, ҳатто пулемёт ва кичик тўплар ҳам ташлаб туришди.

Юрьев батальонига чекиниш вақтида орқада қолиб кетган, адашиб қолган қизил аскарлар, командирлар ҳар куни келиб қўшила бошладилар. Батальон кенгайиб борди. Партизанлик ҳаракати ҳам тобора кучайиб, янги-янги отрядлар пайдо бўла бошлади. Черников олган хабарга қараганда, Ока ва Угра бўйида, Чайка атрофида қирқа яқин партизан отряди курашмоқда. Юрьевчиларга ўхшаш орқада курашаётган батальонлар ҳам оз эмас. Юрьевчилар атрофдаги ҳалқ қасосчилари билан алоқа боғлаб, бирликда ҳаракат қиладиган бўлиб қолдилар.

Армия штаби билан радио алоқаси ўрнатилди. Генерал Погодин Юрьев батальонига: партизанлар билан биргалашиб, душманга тинчлик сурмаслик ҳақида муҳим вазифалар топшириб турди.

Хуллас, вазият бутунлай ўзгариб кетди. Немислар Варшавканинг сапёrlар текширмаган жойида бир қадам ҳам олдинга жилолмайдиган бўлиб қолдилар. Йўлга қўйилган пистирмалар шу қадар чаққонлик ва усталик билан ҳаракат қилиб турдиларки, шу туфайли бу атрофда немислар танксиз юролмай қолдилар, кечалари эса юришини бутунлай тўхтатиб қўйдилар. Мудофаа жангларининг тактикаси ва техникаси тобора такомиллаша борди. Черников атрофдаги қишлоқларга шиша йигиш учун жангчиларни юборди. Бу шишалар батальон қиравчилари мажақлаган душман машиналари нинг бензинлари билан тўлдирилди. Ичига бензин қўйиб

бўғизига латта боғланган бу шишалар душманни титратадиган қурол бўлиб қолди. Ёндирувчи шишалар билан қуролланган жангчилар немисларни батальон турган участкада катта йўлдан воз кечишига мажбур қилдилар. Улар бир неча километр наридаги қишлоқ йўли билан қатнашга мажбур бўлишди. Лекин бу янги йўл ҳам немислар учун тинч эмас эди. У жойда Отахон отрядининг партизанлари ҳаракат қиласидилар. Улар ҳам ёндирувчи шишалар ва танкка қарши гранаталар билан қуролланган эдилар. Хуллас, бепоён Россия немисларнинг кўзига борган сари жуда тор кўрина бошлиди.

— Самолёт қўнадиган жой қилиш керак,— деди Юрьев ўша кунларда.— Уз аэродромимиз бўлмаса, қийналадиганга ўхшаймиз.

Бу қийин иш эди. Тепаликнинг ҳамма ёғи ўйдим-чукур бўлиб кетган. Юрьев комиссар билан тепаликни айланиб юриб, кичик бир майдончада тўхтади. Бу жой тепалик ўртасида бўлиб, кенглиги ярим гектардан ортиқ эмас эди. Бу ерга 76 миллиметрлик тўплар батареяси жойланган эди. Юрьев батареяни бу ердан бошқа жойга кўчириш ҳақида бўйруқ берди.

Жангчилар окопларни текислаб, тўнгакларни кавлаб олиб, кечга яқин «аэродром» тайёрладилар.

— Биринчи самолёт кеч соат 22 да қўнади,— деди капитан ва уни кутиб олишни лейтенант Морозовга топширди.

Кеч соат 22.00 да шарқдан овозсиз учиб келган «У — 2» тепалик устига келиб қизил фонарь ёқди. «Аэродром» атрофларида унинг чегарасини билдирувчи қизил сигналларни кўргач, самолёт тепалик устида айлана бошлиди. Лейтенант Морозов самолётни кутиш учун қўйилган жангчиларга қўл фонари тарқатган, ва фонарнинг қизил сигнални билан чегарани билдириб, кўк сигнални билан қўнадиган жойларни кўрсатишни буюрган эди. Бир неча кўк сигнални кўрган «У — 2» бир жойда айланиб-айланиб, худди баланддан ташланган парашютдек равон пастлай бошлиди. Самолёт мотори ўчириб қўйилган, қораси кўринса ҳам, овози эшитилмас эди. Учувчи самолётни пастлаб олиб келиб, моторни ишга солди ва жуда усталик билан қўнди.

Тепаликка биринчи совет самолётининг қўниши Юрьев батальонининг жангчилари учун катта байрам

бўлди. Жангчилар самолёт экипажини қучоқлааб, кўлма-кўл кўтариб юришди.

— Менга капитан Юрьев керак,— деди самолётдан тушган учувчи.

— Мен Юрьевман.

Батальон командири учувчи билан қучоқлашиб кўришгач, уни штабга бошлади.

Самолёт тепаликка ўқ-дори ва батальон жангчилари учун хатлар келтирган эди. Бу — Юрьева батальони тепаликни мудофаа қила бошлагандан бери биринчи марта келган почта эди.

4

Юрьев штабда ўтириб, армия алоқа офицерининг «Тепалик қўлдан берилмасин!» деган сўзларини тақорлади. Генералнинг буйруғи шу эди. Душманнинг Москвага қилаётган ҳужуми шаштини қайтариш учун унинг орқа томонини бетинч тутиш керак. Бу — энг муҳим вазифа. Душман нима учундир бизни унутиб қўйди. Ҳозирча бизга эътибор қилмаётир. Афтидан Москва бўсағасида бўйни кесилаётганга ўхшайди. Демак, сен унинг обёини кес. Бўйни узилиб, обёи кесилган гавдани гўрга тиқиши осон бўлади... Юрьев оператив ҳаритага қараб: «Тек ўтирганимиз йўқ, аммо ҳаракат доирариз тор»— деди-да, ўрнидан туриб, қулоқчинини бостириб кийди ва курткасининг устидан камарини қаттиқ боялаб планшетини осиб олди.

— Қани, комиссар, кетдик.

Черницов аллақачон кийиниб бўлган ва армия штабидан келган янгиликларни жангчиларга етказиш учун роталарга боришга ҳозирланиб турган эди, яхши бўлди: бу вазифани у Юрьев билан бирга бажаради.

Улар окопма-окоп, блиндажма-блиндаж юриб, взводларда сұхбат ўтказиши. Черницов ҳамма жойда, «Ёлғиз эмасмиз, армия биз билан, бутун Ватан биз билан. Энди улуғ Ватан номидан, буюк армия номидан жанг бошлишимиз керак»— деган сўзларни тақорлади.

Юрьев билан Черницов тўртинчи ротага келиб, Морозовнинг блиндажига кириши. Морозов армия алоқа

офицерининг батальонга келтирган янгиликларидан хабардор эди. Шунинг учун у батальон раҳбарларининг ўз блиндажига кириши бекиз эмаслигини тушуди.

— Лейтенант,— деди Юрьев, Морозовга жилмайиб қараб,— шайланиб тур, ротангни жуда хушчақчақ ишлар кутяпти.

— Ҳужумга ўтамиэмий?— деб ҳаяжонланиб сўради Морозов.

— Кутганимдингиз?— деб Черницов қулимсираб қўл чўэзида, лейтенантнинг қўлини маҳкам сиқди.

Нега кутмасин! Лейтенант Морозов ҳарбий формани бугун кийгани йўқ. У кадровик. Ленин номидаги ҳарбий мактабни битириб бутун ҳаётини ҳарбий хизматга бағишлаган ва Қизил Армия шуҳратига шуҳрат, қудратига қудрат қўшиш ниятида жанговар хизматга қадам ташлаган одам. Нега кутмасин!

— Кутганда қандоқ, ўртоқ комиссар!..

— Шайланиб турингиз,— деди Юрьев ва комиссар билан бирга бошқа роталарга йўл олди.

5

Морозов взвод командирларига топшириқ бергац, Вания Великанни чакирди.

— Жангчиларни тезда чўмилтириб, ички кийимларини янгилаш керак. Бунинг учун сизга З соат муҳлат бераман.

— Есть, З соатда чўмилтириб, ички кийимларини янгиляйман!

Вания Великан Морозовнинг блиндажидан ўқдай отилиб чиқдида, капитинариусга буюрди:

— Ротани чўмилтириб!

Каптинариус ҳайрон бўлиб қолди. Ротани ювинтириш учун бакларда сув иситиш, ҳаммомга неча-нечачелак сув ташиш керак. Сув оладиган жойни немислар кузатиб, ўққа тутиб турибди...

— Нега бўшашиб турибсан, блиндажни оч, кийимларни кутар,— деди старшина.

— Каёққа?

— Каёққа бўларди, ариққа. Сув иситишга вақт йўқ. Чўмилишга биринчи бўлиб сержант Тургенев бўлин-

маси борадиган бўлди. Аммо Тургенев ариқقا борилишини этишиб, тажанг бўлди.

— Жангчиларни тумов қилиб қўясан. Мени ҳам шарманда қилишинг мумкин. Бу нима қилганинг?— деб ўшқириб берди у старшинага.

Вания Великан ўз гавдасидек вазмин бўлиб турди. Сўкишни эшитиб бўлгач, Тургеневга стакан узатди:

— Мана, сенинг норманг.

— Нима бу?

— Асал. Шуни есанг тумов бўлмайсан.

— Қойил-эй!— деб юборди Тургенев.— Буни яхши ўйлапсан! Бу катта каллангнинг ичи ҳаммаси фаросат бўлса керак. Лекин совуқ сувда чўмилтириш яхши эмас.

Бўлинма жангчилари бир стакандан асал еб олгандан кейин ариқ бўйига бориб, апил-тапил ечиниб, чўмила бошладилар. Улар кийиниб бўлгач, сержант Тургенев жангчиларни саф қилди-да, Вания Великанга рапорт берди:

— Ўртоқ старшина, тайёрмиз!

— Олиб боравер!— деди старшина.

Тургенев жангчиларни взводга ашула билан олиб кетди. Бу ашулани узоқдан эшитган Юрьев билан Черников бир-бирларига маъноли қараб олишди.

— Бошланяпти,— деди Черников.

— Бошланяпти,— деди Юрьев ҳам.

Ҳақиқатан ҳам шу кун ва шу соатда жангчиларда ўзгариш бошланди. Окопларда, траншеяларда ҳам ҳарбий қўшиқ эшитилиб турди. Совет Информбюроси ҳам бугунги ахборотга: «Н» участкасида кеча ва бугун позицияни яхшилаш учун маҳаллий аҳамиятга эга бўлган жанглар давом этди, деб қистириб кетди...

Ўн еттинчи боб

ЮРАК СОҒАСИ

1

Блиндажда хат ташувчи Ласточка кўриниши ҳамон ҳамма бирданига қарсак чолиб юборди. Кимдир икки қўлини оғзига обориб, карнай қилди, чалқанча тушиб ётган жангчилардан бири қорнини дўмбира қилиб чола бошлали. Ҳар гал хат ташувчининг ротага келиши ана

шундай тантана билан кутиб олинар эди. Хат ташувчи-нинг асли номи Владимир, фамилияси Ласточкин эди. Унинг «Қалдирғоч» деган ном олиши бежиз эмас. У жуда чаққон йигит, рота жангчилари орасида ўзининг эпчиллиги, ҳамма нарсадан хабардорлиги билан ажралиб турар эди.

Тепаликка биринчи ҳаво ҳужуми бўлган куни ротанинг илгариги хат ташувчиси бомба парчасидан ҳалок бўлди. Ӯшандан кейин янги хат ташувчи тайинланмади. Чунки батальон ўз қўшилмасидан ажралиб, дала почталари билан алоқаси узилиб қолди. Шу сабабдан батальонга хат ҳам келмади, тепаликдан хат ҳам жўнатилмади. Хат ташувчи керак бўлмай қолди. Жангчилар кўп вақтгача «хат-хабарлар ҳам хат ташувчи билан бирга ҳалок бўлди шекилли» деб юришди.

Кунларнинг бирида окоп кавлаётган жангчилар олдинга Ласточкин югуриб келди. Жангчилар уни ҳеч вақт бунчалик шошқалоқ кўрмаган эдилар. Унинг юраги бўғизига тиқилиб қолганга ўхшарди. У югуриб келаётган йўлида фақат бир сўзни такрорлар эди:

- Йигитлар! Йигитлар!
- Упкангни бос, нима гап ўзи? — Тургенев сўради.
- Ҳамманг ўйинга туш! Ҳамманг ўйинга туш! — деди Ласточкин қиққириб. — Хат! Ҳаммангга хат! Бир қоп ҳаг!

Ласточкин батальон штабида постда туради. Навбати тугагач, ким биландир гаплашиб қолди. Унинг штаб атрофида айланиб юришига тепаликка қўнган самолёт сабаб бўлган эди. «Қандай янгилик келтирди бу самолёт?» — Ласточкин шу сирни билмай, дўстлар ёнига қайтгиси келмади. Бир оздан кейин комиссар уни чақириб, бир қулоқ хат топшириди.

— Учинчи ротанинг хатлари. Эгаларига топширинг, — деди Черницов.

Ласточкин йўл-йўлакай ўз номини қидириб, хатларни тита бошлади. Биринчи рота котиби ҳам бир даста хат кўтариб, унинг олдидан ўтиб қолди. Ласточкин: «Ротага сендан кейин бораманми» деди-да, қопчигини орқалаб милитигини елкасига осиб, ротага чопди.

Ласточкин ротага котибдан илгарироқ етиб келди ва қопчигининг оғзини очиб, хатларни қарағай тагига ардади. Жангчилар ўртадаги хатларни бир зумда ҳар томонга тортқилаб кетишли. Ласточкиннинг ўзига ҳам хат тегмай қолди.

— Рота, смиро! — деб қичқирди Ласточкин овози-
нинг борича.

Жангчилар турган жойларида туриб қолдилар.

— Қўлларингиздаги хатларни ўз жойига ташланг-
лар! — деб буюрди Ласточкин.

— Дарров, дарров! — деб қўшимча қилди Тургенев
ҳам.

Жангчилар тутамлаб олиб ўз номларини қидираётган
конвертларни ўртага ташлашга мажбур бўлдилар.

— Мана энди ўзим тарқатаман,— деди Ласточкин ва
жангчиларнинг номларини айтиб, хат улашди. У ўзига
келган хатларнинг конвертларидаги адресларни ўқиб,
қўйнига тиқиб қўяверди. Хатларни улашиб бўлгач, стар-
шинага қараб:— Бир оз танаффус эълон қилсангиз, йи-
гитлар хатларини ўқиб олишарди,— деди.

Старшина қофоздан кўзини ўзмай, «ўқийверишсин»
деб қўйди.

— Ростдан ҳам сен қалдирғоч экансан, Володя,— де-
ди жангчилардан бири Ласточкиннинг елкасига қоқиб,—
Ласточкин эмас, Ласточка...

Ана шу воқиадан кейин Ласточкинни 119 тепалигига
Ватандан биринчи хушхабар келтирган Ласточка — Қал-
дирғоч деб атайдиган бўлдилар ва у ўз-ўзидан хат та-
шувчи бўлиб қолди.

* * *

...Мана бугун Ласточкин яна хат олиб келди.

Уч кундан бери ёғаётган қор ҳали ҳам тингани йўқ.
Жангчилар Ласточкиннинг пўстинига ёпишган қорларни
қоқиб олишига ҳам имкон бермадилар, уни ўраб олиб,
шовқин-сурон билан миясини қоқиб қўлига бергудек
бўлдилар.

— Менга хат борми? — деди Эрали, эптикиб.

— Эзишяпти.

— Азимовга борми?

— Йўлда, келяпти.

— Менга-чи?

— Фамилиянгиз нима?

— Ҳусейн Оға ўғли.

— Эртага оласиз.

— Кимга бор?

— Комилов!

— Мен, мен! — мильтигини қўлтиқлаб бир жангчи югуриб келди-да, хатни олиб, бағрига босди.

— Игнатьев!

— Учинчи взводда.

— Бабилов!

— Жангда қаҳрамонларча ҳалок бўлган.

Ласточка бу қайгули хабарни конверт орқасига ёзиб, хатни сумкасининг ички хонасига солиб қўйди.

— Нормат Жабборов!

— У дараксиз йўқолган,— деди бир жангчи.

— Норматнинг хатини Азимовга бер,— деди Тургенев.

Жангчилар блиндажга кириб, хат ўқишга берилдилар. Вания Великан билан ёнма-ён ўтириб хат ўқиётган Истроил ундан сўради:

— Норматдан ҳеч қандай дарак йўқми-а, ўртоқ старшина?

— Дарак йўқ,— деди Великан бошини чайқаб.

— Бечора ҳалок бўлдимикин?..

— Ҳалок бўлганини ҳеч ким кўргани йўқ,— деди Тургенев.

— Асирга тушиб кетмадимикин?

— Нормат асир бўладиган йигитлардан эмас,— деди Великан.— Мен унинг пистирмада туриб бир танкни ёндириганини кўрганимдан кейин, унга бўлакча ихлос қўйдим. Ажойиб йигит у!..

— Комиссаримиз Норматни жуда яхши кўрарди,— деди печкага ўтин ташлаб ўтирган жангчи,— у Норматни тоза қидиртиряпти. Топмай қўймайди!

— Мен ҳаммадан ҳам Норматга мана шу хатни ёзган одамга ачиняпман,— деди сержант Тургенев.— У умид билан хат ёзган, энди жавоб кутяпти. Эҳтимол, бу хатда жуда зарур гаплар ёзилгандир. Мана ўзимдан қиёс. Полтавадаги қариндошларимга, Уралдаги меҳрибон отамга ёзган 13 та хатимнинг биронтасига ҳам жавоб ололмадим. Ҳозир ҳам юрагимнинг бир парчаси ўлирилиб ётганга ўхшайди.

Истроил яна гапга аралашди:

— Жангга кираётганимизда Нормат билан бир-бири мизга адресларимизни бериб қўйган эдик. Мен унинг онасига хат ёзиб юбордим.

— Нима деб ёздинг?— Тургенев сўради.

— Ўғлингиз адашиб қолган эди, келиб қолади. Хат келмаяпти, деб куйманг, делим.

— Келади. Албатта келади,— деди Великан.— Келишига ишониб, унга ҳар куни поёк қолдирияпман...

Ярим кечак... Қор бўраламоқда... Пистирмада ўтирган жангчи Дронов мудофаа линиясининг нариги томонидаги ҳаракатларни кўздан кечириб турибди. Катта арча дарахти орқасида турган немис совуққа чидолмай сакрамоқда. Иккичи немис соқчи эса арчага суюниб шумшайиб турибди. Унинг усти жуда юпун. Бошида пилотка, оёғида ботинка, эгнида эса ёзлик кўк шинели бор, холос. Дронов милтигини немисга тўгрилади-ю отмади. «Ўқ чиқарма!»— деган командир. Дронов совуқда ютиниб, ёнидаги Ҳусейн Оға ўғлига: «Нима дейсан, босмайликми фашистларни?»— деган назар билан қараб қўйди. Ҳусейн пулемётга тирсаги билан суюлганча индамай турга берди. Шу вақт Дроновга қорда ғарчиллаган оёқ товуши эши-тилди. У атрофига аланглаб қаради. Қоронғида ҳеч нарса кўринмас, аммо шарпа яқинлашаётгани сезилиб турарди. Пистирмачи қўл пулемётини жангга ҳозирлади, гранатасини тайёрлаб, шайланиб турди. У бетараф зонадан ўтиб келаётган номаълум кишининг қўлидаги милтигини кўрди-да, шеригига «ҳушёр бўл» дегандек қараб қўйди.

— Олдимиздан ўтказиб юборамиз, кейин орқасидан бориб ушлаймиз,— деб маслаҳат берди Ҳусейн.

Улар кузатиб турдилар. Шарпа дарахт панасиға ўтиб, курткасиға, шимига ёпишган музларни силкиб тушириди. Уни немис соқчилари ҳам сезиб қолдилар ва қоронғиликқа бетартиб ўқ уза бошлидилар. Номаълум киши ерга ётиб олди.

— Қизиқ... Взводга хабар қилиш керак,— деди Оға ўғли ва окопдан блиндажгача чўзилган симни тортдя. Бир неча минутдан кейин пистирма ёнида Морозов пайдо бўлди.

— Нима гап?

— Номаълум шахс, ўртоқ лейтенант!— деди ҳовли-қиб Дронов.— Ана эмаклаб келяпти!..

— Жим... Ҳозир аниқлаймиз.

Номаълум шахс пистирмага яқин келиб қолди.

— Кимсан?— деб сўради ундан Морозов.

— Мен, мен шу батальоннинг жангчиси.

— Қўлингни кўтар!

— Мен Морозов ротасиданман,— деди номаълум шахс, Морозовнинг овозини таниб.— Мен Норматман, ўртоқ лейтенант!

— Нормат!..— Морозов севинганидан қичқириб юборганини ўзи ҳам сезмай қолди.— Бошингни кўтармал Аста эмаклаб кел! Нормат!..

Қорда эмаклаб келаётган Норматга Дронов қўлини чўзди:

— Салом, Нормат! Мен Дроновман: Қела бер!.. Омонисан, дўстим?..

Нормат ротага келиши ҳамон старшиша Вания Великан уни блиндажда ечинтириб, қуруқ кийимларга ўради ва унга зўрлаб бир стакан асал егиэди.

— Еябер, исиб кетасан!.. Ия, нега оқсоқланяпсан?

— Тикан симлар тагидан ўтишда тиззамни тўнгакка уриб олдим,— деди Нормат, яраланганини яшириб,— тузалиб кетади.

Нормат қадрдон батальонига келиб, ошна-оғайнилари билан учрашаркан, севинчини юрагига сифдиролмай, жуда гапдон бўлиб кетди. У, партизанлар ҳаёти, таниш қиз Раисанинг тақдирни ҳақида узоқ ҳикоя қилди.

— Серёжа қани?— деб сўради ҳикоясининг охирида Нормат.— Серёжага алоҳида салом. Мен ундан суюнчи олмоқчиман.

— У ҳозир банд. Келади.

Лейтенант Морозов Норматнинг қўлидаги қўндоқлари ейилиб кетган эски милтиқни кўриб:

— Энди бошқасини оласан,— деди,— старшина сенга яххисини беради.

— Йўқ,— деди Нормат, милтиқни кўкрагига босиб,— буни менга партизанларнинг Отахони берди. Ёдгорлик.

— Ўзингники қани?

— Ўша куни танк янчиб кетган эди.

Нормат блиндаждан чиқиши билан уни ҳаммадан олдин Исроил билан Эмин қучоқлаб олиши, кейин Отступний бағрига босди:

— Бормисан, дўстим Нормат, бормисан? Хайрият, юзим ёруғ бўлди. Серёжа билан Великанга сўроқ беравериб чарчадим. Мана энди ўзингдан сўрашсин. Ўша куни танк орқасидан қувиб кетиб, сени йўқотиб қўйдим.

Вания Великан Норматнинг қўлидан етаклади:

— Чарчапсан, азамат, юр энди, блиндажга кириб ухлаб ол.

— Мана сенга хат,— Истроил Азимов Норматга бир нечта конверт узатди. Нормат биринчи конвертга қарашдаёт үз кўзларига ишонмади, адресни қайта-қайта ўқиди-да, таниш хушхат билан ёзилган конвертни бағрига босди.

3

Нормат уч кундан бери кўз юммаган бўлишига қарамай, хатларни олиш билан уйқуни бутунлай унутиб юборди. У блиндажда, кичкина шишадан қилинган жиччироқ ёруғида ўтириб, хат ўқиди.

Бу хат икки ойдан бери Норматни қидириб юрган эди. Она нуридийдаси ва жигарпораси Норматни жуда соғинганини, айниқса, ундан бир неча ойдан бери хат келмаётганидан ташвишда эканини ёзган эди. «Қовун пишди, анор қизарди... Сенга атаб қўйган узумларим халта ичиде шира боғлаб ётибди...» деган сўзларни ўқиркан, Норматнинг кўз олдида туғилиб ўсган қадрдан қишлоғи жонланди. Канал бўйлари, янги очилган қўриқ, у ердаги дашт бригадаси хаёлидан ўтди. Она дашт бригадаси тўғрисида «пахтаси жуда мўл бўлди, териб улгу-ролмаяпмиз» деб ёзибди.

Нормат бир оз ширин хаёл сургандан кейин, яна ўқиди:

«...Бозоров деган гўрсўхта Адолатга кўз олайтириб юрибди...»

Норматнинг бутун вужудини қалтироқ босди ва кўз олдида аллақандай пилдироқчалар пайдо бўлиб, кўзи тинди. Аммо у ўзини босиб олди. Шунда унинг хаёл боғида яна Адолатнинг чеҳраси кўринди. Конверт ичиде япа бир мактуб бор эди. Мактуб қизларга хос хушхат билан ёзилган, аммо жуда қисқа эди. Нормат Адолатнинг хатини таниди. У, севикли қиз мактубининг ҳар бир ҳарфини асал ютгандек ютиб ўқиди. Адолат хатида: «Сиздинг йўқлигингизни билдиримаяпмиз» дебди. Бу сўзлар Нормат юрагини тўлқинлатиб юборди. Бу — севимли қизнинг жангчи ёрига рапорти эди. Мактубнинг охиридаги: «Сиздан бошқани ёр демайман...»— деган сўзлар бутун бир ишқ достонининг мазмунига тенг эди Нормат учун.

Конвертдан Адолатнинг яна бир хати чиқди. Бир тахта қоғозга ёзилган бу хатнинг фақат боши билан охирин

қолган әди. Хатнинг сатрлари қора сиёҳда жуда усталик билан ўчириб юборилган. Шу тоқ Нормат ҳарбий дала почтасига бориб, цензорлар билан еқалашгиси, хатимни түлаб бер, деб даъво қилгуси келди. Лекин ноилож. Адолат нима демоқчи экан-а, бу ўчирилган мисраларда?

Нормат борлық күз нурини түплаб, қора сиёҳда ўчирилган сатрларга тикилди, лекин хатдан юлиб ташланған сўзларни ўқий олмади. Унинг ташвиш оловига мактубдан ўчирилмай қолган қуйидаги икки мисра байт сув сепгандай бўлди:

«Хат кутиб жонимда қолмади тоқат,

Бир кўрмоққа хумор бўлди Адолат!»

«Айб ўзимда,— деди Нормат кўкрагига муштлаб,— кейинги вақтда хат ёзолмадим. Мени ҳар қанча койиса арзиди!»

«Бир кўрмоққа хумор бўлди Адолат...»

Демак, у мени кутяпти. Мен унга тасалли беришим керак, ҳеч бўлмаса илиқ сўзим, қайноқ юрагим ҳарорати етиб борсин унга!

Нормат қўлига қалам олиб, юрагидаги оташ туйғуларини қофоз бетига тўқди:

«Салом, жоним Адолат!

Мен сизга ўрмон ертўласида, жанг майдонининг қоқ ўртасида туриб ёзяпман. Сизнинг вафоли сўзларингиз мени ҳамма нарсага ҳозир нозир қилди. Сиз учун, сизнинг бахtingиз ва сиз яшаган боғ-роғларнинг янада гуллаши учун бу жойларда жанг қилмоқдамиз. Кишиликнинг душманларини ер билан яксон қилиб, сизнинг ҳузурингизга соғ-саломат етиб беришга аҳд қилганмая.

Агар бўлсанк иккимиз ҳам саломат.

Умр бўйи сақланур чин муҳаббат!..»

Хат конвертга тушаётганда, Нормат унинг окирига яна икки сатр шеър ёзиб қўйди:

«Мен кўз тутган каби, сиз ҳам кўз тутинг,

Адолатхон, кутинг, чарчамай кутинг!»

4

Жинчироқ блиндажни хира ёритиб турибди. Нормат кўзини хатдан олмайди. Унинг ёнида ўтирган Тургенев эскириб кетган қандайдир қўлланмани ўқимоқда. Эрали ўтирган еридан сурилиб келиб, Тургеневни елкаси билан туртди.

— Ўртоқ сержант,— деди Эрали Тургеневга қараб.

Тургеневнинг ғаши келди:

— Ҳалақит берма, ўқияпман.

— Ўртоқ сержант,— деди Эрали яна бир оздан кейин, унга нимадир демоқчи бўлиб. Сержант ўшқириб:

— Нима дейсан? Етиб ухласанг-чи, ҳализамон постга борасан,— деди-да, ўқишида давом этди.

— Озгина оқ қоғоз беринг.

— Қоғоз йўқлигини билиб туриб сўрайди-я бу...

— Хат ёзмоқчи эдим.

— Йўқ дегандан кейин йўқ! — сержант тескари қараб олди.

Эрали сержант Тургенев ўқиётган китобчадан икки кўзини узмаяпти. Бу китобчанинг биринчи варағида анча оқ жойи бор бўлиб, Эрали ундан умидвор эди.

— Қўлингизда турибди-ку, нега қизғанасиз?.. — деди Эрали ёпишқоқлигини қўймай.

— Мана, буни қара,— деди Тургенев ва китобнинг муқовасини очиб кўрсатди. Унинг биринчи бетида чиройли қилиб «сержант Тургеневга эсадлик учун» деб ёзилган эди.— Йиртиб бўладими шуни? Бирорта хатнинг орқасига ёза қол.

Гапга Дронов аралашди:

— Мен ҳам орқасига ёзиб юбордим.

— Уч ойда битта хат олдиму буниям қайтариб юбордими? — деб Эрали Тургеневга эътиroz билди.— Кўкрагимни иситиб, белимни баққуват қилиб турган хатни-я? Хотинимдан хат йўқ. Онанинг хатини хотинга юбориб бўлмайди..

— Бошқа иложинг йўқ.

Эрали чўнтағидан эскириб кетган хатни олиб очдида, гўё у билан видолашаётгандек бошқатдан ўқиди...

— Очиқ жойи йўқ. Орқасига ҳам ёзилган.

— Бу ёққа бер-чи, кўрамиз.

— Неча марта кўргансан, келган куни кўрсатдим-ку,— деди Эрали, қават-қават қилиб букланган хатни сержантга узатаркан.

Ҳақиқатан ҳам хат катак дафтарнинг бир варағига ёзилган бўлиб, иккала бетида ҳам очиқ жой йўқ эди.

— Мана, кўрдингми, очиқ жойи йўқ.

— Сатрларнинг орасига ёзавер, дўстим,— деди мильтиқ тозалаб ўтирган Нормат, затворга юпқа қилиб ёғ суртаётниб.

Эралига келган хат йирик ҳарфлар билан ёзилган ва унинг баъзи жойлари қора сиёҳ билан ўчирилган бўлишига қарамай, сатрлар орасида бир йўллик жой қолган эди. Эрали шу жойга майда қилиб ёзмоқчи бўлди-ю, лекин уруш бошлангандан бери зўрға олган биттагина хатни қайтариб юборишга сира кўзи қиймади. У бу хатни ҳар куни неча марта ўқир ва ҳар ўқигандан ундан қандайдир янги маъно топгандек ва ўз ютидаги қадрдонлар билан гаплашаётгандек бўларди. Аммо Эрали бошқа илож тополмай, севимли онадан келган хатнинг ораларига кичик ҳарфлар билан ёзишга мажбур бўлди. У хат ёзишга шундай берилиб кетган эдики, жинчироқдан бурқсаб чиқаётган қуюқ тутун унинг оғзи-бурнига кириб, юзини қорайтириб юборганини ҳам сезмади.

— Ласточка!

— Ура! Почтальон!

Блиндажга шамолдек учиб кирган Ласточка елкасидаги қопчигини пекканинг олдига қўйишга улгурмасдан туриб, жангчилар уни ўраб олишди.

— Ҳаммага бор! Ҳаммага заказной! — деди хат ташувчи ва унинг атрофини ўраб, қопга кўз тикиб турган жангчиларга қаради: — Қани, ҳамманг ўйинга туш! — у қопни очмай, тепасига ўтириб олди. — Ўйинга тушмаганга ҳеч нарса йўқ!

— Блиндаж тор, ўйнаб бўлмайди, — деди Тургенев, — тарқата бер, кейин ўйнаб берамиз.

— Яхши ўйинчи битта ғиштнинг тепасида ҳам ўйнай беради.

— Кимга қанақаси чиқса, ўшанга қараб заказ қиласан, — деди Нормат ва қўлинни чўзди. — Ке, ошнам, қопни оч!

Ласточка, қопни очиб, ичидан халтачалар ола бошлиди.

— Тургенев!

— Мен, Тургенев!

— Мана, сенга, — деди ба халтача устидаги ёзувни ўқиди: — «Энг яхши жангчига»

Сержант совға халтасига қўл чўзган эди, Ласточка яна қистади:

— Ўйини қани, ўйини?

— Шошма, эҳтимол бу менга эмасдир.

— Сенга! Бу халталарни комиссарнинг ўзи тақсимлади.

— Ўйна, ўйна! — дейиши жангчилар.

Тургенев кафтини ишқалаб, икки құли билан камарини тортиб, гимнастёркасими тузатди ва чечетка ўйнай бошлади. Жангчилар давра қуриб олиб, қарсак чолдилар.

Почтальон Тургеневга совға берганидан кейин, Дроновни чақирди-да, «Нотаниш жангчига...» деб ёзилган түгунчани күрсатди. Дронов ҳам құлларини тиzzаларига уриб, ер депсиниб, икки марта «циганочка молодая...» деб такрорлади ва халтани олиб, чироқ олдига кетди.

— Нормат Жабборов!

— Лаббай!

— Қани, ўйна, сенинг ўйинингни ҳам күрайлик!

Нормат умрида ўйнуга тушмаган эди, ҳозир ўртага тушиб айланыётганига ўзи ҳам ҳайрон бўлди. Жангчиларнинг қарсаги остида, у құлларини қарсиллатиб, шўх-шўх ер тепиб ўйнади, құллари билан қошларини қимирлатиб, Ласточекага қараб мақом қилди:

— Саргардонини узат!

Ласточка унинг бу мақоми ва саргардон талаб қилишини бошқача тушунди: «Мени ҳам ўйинга таклиф қиляпти, шекилли бу йигит» деб, қопни ташлади-да, ўртага тушди. «Русская пляска» зарбида ўйинга тушди-да, кейин Норматнинг совғасини узатди.

Блиндаждагиларнинг ҳаммасига ҳам халтача, түгунчалар улашилди. Ласточка фақат Крупенъянинг номини чақирмади. Крупенъя бир чеккада хомуш ўтириб қолди.

— Крупенъя!

— Мен, Крупенъя,— деди у, ўриндан иргиб тураркан.

Крупенъя фронтга келгандан бери ҳеч кимдан хат олмас, ҳеч кимга хат ёзмас ва ҳеч кимдан хат кутмас эди. Унинг юрти немислар қўлида қолган...

— Мана сенга, отангдан.

— Ҳазиллашма! — деди Крупенъя ва аллақандай мудҳиш фожиани эслагандек, юзи ўзгариб кетди.— Отамни немислар ўлдириб юборган. Ҳақоратлама мени...

— Бу совға чиндан отангдан. Мана қара: «Фронтдағи ўғлимга!» деб ёзилган. Сенинг отангдан бу!

— Ол! — деди сержант, иккиланиб турган Крупенъяга.

— Олавер!— деди Нормат ва дўстлари уни қиста·
гандан кейин халтачани олди.

— Оча бер, Крупенъя, кўрайлик-чи, отанг сенга ни·
малар юборибди.

Крупенъя халтачани очди. Унинг ичидан бир шиша
атир, ироқи совун, устара чиқди.

— Хати ҳам бор экан,— деди халтачадан кўз олмай
турган Нормат.

Крупенъя хатни олиб очаркан, қўллари қалтираб,
қоғоз ҳам шалдираб кетди.

— Ўқи! Ўқи-чи!— деб туриб олишди жангчилар.

Крупенъя номаълум отанинг меҳрибонлигидан қат·
тиқ таъсирланиб, кўзлари ёшга тўлди. У хатни юти·
ниб-ютиниб ўқиди.

«Салом, ўғлим!— деб бошланарди хат.— Эҳтимол,
сен жангдан шу соатда келгандирсан, эҳтимол, жанг·
га бораётгандирсан, эҳтимол, окопда ота-онангни со·
ғиниб ўтиргандирсан... Менинг шу арзимас совғамни
қабул қил!..»

Крупенъя бир нафас ўқишидан тўхтаб, кўзларини
юмди. Унинг хаёлида бу хат ўз отасидан келгандай,
хатдаги сўзлар ўз отасининг сўзларига ўхшарди.
Унинг қулоғига ўз отасининг овози эшитилгандек бўл·
ди: «Немиснинг йўлини тўс! Уни Москвага ўтказма!»

— Хўш, хат отангдан эканми?— леб сўради Лас·
точка.

Крупенъя бу саволга жавоб қайтармади ва ўқиша·
давом этди:

«Мен 72 ўшдаман, пенсионерман. Лекин, уч ой бўл·
ди, яна заводга ишга қайтдим. Гитлернинг тезроқ яи·
чилишини истайман.

Отанг Иван Петрович Иванов, Москва «Серп и Мо·
лот» заводининг мастери».

— Отам!— деб қичқириб юборди Крупенъя ва хат·
ни бағрига босди.— Отам!

Тургенев халтасини очди: ўрик, ёнғоқ, майиз, магиз...

— Ура...а!— деди Тургенев.

— Нима экан?

— Буни қара,— сержант халтачадан шойи рўмолча
олди. Унинг ҳошиясига: «Ушбу рўмолча ғалаба йўли·
нигизга поёндоз бўлсин» деган сўзлар қизил ипак билан
тиқилган ва тагидаги имзо ўрнига «ЎзССР» деб ёзиб
қўйилган эди.

— Ажойиб халқимиз бор-да...— деди Тургенев, шои рўмолчанинг чиройли гулларига тикилиб.— Аммо хати йўқ экан...

— Сеникida нима бор экан?

— Колбаса...— деди Нормат, халтачани ағдариб.— Ия, чекушкаси ҳам бор экан!..

Нормат халтачадан ароқ билан колбаса олиб ўртага қўйди-да, шишанинг оғзини очди.

— Келинглар, ичамиз.

Нормат дастурхон ўрнига ерга ёзган плашч-палатка барча халталардан олинган совғалар билан тўлди. Нормат ароқни стаканларга оз-оздан қўйди.

— Ўзлари ҳар жойда бўлса ҳам, кўнгли бизда бўлганлар учун ичамиз!— деди Нормат ва биринчи бўлиб қадаҳ кўтарди.

Сержант Тургенев ароқни қўлига олиб:

— Мен, фашистларни Москва бўсағасида ерга кўмиш учун ичаман!— деди.

Ҳамма бир-бир қадаҳ айтиб, ўз кўнглидаги муддао учун ичди.

— Раҳмат, эл-юртимиз бизни унутмайди!— деди ҳаяжонланиб Нормат.

— Унутмайди!— деди Тургенев.— Совет халқи ўз фарзандларини асло унутмайди!

Ўн сакказинчи боб

ЖАНГ

/

Грейдер паром-кўприкни қайтариб олиш учун бир неча марта уриниб кўрди-ю, улдалай олмади. Юрьев батальони қаттиқ қаршилик кўрсатди, партизанлар ҳам икки ён бошдан ўт очиб турдилар. Грейдер, ниҳоят, Дашковка атрофидаги ўрмонларга отряд юборишга, ўз қанотларини мудофаа қилишга мажбур бўлди. Хуллас, унинг ҳужум ўти сўнди. Грейдернинг ёрдамчи куч сўраб берган телеграмма, радиограммаларга турлича ноаниқ жавоблар келди. Шу сабабдан Грейдер мадал келиб, кучлар нисбати ўзгаргунча ҳужумга ўтмай туришга қарор берди.

Юрьев Грейдернинг бу тактикасига тезда тушуниб олиб, унинг қисмларига тез-тез ҳужум қилиб турди.

Бугун тунда партизанлар Варшавка йўлидан немис олий офицерлари ўтишини хабар қилдилар.

Кечаси соат 3 да Куценко взводида тревога эълон қилинди. Взвод дарҳол сафга тизилди. Старшина жангчиларга икки яшик ёндирувчи шиша ва бир қутидаи гутурт тарқатди.

Взвод тепаликдан тушиб, дараҳтлар ораси билан Варшавкани кесиб ўтди. Катта йўл жимжит эди. Фақат узоқдаги паром пристани атрофида немис патруллари юрар, паромнинг икки томонида икки танк турарди. Немислар неча марта уриниб, паром-қўприкни юрьевичлардан қайтариб ололмагач, тепаликдан бир неча километр шимолда дарёдан паром тўхтайдиган жой тайёрлаган ва бу ерга янги йўл қуриб, уни Варшавка билан улаган эди. Бу янги кечув ҳам икки марта ҳужумга учраган, немислар уни танклар билан қўриқлашга, икки томонига дзотлар қуришга мажбур бўлган эдилар.

Куценко шу ерга яқинлашганда взводни уч группага бўлди. Биринчи группани Варшавкадан янги йўлга буриладиган жойда қолдирди; иккинчи группани янги йўлнинг қайинзор участкасига юборди; учинчи группа буларнинг ўртасида резерв бўлиб қолди. Взвод командири бу группага «керак бўлса ўқ отиб, ҳужумчи группаларга ёрдам қилиш» вазифасини топширди.

Куценко жангчиларни энди жойлаштириб бўлган эди:

— Уртоқ командир, соқчилар,— деди, унинг ёнида ётган Азимов.

Паром томондан, янги йўлдан икки солдат келарди. Улар кўк плашч-палаткага бурканиб, оёқларини иситиш учун бўлса керак, ер тепиб, бир-бирларини туртишиб келардилар.

— Уртоқ командир, отайми?

— Йўқ,— деди Куценко,— ўтказиб юборамиз.

— Нима учун ўтказиб юборамиз?

— Бизга енгил машина керак,— деди Куценко.

Соқчилар пистирмага юз метрча қолганда, алла-қандай шарпа сездилар шекилли, автоматдан ўрмонга қараб ўқ ота бошлидилар...

— Бизни кўриб қолдилар шекилли,— деди Нормат Куценкога.— Отайми?

— Йўқ! Шошилма!

Соқчилар автоматдан бир сидра ўқ узиб бўлгач, яна плашч-палаткага бурканиб, Варшавка томонга юрдилар.

— Калт¹! — деди биттаси, плашч-палатка билан бурнини артиб.

— Зер калт²! — деди иккинчиси ва ер телиб елкаси билан шеригини турта бошлади.

Немислар окопга рўпара келгач, Нормат ётган еридан сакраб туриб, мильтик қўндоғи билан биринчи немиснинг бошига урди. Немис ганграб йиқилди, плашч-палаткасига ўралиб, бўйнидаги автоматининг учи ерга санчилиб қолди. Нормат мурданинг оч биқинига тепди:

— Ўз кафани ўзи билан...

Иккинчи соқчи тили калимага келмай, қўлларини кўтарди. Унинг кўзлари косасидан чиқиб кетаётган даражада безовта, қўрқувдан юзи оплоқ оқарган, ҳайкалдек қотиб турарди. Нормат уни ҳам қўндоқ билан урмоқчи ва бирйўла икки ўликни ўрмонга судрамоқчи эди, Куценко уни шаштидан қайтарди.

— Штабга олиб бор! — деб буюрди Норматга командир.

— Юр! — деди Нормат, немисга мильтик учи билан йўл кўрсатиб.

Немис қўлларини баланд кўтарганча, Нормат кўрсатган томонга юрди. Нормат уни Варшавка йўлидан ҳайдаб, ўрмонга кириши билан, немис нималарни дирвалдирай бошлади. Нормат унинг тилини тушунмас ва фақат «Хенде хоҳ!» — деб, мильтик найзасини ёвнинг кураклари ўртасига ботирарди.

— Юр! — дер эди у. — Хенде хоҳ!

Асир ўрмондаги чуқурликларга рўпара келгач, яна тўхтади. «Мени шу чуқурликда отиб ташласа керак» деб ўйлади шекилли, яна ялина бошлади.

— Хенде хоҳ! — деди Нормат, овозини кўтариб.

Немис қўлларини яна баландроқ кўтарди.

Шу маҳал орқадан қаттиқ отишмалар эшитилди, Нормат ўқ товушлари келаётган томонга қарashi билан немис жон-жаҳдида Норматнинг мильтигига ташланди ва уни тортиб олмоқчи бўлди. Нормат унинг тумшуғига бир калла урди. Немис тилини тишлаб, оғ-

¹ Калт — (немисча) совук.

² Зер калтъ — жуда совук.

зи-бурнидан қора қон келди-да, ерга думалаб тушди. Нормат унинг камарини ечиб олиб қўл-оёғини чамбарчас қилиб боғлади-да, ўзи Варшавка йўлига югурди. Отишмалар борган сари кучаярди. Тепаликдаги батз-реялар ҳам тилга кирди. Йўлда Куценко билан Исройл кимнидир гандираклатиб икки қўлтиғидан суяб келардилар.

— Ким бу? — деб сўради, уларнинг рўпарасидан чиққан Нормат.

— Офицер,— деди Куценко.

— Менга беринг,— деди Нормат ва ярадор немис офицерини опичлаб тепаликка, ўрмон томонга югурди. Офицер қўл-оёқларини қимирилатиб, унинг қўлидан чиқмоқчи бўлган эди, Нормат унинг биқинига муштлабди. Офицер питирлашдан тўхтади.

Ярим соат ўтар-ўтмас, Нормат немис офицери билан солдатини батальон штабига келтириб топширди.

Асир офицерни капитан Юрьевнинг ўзи сўроқ қилди. Сўроқда маълум бўлишича, у обер-лейтенант бўлиб, генерал Брук штабидан бронетранспортёрда армия корпусларидан бирининг штабига муҳим топшириқлар олиб кетаётган экан. Бронетранспортёр Варшавкадаң қайрилиши ҳамон, Тургенев билан Дронов отган ёндирувчи шишаларга учраган. Улар бу офицерни ёнаётган бронетранспортёр ичидан тортиб олганлар. Унинг қўриқчиларини отиб ташлаганлар.

Обер-лейтенант капитан Юрьевнинг кўп сўроқлари-га жавоб бермади. Аммо капитаннинг:

— Генерал Брук армияси қаёққа кетяпти? — леган саволига сурбетлик билан:

— Москвага! — деди.

— Ким уни Москвага киритармиш? — деди Юрьев кулиб.

— Ўзимиз кирамиз! — деди, парво қилмай обер-лейтенант. — Москвага бизни Фюрер олиб киради. Эртага сиз ҳам бу ерни ташлаб кетасиз!

— Фюреринг чучварани хом санаяпти, — деди Юрьев ғазабланиб. — Москвага кириб бўпти! Москва осто-насига қўймамиз ҳаммангни!

Сўроқ шу билан тугаб, Юрьев обер-лейтенантни блин-дажга қамаб қўйиш тўғрисида буйруқ берди ва немис обер-лейтенанти қўлга тушгани ҳақида рация орқали армия штабига хабар қилди. Кечқурун соат 22 да кел-

ган «У — 2» самолёти немис офицерини қўмондон иҳтиёрига олиб кетди.

Обер-лейтенантнинг армия штабидаги сўроқда айтганларига қараганда, Гитлер герман қўшинларига: «6 ноябргача Москва олинсин! Ҳар қанча бўлса ҳам жон ва ҳар қанча бўлса ҳам қон аялмасин!» деб қатъий буйруқ берибди. Фюрер «7 ноябряда Москва Қизил майдонида учинчи империя қуролли кучларининг парадини ўтказиш» тўғрисида ҳам буйруқ берибди. «Парадни ўзим қабул қиласман!» депти у. Баъзи мамлакаг радиоларининг хабарларига қараганда, ефрейтор Гитлер Москва парадида киядиган формасига конкурс ёълон қилибди. Унга ҳар ким ҳар хил маслаҳат берибди. Генералитет унга Гросс-Фюрер «эс-эс» формасини лойиқ топибди. Фашист партияси арбоблари, айниқса Розенберг бунга қарши чиқиб, «Гитлер Фюрерлик формасида чиқсан» дебди. Геббелъс ҳам шу фикрни қувватлабди... Гитлер тарихчиларни чақириб: «Искандар Зулқарнайн Россияга ва Осиёга қандай формада кирган?» деб сўрабди.

— Бошида тож, қўлида шамшир билан,— дейишибди тарихчилар.

— Наполеон Москвага қандай кирган?

— От устида, ўт ичиди кирган...

— Масала ҳал!— деб қичқирибди Гитлер тарихчиларнинг сўзини кесиб.— Мен танк устида, «Ферденанд» устида кираман; қўлимда қилич, оғзимда ўт билан кираман. Зулқарнайн билан Наполеон қилолмаган ишни мен қиласман, улар эголмаган халқни мен эгаман, қираман!— депти.

Куценко взводни тўплаб, ана шулар ҳақида гапирмоқда эди.

— Саволим бор,— деди Нормат.

— Марҳамат.

— Ўша тарихчиларнинг ўзи тарихни билмас экан.

— Бу савол эмас, жавоб.

— Саволим ҳам бор. Саволим шуки: ўша тарихчилар Наполеоннинг Москвадан чиқиб кетишдаги формасини айтишмалтими? Наполеоннинг Москвадан иштонсиз қочганини айтишмалтими? Гитлерга худди ана шу форма ярашмасмикин? Шуни сўрашмалтими ўша тарихчилар?

— Гитлер ўзини «Танк устидаги худо» деб юрган эмиш,— деди Куценко.

— Чўлоқ ефрейтор ўзини лашкар боши Наполеондан ҳам юқори қўйибди да? — деди кулиб сержант Тургенев.

Куценко унинг гапига эътиroz билдири:

— Йўқ, йўқ, Наполеон арслон бўлса, Гитлер мушук: мушукнинг ҳам чиллашири...

Жангчилар қийқириб кулиши.

— Чиллашир мушук Москвада парад қабул қилгиси келиптими? — деб Эмин Ражабов гап отди.

Унинг саволига Норматнинг гапи жавоб бўлди:

— Гитлер ҳам бир олақарға да, қагиллайверади. Ким уни Москвага киритади?

— Албатта киритмаймиз! — деди Куценко. — Биз Ватан посбонимиз, Москва посбонимиз!

Куценко взводи 119 тепалигидан анча узоқда, эски немис паром-кўприги олдида ротанинг чап қанотини мудофаа қилмоқда. Лейтенант Морозов иккинчи взводни чап қанотга қўяётиб, бу участкага алоҳида эътибор қилиб, қўшимча «Максим» пулемёти билан 10 та граната беришни ҳам буюрди.

— Маҳкам бўл! — деди унга Морозов. — Обер-лейтенантнинг фронт штабидаги сўроқда айтишига қарандар. Грейдер эрталаб ҳужумга ўтиши керак. Унинг асосий зарбаси сенинг взводингга тушади.

— Жой-жойларингизга борингиз! — деди Куценко жангчиларга.

Солдатлар окопларга тарқалиши.

3

Лейтенант Морозов айтганидек, Грейдернинг роталари ҳужумни тўртнинчи ротанинг чап қанотидан бошлиди.

Артиллерия отишмаларидан кейин, фашист тамғали қора танклар қайилма ёнига келиб, ҳар томонга ёйила бошлиди. Шу чоқ тепаликдаги танкка қарши тўплар зирҳтешар қуроллар тилга кирди. Ўт очиш позицияларини эгаллаётган танкларнинг бири ўз ўрнида тириллаб айланиб сўнгра қимирламай қолаверди. Унга артиллеристларнинг снаряди тегдими, ёки Куценко взводининг зирҳтешар ўқлари тегдими — буни Нормат унча пайқаёлмади. Отишмаларнинг даҳшати ва моторларнинг шовқини остида ҳеч нарса эшитилмаганидек, юз

метр нарироқда нима ҳодиса бўлаётгани ҳам маълум эмас эди.

— Мина майдонлари энди иш беради! — деб қичқирди Тургенев.

Мудофаа районининг чор атрофига танкка қарши миналар, фугаслар, пиёда аскарларга қарши портловчи моддалар қўйилган эди. Энди ҳеч қандай танк окопларга яқин келолмайди. Фақат мина майдонларига душман сапёрларини яқинлаштирмаслик керак. У жойда тўхтаган танкларни чи? Уларни ёндириш лозим! Акс ҳолда, у танклар душманинг кичик қалъасига айланishi ва кейинчалик тепаликдан ғарбга қараб юриш бошлаган батальонни ўққа тутиши мумкин.

— Тургенев! Жабборов! Танкларни ёндиринглар! — деб қичқирди Куценко.

— Есть! — деб олдинга эмаклади Нормат.

— Есть! — деди Тургенев ва қўйини гранаталарга тўлдириб Нормат билан ёнма-ён сургала бошлади.

— Шишаларни эҳтиёт қил, Жабборов! — деб Куценко Норматни огоҳлантирди.

— Хўп бўлади, ўртоқ Сержант.

Тургенев билан Нормат биринчи танкка яқинлашганиларида порохлар тутуни шу атрофдаги ҳавони қоплаб олган, ҳеч ерни кўриб бўлмасди. Занжирили фидираклари узилиб, парча-парча бўлиб ётган танк учинчи взвод позициясини пулемётдан ўққа тутиб турарди.

Жангчиларимиз танкка яқинлашиши билан, немислар уларни ўққа тута бошлади. Шу вақт танкка 119 тепалигидан ўқ ёғдирилди.

— Бу нима гап? — деб бўғилди Тургенев. — Бизниш шу ёққа келганимизни-ку билишар эди... Куценко бизни ўзи юбориб, нега ўзи ўққа тутдиряпти?

— Ет! — деб бақирди Тургенев Норматга. — Жаҳаннам бошланяпти, ёт!

Шу вақт отишмалар яна кучайди. Ҳамма ёқни шовқин-сурон, бақириқ-чақириқ босиб кетди.

— Ўзингни четга ол! — деб қичқирди яна Тургенев ёнбошида эмаклаётган Норматга ўгирилиб. — Ҳозир мана бу пўлат қалъани портлатаман.

Нормат орқага тисарилди.

Тургенев танкка ўн метрча қолганда, қўлидаги шишани танк тагига иргитди. Шиша танкнинг биқинига

тегиши билан парчаланди ва унинг ичидан алана кўтарилиди. Танк ўт олиб, ловуллаб ёна бошлади, унинг экипажи ташқарига қочиб чиқа бошлади, аммо Тургенев автоматдан ўт очиб, ўт ичидаги немисларниң ўлимини осонлаштириди.

— Нормат! — сержант чап ёнига қаради. Нормат кўринмади. Унинг нариги ёнида турган танк ҳам кўринмади.

— Нормат!

Нарироқдан келаётган иккинчи эшелон танкларни кўргач, Тургеневниң ташвиши яна кучайди. «Нормат қани? Наҳотки...» Шу чоқ мина майдонида ялт этиб Норматниң қораси кўриниб қолди. Нормат мина майдонида эмаклаб юрган эди. Тургенев тутоқиб кетди.

— Мина! Қоч... Мина!.. — деб қичқирди у.

Нормат Тургеневга қараб, кулиб эмаклаб келмоқда эди.

— Нега ўзбошимчалик қиласан?

— Уни қара, қочиб қутулмоқчи...

Сержант нарироқдаги танк алангасини кўриб, бир оз ҳовуридан тушди. Аммо яна икки танк кўринди. Душманнинг янги атакаси бошланди...

— Қайт, Нормат! — деди Тургенев. — Фақат менинг орқамдан юр!

4

Душманнинг иккинчи атакасидан кейин, Күценко взводи орқага чекиниб, тепаликдаги окопларга ўрнашди.

— Самолёт! — деди Дронов.

Самолётлар бу сафар анча баланд учиб келди. Сиреналар чинқириб, қулоқларни қоматга келтирди. Биринчи бомба тушиши биланоқ, ердан қуюқ тўзон кўтарилиди. Кейинги бомбалар чийиллаб, ерга бирин-кетин гурсиллаб тушиб, даҳшат билан портлай бошлади.

Күценко самолётларга ўт очишга команда берди:

— Огоны! Огоны!

Бутун взвод ўт очди. Окоплар ичидан дарахтлар оша алана кўтарилиб турди.

Дарахтлар устида окопларга мўралаб юрган бир штурмчи самолёт калта-калта тутун чиқариб, бирдан ёниб кетди ва тумшуги билан ерга санчилди.

Куценко бу самолётга кимнинг ўқи текканини билмай қолди, эҳтимол, зенитчиларнинг снаряди, эҳтимол, окоплардан отилган ўқлар теккандир. Ҳар ҳолда, унинг рӯпрасида бир немис самолёти куйиб ётарди.

Окоплар тепасида иккинчи самолёт айланга бошлади. Шу маҳал Куценко танкка қарши қурол овозини эшишиб орқасига қаради-ю, Вания Великанни кўрди.

— Великан! Нима қиляпсан?

Великан, портлаган бомба шамолидан калласи узилган ПТР чининг қуролини олиб, уни синган арча тўнгагига ўрнатаётганини ва ундан самолётларга ўқ узаётганини кўрган Куценко шодлигидан:

— Офарин!— деб қичқириб юборди.

— Кўрдингизми?— деб Великан куяётган самолётга ишора қилди-да, яна ҳавога қаради.

— Пиёдалар!— деб қичқирди Дронов.

Унг томондан танклар паноҳида немис солдатлари келаётганини кўрган Куценкога Грейдер бутун кучларини шу тепаликка ташлаётганга ўхшади. Бутун бир полк, ҳатто дивизия шу тепаликка келаётгандек туюлди унга.

5

Учинчи атака соат 4 дан 32 минут ўтганда бошланди.

— Фриц бугун ҳамма режасини бузиб юборди...

Урушнинг биринчи қунидан бери немисларнинг жанг жадвалини ўрганиб юрган Дронов бугунги жангда уларнинг жадвали ҳам, тактикаси ҳам бутунлай ўзгарганини кўриб таажжубланди. Бугун фашистларнинг қонга тўлган кўзлари катта талафотни кўрмади, ёки кўрса ҳам, бунга нечундир эътибор қилмади. Тепалик остонаси техника гўристонига айланди. Уликларнинг ҳам сонсаноғи йўқ. Уст-устига ҳужумга ўтган немислар тепалик остонасида, мисоли денгизга ғарқ бўлгандек, қора тупроққа чўкиб кета бердилар. Немисларнинг янги-янги сафлари кўринар ва ўтга учраб ётиб қоларди, яна янгилари пайдо бўлар ва яна тепаликдан ёғаётган аланга ичилади ғарқ бўларди.

— Немиснинг тухуми оғзиға тиқилиб қолди,— деди Нормат.

— Ҳаммаси маст,— деди Эмин Ражабов.

— Тўғри, ўликларнинг оғзидан ҳам ароқ ҳиди келяпти,— деб Крупенъя Эминнинг сўзини қувватлади.

— Қара, қара, уларнинг тутдек тўкилишини қара!..

Шу чоқ бир неча немис солдати тепаликка ўрмалаб қолди.

— Диска!— деди Эмин қичқириб.— Диска!

Крупенъя орқага қараб, патрончи Истроил Азимов взводнинг нариги қаторида ўқ улашиб юрганини кўрди. Фурсат зиқлигини кўрган Дронов окопма-окоп бориб, тайёр дискларни келтирди.

Эмин Ражабов дискасини тўлдирап экан, азбаройи қизишиб кетганидан, шинелини ечиб ташлади-да, немисларни ўққа тутди. Бир неча немис ер тишлаб қолди.

— Диска!— деб қичқириди яна Ражабов.

Патрон пунктидан жавоб бўлмади. У ерга Крупенъяning ўзи югурди. Крупенъя патрон пунктига боргандা патрончи Азимов ўқлар яшигига ёлишиб ётган эди. Унинг бир қўлида диска ва иккинчи қўлида патрон... У пулемёт дискасига сўнгги патронни солишга улгуролмай қолибди... Крупенъя уни яшик устидан кўтариб олди ва снаряд ғажиб кетган, дараҳт остига ётқизиб, устига шинель ёпиб қўйди...

Истроил Азимовнинг ҳалок бўлгани ҳақидаги қайгули хабар бир онда офииздан-офизга ўтиб, барча жангчиларга маълум бўлди.

Нормат ўз ҳамқишлоғининг мурдаси устида сукутга чўмди.

— Истроил Москва учун жон берди,— деди Нормат, ёш тўла кўзлари билан ватандошига тикилиб.— Унинг номи яшайди!

6

Кечки пайт иккинчи рота ҳам тепаликка чекинишга мажбур бўлди. Жанг 119-тепаликдаги околларда давом этди.

— Байроқни келтиринг!

Юрьев батальоннинг жанговар байроғини олдинги позицияга келтириш ҳақида бўйруқ берди.

Байроқни энг аввал жанг майдонида кўрган лейтенант Морозов: «Рота смиро! Байроққа юз ўгир!» деб команда бергиси келди. Бироқ жангнинг ҳар ким ўз бурчии бажариш билан банд бўлган энг масъулиятли пайтида Устав талабини бажариш имкони бўлмади. Морозов

ўрнидан туриб, байроққа честь бергач, яна отишмалар қазиб кетаётган томонга қаради.

Тепаликка жанговар байроқ тикилаётганини Нормат ҳам күрди. Унинг назарида аланга ичидаги афсонавий тепаликка аллақандай енгилмас куч келаётгандек бўлди. Ў, тутундан ачиған чарчоқ кузларини байроқнинг ярқириқ туғидан сира узолмас ва бу тур үнга қандайдир қудрат бағишилаётгандек туюларди.

Эрта тонгдан бери тинимсиз жанг қилаётган батальон тепада ҳилпираётган байроқни кўриш билан яна руҳлануб кетди. Бу байроқ ҳар бир жангчи учун шон-шараф белгиси. У ғалабанинг ёрқин нишони. Совет жангчиси қадрдан батальонининг жанговар байроғини душман қўлига топшириб қўйгунча бир марта эмас, ўн марта ўлишга рози! Ана шу руҳ ҳар бир солдатнинг тан-жонига сингиб кетган.

* * *

Немисларнинг тумшуғи тагида Қизил Армия жанговар байроғининг пайдо бўлиши уларни ҳайратга солди. Бу хабар полковник Грейдерга етиб келгач, у ўйланиб қолди.

— Бу ниманинг белгиси? Юрьевнинг мақсади нима? Аҳа... Юрьевнинг кучи тугаш олдида. У гангиг қолгапга ўхшайди... Яна бир ҳамла, яна бир интилиш — русларнинг масаласи ҳал бўлади!..

Аммо Грейдер шу «яна бир ҳамла, яна бир интилиш» нинг нақадар қурбонларга сабаб бўлишини ҳам билар эди. Уни ўйлатиб қўйган нарса ҳам шу эди.

— Бу менга «Пир ғалабаси¹» каби қимматга тушадиганга ўхшайди.

У ана шундай хаёлларга бориб ўтирганда, адъютант югуриб кирди:

— Жаноб полковник! Руслар томонда оркестр янг-рамоқда.

Грейдернинг буришган пешонасига тираб турган бармоқлари қалтираб кетди. Чимчалоғидаги тилла узук ярқираб сўнди.

— Бу нимаси? Мен русларга ҳеч тушунолмай қолдим. Нега шу қадар қайсарлик қилишади? Беҳуда ўжарлик бул!..

¹ Пиррова победа.

* * *

Батальоннинг унг қанотидан келаётган оркестр садосини эшилгач, Юрьев Черницовга савол назари билан қараб қўйди.

— Улсак ҳам музика билан ўлайлик Юракларда армон қолмасин...— деди комиссар.

Оркестрни жанг майдонига Чернизов чақиртирган эди. Жанг бешинчи ротанинг иккинчи траншеялари ичидага давом этар, аҳвол оғир эди. Жанговар қаторларда батальон байроғининг пайдо бўлиши жангчиларнинг ҳар бир қарич ер учун масъулиятини оширди. «Бўшашмал» деб хитоб қилди байроқ алансаси ва солдатларнинг кучига куч қўшди. Жангчилар энг сўнгги кучларини жамлаб, душманнинг янгидан-янги ҳамласига бардош бера бошладилар. Жанговар қаторларда янграган жангвар марш оҳанглари эса, жангчиларнинг руҳини яиада кўтариб юборди.

Батальон оркестрининг тантанали садолари немисларга бошқача таъсир қилди. Уларга тепалик мудофаачиларига ёрдам келгандек, гўё бутун Қизил Армия ҳужумга ўтаётгандек, ана шу катта ҳужумнинг биринчи ва даҳшатли тантанаси шу жойда бошланыётгандек туюлди. Шунинг учун уларнинг руҳи тушиб кетди, сафларида парокандалик бошланди.

Шу вақт Юрьев батальониниң жангчилари учун яна бир қувончли ҳодиса юз берди. Грейдернинг орқа томонида ҳам отишмалар эшитилиб қолди. Отахоя бошлиқ партизанлар отряди Юрьевчиларга ёрдам бериш учун Дашковка ва Ильичёвкада ҳужум бошлади. Натижада Грейдер полкининг кучлари иккни фронтга бўлинниб кетди.

— Энди контратаканинг пайти келди,— деди Юрьев Чернизовга. Контратакани Куценко взводи бошлаб бериши керак.

— Тўғри!— деди Чернизов.— Мен окопларга борай!
— Бирга борамиз!

Юрьев билан Чернизов окопма-окоп юриб, жангчилардан ҳол-аҳвол сўрадилар, уларни руҳлантиридилар. Кейин, Куценко взводи контратакага ўтганда, улар жангни охиригача кузатиб бошқариб турдилар. Кечга яқин немислар чекинди. Аммо бизнинг жангчиларимиз

позициялардан кетмадилар. Улар тун оғгунча душман ҳаракатини кузатиб турдилар. Немисларнинг атакалари тақрорланмагач, Юрьев роталарни овқатланишга буюрди-да, ўзи снаряддан узилиб тушган қарағай шохига ўтириб, махорка ўради.

— Комиссар, келинг, бир чекайлик!

— Майли,— деди Черников, Юрьевнинг ёнига ўтириб.

— Федор Петрович,— деди Черников, Юрьевга мамнун қараб,— биласизми, Москвага ҳужум қилаётган Гитлер армиясининг биронта солдати ҳам Чайкадан қайтиб ўтолмайди. Мен бунга шу бугун яна бир марта ва узил-кесил ишондим!

— Бу бизга боғлиқ,— деди Юрьев, махорка тутунини оғзидан паға-паға чиқараркан.

— Тўғри!— Черников унинг фикрини қувватлади.— Аммо бу армиянинг маънавий руҳига, маънавий кучига ҳам боғлиқ.

Юрьев бу фикрга дарҳол қўшилмади.

— Шу чоққача,— деди у ўрнидан туриб, Черников олдида у ёқдан-бу ёққа юараркан,— бирор армия маънавий атака билан фалон давлатни йиқитибди ёки фалон қалъани олибди, деган гапни эшитганим йўқ. Агар батареяларимиз бўлмаса, самолётларимиз ёрдам қилмаса, пулемётларимиз сайраб турмаса, қуруқ асабий атака билан Грейдерни тор-мор қилолмас, фашист кўпригини маҷақлай олмасдик. Кимнинг қўшини кучли бўлса, қурол кўп бўлса — жангда ўшанинг қўли юқори бўлади. Ҳарбий ишда қўшинларнинг сони ва сифати ҳал қилуечи роль ўйнайди.

— Баракалла!— деди Черников.— Сони ва сифати... Сон ҳам муҳим-ку, аммо сифат ундан қолишмайди. Ана шу сифат — армиянинг маънавий руҳи; қийинчиликларни енгнинг, мақсад йўлида жон фидо қилишга тайёрлиги ёки тайёр эмаслиги — мана шу нарса жуда муҳим. Армиямизнинг кичик-кичик отрядлари ёвнинг катта-катта қисмларини қириб ташлаётганилиги бежиз эмас. Дарҳа-қиқат, урушнинг тақдирини кўпинча ана шу урушаётган кучларнинг маънавий руҳи ҳал қиласди. Узокқа бормай, ўзимииздан мисол олайлик. Бугунги жангда ҳеч кимнинг кўзига ўлим кўринмади. Жангчиларимиз тупроққа қориши қоришдик, уларнинг бирортаси ҳам байроқ олдида кетмади. Оркестр янграган вақтидаги ҳолатга разм солдингизми? Жангчиларимизнинг ватанпарварлиги жўш

урди, руҳи кўтарилиди, иродаси чиниқди. Шунинг учун ҳам биз бугун Грэйдерни енгдик.

— Грэйдерни ҳали буткул енгганимиз йўқ,— деди Юрьев, ўзига хос совуққонлик билан.— У биз билан ҳали яна олишиб кўради...

— Ўз тупроғини севган, ўз Ватанининг тақдирини ўз қўлида маҳкам ушлаб турган кишилар енгилмайди!

— Аммо бу тупроқни бизникидай оз куч билан ушлаб туриши ҳам осон эмас.

— Бизга оғир курашлар, жанглар замонида яшаш насиб бўлди,— деди Черницов, ўйчан кўзларини жанговар сафдошидан олмай.— Биз қийинчиликларни енгиш учун туғилдик. Шу сабабли машаққатлардан қўрқмаймиз, ҳар қандай душманни енгамиз!

Юрьев Черницовнинг чуқур маъноли мулоҳазасидан мамнун бўлса ҳам, махоркасининг учини қип-қизил чўғилиб тортаркан:

— Ҳар ҳолда, техникани унумтсанг, комиссар!— деб қўйди.

7

Батальон овқатланиб бўлгач, Черницов лейтенант Морозовнинг олдига борди. Морозов сакраб ўрнидан туриб, Черницов томонга ўгирилди.

— Рота жангга тайёр, ўртоқ комиссар!

— Жангчи Исройл Азимов жасади учун тобут ясатинг,— деди Черницов унга.— Эртага Ўртоқлар мозорига музика билан қўямиз.

— Есть!

Герман фашизмига қарши курашда 119 тепалигига ҳалок бўлган жангчилар учун дарё бўйида, кўприк олдиндаги кекса чинор тагида Ўртоқлар мозори қилинган эди. Юрьевчилар бу ернинг мудофаасини ўз зиммаларига олаётган куни: «Душман шу кўприк остонасида ўлигимизни босиб ўтса ўтадики, кўприкни унга бермаймиз!» деб қасамёд қилган эдилар. Шундан кейин ҳалок бўлган жангчиларнинг жасадлари шу жойга қўйиладиган бўлди. Эндиликда бу ер Юрьевчилар учун муқаддас бўлиб қолди.

Ана шу ерга энди ўзбек фарзанди Исройл Азимовнинг жасади ҳам қўйилляпти.

— Азимовнинг ҳужжатларини ол, унинг юбарамиз,—
деди Тургенев Норматга.

Нормат Истроилнинг тепасига борди, шинелини аста
кўтариб, унинг жанг ўтида қорайган таниш чехрасига ти-
килди, ўпкаси тўлиб, кўзига яна ёш келди. Нормат ўзини
тутолмай, пиқ-пиқ йиглади. Кейин, дўстининг гимнастёр-
каси чўнтакларидан «Қизил аскар книжкасини», маориф
бўлимининг гувоҳномасини ва хатларни олди. Нормат
шуларнинг ҳаммасини тахлар экан, хатлардан баъзила-
рини кўздан кечирди. «Жоним, ғалаба билан қайтиб ке-
линг. Тез келинг. Согиндим» — деб ёзибди хотини.

Истроилнинг ўқувчиларидан келган хатлар худди ра-
нортга ўхшаб бошланар ва катта ваъдалар билан тугир
эди.

«Биз, ўқувчи болалар, сизнинг шогирдларингиз, аъло
ўқишидан ташқари, колхозга йигим-теримда ёрдам бера-
ётимиз. Биз совет жангчиларининг ғалаба қозонишлари
учун қўлимииздан келганча ҳаракат қиляпмиз ва ҳара-
кат қиласмиз!»

— Бу мактубларни ҳам ўзи билан кўмамиз,— деди
Нормат, ёнига келган Тургеневга.

— Нима учун?

— Эҳтимол, ҳалок бўлган жангчиларниң қабри шун-
дайча қолиб кетмас. Бородино қишлоғи каби, Варшавка
ҳам тарихий жой бўлиб қолар. Бизнинг жасадларимизни
қабрдан-қабрга кўчираётуб, кимлигимизни суриширувчи
тарихчилар шу хатларни ўқиб қўришар. Истроил ўлтани
билан, унинг кўп шогирдлари ҳаёт эканини билишар!..
— Тўғри айтасан.

Нормат блиндажта қайтаётиб, Черницовга дуч келиб
қолди. Черницов ярадор жангчилар ёттап блиндажларга
қараб ўйланиб турарди. Блиндажлар ярадорларга тўла.
Афтидан, санитарлар шошилиб қолганга ўхшайди-
лар.

— Оғир жанг бўлди... — деди Черницов ҳоргин бир
қиёфада.— Батальоннинг учдан бири тўкилди... Ҳали бу
ҳолва. Гитлер 7 ноябрда Москвага киришга шошиляпти.
Оғир жанглар ҳали олдимиизда...

— Душманни ўтказмаймиз, ўртоқ комиссар! — деди
Нормат.— Ҳар қандай оғир жангга тайёрмиз!

Юрьевчилар шайланиб турдилар, лекин улар кутгани
отир жанглар тақрорланмади. Чунки Брянск ўрмонлари-
да, Тула атрофида ва Вязьмадан шарида бўлган жанг-

ларда тинкаси қуриган герман қүшинларига ёрдамчи күчлар келмади. Фельдмаршал фон Бокнинг буйруғи билан генерал Шмидт Грейдерга берилган танкларни ва унинг яна икки батальонини олдинги позицияларга чакириб олди. Шундан кейин Грейдер паром-күпприк билан катта йўлларнинг қўриқчисигина бўлиб қолди.

Ўн тўққизинчи боб БАЙРАМ ОЛДИ КЕЧАСИ

I

1941 йил олтинчи ноябрь...

Уч кундан бери сурункасига ёғаётган қор бугун кечга бориб янада кучлироқ бўралай бошлади. Бўрон кўтарилаётганини кўрган Вания Великан қарсак чолиб юборди. «Мана, ов энди қизийди!»

— Еғингарчилик — немисни блиндажга тиқади, плашч-палатка ичига ўрайди,— деди Великан.— Байрам хушчақчақ ўтсин десанг, қор, бўронни тилайвер!..

Блиндажда ўтирганлар Вания Великаннинг бу мулоҳазаларини қизғип муҳокама қилишиди.

— Қор-ку майли-я, бўронига нима бор?— деди блиндаж ойнасидан қараб турган Нормат.

— Бўрон керак!— индамай турган Тургенев гапга аралашибди.— Кучли бўрон керак.

— Нега бўронни бунчалик яхши кўрасан, сержант?

— Мен уни яхши кўрмайман. Билансанми, нима учун? Табиат жуда раҳмсиз нарса. Кузда ёқсан ёмғир, қишида қор, экин даласи учун озуқа, лекин куздаги шамол ва қишидаги бўрон бу табиат инъом қилган намликтининг офати... Уни даладан учирашиб кетади.

— Undай бўлса, нега бўрон тилаяпсан?

— Биз табиатни ўз мақсадимиз учун ишга солиб юрган одамлармиз. Агар қаттиқ бўрон турса, рус ерини депсиб юрган ёвузларни учирашиб кетади.

Вания Великан автоматини елкага илди:

— Мен жўнаш м керак, қулай вақтни ўтказиб юбормайин.

— Оқ йўл!— деди Нормат, блиндаждан чиқиб кетаётган старшинага.

Вания Великан «он»га кетди.

Оқшом қоронғилигіда блиндаждан узоқлашаётган старшинаны күзатиб қолған Нормат, Россияннің қаҳратон қиши манзарасыга, еру құкни тутиб бўралаб ёғаётган қорга узоқ тикилиб қолди. Қалин қор арча шохларини әгиб турибди, оппоқ ер лўппи-лўппи очилган пахта майдонига ўхшаб кўринмоқда.

— Худди бизнинг қийғиракка ўхшайди...

— Бугун байрам арафаси,— деди Тургенев, жангчиларга ўйчан тикилиб.— 1917 йил ноябрь күпларидек машиққатли бўлди бу кун ҳам... Байрамни жанг билан, қон тўкиб кутиб оляпмиз.

— Октябрь меваларини,— деди Тургенев сўзида давом этиб,— Гитлер тортиб олмоқчи, бизни яна зулм зинданига ташламоқчи. Йўқ, овора бўлади. Ҳалқимиз ўзини қулликка солдириб қўядиган халқ эмас! Қизил Армиямиз бор. Ҳарбий Флотимиз, авиациямиз бор. Қаттиқ курашларда енгиги чиққан партиямиз, галабадан ғалабага олиб борувчи ЦЕКамиз бор! Бу жиҳатдан бугунги 6 ноябрь 1917 йилдаги 6 ноябрга асло ўхшамайди! Аммо бугунги 6 ноябрь ўша 1917 йилдаги 6 ноябрдек ғалаба куни бўлиши турган гап!

• Тургеневни Нормат қувватлади:

— Гитлернииг паймонаси тўлган кун... Паймонаси тўлмаса, 1917 йилда империализмнинг илигини қоққан Советларга ҳужум қиласими? Үн тўрт давлат биргалашиб йиқитолмаган Москвани Гитлер қўшинлари йиқита оладими? Валақлайди-да, оғзига кучи етмаган!

— Гитлер Москвани олиб бўпти!— деди Тургенев яна.— Қайси виждонли совет кишиси бунга йўл қўйиб беради?

— Ҳеч ким!— деди Нормат.

— Ҳеч ким!— деб такрорлади бошқалар ҳам.

2

Вания Великан ҳар қачонгидан ҳам хурсанд ҳолда блиндажга кириб келди.

— Ҳамманг ўйинга туш! Билған ҳам, билмаган ҳам ўйинга тушадиган совға келтирдим.

— Нима келтирдинг?

Великан қўлларини ишқалаб ўртага тушди.

— Қани ўйин, Октябрь байрамини келтирсам ҳам ўйнамайсанларми!

— Байрам сенсиз ҳам келяпти.

— Байрам менсиз қизимайди. Мана. бунга қараб қўйинглар..

Ваня Великаи ўзи олиб келган катта қора термусни ерга қўяркан, ўрта бармоғи билан томоғига чертди...

— Шнапс!..— деди у. Крупенъяга кўзини қисиб.

Жангчилар кулиб юборишди: Великанинг ўлжаси немис рацияси эди.

— Рация!— Тургенев қувониб кетди.— Ишимиз беш! Ким билади бунинг тилини?

— Оға ўғли билади.

— Тургенев, постдан келиб ухлаб ётган Оға ўғлини уйғотди.

— Техникани биласанми?— деб сўради Тургенев, уйқули кўзларини муштлари билан ишқалаётган Ҳусейндан.

— Биламан, нефть насосларини биламан,— деди шошиб Ҳусейн.

— Нефtingни қўявер. Рацияни биласанми?

— Нега билмайин? Бокуда ер ости алоқасини рация билан олиб борардик.

Ҳусейн ишга киришди. Аммо ҳар қанча уринса ҳам, рацияни гапиртиrolмади ва «Бокудаги рация бунақа эмас» деб, қўл силтади. Блиндаждаги бошқа жангчилар ҳам бир-бир уриниб кўришди. Аммо немис рациясидан ақалли «тиқ» этган товуш чиқмади.

— Истроил Азимовнинг қадри айниқса ҳозир ўтятти,— деди Великан.

— Қўли гул эди. Унинг билмаган ҳунари йўқ эди. Агар Истроил бўлганда, кўзини юмиб туриб тузатиб қўярди...

— Батальон радиостини чақира қолайлик,— деди Крупенъя.

— Ҳеч қандай радиостнинг ҳожати йўқ, ўзимиз яна бир уриниб кўрайлик!

— Менга беринг-чи,— деди Нормат,— мен ҳам бир кавлаб кўрай! Мактабда радио дарси ҳам ўтган эдик, шояд иш берса!

Нормат бир оз урингач, азбаройи севинганидан қич-қириб юборди:

— Топдим!..

— Нимани? Нимани топдинг! Қани?— деб жангчилар уни ўраб олишди.

— Шошмай тур.

Рация гувиллаб, чинқириб, блиндажни шовқин-суронга түлдирди, шу шовқин ичиде аллақандай бегона овозлар хириллай бошлади.

— Москвани тұғрила! — деди Великан.

Нормат рациянинг құлғини бураб, шкаласи устидағи стрелкасини йүргалата бошлади. Стрелка ҳар рақамга ўтганда, овозини, шовқинини бир ўзгартыриб оларди. Гоҳ станциялардан вальс, фокстрот, опера ариялари, гоҳ станциялардан фақат әркак ва хотин дикторларнинг турли-туман овозлари әшитиларди.

— Топдим! — деди Нормат, күzlари чақнаб.

— Москвами?

— Москва!

— Менга бер!

Тургенев унинг құлдан наушникни тортиб олиб тинглади. Эфирдан аллақандай нотаниш овозлар билан бир қаторда, рус тилида ҳам гаплар әшитиларди.

— Тфу! — деди Тургенев, наушникни Норматта бераркан.

— Нима бўлди?

— Москва эмас, немис. Геббелъснинг ит ялоқилари рус тилида вайса япти.

— Шошманглар, Москвани топамиэ! — деди Нормат, рацияни яна ғириллатиб.

— Эплолмайсан, — деди Великан. — Яхиси, штабдан радиистни айтиб келай!

Великан кетгандан кейин ярим соат ўтар-ўтмас, блиндажга Черницов ва унинг кетидан радиист билан Великан кириб келди.

— Яхши бўлибди бунинг топилгани, — деди Черницов ва радиистга қаради. — Москвани топинг!

Аммо шу вақт Нормат шодлигидан қичқириб юборди:

— Үртоқ комиссар, Москва!..

Москва радиоси дикторининг салобатли, босиқ овози әшитилди.

— Ура! — деб қичқирди Великан.

«Ура» садолари бутун блиндажни бошнга кўтарди, жангчилар бир-бирлари билан қучоқлашиб кетишли. Аммо тұсатдан пайдо бўлган Москва овози эфирдаги шовқин-сурон ичиде кўмилиб кетди. Жангчилар нафасларини ичларига ютиб, эфирдаги ҳар бир сўзни уқиб олишга тиришардилар. Чиндан ҳам юрьевчиларнинг ҳаёти Москвага боғлиқ эди. Улар орқада Москва тургани

учунгина ўзларини кучли деб билардилар. Шунинг учун Москвадан келаётган ҳар бир сўз улар учун қимматли, қадрли эди. Душман: Москва олинди, деб ҳамма жойга варақалар тарқатган, ҳар кун рупор орқали 119 тепалигига қараб: «Сталин қочди, фюрер Москвада парад қабул қиласди» деб вайсар эди. Аммо бу уйдирмага ҳеч ким ишонмади. Мана энди ўша «олинди» деб эълон қилингани Москва ўз овози билан ёвуз душманни фош қилмоқда.

Рацияда Иосиф Виссарионович Сталиннинг:

— Бизнинг ишимиз ҳаққоний иш, биз ғалаба қиласмиз! — деган сўзлари равон ва аниқ эшитилди. Ишонч билан айтилган бу сўзлар Черницовга ҳам, бошқа жангчиларга ҳам енгилмас руҳ, тугалмас қудрат бағишлади. Узоқ вақтгача рациядан қарсак ва «ура» товушлари келиб турди, «Интернационал» чолинди.

Тургенев наушникда эшитилган ҳар бир сўзни такрорлаб турди. Москва орқалии Киев, Ленинград, Боку, Тошкент, Сталинобод овозлари эшиittiрилди. «Эшифронт, биз сен билан!» — дерди у шаҳарлар.

Тургенев жангчилар номидан: «Эшиф мамлакат, эшиф узоқдаги шаҳарлар, биз сен билан ва сен учун қурбон бўлишга тайёрмиз!» деб қичқирганини ўзи ҳам сезмай қолди.

— Бизнинг ишимиз ҳаққоний иш, биз ғалаба қиласмиз!

Черницов ҳам, жангчилар ҳам И. В. Сталиннинг ана шу содда, аммо чуқур маъноли сўзларини такрорлаб, Қалбларига жо қилиб олдилар.

3

Қаёқдан келди унга бу шодлик.

Тўхта хола ўзини ҳеч қаерга сиғдира олмай, қувончга тўлиб ўтирибди. Болалар ҳам кампирнинг атрофидан кетмай, ғужурлашиб, унинг шодлигига шодлик қўшмоқдалар. Катта онаси уларни ҳам ювинтириб, яхши кўрадиган кийимларини кийдириб қўйди. Тўхта холанинг ўзи ҳам оҳорлик кўйлагини кийиб, оқ дока рўмолини ўраб олган. Унинг кўзлари қувнаб, кўнгли яшнаб кетяпти. Бу байрамни унга Холматнинг: «Сизни ва болаларни Улуғ байрам билан табриклайман» деган телеграммаси олиб келди.

Эшикдан Эргашнинг кириб келиши кампирни янада шодлантириб юборди. Эргашни биринчи бўлиб Славик

құчоқлаб олди. Ү, Уралдан Славикка уч ғилдиракли велосипед олиб келган әди. Славик уч кундан бери укала-рини, құшни болаларни велосипедга миндириб, ўйнатиб юрибди. Бу велосипедни болалар кечалари ҳам ўртага олиб ётадилар. Ҳозир ҳам велосипед уларнинг ўртасида: Ганижон унинг орқа ғилдирагини ушлаб турибди, Хол-матнинг кичик ўғли қўнғирогини жаранглатмоқда, катта ўғли отининг ёлини құчоқлаб, қулоғидан ўммоқда.

— Табриклайман, сизни, онажон! — деди Эргаш, Тўхта холага елкасини тутар экан, шодланиб.

— Умрингдан барака топ, болам! — деди кампир, Эргашдан мамнун бўлиб. — Шундай улуғ айём кунларда мени йўқлаб келганинг учун минг раҳмат, болам, асло кам бўлма!

Эргаш Тўхта холага иккита қофозни кўз-кўз қилди:

— Суюнчи беринг, суюнчи!

— Сенга ўзгинам суюнчи, болам. Қандай хушхабар келтирдинг, садағанг кетай, Эргашвой?

— Норматдан хат, Адолатдан телеграмма.

— Вой, оғзингга мой, Эргашвой! Тезроқ айт, болажонларимдан не хушхабар бор?

Она Эргашни қучиб, пешонасидан ўпди-да, сандиққа югурди ва уни очиб, Норматнинг тўйига аталган кийимликлар ичидан қўлига илинган бир чуст дўппини олиб келиб Эргашга кийдирди, яна орқасига қайтиб сандиқдан шойи қийик олди-да, унинг белига боғлади.

— Сенга ҳар қанча қилсам ҳам оз, болам. Сен менга фақат яхши гап келтирадиган хосиятли йигитсан. Қурбим етса, от миндиардим сенга, болам!

Кампир Эргашнинг қўлидан уч бурчакли кўк конверт билан телеграммани олиб, бағрига босди. Шу чақ у яна Нормат билан Адолатни ўз бағрига босгандек ва уларнинг қайноқ юзларидан ўпиб, азиз бошларини силаётгандек бўлди. Кейин у хат билан телеграммани кўзларига суртди.

— Улар бир-бири билан топишиптими, болам? Адолатхон Норматимнинг олдига етиб бориптими? Илоҳи, муроду мақсадларига етишсин!

— Адолат Москвада экан. Нормат фронтда,— деди Эргаш. — Аммо улар бир-бири билан албатта топишади.

— Ўқи, ўқи, ўғлим! Нима депти Нормат? Нима деб ёзипти Адолат?

Эргаш аввал Норматнинг хатини ўқиб берди. Унинг меҳрибон онасини соғиниб ёзган илиқ сўзларини эшишган кампирнинг кўзларидан дув-дув ёш тўкилди. У, кепжа ўғлиниң бу мактубининг ҳар бир сўзини қулоғига қўйиб, кўксига битиб олаётгандек диққат билан тинглади ва тобора унга берилиб, ўзини Нормат тасвирланган фронтда, партизанлар орасида, жангларда, севимли Москва мудофааси майдонида сезди-да, томаётган кўз ёши томчиларининг мижжалардан ғойиб бўлганини ўзи ҳам сезмай қолди. Мактубнинг «Адолатхон соғ-омон юриптими?» деган жойига келганда, кампир Эргашни тўхтатиб, «Норматга телеграмма бер, дарҳол хабар кил» деб ўтиindi. Хатнинг охирги қисми қишлоқдаги дўстларга аталган эди.

Эргаш Адолатнинг телеграммасини ҳам ўқиб берди. Адолат Москвага етиб борганини, соғ-саломат эканини ёзибди. Тўхта холага қизғин салом йўллади.

— Барака топсин! — деб кампир Адолатни дуо қилди.
— Энди мен кетай, — деди Эргаш, Славикнинг пешо-насидаи ўпиб.

— Қаёққа шошиласан, болам?
— Мана бу хатни почтага ўзим топширмоқчиман. Бугундан қолса, уч кунга кечикиб кетади. Бу муҳим хат Бегимхондан...
— Бегимхондан?.. Яна қандақа оширига ёзипти у бе-карор?

— Оширига эмас. Акасига. Соттига, мен ўзим ёздирдим. Сотти Уралда ҳам одамларни шоштиряпти. У, синглисисининг «бетоблиги»ни баҳона қилиб, «кетаман»га тушиб қолипти. Бегимхон акасига: мен жуда яхши юрибман, уруш ғалаба билан тугамагуцча Уралдан қайтманг, деган мазмунда хат ёзди. Қаёқдан келди экан унга бунча ботирлик?..

— Қаёқдан келарди. Сотти келиб қолса қўриқчи пайдо бўлади, Бегимхон ёлғизликнинг яллосини суролмай қолади. Бўлмаса-ю, аками чақириб беринглар, деб ни-малар қилмасди.

— Ҳар ҳолда инсоф кирганга ўхшайди.
— Ўғлимнинг хатини ташлаб кет, Эргашвой, келин-ларим ҳам ўқишисин.

Келингларингиз даладан тўғри клубга келишади. Уша ерда ўқиб бераман, эшишишади. Уларга арава юбордик.

Эргаш кетгач, Тўхта хола қайтиб уйига кирди, болаларининг кийим бошларини тузатиб, Славикка янги қизил этигини кийдириб, уларни етаклаб ҳовлига чиқди.

Куз ҳавосининг илиқ шабадаси олтин баргларни учирив юрибди. Оқ ўрик, шотут, шафтоли ва ғайнолининг сап-сариқ япроқлари ҳоэли бетини кўмиб ётибди. Славик велосипедининг ғилдираклари билан ҳазонларни тўзитиб дарвоза томон бормоқда, унинг ўртоқлари велосипед орқасидан югуриб, ғилдиракка ёпишган ҳазонларни бирма-бир олиб ташламоқдалар. Кампир Славикка сандиқдан олган байроқчасини берди.

— Славик, мана, буни велосипедингга ўрнатиб ол!— деди Тўхта хола.

Болалар бу байроқчани танидилар. Уни ўтган йили 7 ноябрь куни Холмат шаҳардан келтириб берган, байрамдан кейин Тўхта хола уни «келаси байрамда ўйнайсизлар» деб беркитиб қўйган эди. Болалар байроқчани велосипеднинг рулига ўрнатиб, катта йўлнинг ўртасига тушдилар. Байроқ шабадада ҳилпиаркан. Тўхта хола чексиз қувонди.

— Гиргиттонларинг бўлай, шундоқ севинсаларинг!— деди кампир, болаларининг олдига тушиб бораркан.

Колхоз клуби олдида ўйнаб юрган болалар Славиккинг велосипедини кўришлари ҳамон «урал» деб қичқириб, уни ўраб олишди. «Менга ҳам бир миндир еелосипедингни, мен ҳам минсам майлими?» деб қўярда-қўйишмади улар. Бир бола Славикка ўрик, ёнроқ берса, иккинчи бола: «Слава, Слава, кинодан кейин бизникига борасанми, тойимга миндираман» деб уни таклиф қиларди.

— Бизникига боради, қаймоқ бераман. Кейин бузоқчани етаклаб боқиб келамиз-а, Славик?— деб, Славиккинг елкасига қўл ташлади учинчи бола.

Славик болалардан бирининг елкасида ёғоч милтиқни кўриб, велосипедини ҳам ташлади-да, унинг ёнинга югуриб кетди. Велосипедга болалар ёпишган эди, Фанижон унга миниб олди.

— Милтиғингда бир оттиргин, ўртоқ, мен ҳам велосипедимга миндираман,— деб ялинди «аскар бола»га Славик.

— Олдин сен велосипедингга миндир, кейин мен милтиғимни бераман.

— Хүп бўлади,— деди·да, Славик орқасига қаради, аммо велосипед жойида йўқ эди. Икки бола унга миниб олиб, клуб атрофида ғизиллатиб юришибди.

Уларни кўрган «аскар бола» милтигини Славикка узатиб:

— Мана, ол,— деди·да, ўзи велосипед томонга югурди.

Славик милтиқнинг тепкисини босди, лекин милтиқ отилмади. Славик ёнидаги болалардан ҳафаланиб сўради:

— Ўқи йўқ·ку?

— Кимни отасан?

— Фашистларни.

— Фашистлар бу ерда йўқ·ку?

— Узоқда бўлса ҳам, мўлжаллаб отавераман!..

Болалар қийқириб кулиб юбордилар.

Ана шу қий·чув ичида клубга араваларда даладан хотинлар келиб қолишли. Болалар ўз оналари, опалари, қариндошларининг бағрига отилдилар.

4

Клубнинг катта зали одамга тўлди.

Эргаш минбарга чиқиб, доклад бошлашдан олдин залга разм солди. Биринчи қаторларда дашт бригадасининг қизлари ўтиришибди. Бегимхон Эргашнинг залга олазарак қараётганини кўриб, Шакархонни тирсаги билан секин тутириб қўйди. Шакархон: «жим ўтир!» дегандек Бегимхоннинг биқинини чимчилаб қўйди. Бегимхоннинг қитиғи зўрлигидан ўзини тутолмай «вой!» деб ёнига ташланди·да, кейин ўз овозидан ўзи уялиб, рўмолчаси билан юзини беркитиб олганича, Эргашнинг доклади бошлангандан кейингина юзини очди.

Эргаш Улуғ Октябрь социалистик революциясининг самаралари ҳақида гапирди.

Эргашнинг оғзига тикилиб, унинг ҳар бир сўзини дик-қат билан тинглаб ўтирган Тўхта хола шу чоқ узоқ ўтмишни ўйлаб кетди. «Ким эдик, ким бўлдик? Худо қўрсатмасин, ёв келса, бошимизга не қора кунлар тушарди?» У, шу қадар хаёлга берилиб кетган эдики, ёнида ўтирган катта келини уни ухлаб қолди, деб ўйлади шекилли, чап тирсаги билан секин нуқиб қўйди. Кампир чўчиб ўйқудан уйғонган кишидек сесканди·да, кўзларини минбарга қадади.

Докладчи Улур Ватан урушининг фронтларида, айниқса Москва ёнида бораётган оғир жангларни батафсил ҳикоя қила кетди.

— Халқ нияти — ғазотга отланди! — деди Эргаш, бошини баланд кўтариб, янгроқ овоз билан.

Зал сув сепгандек жимжит. Гўё ана шу нияти — ғазотга кўтарилган халқнинг ўзи шу ерда саф тортиб сукут сақлаб тургандек.

— Москвани бутун мамлакат мудофаа қиляпти. Шу жумладан бизнинг колхоз ҳам уни мудофаа қиляпти,— деб сўзида давом этди Эргаш.— Бизнинг йигит ва қизларимиз, колхозчиларимиз, звено бошлиқларимиз, бригада бошлиқларимиз ҳам ўша ерда! Мана, Нормат...

Нормат тўғрисида гап бошланиши билан Тўхта хола ўтирган ерида бир чайқалиб, стулга ёзилиброқ ўтириб олди.

— Менинг акамни гапиряпти,— деди қўнғироқдай овози жаранглаб Славик.

— Менинг амакимни мақтаяпти,— деди мағурланиб Фанижон.

Эргаш Норматдан келган хатни ўқий бошлади.

«Бизнинг фронтдаги муваффақиятларимиз, сизнинг фронт орқасидаги унумли ишларингизга ҳам боғлиқ!— деб ёзган эди Нормат.— Қурол қанча кўп бўлса, кийимкечак қанча кўп бўлса, бағримиз бутун, қўлимиз узун бўлади. Биз ғалаба қиласмиш...»

— Илоҳо олишину олдиришмасин! — деди кампир овозининг борича.

— Менинг таклифим бор,— деди кимдир ўрнидан турриб.

Бир енги осилиб турган бу йигитни ҳамма таниди. У даштдаги ёшлар бригадасининг бошлиғи Олимжон эди.

— Таклифим шуки, Норматга, Эралига, Адолатга, хуллас, колхозимиздан урушга кетган фронтчиларга хат ёзилсин, айтилсинки, фронтга қанча пакта керак бўлса, ётказиб берамиш!

Залда қарсак янгради.

— Менда ҳам таклиф бор,— деди Шакархон, стулдан сапчиб туриб.— Қирга қайроқи буғдой экамиш. Ўзимиз емасак ҳам, фронтга юборамиш! Тўғрими, қизлар?

— Тўғри, тўғри! — дейишди қизлар.

Залда яна шов-шув кўтарилиди, қарсак чолинди.

— Яна бир таклиф шуки,— деди Олимжон.— Да лада пахта күп. Күрак узилганий йўқ. Фўзапоя юлинимаган. Шудгорга тушганимиз йўқ. Ун беш кунлик штурм эълон қиласайлик. Бўлмаса, қолган ҳосилни қорга кўмиб юбордамиш.

— Тўғри!

— Жуда ҳақ гапни айтди Олимжон!

— Штурмга барча ёшу қаря чиқамиз!

— Магазин билан чойхонадаги баъзи бекорчилар ҳам чиқсан далага!— деди аллаким.

Колхозчилар чапак чолишиди.

Энг олдинда ўтирган Соҳиб қори аланглаб қолди. У Бозоровни қидирди-ю тополмади. Бозоров энг охирги қаторда ўзини панага олиб ўтиради. Норматнинг топилиб қолгани, бунинг устига, унинг фронтдаги қаҳрамонлиги ҳамманинг тилида достон бўлиб, Бозоровнинг занг босган юрагини тилка-пора қилиб ташлаган эди. Бозоров «сеғиси»нинг ҳам миси чиқди. Энди у ҳаёсиз бошини қуий солиб, қўл учида қарсак чолиб, лой бўлиб ўтирибди. Соҳиб қори бир неча марта орқасига қайрилиб қарагандан кейин, унга кўзи тушгач, Бозоров Қорининг шимадан безовта бўлаётганини сезди-да, унга кўз қисиб: «Майли, магазинни ёпишса ёпишар, чайқовни далада қила берамиз» дегандек ишора қилди. Соҳиб қори «тушундим» дегандек, томогини қириб қўйди.

— Ғалаба қозониш учун қурол етарли, ўртоқлар,— деди Эргаш, гапида давом этиб,— мен буни Уралда ўз кўзим билан кўриб келдим.

Эргашнинг гапи тугамай, кимdir савол ташлади:

— Ҳамқишлоқларимиз Уралда қалай юришибди, тузукми?

— Улар сизларни мусобақага чақирдилар,— леди Эргаш.— Фронтга қанча яроғ керак бўлса, ўшанча етказиб берамиз, «гулистан»ликлар ҳам меҳнатини аямасинлар, дейишиди азаматлар!

— Сотти сатангни ҳам кўрдингми, Сотти сатангни?— деб савол ташлади бир кексароқ колхозчи.— Йигитларимиэни уялтирмаётимикан?

— Уялтиряпти,— деди афсусланиб Эргаш.— Кўпланиб ўртага оловдик, барибир, тошдек безрайиб тураверди. Сен тош бўлма, тупроқ бўл, бағрингда ранг-баранг гул-чечак унсин, дедик. Тумтайганича тумтайиб тураверди. Ўрик, ёнғоқ сотиб пул тўплабди. Тўнининг қавиқлари

дўппилинг пилтасидек червонга тўлибди. Унинг кўзига пулдан бошқа ҳеч нарса кўринмай қолган экан. Мен қайтиш олдимдан ачитиб-ачитиб гапирган эдим, торс этиб ёрилди-ю Холматлар билан байрам вахтасига жўнади. Пўлат қуювчи бўлмасанг, юртингга қайтма!— дедим.

— Жуда тўғри айтибсан!— деди ҳалиги чол.

— Пўлат қуюечиларни кўрдим,— деб гапида давом этди Эргаш.— Улар Урал бойликларини ердан суғуриб олиб, қурол ясашяпти. Мижжа қоққани қўли тегмайди уларнинг. Улар ясаган қуролларнинг ҳаммаси сайраб берса, немисга сичқоннинг ини минг танга бўлиб қолади.

Эргаш «гулистон»лик колхозчиларнинг Уралдаги қаҳрамонлик ишлари, уларга рус мастерларининг меҳрибонликлари тўғрисида гапирганда зал яна тўлқинлашиб олди.

Қодир ака ўрнидан турди. Ҳамма президиумга қарди.

— Демак, ишчилар синфи фронтни етарли таъминлајпти,— деди колхоз раиси.— Биз деҳқонлар ҳам фронтни озиқ-овқатга, ҳарбий саноатни хом ашёга зориқтириб қўймаймиз!

— Қасамёд қиласмиш!— деб қичқирди залдан Олимжон.

Бутун зал унинг сўзларини такрорлади:

— Қасамёд қиласмиш!

Йиғирманчи боб 7 НОЯБРЬ, ҚИЗИЛ МАЙДОНДА

I

Адолат Москвани тезроқ кўриш орзусида кечаси билан мижжа қоқмай чиқди. Мана ҳозир у казарма ойнасидан улуғ шаҳарга қараб турибди.

Шу соатларда ҳамма жойда байрам ҳолати ва ҳаммада байрам кайфияти. Аммо Москва Адолатга уни кўрган дўстлари таърифлаган Москвага ўхшамайди: шаҳарда бутунлай ўзгача ҳолат ва ўзгача кайфият. Аввалги байрамлардагидек ҳавода ранг-баранг шарлар учуб юрмаяпти, осмонда электрда ёритилган учар портретлар кўринмайди. Уларнинг ўрнига аэростатлар

сузиб юрибди. Катта биноларга ҳусн берадиган ҳар хил безаклар, иллюминациялар ўрнида ўт ўчирувчи банкалар қорайиб кўринади. Кўчаларда патруллардан бошқа ҳеч ким йўқ. Катта бинолар олдида противогазлик йигит ва қизлар у ёқдан-бу ёққа юриб туришибди.

Байрам олди кечасида Москвә ухлагани йўқ. Зенитчилар саираб чиқди. Духовой оркестрларнинг вазмин садолари уйларни, деразаларни ларзага келтириб турди.

Москваликларнинг тинч меҳнати узилиб, осойишта ҳаёти бузилганига бир юз ўттиз тўрт кун бўлди. Шу кунлар ичиди Адолатларнинг ҳозирги казармаси олдиндган ўтаётган Москва-Рекадан қанча кўп сув оқиб ўтган бўлса, мамлакат ҳаётида ҳам шунча кўп ҳодисалар юз берди. Ёв қўшиналари Донбассга кирди, душман революция шаҳри — Ленинград устида қора булутдек деваклаб турибди ва Москва остонасида Кремль деворлари га дурбиндан тикилмоқда. Лекиң тўрт ойлик «блицкриг» Гитлер учун шавкат эмас, шармандалик келтирди. Тўрт ойлик уруш унинг тўрт ярим миллион солдат ва офицерининг бошини еди. Гитлернинг ўзи ҳам тўрт марта ёлгончи бўлгач, тепа соchlарини юлавериб, боши сийқаланди. 7 ноябрь куни Қизил майдонда ғалаба паради қабул қилиб, тантанали нутқ сўзламоқчи бўлган Гитлер ҳозир қайси ҳолатда экани номаълум, ҳар ҳолда, у ҳамон қутуриб, қолган-қутган соchlарини ҳам юлиб: Одам — гуноҳкор махлук, уни ўлдиришдан тойма!» деб айюҳаниос солмоқда. «Биз дунёни босиб олишимиз учун рус, поляк, чех, украин, болгар, белорусларни қириб ташлашимиз керак» деб алжираМОҚда у аблаҳ. Бунинг учун у бутун куч, ҳарбий машина ва қуролларини Москвага ташламоқда. Герман армияси Совет Ватанининг юраги, қон томири ва ифтихори бўлган севимли Москвага тўхтовсиз ҳужум қилмоқда. Пойтахт катта хавф остида!

Москва бу даҳшатли хавфни сезиб турибди: унинг халқи, армияси, иродаси, қудрати душман йўлида ўтиб бўлмас ғовга айланган.

Кремль соати ҳар ўн беш минутда занг бериб, ғалаба яқинлашаётганидан оламга жар солмоқда.

Тонг отса — байрам. Тонг отса — Қизил майдонда ҳарбий парад.

Шаҳар шу орзу билан тонг оттириди.

Москөада қамал ҳолати эълон қилинган. Туни билан олислардан эшитилиб турган замбарак садолари тонгга яқин яна кучайди. Адолат уруш гулдуросларини биринчи марта эшитяпти. Ҳақиқатан ҳам Москва атрофилда тарих билмаган уруш бўляпти. Қизнинг хаёли ана шу жанг майдонини кезади ва ўша майдонларда жопини жабборга бериб юрган Норматни ўйлади.

Адолатнинг назарида, Москва буюк ҳарбий лагерь. Бу ерда ҳар бир тирик жон — солдат. Ёш болалар ҳам елкасига противогаз осиб шишаларга бензин, керосин қуиб, қўлида гугурти билан кўчаларда, катта дарвозалар оғзида, бурчакларда ўтиришибди. Уларнинг ёнидан ўтиб қолган милиционер:

— Кимсан? — деб сўраб қолгудек бўлса, улар:

— Биз танк қиравчилармиз, — деб жавоб беришади.

Москва фақат фронтгина эмас. Москва уруши билан бир қаторда қурол ҳам ясаяпти; тўп отяпти ва тўплар, миномётлар, танклар, самолётлар ишлаб чиқаряпти. Хуллас, улуғ пойтахт мамлакатнинг ғалабасини тайёрлайпти.

Кремль курантлари олти марта занг уриб, тоңг отганини, Москва яшаётганини жаҳонга хабар қилди...

2

Тоңг отса ҳам ҳаводаги туман тарқалмади.

Тонгни сабрсизлик билан кутган Адолат ўз ротаси сафида Москва кўчаларидан шахтам қадам ташлаб бораркан, севимли пойтахтга қараб тўймаяпти.

Рота Революция майдонига Моховая кўчаси билан кирди. Адолат кўччанинг икки юзидағи ҳар бир иморатни таниб, билиб, юрагига жойлаб олишга ошиқади.

— Бу нима? — деб сўрайди у, ёнидаги жангчи қиздан. — Бу қандай бино?

— Ленин кутубхонаси.

Адолат ҳашаматли бинога тикилиб қаради. У, юқори қаватларга қараганда, «бошимдан қулоқчиним тушиб кетмасин» деб, юлдузли қалпоғини қўллари билан ушлаб олди.

— МГУ қаерда?

— Мана, мана шу бино — МГУ!

— Литфак ҳам шу бинодами?

— Разговоры! — деб огоҳлантирди лейтенант.

Адолатнинг ёнидаги қиз — Нина литфак қайси бинода эканини аниқ айтиб беролмади. Бу вақт улар МГУ биносидан анча узоқлашиб кетдилар. Қизил майдонга яқинлашган сари рота текис ва жадал юрарди.

— Бу — Қизил майдон,— деди Нина.

Адолат Қизил майдонга ротанинг чап ёнбошида кирди.

— Рота, тұхта!

Лейтенантнинг командаси билан рота Қизил майдоннинг Октябрь күчасига кира бериш ерида, ГУМ биноси бурчагида тұхтади. Үндега ҳам, чапда ҳам, орқада, олдинда ҳам құшинлар... Адолат Мавзолей минбарларидан узоқда тұхтаганига ачинди. У солдатлар тепасидан шунча бўйин чўзиб интилса ҳам, ҳеч нарса кўролмади.

— Аттанг, биз узоқда қолдик...— деди Адолат ағсусланиб.

— Ташвишланма, яқиндан ҳам кўрасан,— деди Нина уни юпатиб.— Ҳали минбарлар ёнидан ўтамиз.

— Ҳозир-чи?

— Ҳозир Олий Бош Қўмондан нутқ сўзласа керак.

Адолат Қизил майдонни кўздан кечирди. У суратларда тасвирланғанидан ҳам каттароқ, кенгроқ, салобатлироқ эди. Ана, кекса Кремлинг қадимги тишдор деворлари юксалиб турибди. Майдон тұла аскар. Василий Блажений храмидан то Тарих музейигача қўшинлар саф тортиб турибди. Мавзолей минбарларини партия ва ҳукумат раҳбарлари, стахановчилар, мухбирлар, фотографлар, ёзувчилар, кинооператорлар, чет элларнинг вакиллари ҳар қачонгидек тұлдириб турибдилар.

Халқ күтапти.

Спасск башнясидаги соат саккиз марта жаранглади... Адолат ҳамма қараган томонга қаради. Бутун майдон ҳаракатта келди. Спасск дарвозасидан оқ отда мўйловли Будённий чиқди. Адолат маршалнинг парад қабул қилиш маросимини биринчи марта кўраётгани учун ҳам ўзига сифмай севинар, қора кўзлари нурланиб чақнарди.

Бутун майдон тўлқинланиб кетди. ВКП(б) Сиёсий Бюросининг аъзолари суратлардагидек қўлларини баланд кўтариб турибдилар. Улар халқ оломонини оралаб, турли қисмлар орқасидаги регулировщиклар ротасида турган Адолатга, фақат Адолатта қараб қўл кўтараётганга ўхшайдилар!

Ҳар бир солдат, ҳар бир совет кишиси бу тантанали дақиқаларда ўзини шундай сезади.

Ана шу дақиқаларда бутун Москвани, бутун мамлакатни тантанали жимлик коплади.

Олий Бош Құмандон И. В. Сталин микрофон олдиға келиб нутқ бошлади. У оғир күнларни эсга солди: ўн еттинчи.. ўн саккизинчи ва йигирма бириңчи.. Россия кечирған оғир йиллар... Ұша йилларда ҳам совет халқи бутун қийинчиликни енгди, улуғ Ленин йўлидан бориб, ғалаба қилди.

— Улуғ Ленин сизларни бундан 23 йил илгаригидек Ватан урушiga руҳлантирсын! — деди Сталин. Ҳамманинг кўзи Ленин ухлаб ётган қизгиш бинога — Мавзолейга қадалди.

— Ленин тирик турғанга, биз билан гаплашаётганга ўхшайди.. — деди Адолат Нинага секингина.

Нина бошини қимирлатиб, аста жилмайиб қўйди.

Олий Бош Құмандон нутқини тамомлагач, Москва-Река қирғоқларидаги тўплардан артиллерия салюти берилди. Еру кўк ларзага келди. «Интернационал» чолинди.

Парадни жанг майдонларининг ҳукмрони — совет лиёда қисмлари бошлади. Бу қўшинлар шу тарихий майдондан тўғри фронтга йўл оладилар. Олий Бош Құмандон уларга оқ йўл тиламоқда:

— Бу урушда сизларга паҳлавон авлодларимиз Александр Невский, Дмитрий Донской, Кузьма Минин, Дмитрий Пожарский, Александр Суворов, Михаил Кутузовлар руҳи мададкор бўлсин! Буюк Лениннинг енгилмас байроғи мададкор бўлсин!..

Найзаларни ярқиратиб, мардона қадам ташлаётган жангчилар улуғ рус халқи паҳлавонларини эслатиб, уларнинг ғалабасини яна бир марта такрорлашга кетмоқдалар.

Регулировщик қизлар ротасига павбат келганды, ҳарбий техника гулдуроси майдонни ларзага келтирди.

Рота Тарих музейи олдидан айланиб ўтиб, минбарларга яқинлашди. У марказий минбар ёнидан ўтаётганда, минбарда турған кекса маршаллардан бири:

— Яшасин қудратли Қизил Армия! — деб хитоб қилди.

«Бу хитоб менга ҳам айтилди, — деб фахрланди Адолат. — Бу хитобни Нормат ҳам эшитаётгандир... Қудратли Қизил Армия!»

Адолатнинг кўзларига севинч ёшлари тўлиб, ҳеч нарсани кўролмай қолди...

Йигирма биринчи боб ФРОНТ ИУЛИ

1

Октябринг охири, ноябринг киришида бошланган қиши шу кунларда айниқса зўрайиб кетди.

Адолат Россия қишини биринчи марта синаяпти. Уларнинг ротаси 7 ноябрь куни Москва Қизил майдонидан ўтганидан кейин, шу жойга келиб тұхтади. Адолат бу жойнинг номини ҳам билмайди. Яқин ўртада ҳеч қандай қишлоқ ҳам йўқ, атрофлари ўрмон ва кенг дала. Шу ердан катта йўл ўтган. У қишлоққа хат ёзай, адрес берай деса, нима деб ёзишини билмайди. «Катта йўлдаман» деб ёзсинми? Жанг майдонларидан ўтган бундай катта йўлларнинг сон-саноғи йўқ.

— Шу ерга шлагбаум қурамиз,— деди рота командири.

Адолат умрида шлагбаум қурмаган. У Москвадан келаётисиб, бир неча марта контролъ пунктлардан ўтган бўлса ҳам, кечаси шлагбаумларни яхшилаб кўриб ололмади.

Шлагбаум биринчи куниёқ йўл устига қуриб битказилди, ёнига будка қўндирилди. Нина шлагбаумни оқкора қилиб бўяди. Ўрмон чеккасига брезентлардан чодир — палаткалар тикланди. Адолат қандай ном билан аташни билмаган жойга «ВАД — 25» деган ном қўйилди.

Ҳамма нарса тахт бўлгандан кейин сарғиш шинелли қизлар наебатма-навбат постда тура бошладилар. Лейтенант биринчи кунлари Адолатни постга қўймади. «Иш ўрган, тартиб ўрган, ҳарбий ҳаётга кўник» деди у. Ҳар куни ўрмонда машгулот бўлиб турди. Адолат сержантнинг командаси билан қизил байроқчани кўтариб, тушириб, яна кўтариб машқ қилди. Аммо ҳар куни бир хил нарсани такрорлайвериш унинг кўнглига тегди. У, лейтенантнинг ижозати билан шлагбаум олдига чиқиб, наебатчилик қилишни ўргана бошлади.

Кунлар, ҳафталар ўтди. Адолат ҳарбий вазиятдаги йўл қоидалари ва қонунларини ўрганиб олди. У биринчи марта постда турган куни қатнов унча кўп бўлмади. Шунинг учун ҳам у контролъ постдан ўтадиган ҳар бир машина ва ҳар бир кишининг ҳужжатини текширишга улгуролди.

- Сизнинг ҳужжатингиз?
- Путёвкани кўрсатинг!
- Колонна бошлиғи ким?

Шлагбаумдан ўтаетган колонналар, солдатлар, командирлар кулранг шинель, кубанка кийиб олган қизил юзли, қора кўзли, ўрта бўйли қиздан кўз узолмас, агар ишлари шошилинч бўлмаса, шу ерда бир оз дам олиш пайига тушиб қолар эдилар. Колонналарда кетаётган баъзи бир солдатлар Адолатга яқинлашгач:

— Смирно! Чап ёнга қара! Смирно! Ўнг томонга қара! — деб, ҳар хил командалар бериб, унга тегажағлик қилиб ўтардилар.

Адолат бир неча кунгача бу хил ҳазилларга кўни-колмади, ғаши келди ва ҳатто жаҳли чиқиб, баъзи солдатларга ўшқириб берди ҳам.

Аравалар, машиналар, танклар Адолат олдидан секинлаб ўтардилар. Шофёрлар, танкистлар кабинкалардан бошларини чиқариб, регулировкачи қизга сигнал билан салом берар, ҳарбий честь бериб ўтардилар. Баъзи бир шофёрлар шлагбаумга яқинлашганда машиналарини тўхтатиб, моторни ўчириб, ҳар хил нарсаларни баҳона қилиб йўл сўрабми, гап сўрабми, гўзал қиз олдидан кетолмасдилар. Агар Адолат: «Ўртоқ шофёр, машинани йўлдан олинг!» деса, улар «мотор қизиб кетди» дер эдилар. Баъзи шофёрларнинг машиналари албатта «ВАД — 25»га келганда атайлаб «бузилиб» қолар эди...

— Тезроқ жўнанг, бўлмаса машинангизни ВАД га топшириб, ўзингизни командир олдига олиб бораман,— деб қичқиради Адолат.

Адолатнинг бу талабига баъзи шўх йигитлар:

— Майли, сиз билан бирга нариги дунёга боришга ҳам тайёрман! — деб жавоб қиласди.

Адолат бўш машиналарни, албатта, орқасига қайтариб, шлагбаумни тоннажига лойиқ юки бор машиналаргагина очар эди. Неча-неча шофёрлар унга атирупа, ироқи совун, крем келтириб совға қилмоқчи бўлардилар. Адолат уларга «раҳмат» дер, лекин ҳар қанча ялиниб-ёлворсалар ҳам, совғани олмас эди.

— Шу қизнинг ҳам севгани бормикин? — дерди баъзи солдатлар.

— Шу ўжар қиз ҳам севишни билармикин?

Адолатга кўзи тушган, иши тушган ва ишқи тушган

Йигитларнинг ҳаммаси ҳам ана шундай хаёлнинг асири эди.

Аммо номи тилдан тилга ўтиб, бутун фронтга довруғи кетган бу қизнинг ўйида фақат Нормат кезарди. Адолат фронтга кетаётган ва фронтдан келаётган кишилар орасидан биргина Норматни қидиради. Шлагбаумдан ўтадиган командирларга, солдатларга ва шофёрларга биринчи марта берадиган саволи: «Ҳужжатингиз? путёвкангиз?»— бўлса, иккинчи саволи: «Қисмингизда ўзбеклар борми?»— деб сўрашдан иборат эди. Улар «бор» ёки «бilmадим» деб қисқа жавоб қайтарар, аммо ўша ўзбекларнинг исми-фамилияларини айтиб беролмас эдилар.

— Қанақа ўзбеклар? Қаерлик?..

— Олов йигитлар экан. Хўп иш кўрсатишяпти. Баъзилари орден ва медаллар олдилар... Аммо қаерлик эканини билмаймиз,— дерди солдатлар.

Адолат йўловчилардан бир неча марта: «Нормат Жабборов деган солдат борми?» деб сўрамоқчи ҳам бўлди-ю, лекин тили бормади.

— П-Я 11 698 деган адресни биласизми?

— Адресслар ўзгарган...

— Сиздан бир нарсани сўрасам айтасизми?

— Жоним билан, сўранг, яхши қиз,— деди шлагбум олдила тўхтаган машина кабинасидаги майор.

— Қисмингизда ўзбеклар борми?

— Ўзбеклар йўқ. Аммо грузин, армани, озарбайжонлар кўп. Кўшини полкда қозоқлар ҳам бор.

— Ўртоқ майор, биринчи батальоннинг ошпази ўзбек,— деди майорнинг ёнида ўтирган шофёр, Адолатга кулиб қараб.

— Мен сўраётган одам ошпаз эмас.

Бу машина ҳам ўтиб кетди.

Хуллас, Адолат Норматдан хабар тополмади...

Эрталаб постга кетаётганларга рота командирининг шахсан ўзи йўл-йўриқ берди.

— Бугун айниқса ҳушёр бўлинглар!— деди лейтенант.— Вязьма, Юхнов ва Можайск атрофларига душман қўпарувчи парашютчилар туширибди. Ана шу парашютчиларнинг баъзилари катта йўлларда фронтга бораётган қисмлар ҳақида радио орқали сигнал бериб турибдилар. Битта ҳам машина, битта ҳам одам текширилмай қолмасин!

Адолат постга келнши билан командир айтган парашютчилар, жосуслар ҳақида ўйлай бошлади. У одамлар ва техниканинг бир жойга тўпланиб қолишига йўл қўймаслик учун битта ҳам машина, битта ҳам одамни тўхтатмай. ҳужжатини текшириб, шлагбаумдан тез-тез ўтказиб туришга ҳаракат қилди.

Қор учқунлаб турибди. Совуқ шамолда Адолатнинг юзи яшада қизариб, қўллари ёрилиб кетди. Машиналар бир оз сийраклашиб қолди. Адолат будкага кириб, қўлини чelакда алангаланиб турған кўмир чўғига тутган эди, совуқда тараған бўлған териси торсиллаб ёрила бошлади, бармоқ сұякларида оғриқ пайдо бўлди. Шу чоқ устма-уст сигнал эшишилди. Адолат югуриб будкан чиқди. Шлагбаумнинг икки томонида машиналар тўпланиб қолған эди. Адолат дастлаб фронтга кетаётган машиналарнинг ҳужжатини текширишга тушди. Фронтдан келаётган машиналар тоқатсиз сигнал бера бошладилар. Адолат уларнинг ҳам ҳужжатларини текшириб бўлгач, шлагбаум ёғочини кўтарди. Машиналар икки томонга гизиллаб ўта бошлади.

Адолат Москва томонга бораётган машиналар колоннасини синчиклаб кузатиб турди. Колоннанинг оҳиррогида шлагбаумдан гизиллаб «Виллис» ўтиб қолди. Адолат колоннани текшираётганда бу «Виллис»ни кўрмаган эди. Адолат қизил байроқча билан сигнал берди:

— Тўхта!

«Виллис» Адолатнинг сигналини кўрмагандек, визиллаб келаверди. «Виллис»да иккى киши ўтиради: бирин шофёр, иккинчиси майор. Адолат ўз ҳукмини ўтказиш учун машинанинг командирига қараб қичқирди.

— Уртоқ майор!

Машина тўхтади ва Адолат ҳужжат сўраши ҳамон майор планшетидан қоғозлар олиб узатди. Майор Гороховнинг шахсий гувоҳномаси, Москвага командировка, путёвка...

Адолат ҳужжатларга қадида, «бир оз туринг» деб будка томон юра бошлади.

— Нега бизни тўхтатасиз! — деди майор жаҳл билан. — Иш зарур.

— Путёвкани аниқлаші керак. Муддати ўтиб кетибди.

— Э, шундайми, адаш бериб қўйгандирман,— деди. майор, планшетни қидириб,— мана бу ёқда экан.

Адолат иккинчи путёвкани синчиклаб қаради, буниси эртаги куннинг чисолоси билан ёзилган эди. Адолат: «Тўхтаб туринглар, ҳозир келаман!» деди-да, командирга хабар қилиш учун будкага борди. Шу вақт «Виллис» тўсатдан ўрнидан жилиб қолди. Адолат трублаки ташлаб, «Виллис»га «Тўхта!» деб сигнал бера бошлади.

Майор Адолатга қараб: «ишимиз зарур, вақт йўқ» дегандек ишора қилди-да, қўлини силкитиб кетаверди.

— Тўхта!— деди Адолат, овозининг борича қичқириб.

«Виллис» тўхтамади. Адолатнинг хаёлига лейтенант айтган гаплар келди.. Адолат елкасидан автоматни олди-да, осмонга қараб ўқ узди. «Виллис» тўхтамади. Ўзининг сигналига итоат қилмаганини кўргач, Адолат автоматни «Виллис» га тўғрилаб туриб икки-уч бор ўқ узди. «Виллис» нинг баллони ёрилиб, ўрта йўлда кўндаланг бўлиб тўхтаб қолди. Майор машина кабинасидан йиқилиб тушди...

— Регулировкачи қиз майорни ўлдирди,— деб қичқириди шлагбаум олдида турганлардан бири.

Шу вақт шлагбаум олдидағи юк машинасидан калта пўстинли бир солдат тушиб, Адолатнинг қўлидаги автоматга ёпишиди.

— Бу ёқса бер, сенга ким берди бу қуролни?

— Қоч, яқинлашмал— деди Адолат жаҳл билан.— Мен постда турибман.

— Постда турган кўринганини отаверадими?

— Мен Москвани қўриқлаяпман! Қоч, яқинлашма менга!

— Москвани қўриқлагинг келса, фронтга бор, бу ерда нима қиласан?

Адолат унга овозининг борича бақириб берди:

— Қоч, қуролга тегм.

Пўстинли солдат Адолатнинг автоматини тортиб олмоқчи бўлган эди, Адолат унинг билагини тишлади ва солдатнинг қўлидан чиқиб, «Виллис» томон югурди. Пўстинли солдат юк машинасининг кузовидан милтиғини олиб, Адолатнинг орқасидан югурган эди, можаро чиққан жойга тўплланган командирлар уни тўхтатиб қолишиди.

Автомат товуши эшитилгач, регулировкачилар ротасида тревога күтарилиб, навбатчи взвод қизлари югуриб келишди. Рота командири ҳам пайдо бўлди.

— Нима гап? — деб сўради лейтенант Адолатдан.

Адолат командирга рапорт бериш учун қаддини ростлаган эди, шлагбаумга кўзи тушиб қолди. Шлагбаум посбонининг постдан кетгани ва ҳамманинг можаро билан банд бўлганидан фойдаланиб, кимдир ола ёғочни кўтариб қўйибди. Катта йўлга терилган машиналар ўзбошимчалик билан ўта ётибди. Энг олдинги машинанинг қанотида ҳалиги пўстинли солдат Адолатга мушт ўқталиб келмоқда.

Адолат жуда тезлаб келаётган яна бир машинанинг йўлини тўсди. Унинг ёнига Нина қўшилди, кейин бошқалар... Қизлар машиналарни тўхтатиб қолдилар.

— Ҳужжатларини текширгилар! — деди Адолат қизларга ва ўзи рота командирининг олдига борди.

Лейтенант ерда чўзилиб ётган новча. Қотмадан келган майорни кўздан кечирди. Афтидан, у машинадан бошини чиқариб кетаётган бўлса керак, автомат ўқи қулогининг оғқасидан тегиб, қаншаридан ёриб чиқибди, сочи қонга беланиб, ивиб кетибди. Шофёр соғ, аммо майорнинг тепасида тирик мурдадек гезариб турибди.

— Ўртоқ лейтенант, ижозат этинг! — деди Адолат, ҳодисани ҳикоя қи юқчи бўлиб.

— Автоматни топшир! — деди лейтенант унга ўшқириб.

Адолат қўлидаги автоматини рота командирига узаттаётган эди. лейтенант қўли билан Нинани қўрсатди:

— Жангчи Михайловага топшир!

Адолат автоматини Нинага узатди.

— Энди камарингни еч!

Адолат маҳкам боғланган камарини ечиб, узатди.

— Сўроқ бўлгунча блиндажга қамаб қўй буни! — деб буюрди лейтенант Нинага.

Нина Адолатни катта йўлдан ўрмон ичига — сўқиёз, ҳайдаб кетди.

3

Адолат ротадаги қизлар орасида Нинани севиб қолган эди; у билан бир жойда ўтириб, бирга овқатланарди. Энг яқин дўсти, сирдош дугонаси Нина энди уни блиндажга қамаб, эшикда соқчилик қилиб турибди.

— Нина, а Нина!

— Мен Нина эмас, сержант Михайловаман! — деди Нина жаҳл билан.

— Дугонангни шу қадар тез унутасанми-а, ўртоқ сержант?..

Нина бир нүқтага қараб турганча пинагини бузмай жавоб қилди:

— Мен сенга ўртоқ эмасман. Сен маҳбус, мен соқчи. Адолат жимиб қолди.

Блиндаж қоп-қоронғи. Унинг туйнуғи ҳам, ойнаси ҳам йўқ. Гаупвахта учун қилингани бу заҳ конада Адолатни қалтироқ босди. Маҳбус... Ватан олдидаги бурчни бажариш учун фронтга келиб энди ҳоли шуми² «Майорни отиб ўлдирдим. Ростдан ҳам мен совет офицери ни ўлдирдимми? Эҳтимол, у муҳим топширик билан кетаётган эди. Эҳтимол, уни фронтда кутишиб турган-дирлар. Унинг ҳам севган ёри, соғиниб кутаётган болалари бордир. Нима қилдим мен? Энди мени суд қилдилар, жазолайдилар...»

Адолат хўрлиги келиб, пиқиллаб йиглади. Кейин кўэ ёши фойда бермаслигини англаб, яна Нинага гапира бошлади.

— Сен ҳам ўшанинг ёнини оляпсанми, сержант? — деди Адолат. — Мен қонуний иш қилдим-ку, менга раҳминг келмайдими?

Нина индамади. Шундан кейин Адолат ўзининг ҳақиқий банди бўлганига ишонди-да, ерга чўққайиб ўтириб олди. Шу чақ унинг кўз олдидан туғилиб ўсган қишлоғи, далалар, йўллар, Москва, шлагбаум, юз берган ҳодиса, чўзилиб ётган мурда бир-бир ўтди... Кейин, энди бўладиган воқиаларни кўз олдига келтириша уринди. «Мени сўроқ қиласдилар... Нима део сўроқ қиласдилар, қандай айб қўядилар?..»

Адолат юраги сиқилиб, тоқати тоқ бўлиб, ўр идан турди ва блиндаж эшигининг ёруғидан ташқај та қаради. Ўрмон ўз жойида турибди, қор ҳамон ёғмоқда, катта йўлдан боягидек машиналар қисқа-қисқа сигнал бериб ўтаётиди. Ана, котелогини тарақлатиб поход кухняси томон ўтган икки қизнинг қораси кўриниб қолди. Ҳаёт тўхтагани йўқ, ҳаёт эскича лавом этмоқда. Фақат биргина Адолат шу ҳаётдан четда. У маҳбус...

Кўнгилсиз ҳодиса юз берган жойга ВАД бошкармасидан, Смерчдан вакиллар келишди. Смерч вакили

«Виллис» кузовидаги чамадонни олмоқчи бўлди. Чамадон жуда оғир эди. У, машинанинг шофёрига қараб, ёрдамлаш, деган эди, шофёрнинг юзи кесакдек гезариб кетди.

— Нима бу?..

— Майор... майорники...

Смерч вакили шофёрга буюрди:

— Чамадонни оч!

— Калити йўқ,— деди у,— калити майорда эди...
ВАД вакили майорнинг ёнини қарамоқчи эди, уни

Смерч вакили тўхтатиб қолди:

— Қўйинг, калитсиэ очамиз.

Смерч вакили чамадонни очишга уринаётганини кўрган шофёрнинг ранги яна ҳам оқариб кетди.

Смерч вакили чамадонни жойига қўйди-да, сиденини ағдариб, тагини қаради. Ундан бир қутича тошилди.

— Радиопередатчик,— деди Смерч вакили.

— Уликни машинага сол,— деб буюрди Смерч вакили шофёрга.

Шофёр мурданинг белидан кўтарди-да, чўзилтириб кузовга ташлади. Мурда икки букилиб қолди. Икки автоматчи шофёрни ўликнинг ёнига ўтқазиб, ўзларининг икки ёнига ўтиришди.

— Текширишни фронт штабида давом эттирамиз,— деди Смерч вакили, рота командирига.

Лейтенант Адолатни ертўладан чиқариш учун одам юборди.

Адолат қоронги ертўлада ётиб димиқиб кетди.

— Сержант, а, сержант!— дерди ялиниб Адолат.— Битта яхшилик қил менга!

Нина анча вақтгача индамай турди. Аммо дугонасининг ноласи кўксини тилгудек бўлди-да, сўради:

— Нима қилай?

— Ариза ёздим, шуни штабга юбор, бу ишни тезроқ ҳақиқат қилишсин.

Нина атрофга қаради, гаупваҳт олдида ҳеч ким кўринмагач, эшикни қия қилиб, қўлинни чўзди.

— Узат.

Адолат аризани тўрт буклаб Нинага узатаётган эди, югуриб келаётган кишининг дупур-дупур оёқ товушлари эшитилди.

— Сержант, сержант!..

Гүё Нинанинг қилаётган ишини лейтенант кўриб қолгану унга қарши жазо чопари юборгандек бўлди-да, Нина эшикни тақ эткизиб ёпиб, орқаси билан унга тиранниб олди.

Югуриб келган жангчи қиз шошилганидан дудуқланаб гапирарди:

— А-а... Адолат.... Адолатни чиқар!..

— Чиқарганим йўқ,— деди Нина унинг сўзини англамасдан,— қани чиқарганим?

— Чиқар, чиқариб юбор! Мана камари! Улдирилган майор бизники эмас экан. Фашист экан. Чиқар уни!..

Нина гаупваҳт эшигини катта очиб юборди. Адолат отилиб чиқиб, хушхабар келтирган жанговар дугонаси билан, Нина билан қучоқлаша кетди.

— Айтмадимми!— деб қичқирди Адолат.— Кўнглимга келган иш тўғри чиқмай қолмайди. Афсус...

— Ҳа, нега афсусланасан!

— Шоффёри тирик қолди.

— Уни штабга олиб кетишди.— деди жангчи қиз.—
Соф қутулмайди!

Адолат камарини боғлаб, Нинага қаради:

— Автоматни бер, постга бораман!

4

Адолат яна постда. У кечаги воқиадан кейин яна ҳам ҳушёр бўлиб қолди. Бугун Москва — Минск йўлида ҳаракат кечагидан ҳам зўр. Кечаси билан ҳамма ёққа ларза солиб, танк колонналари, оғир тўплар ўтди. Мотопехота колонналарининг ҳам кети узилмаётиди.

Адолат қизил байроқчасини баланд кўтариб, фронтга кетаётганларга оқ йўл тилаб қолаётиди.

— Ана у қизни қаранг, ана у қизни қаранг!— деди, машинадаги солдатларнинг бири.

— Ким? Қани?

— Ана, олдимизда. Шлагбаумда.

Ҳамма шлагбаум томонга қаради.

— Адолат! Адолатхон!..

Адолат бу овознинг қаёқдан чиққанини билмади ва узундан-узоққа чўзилган колонна машиналаридаги солдатларга олазарак бўлиб қаради.

— Адолатхон! Адолатхон!— деб Аллақайси машинадаги жангчи овози борича қичқирарди. Машина шлаг-

баум олдига келганда, ҳалиги қичқирған солдат ўзини машинадан отмоқчи бўлди-ю отолмади: машина шлагбаум олдидан ғизиллаб ўтиб кетди.

Адолат овоз эгасини танимади. Унинг юраги дукиллаб уриб кетди. Нормат эмасмикин?.. У, постда турганини ҳам унугиб, машинанинг орқасидан анча жойгача югуради. Лекин етолмади. «Ким бўлди экан мени таниган солдат?— деб ўйларди Адолат.— Нормат бўлса, шунчалик бир қичқириб, қўл силтаб ўтиб кетавермас эди. Ҳамқишлоқларимданми?.. Ким? Қаёқса боряпти у? Норматнинг ёнигами, уни кўрадими? Кўрса кошки эди...»

Эртаси куни Адолат яна постга чиқди, яна одатдаги ишини бошлади.

— Тўхта!

Солдат қиз қўлидаги қизил байроқча кўтарилганини кўрган шофёр эвакомашинани контролъ пунктдан юз қадам нарироқда тўхтатди.

— Нима учун бизни тўхтатяпсан? Машина эвакогоспиталники, оғир ярадорларни олиб кетяпмиз, Тезроқ Москвага етказишимиз керак!— деб кабинада ўтирган хотин Адолатта тушунтира кетди.

— Машинанинг командири ким?

— Мен, ўзим,— деди ҳарбий формадаги хотин.

— Ҳужжатингиз?

— Қандай ҳужжат? Мен эвакогоспиталдан,— деб такрорлади у ва Адолат ушлаб турган қўл фонарининг нурига қарай олмай, қўзини яширди.

— Путёвка керак. Қанча ярадорни қаёқса олиб кетаётганингиз ҳақида ҳужжат керак.

Машина командири, кекса ҳарбий врач аёл регулировкачи қизнинг талабчанлигидан ранжиди.

— Энлиги ёшлар оқ сочингни ҳам ҳурмат қилмайди,— деди ҳарбий врач.— Қизим, совқотдим. Кел, қўйиб юбора қол!

— Хафа бўлманг, онажон...

— Мен онанг эмасман!— деди жаҳли чиққан хотин.— Мен ҳарбий врачман, командирман!

— Кечирасиз, ўртоқ ҳарбий врач, ҳужжатингизни кўрсатинг, мени ушламанг, яна машиналар келяпти.

— Мана, командировка қоғози.

Адолат командировка қоғозини қўл фонарининг ёруғига солиб ўқиди.

— Энди машинадаги кишиларнинг рўйхатини кўрсатинг.

— Нега тиқилинч қила берасан?— Кекса ҳарбий врачнинг тоқати тоқ бўлди-да, совқотган оёқлари билан кабинани тепкилади.— Юр! Юравер!— деди у, шоферга қараб.

Адолат машинани ўтказиб юборди. Аммо нечундир кўнгли тўлмади. Унинг назарида, Нормат шу машинада ярадор ётган эди-ю, Москвага кетиб қолди. Адолат уни кўролмай қолгандек бўлди...

Йигирма иккинчи боб ГАПНИ ГАПИР УҚҚАНГА

1

Бегимхон Октябрь байрамининг эртасига никоҳ тўйимиз бўлади, деб 6 ноябрда даштдан кетганича, мана беш кун бўлди, ҳали қайтиб келгани йўқ. Комсомол ёшлилар бригадаси колхозда биринчи бўлиб пахта тайёрлаш планини бажаргандан кейин, давлатга яна қўшимча беш тонна пахта бериш мажбуриятини олган эди. Далада пахта тугади, энди кўрак узиляпти. Ёғингарчиликдан пайкалга кириб бўлмай қолди. Олимжон қўшимча мажбуриятни ҳар бир кишига бўлиб берди. Бунинг учун ҳар бир теримчи, энг ками ярим тоннадан кўрак узиши лозим. Қизлар Олимжонни ўртага олишиб: «Нега Бегимхонга жавоб бериб юбордингиз?» деб қисталанг қилдилар.

— Тўй қиласиз, деб эди...

— Ўйнашга ишониб эрсиз қолади у Бегим,— деди Шакархон ачитиб.— Тўйдан жар согланига икки ой бўлди. Ишонмаймиз унинг гапига!

— Қўсагини узсин, унинг учун токайгача биз лой кечамиз!— деб бобиллаб берди яна бир қиз.— Бўлмасз Бегимнинг хуржуини ҳам сизнинг бўйнингизга иламиз..

Қизлардан ҳадеб дакки ейберган Олимжон Бегимхонни қидириб қишлоққа кетди. Бегимхон ўз уйда йўқ эди. Қўни-қўшнилар Бегимхоннинг қаердалигини аниқ айтиб беролмадилар. Кимдир: «Бегимхонни Бозоровнинг ҳужрасидан топасиз» деди.

Олимжон гуларга келиб, Бозоровни ҳам, Бегимхонни ҳам тополмади. Бозоровнинг ҳужрасида бегона хотин ўтиради, Уй бесаранжом...

- Бозоров қаерда? — деб сўради Олимжон.
- Кўчага чиқиб кетди. Нима ишингиз бор эди?
- Зарур ишим бор эди.
- Эргаш ака деган сиз бўласизми?
- Йўқ.
- Менга Эргаш ака керак эди,— деди бетона хотин.— Уни кўрсантиз, айтиб қўйинг, колхозчиларини тийиб олсин. Ҳамма жон бериб, жон олаётган пайтда унинг колхозидаги баъзи хотинлар бирорларнинг эрини йўлдан уриб, бахтини ўғирлаяпти.
- Олимжон гап нима ҳақида ва ким тўғрисида бораётганини тушунди да, лабини тишлади.
- Қани ўша, бирорнинг бахтини ўғирлаган хотин?
- Менинг устимдан арз қилгани кетди. Бирорнинг эрини қўйнидан суғуриб олиш учун, болаларини тирик етим қилиш учун арз қилгани кетди. Қаёқдан чиқди бундай зўрлик? Бу уруш бошимизга бир бало бўлди. Ҳамма ёқ остин-устин...

Олимжонни тер босиб кетди. У бетона хотинга нима деб жавоб қилишини билмай, секингина орқасига қайтди.

2

Саккизинчи ноябрь куни кечқурун бўлиб ўтган воқия қўйидагича эди.

Бозоров Аравондаги хотинини «Гулистон»га кўчириб келаман деб, унга кўп ваъда қилган бўлса ҳам, лекин орадан ҳафталар, ойлар, йиллар ўтиб кетишига қарамай, унинг ваъдаси ваъдалигича қола берган. Хотин унинг ваъдасини эслатиб, бир неча бор хат ёэди. Бозоров бу хатларга: «Ниманг кам сенинг? Емак-ичмагингни юбориб турибман, кийим-кечагинг етарли. «Гулистон» да ётар жойим йўқлиги учун сени чақира олмаяпман. Бундан ташқари, иш шу қадар кўлки, бош қашлагани қўл тегмайди. Нима қилай, уруш... Яхшиси, худога шукур қилиб ўтиравер» деб жавоб ёэди. Байрам арафасида хотинидан: «Болалар соғинди, сизни кўришга интизор!» деган хатлар келавергач, Бозоров уларни тинччиш учунми, «б ноябрь куни кечаси бораман, болалар билан байрамни бирга ўтказиб қайтаман» деган жавоб юборди. Болалар икки кунгача дарвоза тагида, катта қўчада йўл пойладилар. Она хуноб бўлиб, болаларини

қўшнисига қолдирди-да, ўзи йўловчи машина билан «Гулистан»га жўнади.

«Гулистан»га келган куни база қоровули уни ўз эри-пинг ҳужрасига киритмай, тўппа-тўғри омборга олиб кирди ва «Шу ерда ўтириб туринг, мен Бозоров акамни топиб келаман» деб чиқиб кетди. Омборчи ҳадеганда келавермади. «Ишим кўп, бош қашлатани қўл тегмайди» деганича ҳам бор экан, бечора байрамда ҳам бир жойда туролмас экан» деб эрига ачинган бўлди. Унинг қорпи оч эди. Омбордаги қопларни, яшикларни қидириб егулик нарса тополмай, эшикнинг ёригидан қаради. Базанинг ҳовлисида ҳар хил овозлар эшитилди. Унинг назарида, мастрлар бир-бири билан айтиша-ётгандай кўринди, кейин жанжал кучайиб, қий-чув бошланди. Кимдир «дод!» деб қичқирди. Эркак кишининг овози эшитилгач, дод солган хотиннинг уни ўчди. Улар бир-бирига осилиб, шу ердаги уйларнинг бирига кириб кетишли.

Можарони Бегимхон бошлаган эди.

Саккизинчи ноябрь куни Бегимхонни Бозоровнинг ҳужрасига киритмадилар. Қоровул унга: «Бозоров Аравонга кетди» деди. Бегимхон бунга ишонмади. Унинг ишонмасликка асослари бор эди. Биринчидан, Бозоровнинг ўзи унга: «Саккизинчи ноябрь куни келинг» деб айтган... Иккинчидан, Бозоров миниб юрадиган сельпо извоши яқиндагина қўнгироқларини жаранглатиб база саройига кириб кетди. Ҳаммадан ҳам шубҳалиси шуки, қозонда шўрва қайнаб турибди. Каюв пиширилган кўрачадаги чўғ ҳам ҳали ўчиб битгани йўқ. Демак, Бозоров ҳужрада. Аммо ёлғиз эмас...

Бегимхон ҳужра эшигини дастлаб бармоғи билан чертди, кейин қўли билан тиқиллатди; ичкаридан садо чиқа бермагандан кейин, оёғи билан тепа бошлади. Афтидан, ичкаридагилар «очмасак қутулмаймиз» деб ўйлашди шекилли, эшикни очишга қарор қилишибди, лекин Бозоровнинг ўзи унга рўпара бўлишдан қочди. У меҳмонига: «мени йўқ дент» деди-да, ўзи каравот тагига бекинди.

Эшикни нотаниш жувон очди.

— Ким керак сизга?

Бегимхон уни кўриш билан ранги бўзариб, лабини тишлаб қолди, кейин: «Сен ўзинг кимсан?!» деди унга кўзларининг пахтаси чиқиб.

- Мәҳмөнман...
- Кимнинг меҳмөнисан, бузуқ?
- Вой, вой, шўрим қурсин, нима деяпсиз?
- Нима қиляпсан бу ерда?
- Мәҳмөнман деяпман-ку, Бозоров акам байрамга чақирган эдилар. Бозор бошидан меҳмон бўлиб келдим.

Бегимхон ўзини тутолмади. «Мана сенга меҳмондорчилик» деди-да, эшикни паналаб турган жувоннинг юзига бир тарсаки солди.

— Қани ўзи, қани ўша бойвачча?— деб бақирди Бегимхон.— Топ, мочағар, бўлмаса, гўштингни тилкапора қиласман!

— Ана, ана...— деди меҳмон жувон, Бегимхоннинг авзойидан қўрққанидан, Бозоров яширинган жойни кўрсатиб.

Бозоров каравотнинг тагидан судралиб чиқди.

— Нега мени уйғотдинг, Бегим?— деди у пинагини бузмай.

— Ошингиж ҳалол бўлса кўчада ичинг! Қачондан бери каравотнинг тагида ухлайдиган бўлиб қолдингиз, бойвачча!

— Секинроқ гапир, Бегим, секинроқ...

— Нега секин гапираман. Ваъда қани? Вафо қани?

— Ҳеч кимдан қарзим йўқ.

Бегимхон Бозоровга чақчайиб қаради. Бозоров индамай этигини кийди ва беқасам тўнини елкасига ташлаб, кўрпачага ёнбошлади-да, дастурхондаги шишани олиб, бир пиёла тўлдириб ароқ қуйиб иди.

— Сен ҳам ичасанми?

— Ичмайман. Севганингиага беринг.

Бозоров Бегимхонга парво ҳам қилмай, ўзини ўзи сийлаб, овқатланаверди. Тобора фигони фалакка кўтарилаётган Бегимхон ҳужра бурчагида қисилиб турган атлас кўйлакли хотинга ёпишди.

— Сен мочағарнинг ишинг бу!..

Атлас кўйлакли хотин қочиб эшикка чиқди. Орқасидан қувлаб чиққан Бегимхон айвонда унинг сочидан бураб, юз-кўзини юмдалай бошлади. Бозоров уларни ажратгани чиққан эди, Бегимхон унга ўшқириб берди:

— Киринг ичкарига!..

Олишувда енгиб чиққан Бегимхон ҳужрага кирди. У ҳужрада тўкилиб-сочилиб ётган нарсаларни йиғиши-

тириб, жой-жойига қўйди, Бозоровнинг каравотидаги рўжони йигиб олди-да, юмалоқлаб, даҳлизга ташлади, кейин шкафдан янги оқ рўжо олиб каравотга ёзди.

— Мана бу ишинг жойида, Бегим,— деди Бозоров кулиб.— Ахир, шу ишингни жанжалсиз қилсанг бўлмасмиди?

Бегимхон Бозоровнинг қаршиисига ўтириб, энди гап бошлаган эди, кимдир деразани жонининг борича икки қўллаб тақиллата бошлади. Бегимхон бўзрайиб, Бозоров бақрайиб турганда унинг хотини кириб, Бегимхонга отилди.

— Кимсан? Нега менинг эримнинг олдида ўтирибсан?— деди у муштини ўқталиб.

— Сен ўзинг кимсан?— деб Бегимхон унга қараб ўшқирди.— Ҳозиргина бирингни қувган эдим, энди яна бирингга йўлиқдимми!

— Нега эримга эга чиқдинг, бетинг сидирилса бўлмайдими, беор! Болаларимни тирик етим қилиб, нима авзим топасан, беҳаё?..

Бегимхон нимадир демоқчи эди, Бозоровнинг хотини унинг гажжакларидан тортиб юла бошлади. Ҳеч қачон бирорга сўз бермаган Бегимхон, энди ноилож қолиб: «войдод!» деб бақирди-да, ўзини Бозоровга отди.

— Дод! Дод! Мени қутқазинг бу кундошлардан!..

Шу вақтгача лол бўлиб турган Бозоров энди тулкилик қилишга ўтди:

— Ийи, ийи, ке, хотин. Қачон келдинг!? Нимага келдинг?..

Хотин эрига танбиҳ бера кетди:

— Иш кўп, бош қашлагани қўлим тегмайди, деб ёзмабидингиз? Қўрдим, нима иш билан банд эканингизни... Болаларингизнинг кўз ёши кўр қилмайдими сизни? Одамлар қон кечайтган чоғда сиз мойга ботиб, нон тепиб ётибсиз. Уволидан қўрқмайсизми бу исрофгарчиликнинг? Бу ўйнашни қайдан топдингиз?

— Уйнаш эмас, оқсоч. Кир-чир, об-овқатимга қараб туради...

— Нега мени оқсоч, дейсиэ?— деб Бегимхон бобиллаб берди.

— Ҳа, кундошман дегин ҳали?— деб Бозоровнинг хотини Бегимхонни яна юмдалай кетди.

Бегимхон чумчуқдек пир этиб айвонга чиқди-да,

орқасидан оташкурак кўтариб қувлаган хотиндан кўчага қочди.

— Арз қиласман устингдан... Кунингни кўрсатаман!.. Дод!.. — деб пўписа қилди у.

Бегимхон гузардан тезлаб ўтиб, катта йўлдан бедана юриш қилиб кетди.

3

Бегимхон йўл-йўлакай ўзи-ўзига панд бериб борди... «Шу ҷоққача биронга сўзини бермаган, бирондан гап эшиитмаган Бегим, нотаниш хотиндан дакки единги, у алвастининг ола-кула кўзларидан қўрқиб, калтагидан қочдингми? Одамлар нима дейди, даладаги қизлар нима дейди, мабодо Адолат эшитиб қолса: «Ўла, ҳолинг шу экан-ку» демайдими? Ҳу, яшшамагур Бозоров... Ҳар қишлоқда биттадан хотини бор экан унинг. Кенжасини катта хотинига калтаклатиб қўйиб ётишини қаранг-а, у гўрсўхтанинг! Мен оқсоқ эмишман унга,вой бемаъни-еий... Қир-чир ювиб юргани хизматкор қилиб олган эмиш мени... Тилинг кесилса бўлмайдими, йигит ўлгур!..»

Тўсатдан девор орқасидан ит ҳуриб қолди, Бегимхоннинг хаёли сочилиб кетди. У, кўйлагининг ёқасини очиб, кўксига «туп, туп» деб қўйди-да, қадамини тезлатди.

Йўл сув сепгандек жимжит. Бегимхоннинг хаёл ипни яна чўзилиб кетди. Айб Бегимнинг ўзида эмасми? Нега ўзини ўзи калтаклатиб қўйди? Нега ўзини ўзи Бозоровга ҳақоратлатиб қўйди? Оҳ-воҳ, деган хушомадларни айтиб, ширин ваъдалар қилган кишининг оғзи сасиган чоғида нега тек турдинг, Бегим? Нега қочдинг у ердан? Қайтиб бормасликни бўйнингга олиб қочдингми? Ҳолинг шу экан, нега унга ёпишдинг, нега эртага тўй, деб эълон қилдинг. Энди одамларнинг юзиға қандай қарайсан? Қайт орқангга, ўзингни кўрсат, Бегим!

Бегимхон орқасига қайтмоқчи бўлиб қайрилиши ҳамон, йўл устида шарпа сезилди ва аллаким яқинлашиб кела бошлади.

— Қори... Соҳиб қори келяпти... Кўзи қурсин унинг, тили қурсин. Чиён нима-ю у нима!..

Бегимхон Қорига кўринмаслик учун девор паналаб тез юриб кетди-да, қия очилиб турган эшикка ўзини урди.

Бу Норматнинг ҳовлиси эди. Айвон олдида майдачуда иш билан ивирсиб юрган Тўхта хола бемаҳалда бош яланг кириб келган Бегимхонни кўриб, ҳангманг бўлиб қолди.

— Бемаҳалда нима қилиб юрибсан, Бегимхон?

— Маслаҳатга кирдим, хола.

Тўхта хола Бегимхоннинг феълини яхши билар эди. Шу ёшга етиб, бирордан маслаҳат сўрамаган, ўз билгича иш тутадиган бу ўжар жувоннинг бугун, қоронги кечада қандай маслаҳати чиқиб қолибди?..

«Илоҳим, яхшиликка кўринсин унинг тунги қадами...»— Тўхта хола шу гапни кўнглидан ўтказди.

— Ҳа, тўйга айтиб келдингми?

— Тўйнинг азаси чиқди,— деди Бегимхон, айвон пешига ўтиаркан.— Бозоров мени лақиллатиб юргая экан.

— Тақдир, айланай, тақдирга бир нима деб бўладими... Энди нима қилмоқчисан?

— Адабини бермоқчиман!

— Чакки қиласан. Бемаслаҳат иш бўлипти. Энди бу ёғини маслаҳат билан қилганинг маъқул. Айб ўзингда. Энди ҳеч нарсани кўрмагандек, ишингни қилавер. Ёниғлиқ қозон ёниғлигича қолади.

— Нега айб менда бўлади, хола, мен ўғирлик қилибмани? Одам ўлдирибмани?

Тўхта хола Бегимхоннинг бетга чопарлигини билгани учун, «есиэ сенга маслаҳат» дегандек, тилини тияқолди. Аммо Бегимхоннинг очилган оғзи ёпилавермагач, тек туролмади.

— Бирорнинг эрини купла-кундуз куни тортиб олмоқчи бўласан-ку, тагин бу ўғирлик эмасми?— деди Тўхта хола ачитиб.— Сенга ўхшаш, эри фронтга кетганлар камми қишлоқда? Еш чоғида тул қолганлар йўқми сендан бошқа? Ҳеч ким «қора қофоз» қўлига тегиши билан сенга ўхшаб эр қидираётгани йўқ-ку?

Бегимхон гезарган лабини буриб, тескари қаради:

— Ақлим бўлса, келиб-келиб сизга ёрилармидим? Норматнинг доғида доғланиб, жизғанагингиз чиққанини билардим-ку...

— Норматни ўртага солма, Бегим. Нормат жон бериб, қон кечиб юрипти. Газетада ўқидингми ўзинг? Душманнинг учта ҳужумини тўхтатиб қолишипти бо-

лаларим. Москвадан нари қувлашиб юборишипти ёвни, билдингми? Норматни ўртага солма!

Бегимхон мулзам бўлиб, бўшашиб ўрнидан турдида, бир аҳволда кўчага чиқиб кетди. Умрида эшигига занжир солмаган Тўхта хола унинг орқасидан кўча эшикни занжирлаб, ҳалқасига чўп тиқиб қўйди.

— Гапни гапир уққанга, жонни жонга суққанга!..— деди кампир, шум оёқдан тезроқ қутулганига севиниб.

Илгир ма учинчи боб

ТОР-МОР

1

1941 йил 6 декабрь кечаси Москва вақти билан соат 11 дан 45 минут ўтганда взвод жангчилари Тургенев блиндажига рация ёнига тўпландилар.

— Биласизларми,— деди Вания Великан,— гоҳо музика эшитгинг, қўшиқ тинглагинг келади. Қелинглар, ҳордиқ чиқариш учун ҳам шу рацияни сақлаб юрайлик. Блиндажда занглаб кетяпти киши.

— Эрта-индин ҳужумга ўтсак, уни ким кўтариб юради?— деди Отступний.

— Кўтариб юраверамиз!

— Мен сизларга кўтартириб қўймайман,— деди Великан.— Узим аравада олиб юраман.

Шундай қилиб, иккинчи взвод жангчилари бу рацийни Берлингача кўтариб боришга қатъий қарор қилдилар. Ҳар куни эрталаб, кечқурун блиндаж рациядан ахборот, музика эшитувчиларга тўладиган бўлди.

Совет Информация бюросининг бугунги ахбороти немисларнинг Москвани қуршаб олиш, уни ишғол қилиш планининг тор-мор этилганлигига бағишлиланган эди. Хушхабар ўқинган дикторнинг ҳар бир сўзини жангчилар қарсак билан кутиб олдилар.

— Жим! Шовқин қилманлар!— деди Великан.

— Шунча хурсандчиликни қандай қилиб блиндажга сиғдириб бўлади?

— Эшитишга ҳалал берма!

Бугунги хабар оғиздан оғизга, тилдан тилга кўчиб, бир нафасда ёйилди. Чиндан ҳам, буюк зафар қозонил-

ган эди. Герман қўшинларининг Москвани ўраб олиш ва ишғол қилиш учун 16 ноябрда бошлаган учинчи ва охирги ҳужуми тўхтатилган. Фашистларнинг бу ҳужумда қатнашган 13 танк дивизияси, 33 пиёда дивизияси, 5 мотодивизияси, жуда кўп бошқа хил қўшинлари тормор қилинди. 777 танк, 534 замбарак мажақланди. 57 минг 170 фашист қирилди.

— Бу рақамларга ҳеч қандай изоҳнинг кераги йўқ,— деди Тургенев.

Қизил Армия қўшинларининг умумий қарши ҳужумга ўтиши учун катта имконият, қулай фурсат туғилган эди. Шу имконият ва фурсатдан фойдаланиб, Қизил Армиянинг Москва атрофидаги қўшинлари деброда қарши ҳужумга ўтдилар. Москва мудофаачила-ри ғарбга йўл олдилар. Гитлерчилар фронт бўйлаб тартибсиз чекиндилар.

Ҳужумнинг тўргинчи куни генерал Лелюшенко қисмлари Рогачевни озод қилди ва Клинни қуршаб олди. Генерал Кузнецов дивизиялари Яхромани ишғол этди. Генерал Погодин полклари Истрага кирди. Генерал Белов отлиқлари Солнечногорскии эгаллади, генерал Говоров қисмлари ҳам икки шаҳарни душмандан тозалади. Хуллас, Қизил Армия бутун салобати, қудрати билан қўзғалди!

Немислар Чайка дарёсининг Ғарбий қирғогига жонжаҳдлари билан ёпишиб, шу ерда мудофаада туриб қолишга уриндилар.

Генерал Погодиндан: «Тепалик қўлдан берилмасин! Қўпприкни сақлангиз!» деган радиограмма келгац, Юрьев билан Черницов тепалик мудофаасини янада кучайтиридилар. Самолётларимиз чекинаётган немисларнинг дарёдан ўтишини қийинлаштириш мақсадида, уларнинг кечувларини, кўпприкларини бомбардимон қилиб турди. Партизанлар дарё музларини портлатиб, душманнинг ғарбга ўтишини қийинлаштиридилар.

2

Москва атрофидан чекинаётган немис қўшинлари дарёга яқинлашгач, сўнгги вақтларда тикланган паром-кўпприк олдиди катта техника: танклар, артиллерия, автомашиналар, фургонлар ва пиёда қисмлар тўпланиб қолди. Уч томондан келаётган колонналар шу жойда уюла бошлади.

Совет бомбардимончи, штурмчи ва қиравчи самолётлари ердаги оломон устида пайдо бўлиб, душман техникинди аскарларини тинимсиз олов ёмгири билан ерпарчин қилиб ташлай берди. Немисларнинг кўприги бузилиб, йўл кесилди. Қий-чув, дод-фарёд Тургенев взводи блиндажларидан ҳам эшитилиб турди.

Кундуз куни шундай ўтди.

Душман сапёрлари тун бўйи кўприк тузатиш билан овора бўлдилар. Эрталабгача дарё бўйида бутун бир армиянинг сон-саноқсиз техникаси тўпланиб қолди. Кўпгина полклар кўприкнинг битишини кутмай, дарё кечиб ўта бошладилар. Кўп солдатлар совуқ сув қаърига чўкиб кетди.

Эрталаб Москва вақти билан соат бешда шарқий қирғоқдаги немис қўшинлари Юрьев қўлидаги кўприкни эгаллаш ҳақида буйруқ олдилар. Чайка дарёсининг бу кўприги темир-бетондан қурилган, атрофи темир панжара билан ўралган эди. Юрьев бу кўприкка жуда катта эътибор бериб, унинг атрофларини душман танклари ва пиёдаларини портлатиш учун мина майдонлари билан ўраб олган эди.

Немисларнинг кўприкка ҳужумини танклар колоннаси бошлаб берди. Ҳужум ҳеч қандай разведкасиз бошланди. Авангардда бораётган танклардан иккитаси минага учраб портлагач, бутун колонна йўли тўсилиб, тўхтаб қолди. Шундан кейин душман қўмондонлиги шарқий қирғоқдаги тўплар билан минамётларни ишга солди. Юрьевичлар мудофаа қилиб турган тепаликдаги батареялар душман тўплари тингунча индамай турди. Немислар тепаликни ярим соат тўрга тутгандан кейин, Юрьев батареялари ёпиқ позициялардан туриб ёв устига жаҳаннам оташи ёғдирди. Ҳар икки томон ҳам кўприкка зарар етказиши истамас, кўприк ҳар икки томонга ҳам зарур эди.

Немис қўмондонлиги кўприкни олиш учун иккита томонлама ҳужум бошлади. Дарёни кечиб ўтган пиёда қисмлардан бир неча батальон шимол томондан, яна бир неча батальон шарқдан атака қилди. Тепалик мудофаачилари душманнинг икки томондан қилаётган сиқувига бардош бердилар.

Юрьевнинг:

— Сабот сақланглар! Қизил Армия келяпти! — деган сўзлари жангчиларни руҳлантириб турди. Окопма-окоп

тарқалған бу хүшхабар жаңгчиларнинг кучига күч қўши.

Тонг отиши билан немисларнинг атакаси қайта-қайта тақрорланиб турди. Улар катта талафот бериб, кўпrikнинг шарқий чеккасидаги тикан симли фовларни эгалладилар. Аммо йўлдаги миналарни тозаламасдан туриб танкларни кўприкдан олиб ўтиш мумкин эмас эди.

Ҳавода яна моторлар гуриллаб қолди. Самолётлар кумушдай ярқираб, кўкда парвоз қила бошлади. Окопдан қараб турган Нормат уларнинг қанотларидағи қизил юлдуз тамғаларини кўриб қолди.

— Самолётларимиз! — деб қичқирди Нормат.

Немис қўшинлари тўпланган йўл устида бирин-кетин шўнгигб, бомба ташлаётган самолётларимиз ўз ишини тутатгач, шарқдан танклар овози эшитилди.

— Танкларимиз!

Бу танклар ҳужум қиласаётган Қизил Армия қўшинларининг олдинги отрядлари эди. Немислар совет танкларига қаршилик кўрсатолмади. Душманнинг орқароқдаги баъзи танклари ва тўплари бир-икки марта ўқчиқаришга улгурди, холос. Талвасага тушган немислар техника ва қуролларни ташлаб, ўзларини дарёга ота бошладилар. Дарёдан фақат бир неча юз немисгина сузиб ўтолди, қолганлари эса, парча-парча муз тагига чўкиб ва тепаликдан отилган пулемётлар ўқига учраб, ҳалок бўлдилар.

Немис қўмондонлиги рациялар орқали: «Кўприкни қўпориб ташла! Кўприкни қўпориб ташла!» деб эфирга хитоб қила бошлади.

Совет танкларининг кўприк олдига келиш йўли тўсилган эди. Фашистларнинг ташлаб кетган танклари, машиналари, тўплари уюм-уюм бўлиб ётарди. Уларнинг баъзилари миналардан портлаган, бошқалари артиллерия снарядлари билан ёндирилган эди.

— Қочаётган немисларга қараб залп! — деди Армия авангард отрядининг командири ва ўзи танк башнясидан тушиб, кўприк томонга югурди. У немис машиналарини оралаб бораркан, ҳар қадамда ўлик ва ярадор немислар устидан ҳатлаб ўтишга мажбур эди. Авантгард отряд командири Юрьев қисмига етиб олишга шошиларди. Шу маҳал бирин-кетин икки марта кучли портлаш эшитилди. Командир ўзини бир немис танкининг орқасига олди. Портлов зарбасидан қора крестли танк тебраниб кетди.

Портлаган кўприк олдида совет танклари кўриниши билан окоп ва блиндажлардан чиқиб келаётган тепалик мудофаачилари милтиқларини баланд кўтафиб: «ур-ра!» деб қичқира бошладилар. Дарё бўйидаги окоплардан бир неча жангчи кўтарилиб чиқиб, кўприкнинг букилган ва йиқилган қанотларига тирмashiб, дарёдан ўтди ва совет танкчилари билан қучоқлашиб кўриша кетди.

Юрьев блиндаждан чиқиб, дарё бўйига келди. Танк экипажи авангард отрядининг командири Юрьевни кўриши билан, танкдан чиқиб унга отилди. Икки офицер бир-бирлари билан қучоқлашиб кўришиб, рус одати бўйича, уч мартадан ўпишдилар.

3

Соат йигирма тўру ноль-ноль минутгача ҳамма тай-еरгарлик кўрилиб бўлди. Роталарда партия ва комсомол йиғилишлари, вазводларда қисқа-қисқа суҳбатлар ўтказилди. Энди жангчилар бир оз ором олиши керак. Эрта тонгда Грейдер истеҳкомига штурм бошланади... Шунча вақтдан бери немис қўшинларининг сиқувига бардош берган батальон Қизил Армия қисмлари билан бирга ҳужумга ўтади.

— Етингиз, ором олингиз,— деди Кузенко жангчиларга, аммо ўзи ҳали у ёққа, ҳали бу ёққа югуриб, ҳадеганда блиндажга киравермади.

— Етингиз, бир оз мизғиб олингиз,— деди блиндаж навбатчиси Дронов ва ўзи милтигини тиззалари орасига олиб, махорка тутатди... Унинг катта-катта кўк кўзлари сигарета чўғига қўшилиб ёнар ва қоронги блиндаж ичидаги йилтиллаб кўринарди.

Жангчилар қатор тизилишиб ётган бўлсалар ҳам, бироқ ҳеч кимнинг уйқуси келмайди. Эртага тонгла кўплан бери кутилган ҳужум бошланади...

— Махорканг борми?— деди Тургенев ёнида ётган Оға ўғлига ўғирилиб.

— Йўқ.

— Кимда бор? Хумор бўлиб кетяпман...

— Эминда бор,— деди Отступний,— махорка халтасини Ўзбекистонга қайтариб олиб кетадигандек, қўйнига тикиб олипти.

— Ол, дўстим!— деди Тургенев, Эминнинг елкасини туртиб.

Эмин унга тамаки халтасини узатди.

— Хуморингни ёз, ошнам, қўл бола тамаки...

— Менга ҳам,— деди Оға ўғли, ётган ўрнидан туриб.

— Мен ҳам бир тортай,— деди яна бир жангчи.

Нормат чекмагани учунми, чекувчиларнинг майшатидан четда, хаёл суриб ётибди. У Адолатни ўйлаяпти. У эрталаб жангга боради, душман истеҳкомини ёриб ўтади, эҳтимол, ёв ўқига учиб, ҳалок бўлади ёки яна яраланади. Қани энди Адолат шу ерда бўлса! Нормат унга эрта тонгда ҳужумга кетаётганини айтарди, уни қучиб-қучиб ўпарди ва хайрлашарди...

Норматнинг кўз олдида бугун бўлиб ўтган комсомол йиғилиши жонланди. Черницовнинг оташин нутқи, Тургеневнинг ўткир сўзи, Крупенъянинг ғазабга тўла овози унинг қулогида ҳамон жаранглаб турибди. Оға ўғли ҳам бирам гапирдики!. Нормат унинг бунчалик потиқлигини биринчи марта кўриши. Эмин ҳам гапни эшиб боплади. Йиғилиш шундай қизидики, ҳамма мартенга тушган пўлатдек тобланиб кўринди. Командир: «Олғал» деса, бутун йиғилиш душман устига ташланишга тайёр. Қани, энди тезроқ тонг отса-ю, ўшачайноқ жанг бошлана колса!..

— Нормат, сен ҳам бир торсангчи,— деди Тургенев.

— Келинг,— деди Эмин, Норматга қараб,— қатордан қолманг!

Нормат ётган жойидан туриб, чекувчилар давраси-га қўшилди. Тамакини қўлига олиб қаради-да, чекди. тутуни томоғига кетиб, ўхчиб ўтальди.

— Ўрганимагансиз-да,— деди Эмин.—Мен ҳам окопда ўргандим. Хумор бўлганда иш беради бу тамаки.. Уни торсанг, ёзиласан киши.

Эмин оғзидан паға-паға тутун чиқараркан, урушдан аввалги тинч, фаровон кунларни эслаб кетди.

— Қандай яхши яшар эдик,— деди у, Норматга ўйчан тикилиб.— Яна ўшандай яшармикимиз?

— Яшаймиз!— деди Нормат.— Яшаш учун кураш-япмиз-да. Аввалгидан ҳам яхшироқ яшаймиз!

Аччиқ тамакидан хуморини ёзаётган Крупенъя ҳам гапга тушиб кетди.

— Мен,— деди у,— 1941 йилнинг 16 июлидан бери фронтдаман. Тупроғимизга немис бостириб кирган куниёқ военкоматга бордим. «Ёшсан» деб олишмади.

Күчадан ўтаётган қисмларнинг командирларига ёлвордим. Улар ҳам қабул қилишмади: «Военкоматга бор» дейишиди. Душман Полоцкка кирган куни ҳаракатдаги Қизил Армия қисмлари турган ерларга Пўл олдим. Йўлда бир таниш капитан учраб қолди. У, поход кунлари бизницида сут ичган ва ўтга кўмиб пиширилган картошка еган эди. У мени кўриб қолиб: «Ха, йигитча, қаёқقا?» деб сўради. «Жангга!» дедим. У мени ўзининг ўқчи батальонига қўшиб олди. Яхши капитан эди, бир жангда ҳалок бўлди. Уша жангда батальонимиз чекинди... Ушандан бери на онамни, на синилимни кўрдим. Уларнинг нима бўлганликларини билмайман. Синглимнинг Поля деган бир ўртоғи бор эди. Унинг сурати менинг кўнглимга ўрнашиб қолган... Шаҳаримиздан катта дарё ўтади. Биз Поля билан қайиқда саир қилиб юрардик. Дунёда чиройлилар кўп, аммо Поля бошқа олам. Сочининг ҳар бир толаси, қошидаги ҳар бир тук, мижжасидаги ҳар бир киприк кўз ўнгимда турипти...

Блиндажда ёттан жангчилар секин-секин ўришларидан туриб, Крупенъянинг ҳикоясини тинглай бошладилар.

— Поля немислар қўлида қолди... 7 ойдан бери фақат тушимда кўраман уни...

— Ваъдасини олганмидинг?—деб сўради Эмин ундан.

Крупенъя блиндаж печъкасидан йилтиллаб чиқаётган ўт ёруғига тикилганича, хаёл суриб кетди.

Жангчиларнинг кўзлари Крупенъянинг оғзида эди.

— Бир кўрсам эди, лабларидан, кўзларидан тўйиб-тўйиб ўпсам эди...

Нормат беихтиёр хўрсиниб, «эҳ, бевафо фалак!» деб юборди. «Зар қадрни заргар билар» деганлариdek, ҳижрон дардини тортаётган ошиқнинг ўртанишлари Норматнинг юрак яраларини қайтадан янгилагандек бўлди.

— Мен севгилимининг ҳатто билагини ҳам ушлай олганим йўқ,— деди Нормат.— Агар ҳозир кўриб қолтудек бўлсам, рухсат ҳам сўрамай, бағримга босардим-у...

— Хатига қараганда, жуда вафодор қизга ўхшайди,— деди Дропов, Норматга қараб.

— Мен ҳам, қасамимга қанча вафодор бўлсам, Адолатта ҳам шунчалик вафодорман!

— Сенинг севгашиб юртингда-я. Менини...

Крупенъянинг тамаки тутунлари орасидан ярқираб турган кўзлари Норматга кимнидир эслатгандай бўлди. Ўнинг кўзлари Ильичёвка қишлоғида бомба парчаси тегиб ҳалок бўлган хотиннинг кўзларига ўхшамайдими? Худди ўша! Фамилияси ҳам бир. Нормат ўша хотиннинг ҳикояларини, армиядаги ўғлини эслаб айтган гапларини эслади.

— Онангнинг номи нима эди?

— Ракишина Егоровна...

— Онанг бомба тагида ўлди... — деди Нормат ва ўзи гувоҳ бўлган мудҳиш воқиани бирма-бир айтиб берди.— Онангни фашистлар ўлдирди...

Крупенъянинг ҳозирги аҳволини тасвирлашга қалам ожиз. У пиқ-пиқ йиғлар, кўз ёшлари булоқдай қайнаб чиқарди. Бу ёшлар — алам ёшлари, ғазаб ёшлари эди.

— Бечора онам... — деди Крупенъя, аламда ўртаниб.— Бечора онам... Эҳ, тезроқ тонг отса, жанг бошланса эди... Битта фашистни ўлдирсан ҳам, онам учун қасос олган бўлардим. Бир қадам олдинга юрсан ҳам, немислар тепкилаётган юртимга яқинлашган бўлардим...

— Онанг учун душмандан ҳаммамиз ўч оламиз,— деди Нормат.— Кечир, дўстим, қайгули хабар айтдим сенга. Иложим қанча? Кулфатларга бардош берайлигу, ёвларга шафқатсиз бўлайлик!

Тонг яқинлашмоқда. Ҳавода юлдузлар чарақлаб, тўлин сўни ўраб турибди. Қалин ўрмон тепаси янги йил байрамида ясатилган арчадек зарга кўмилганга ўхшайди. Тепа ён бағирлари эса, сутдай оқариб, қалин қор кўрпаси остида ётибди. Онда-сонда пулемёт ва автоматлар «сайраб» қолади. Немислар ўзларининг «уйғоқ» эканликларини билдириш учун ўқ чиқармоқдалар...

Жангчилар энди ётган эди, штабдан чопар келиб, Нормат Жабборов, Крупенъя, Дронов ва Оға ўғлини капитан Юрьев чақираётганини айтди. Нормат блиндаждан чиқаётib, бу ерда қолаётган ўртоқлари билан хайрлашди ва қадрдан бўлиб қолган блиндажга: «яхши қол», деб маъюс тикилиб қаради.

Тонг ёриша борган сари кўкдаги юлдузлар бирин-кетин сўна бошладилар. Ерни туман қоллаб олди. Қисм жангчилари траншеяма-траншея ўтиб, ҳужум маррасига тўплана бошладилар.

Эрта тонгда артиллерия тайёрлигидан кейин ҳужумга ўтилади.

Нормат шериклари билан штабга келганида комбат уларга парча-парча хариталарни елим билан ямаб, күк, қизил чизиқлар чизиб қўйилган жойларини кўрсатди.

Қизил қалам билан қўргон қилиб қўйилган жойларни «бу ер дзот» деди, кўк қалам билан хол-хол қилиб қўйилган ерларни эса «бу мина майдонлари» деди.

— Йўлларни миналардан тозалайсизлар. Сизга сапёрлар ёрдам қилишади.

Юрьев жангчилар билан оталарча мулоим гаплашди, уларга ҳатто юз граммдан ароқ ҳам қуийб берди.

— Бу группага ефрейтор Нормат Жабборов бошлилик қиласди,— деди комбат.— Муваффақият тилайман.

Нормат Жабборовга ефрейторлик унвони бериш ҳақидаги буйруқка Юрьев бугун кечаси қўл қўйган, лекин ҳали ротада ўқиб эшилтирилганича йўқ эди. Бу қувончли воқиани Нормат комбатнинг ўз оғзидан эшиятти.

— Совет Иттифоқига хизмат қиласман!— деди Нормат.

Улар блиндаждан чиқиб, энди йўлга тушганларида, ҳат ташувчи Ласточка кўриниб қолди.

— Сени шу ерда эканингни эшитиб келаётган эдим, ўртоқ Жабборов!

— Нима гап!

— Ҳат бор.

— Қани? Қани?

Ласточка папкасидан қизил конверт чиқарди. Нормат конвертга қараб, Эргашнинг қўлини таниди. Ласточка турли-туман конвертлар ичидан яна нимандир қидираётган эди, Нормат кутмади.

— Кейин берарсан, иш зарур.

— Мана, мана, олиб кет. Қизиқ экансац, ҳат деса ўзини томдан ташлайдиган одам...

Нормат биринчи конвертни очиб, ўқий бошлади ва ҳатнинг ярмига борар-бормас:

— Офарин!— деб қичқириб юборди.

— Нима? Нима гап?

— Колхозимиз пахта планини бажарипти... Яшасин, менинг бригадам энг олдинда эмиш!.. Ийи! Ийи! Буни қара, Адолат... «Адолат фронтга кетган эди, сени топ-

дими?..»— Нормат ўз кўзига ишонмай, хатнинг шу сатрларини қайта-қайта ўқиди:—«Адолат фронтга кетган эди, сени топдими?» деб такрорлади Нормат. «Адолат фронтда... Қайси фронтда?.. Солдат бўлиб-а? Наҳотки, эркаклар қолмай қизларга навбат келган бўлса!.. Қишлоқда одам қолмадими?.. Ёки, вакил бўлиб келдимикин? Йўлдош Охунбобоев билан бирга келган бўлса эҳтимол. Тунов кунги совғаларни Адолат олиб келдимикин... Ӯша рўмолчаларнинг кашталари худди «гулистан»лик қизларнинг чокига ўхшарди... Нега совға ҳалтасига икки энлик хат ташлаб, ўзини билдирамади у? Қаерга келди? Қаерда экан ҳозир у?..»

Вақт зиқ. Узоқ ўйлаб ўтирадиган пайт эмас. Уларни жанговар иш кутяпти. Бутун рота уларнинг сигналига қараб турибди. Ҳаёлингни сочма, Нормат. Рўпарда ўрмон, ўрмонда душман...

Бу ўрмон айниқса Крупенъяга таниш. У орқага чекиниш вақтидаги тўўп ўқларидан шохи синган дараҳтларни, ёндирувчи ўқлардан куйган арчаларни таниди. Крупенъя бу жойлардан чекинаётib, шу арчаларга қараб: «қайтиб келаман», деган. У энди ваъдасига вафо қилиб келди. Бир оздан кейин унинг ўртоқлари ҳам келадилар. Ҳозир эса шу атрофларда немислар изғиб юрибди.

— Сапёрлар келишмалтими?

— Йўқ,— деди Тургенев,— келишмаяпти.

Немис қисмлари бир неча бор ҳужум қилиб, 119 тепалигини ололмагач, қонига бўялди, тинкаси қуриб, резервларидан ажралди ва бу тепаликка атака қилишдан воз кечди. Генерал Шмидтнинг бўйруғи билан дарё бўйларига, тепалик атрофига катта мудофаа линияси қурди; ўттиз кечаю ўттиз кундуз ер кавлатиб, темир-бетонли дотлар, қарагай ёғочлардан дзотлар қурдирди. Уч-тўрт қаторли сеткадан иборат тиканли симлардан ғов ясади. Кўзга илинмас симлардан тузоқлар ўрнатди. Уларнинг ораларига танкка ва пиёдаларга Қарши миналар кўмилди.

Юрьевчилар немисларнинг ана шу хатарли линиясини ёриб ўтиши ва дарёнинг ғарбий қирғоғидаги плацдармни кенгайтириши керак.

— Бундай ўйлаб қарасак,— деди Нормат,— бутун батальоннинг тақдиди бизнинг ишимизга боғлиқ экав...

— Бутун дивизиянинг дегин...

— Бутун армиянинг, фронтнинг, ҳатто Москванинг!
— Сапёрлар!..

Улар келаётган сапёрлар орасида Ласточкани кўриб, ҳайратда қолишиди.

— Ласточка, сен ҳам сапёрми?

— Сапёр!

Нормат ўзини тутолмай, кулиб юборди.

— Сенинг сапёргилинг менинг созандалигимга ўхшаса керак. Мен ҳам патефон бўлса ҳар қандай куйни нотасиз чалавераман.

— Кулма, дўстим, сен қандай сапёр бўлсанг, мен ҳам шундай сапёрман. Сен билан биз жангчимиз. Жангчининг қўлидан ҳар қандай иш келиши керак.

— Бошлайлик!— деб Нормат команд берди.— Бизни бутун взвод қўриқлаб туради. Батальон учун йўл очишимиз керак, ўртоқлар!

5

Нормат «Йўл очувчи группа» ни яна иккига: таёқчи минёрлар ва байроқчиларга бўлди. Крупенъя раҳбарлигидағи минёрлар ўзлари ўрнатган мина майдонида энига ўн метрлик йўл очдилар. Байроқчилар очилган йўлнинг чегарасини белгилаш учун шу йўл чеккаларига қизил байроқчалар ўрнатдилар.

Душманнинг мина майдонига келганда, Нормат команда берди:

— Таёқчилар олдинга ўтсин!

— Есть!— деди Крупенъя, олдинга ўтаркан.

Душман эгаллаб турган ўрмонда, йўлларда шубҳали жимжитлик ҳукм сурмоқда. Рўпарада немис соқчилари кўринмайди. Аммо улар албатта бор. Мина майдони ҳеч маҳал соқчисиз қолдирилмайди.

Таёқчилар узун таёқлар билан мина майдонини тишиб, пиёдаларга қарши қўйилган миналарни икки ёққа суриб, ўртадан йўл оча бошладилар. Бу жуда оғир вазифа эди. Майдон таёқ билан савалай бошланса, душман билиб қолиши мумкин. Аммо бошқа илож йўқ. Чунки шу чоққача инструкцияларда фақат ана шундай усул тавсия қилиниб, қўлланиб келинган. Аммо немисларнинг пиёдаларга қарши қўйган миналари қалин қор тагида қолган. Таёқда савалаган билан, қор қатламлари тагидаги минани четга суриб ёки портлатиб бўлмаяпти.

— Вақт ўтятти. Бир оздан кейин артиллери я ишташади.

— Шошилиш керак.

Нормат уч метрлик узун таёғини чўзиб, мина майдонининг қирғоғига ётди.

— Сен беш метр кейинроқда юр,— деди у, Крупенъяга.

Нормат қор қатламларини савалаб, ерда сургалиб олдинга силжий бошлади. Бир метр... икки метр... уч метр... Қалин қор қатламлари тагида оғир металл-миналар турибди-ю, аммо битта ҳам мина портламаяпти. «Музлаб, ер қатламига қўшилиб кетипти миналар» деб ўйлади Нормат. Нормат пиёдаларга қарши қўйилган кичик «қутича»ларни қидиришда давом этди. Шу билан бир қаторда у, минёрлар группасининг ишини енгиллатиш учун, йўлда учраган танкка қарши миналарнинг ҳам устини очиб, ёки тепасига белги қўйиб ўта бошлади. Мина майдонининг тўртинчи метрига боргандা, биринчи мина портлаб, полк замбарагидан отилган снаряднинг портлашига ўхшаш садо берди. Бу гумбурлаш немис пистирмалари даги солдатлар ва соқчилар диққатини мина майдонига жалб қилди. Нормат оқ халатига буркануб, қорга ётиб олди.

Аммо немислар: «рус минамёт отаётитти» деб ўйладилар шекилли, бу томонга келмадилар. Энди бошиқа усул топиш керак бўлиб қолди. Агар яна мина портласа, немислар албатта шубҳага тушарди. Душманни огоҳлантириб қўйиш — ҳужум муваффақиятини қийинлаштириш ва ортиқча қон тўкиш демакдир.

Нима қилиш керак? Вақт зиқ. Бир оздан сўнг тонг отади. Штурм бошланади. Йўл зарур. Йўлни таёқчилар очиб бериши керак.

Нормат, орқасидан эмаклаб келаётган Крупенъяни таёғининг уни билан туртди.

— Нима гап?

— Ҳув ана, қаршимизда бир немис тикилиб турипти. Ҳозирча тапирлатма. Совқатганга ўхшайди, ер тепинаяпти. У кетиши билан бошлаймиз.

Лекин немис ҳадеганда кета бермади.

— Менга қара,— деди Нормат Крупенъяга,— пичоғинг борми?

— Бор.

— Таёғингни кес! Қалта қилиб кес!

— Нима учун?

— Таёфингнинг учини йўн. Қорни у ёқ-бу ёқса сувравер. Кичик миналарни қор билан чеккага чиқарамиз. Одам юра оладиган сўқмоқ очилса бўлгани. Қолганини Ҳусейнлар бажаради.

— Норматнинг ўзи ҳам таёқ учини йўниб, қор қатламларини худди канал кавлаётган экскаватордек икки томонга суриб, ҳеч қандай шарпа чиқармай, олдинга силжий бошлади. Унинг орқасидан бораётган Крупенъя ҳам икки метр чапроқда қорда таёқ билан ариқча кавлай бошлади.

— Энди бошлаймиз!— деди, орқадан етиб келган Ҳусейн ва енгларини шимариб, ерга энгашди.

Ҳусейн билан Дронов Норматлар қазиб кетган «ариқча»га ётиб, қор остидан танкка қарши миналарни қидира бошладилар. Улар ҳар бир қарич ерни тинтиб қарашди; қўлга уринган миналарнинг пистонларини суғуриб олиб, мина корпусларини орқадаги байроқчиларга узатиб туришди, байроқчилар эса, уларни «хирмонга» тўплай бошладилар.

Душманнинг биринчи мина майдонида қизил байроқчалар ҳиллилади.

— Ҳеч ким кўринмайди,— деди Нормат, шерикларига қараб.

— Бошлаймиз.

Саккиз қаторлик катта қозиқларга ўргумчак уясига ўхшатиб тортилган тиканак симларга биринчи бўлиб Нормат қайчи урди.

— Қайчини ёғлаб олмапсан,— деди Крупенъя.

Нормат чўнтағидан милтиқ ёғини олиб, қайчига суртди ва Крупенъяга узатди.

— Мана, ёғлаб ол.

Таёқчилар таёқларини белга қистириб, қайчиларни ишга солдилар. Улар биринчи қозиқларнинг симларини икки томонга суриб, иккинчи қозиқлар симига қайчи уришлари билан, ҳар томондан қўнгироқ чолиниб кетди. Немислар тиканли симларга консерва қутилари ва снаряд гильзаларини осиб қўйган эканлар. Симлар кесилиши билан гильзалар бир-бирига урилиб, жаранглади.

Минёрларнинг ишини бутун рота кузатиб турган эди. Немис солдатларининг қўзғалиб қолганини сезган Морозов Куценкога буюрди:

— Пулемётларни жангга ҳозирла!

— Есть! — Куценко пулемётчилар олдига югурди.

— Рота минамётлари жангга ҳозирми? — деб сўра-ди Морозов минамётчилар взводи жангчиларидан.

— Жангга ҳозирмиз, ўртоқ лейтенант! — деб мина-мётчилар командири жавоб берди.

— Огоны!

— Огоны!

Тўртингч рота ёғдирган оташ Норматлар тепасига келаётган немисларнинг йўлини тўсди. Орадан сал ўт-май, артиллерия кононадаси бошланди...

Нормат группаси икки ўт ўртасида қолди. Ана шу отишма пайтидан фойдаланиб, Нормат ишни давом эттиришга қарор берди.

— Всatty! — деди Нормат ўз жангчиларнига қа-раб.— Вперед!

Нормат сакраб ўрнидан турди-ю, яна дарҳол энгашиб, ўртоқларига: «ёт!»— деб қичқирди. Уларнинг яқинида портлаган мина парчалари визиллаб тепадан ўтиб кетди.

— Всatty! — деб команда берди яна Нормат.— Бўш келма, азаматлар! Яна бир неча минут, яна бир неча қадам!.. Бизни рота қўриқлаяпти, бизнинг иши-мизни бутун батальон кузатиб турибди!

Улар яна тикан симли ғовга ёлишдилар. Тўртингчи қатор симлар қирқилиб, бешинчи қаторга ўтганларида, немисларнинг тумшуғи тагида ишлашга тўғри келди. Бу қаторни немислар ўққа тута бошладилар. Ўқлар сим тўсиққа аридек ёпиша берди. Бир ўқ Норматнинг каскасига тақиллаб тегиб, қайтиб ерга тушди. Крупенъянинг шинели тутай бошлади. Бош кўтаришнинг иложи бўлмади...

— Граната!

Нормат белидаги гранатларни олиб, тўғрисидаги окопга ташлади.

— Граната!

Крупенъя ҳам, Эрали ҳам, Оға ўғли ҳам душман окопларига граната ташлай бошладилар.

Ана шу дақиқада батальон жангга кўтарилди. Ҳу-жум бошланди...

— Проходчилар орқага қайтсин!

Юрьевнинг буйруғи билан лейтенант Морозов одам юбориб, Норматларни чақириб олди.

— Қолған йўлни артиллерия очади. Рота районига битта-биттадан қайтингиз! — деди эмаклаб келган жангчи.

Нормат қисмига қайта туриб, Морозовга дуч келди:
— Йўл очиқ! Пехота ўтса бўлади, ўртоқ лейтенант!

6

Юрьев ўзининг кузатиш пунктини тўртинчи рота районига кўчирди. Взводлар, алоҳида роталар, артиллерия батареялари ва минамёт ротасини комбат билан боғловчи телефон симлари ҳам Морозовнинг илгариги блиндажига тортилди. Бу блиндаж ён бағирликда бўлса ҳам, катта дараҳтларнинг остига қурилгани учун, унга снаряд тушмас эди. Унинг яна бир фазилати шундаки, катта дараҳт тепасига чиқсан кузатувчига бутун атроф, ҳатто немис траншеялари ҳам кўриниб турарди.

Юрьев жанг операциялари планини кўздан кечира-ётганда алоқачилар командири кирди.

— Ўртоқ капитан, барча роталар билан телефон алоқаси ўрнатилди.

Юрьев картадан бош кўтарди-да, қисқагина қилиб:

— Алоқа соат механизмидек ишласин! — деди.

— Есть, соат механизмидек ишлатамиз!

Старший лейтенант блиндаждан югуриб чиқиб кетди.

— Роталарни чақир! — деди Юрьев радиостга қараб.

Паст бўйли, ингичка ва қотма радиост рация микрофонини пуфлаб қичқира бошлади:

— Ленинград, Ленинград, Ленинград! Мен Москва, мен Москва! Мен Москва, қабул, қабул, қабул: бир, икки, уч, тўрт, беш, беш, тўрт, уч, икки, бир, қабул...

Радистнинг кичкина кўзлари ёниб, қотма юзига мулойим табассум ёйилди:

— Тайёр, ўртоқ капитан.

— Ким бу? Хўжайнинни чақир! — деди Юрьев ва бир оздан кейин гапира бошлади.— Ишлар қалай? Жойида дейсанми? Овқат пишдими? Жуда соз, кут! Беш минутдан кейин бодринг юбораман.

Юрьев микрофонни яна радиостга узатди.

— Иккинчи, учинчи роталарни чақир.

— Урал! Урал! Мен Москва... Тайёр, ўртоқ капитан.

Юрьев учинчи ротанинг ҳам жангга тайёргини сўради ва топшириқлар берди.

— Энди тўртингчи ротани ҳам рация билан таъмин қилсак, ошиқ олчи бўлар эди.

— Бўлмаса, ошиқ олчи! — деди комиссар.

Юрьев Чернизовга қараб мамнун жилмайди.

— Радист, — деди капитан, — тўртингчни чақир!

— Тўртингчидаги рация йўқ, ўртоқ капитан, рация ма-жақланиб, радист ҳалок бўлган.

— Рация ҳам, радист ҳам бор. Чақир, «Нормат» деб чақир, — деди Чернизов.

Бу янгиликдан ҳайрон бўлган радист микрофонга оғзини тутиб: «Нормат! Мен Москва!» — дейиши билан, эфирдан жавоб келди.

— Мен, Нормат, Москвани эшитаяпман, қабул...

— Ўртоқ капитан, жуда қизиқ, янги рация, нотаниш радист...

— Менга бер, — деди капитан ва микрофонни олди. — Қимсан? Ефрейтор Нормат? Хўжайнини чақир! Ким бу? Ҳа, менга қара, хўжайнин, ана шу радистни, «Жасурлик учун» медалига тақдим қилиб материал юбор.

— Нега шошиласан, капитан? Жанг тугасин! — деди Чернизов унга.

— Арзийди. Норматдек жангчиларнинг бошидан-оёғигача олтин медаль тақсанг ҳам арзийди!

— Тўёри! — деб Чернизов унинг сўзини маъқуллади. — Эсингдами, капитан, Варшавкадаги бомбардимон вақтида бузилган тягач тагига кириб олиб, чалама-чатти ўқ узиб ётган солдат? Уша шу эди. Энди у жуда яхши солдат бўлиб етишли. Ротада ҳамма ҳурмат қиласиди уни. Морозов ҳам «Норматдан умидим катта» деяпти.

— Биз, — деди капитан, — кишиларга баҳо беришда кўп маҳал адашамиз. Одамнинг ички дунёсини, характеристерини дарҳол билиш қийин. Мана, жангчи Азимовни ол. Биз Азимовдан яхши жангчи чиқиши кийин деб ўйлаган, обозга қўйган эдик. У бошқача бўлиб чиқди. Жангда ҳақиқий ботирлик кўрсатди. Сўнгги қони қолгунча жанг қилиб ҳам «яраландим» демабди...

— Ўртоқ капитан, вақт яқинлашди.

— Телефонист, артдивизионни чақир!

Телефонист новча бўйини аппаратга эгиб, узун панжалари билан трубкани ушлади-да, чақира бошлади.

— Зарба, зарба! Мен Москва, хўжайинингни хўжа-йин сўрайти.

Артдивизион командири аппаратга келиши билан телефонист жойни бўшатди ва трубкани Юрьевга узатди.

— Алло! Учинчи кухняга ионушта учун бодринг керак. Меҳмондорчиликни бошлайвер! Ҳа, ҳа, тўкиб-сочиб меҳмон қил!

Кейин телефонист роталардан рапорт қабул қила-ётуб, комбатга айтиб турди:

— Ленинград тайёр.

— Урал сигнал кутаяпти.

— Олға! Олға! — деди Юрьев.

Телефонист Юрьевнинг бўйругини роталарга етка-зиши билан, жангчилар олға ташландилар. Икки томондан отилаётган ўқлар тонг қоронғилигига тепалик-да ва пастликда қозондаги бодроқлардек сачрай бошлади.

— Ўртоқ капитан,— деди радиист,— тўртинчи рота сигнал беряпти, немисларнинг охирги тикан симли ғов-ларини ҳам босиб ўтибди...

— Сўра, батафсилоқ ҳабар сўра!

Радиист комбатнинг саволини етказиши ҳамон, Нормат жавоб қайтарди:

— Тикан симли ғовларга ва кўринмас симлардан қўйилган тузоқларга солдатлар шинелларини ёпиб, қозиқларини суғуриб, кўприк қилиб ўтишиди...

— Менга бундай деталларнинг кераги йўқ! — деб ўшқириб берди Юрьев радиистга.— Бу деталларни кейин ўрганамиз. Менга қайси траншеяларга кирганини ва қайси нуқталар қўлга олинганини айтсин.

— Биринчи траншеяларга кирдик, лекин қайси нуқта олинганини билмайман. Номини билмайман... Мана, мана, рўпарамиздаги пулемёт нуқтасини олсак учта бўлади...— деган ҳабар келди.

Юрьев трубкани қўлига олди.

— Кимсан ўзинг?

— Ўртоқ капитан, мен, мен, ефрейтор Норматман, бўлинма командирининг ўринбосари.

— Морозов қани?

— Биринчи вазводга кетди.

Юрьев Черницовга қаради:

— Тек қўйиб берсанг, бу Норматинг ротага ҳам команда бера бошлайди...

— Унинг ана шу хусусияти менга ёқади. Мина майдонидан қайтиб келибоқ, ўлжа рацияни ишга солиб, ўзи радиостик қиляпти азamat!

Оғир тўпларнинг даҳшатли гумбурлашлари эши-тилди. Бу — дивизия ва армия артиллерияси, плацдармга кирувчи қўшинларнинг шарқий қирғоқдаги ба-тареяларининг айюҳаноси эди.

— Биласанми, комиссар, Норматни радиостикдан кўра кўприкка юбориш керак.

— Тўғри, капитан, мен қарши эмасман.

Йиғарма тўртминча боб БЕГИМХОННИНГ БЕДАРАҚ КЕТИШИ

/

Бегимхон ўша шармандаликдан кейин анча вақт-гача ўзини ҳеч қаерга сифдиролмай юрди: осмон узоқ, ер қаттиқ. Одамлар бераҳм, эркаклар алдамчи, хотинлар бир-бирига кундош. Уларнинг ҳаммаси сени — Бегимхонни кўролмайди. Тўхта холадай худогўй одам ҳам сени олдига солиб уйидан ҳайдади. Соҳиб қорининг сени кўргани кўзи йўқ. Қишлоқдан ҳайдаганлари бу? Қишлоқ сенга торайиб қолди. Ҳайдамасалар ҳам унга сифмайсан. Далага қайтганинг маъқул. Да-ланинг бағри кенг, осмони бепоён. Фақат қизлар... Уларнинг тилини кесиб бўладими! Гўрингга гишт тўлдириб ўтиришгандир. Қарға қақимчи, қизлар чақимчи. Ғафиллашавермайдиларми. Бўшашганни бўри ейди. Қулоғингни кар қилиб ол. Кўпириб, кўпириб сўнишади.

Даштда ҳақиқатан ҳам Бегимхон ўйлагандай гап кўпайиб қолган эди. Бозоровнинг уйида юз берган ҳодиса аллақачон қизларнинг оғзида чайналиб юрибли. Олимжондан бу гапни эшитиб, қизларнинг бири дарғазаб бўлса, иккинчиси унинг ҳолига ачиниб, яна бири бетараф бўлиб, борингки, кападаги қизларнинг ҳаммаси Бегимхон тўғрисида гапирар ва ўйлар эди. Бегимхон капага кириб келган чоқда ҳамма кўрлага буркануб ухлаб ётгани сабабли, у бу гапларни эшитмади.

Совуқданми, қызлар жуфт-жуфт бўлиб маҳкам қучоқлашиб ётишибди. Бегимхоннинг кўрпаси йўқ, кимдир ёпиниб олибди. Бегимхон ўз кўрпасини қидириб ўтирамади. Тинч ётгав қызларни қўзғатиб, гапни кўпайтириб нима қиласди? Яхшиси, тишингни-тишингта қўйиб ўтиравер. Бегимхон қызларнинг оёғида, кўрпанинг учига чўнқайиб ўтирида, тиззасига жагини тираб олди. Изғирин унинг кўзларини юмдирмаяпти. Шу сабабдан ҳам у ката ёруғидан мўралаётган юлдузлардан кўз узолмайди. Саноғи борми бу юлдузларнинг?

Тонг қоронғисида уйғонган қызлар Бегимхонни кўриб қий-чув кўтаришди.

— Вой, Бегимхон келибди...

— Бугун кўрак узиш плани ортиб кетади денглар...

Бегимхон қызларнинг ҳазилига ҳам, қочирим пи-чингларига ҳам қулоқ солмай бепарво тура берди, аммо у аввалгидай эмас, шахди паст, камгап эди. У, қызларнинг юзига сув илитиб, нонуштага икки қумғон чой қайнатиб қўйибди... Қызлар сандиқчаларидан, ёстиқларининг остларидан тугунчакларини келтириб, нонларини ўртага тўкиб, нонуштага ўтирганларидан кеий ҳам, ўзсаноғи пицирлаш тугамади.

— Қаёқдан кун чиқди?

— Нечук, Бегимхоннинг қўли совуқ сувга тегибди?..

Бегимхон қызларнинг кўзига тик қарай олмаса ҳам, уларга сўз бергиси келмади:

— Ҳа, нима, Бегимхон бадарға бўлиб кетди, деб ўйлабмидинг, Бодомхон?— деди у, ёнидаги қизга қараб.

— Пичирлаётганимнинг сабаби — тўйнинг қатламаларидан ўртага ташлармикинсиз, деяпман.

— Пичинг қилма менга, Бодомхон, билдингми, мен тўй қилганим йўқ. Тўй қилсан дастурхон боши ўзинг бўласан.

Қызлар бир-бирларига қараб олишди.

— Тўйни қачон қиласиз бўлмаса?

— Насиб қилган кунда...

Қызлар яна бир-бирларига маънодор қараб қўйишли.

— Нега иржаясизлар? Ҳозир тўй қиладиган замонми?

Шу чоққача бетараф ўтирган Шакархон, қўлидаги пиёлани ерга қўйиб, Бегимхонга хўмрайди.

— Нега бўлмаса, эринг туриб, эрга тегдинг?

— Эрим ўлган мени. Еш бошим билан тул қоламани?

— Эринг тирик бұлса-чи?

— Тирик бұлса хат ёзиб, хабар берарди...

— Бу урушда «йўқолиб» топилганлар, «ўлиб» тирилганлар озми? Нормат акани ҳам ўлдига чиқаришмабиди! Тирик экан-ку! Топилибди-ку! Адолатга офарин, «ўлди»сига ишонмай, уни қидириб кетди.

Қизлар ярқ этиб Бегимхонга қараб қўйдилар. Бегимхон Адолатнинг номини эшишибми, бир қизариб олди. Кейин ўзини ўнглаб, Шакархонга жавоб қилди.

— Ҳамма ҳам Адолат бўлавермайди. Адолатга ўхшаганимда мен ҳам бошимни олиб, фронтга кетиб қолар эдим.

— Фронтга бормасанг ҳам, фронтчи бўлишинг мумкин. Қўй, ўша Бозоровни ташла!

Бегимхон тўсатдан ғазабланиб кетди.

— Нега ташлайман уни! Мен ҳали уларга кўрсата-ман!

2

Эртасига Бегимхоннинг яраси янада янгиланди. Олимжон қишлоқдан қайтиб, тўппа-тўғри Бегимхоннинг олдига борди. Бегимхон ўйчан бир ҳолда кўсак узарди. «Келдингми?»— деди Олимжон, унга маънодор қараб. Бегимхон юзини ўгириб олди. «Кўзини кўзимдан яширишида бир гап бор» деб ўйлади Олимжон.

— Мусоғир хотинни нега ранжитдинг, Бегим?— деб сўради Олимжон.

Бегимхон унга ёв қарав қилди.

— Нега мусоғир бўлсин, Бозоров менга ёлғон гапирипти, мени алдапти.

— У хотинда нима гуноҳ, нега уни юмдаладин? Устингдан арз қилиб юрибди.

Бегимхоннинг кўзлари чақчайиб кетди.

— Арз қилиб юрибди, дейсизми? Арз қилишни мендан кўрсин! Аравонлик хотини ҳайдатиб, ўзимни ҳалоллаб олмасам, номимни бошқа қўяман.

Олимжон унинг чақнаб турган кўзларига қараб, қайнаётган ғазабини сўндириш йўлини қидирди.

— Ҳовурунгдан туш. Эралининг ҳурматини қил. Лоп этиб келиб қолса, юзинг шувут бўлади.

Бегимхон увотга ўтириб йиғлашга тушди. «Илоё уруш чиқарган Гитлернинг оғзи-бурнидан лахта-лахта қон оқсин. Шу уруш чиқмаса, бахтим қораймас эди...»

— Беҳуда кўз ёши тўкаверма,— деди Олимжон эркакларга хос тошюраклик билан,— йиғлаганинг билаи, аравонлик хотин эрини «ма, ол!»— деб сенга бериб қўймайди...

— Бурнини ерга ишқайман унинг. Мени ҳақорат қилиши етмай, яна устимдан арз қилиши ҳам борми!

— Ўйлаб кўр, яна кейин пушаймон еб юрмал..

Олимжон кетиши билан Бегимхон этагидаги кўракларни қанор қопга тўқди-да, йўл тарааддусига тушиб қолди. Унинг бу ҳаракати қизларни, айниқса Шакархонни ташвишга солмай қўймади.

— Қаёққа отланяпсиз, Бегимхон?— деб сўради у, дугонасининг кўзига тикилиб.

— Районга. Қўшхотинни тусаган Бозоров номимни оқлаб берсин.

Шакархон унинг қўлидан ушлаб, увотга ўтқизди.

— Бегимхон! Бегимхон!— деб қичқирди бирор. Бегимхон ўрнидан туриб, хат ташувчи тўппа-тўғри шу томонга келаётганини кўрди.

— Ўйинга тушинг, Бегимхон, сизга бир қучоқ салом олиб келяпман.

Бегимхоннинг юраги жиғ этди-ю, дармони қуриб, ўтириб олди.

— Мени калака қилмал!

— Сизга! Ўз-ўзингизга. Мана, Уралдан. Сотти акамлардан. Мана буниси фронтдан...

— Кимдан?

— Суюнчисиз айтмайман. Бунисига катта суюнчи берасиз!

— Адолатдандир-да.

— Йўқ-йўқ! Бошқадан...

— Мендан кулмаган сен ҳам бормидинг...

— Нега куламан?— деди хат ташувчи.— Мана, Эрали акамдан. Бир эмас, икки хат.

— Эралидан?!— деб қичқирди Бегимхон.

Бир зумда қизлар югуриб келиб, уни ўраб олишди. Бегимхон Эралининг хатларини чангллаганча, конвертларни очишга ботинолмай, атрофини қуршаб олган қизларга қараб: «Нега тикиласиалар менга!» деганича, уларнинг кўзидан йироқлашиди.

Кишининг ҳаётида шундай дақиқалар ҳам бўладики, бундай чоқларда гўё осмон билан ернинг фарқи, масофанинг ҳожати ва аҳамияти қолмайди. Ҳаёл қанотлари кишини бир нафасда кўкларга кўтариб, самода сайд қилдириши ёки етти қават осмондан қора ерга ташлаб юбориши мумкин.

Бегимхон ўзини худди ана шундай ҳаёл дақиқаларининг қанотида учайдигандек сезди.

Бу сирли хатларни очсинми, очмасинми? Қандай хабар келтирди бу кирлаб кетган конвертлар?.. Бегимхоннинг қўллари қалтираб, кўзлари беихтиёр жавдира-моқда. У, қизларнинг кўзидан йироқлашиб олгани билан, уларнинг назар найзалари тек қўярмиди. Бегимхон конвертларни яна бир бор аста ушлаб кўрди ва гўё уларнинг ичидан нимадир отилиб чиқиб, унинг ёқасига ёпишаётгандай, юраги орқасига уриб кетди. «Нима бўлса ҳам оч!» деди унинг юраги. У биринчи конвертни очиб, хатни кўрди-ю боши гангради. Унинг кўзига хат эмас, аллақандай чўкарлар, мунчоқлар, кесаклар, тиканлар, панжалар кўринди.

— Эрали... Эрали акамдан,— деди у ўз-ўзинга ва дарҳол атрофига қаради.— Ҳеч ким йўқми? Қизлар пойлаб туришмаяптими? Дод, шўринг қуриди Бегимхон. Белинг синди, Бегимхон!..

Унинг кўзлари янада қамашиб ўзини қора панжара ичida кўрди. Эринг тирик, эринг жанг қилмоқда. У сени унутмаган. Аввалгидай севади... Хатидан илиқ нафаси келялти. У, ғалаба билан ёнингга келмоқчи. Кўзига қандай кўриниасан? Булар сени унга тутиб берадилар... Соҳиб қоридан тортиб, Тўхта холагача сенга душман. Улар Адолат учун ҳам сендан ўч олишади... Ана, қизларнинг пи chirлаган товушлари эшитиляпти, улар сенинг ҳали қазилмаган гўрингга ғишт ташияптилар... Уларнинг кўзига кўринма. Оч қорнинг, тинч қулоғинг...

Дала қоронғилашиб кетди. Қоронғида унинг кўзига гоҳ иржайған Бозоров, гоҳ кўкраги тўла орденли қучогини очиб турган Эрали кўрина бошлади... Кейин уларнинг ўрнига «инс-жинс»ларга ўхшаш бетартиб алланималардир кўринди. Ваҳима босган Бегимхон атрофига қараб олди. «Худога шукур, ҳеч ким йўқ. Қизлар узоқда...» деб қўйди ўз-ўзига. Энди унинг кўзи елвизак кўз-

лардан нари, қулоги фисқ-фасотдан холи. Энди унинг боши очик, тўрт томони қибла, ҳамма сўқмоқ, ҳамма йўл-йўлак унинг ўз-ўзиники...

Бегимхоннинг бедарак кетиши ҳақида «Гулистан»да ҳар хил гаплар тарқалди. Даشت бригадасининг қизлари кечаси билан шоариқ, ариқчаларнинг бўйларидағи тут дархтларининг ост-устларини тинтиб чиқдилар. Олимжон қайтармагача бориб, чиғир атрофларини ҳам син-чиклаб қараб келди. Қизлар далани бошларига кўтариб, чақира бошладилар. Қизларнинг овози тоғ-тошларга урилиб, уфқда янграб, узоқ-узоқларда жаранглар эди. Аммо жавоб йўқ. «Бирор кўнгилсиз ҳодиса юз бермаса кошки эди» деб ўйлашди қизлар. Шакархон Олимжонни қишлоққа жўнатди. Олимжон тўппа-тўғри Бозоровнинг ҳужрасига келди. Ҳужрада Бозоров билан унинг хотинидан бошқа ҳеч ким йўқ эди. Олимжон изига қайтиб, Тўхта холанинг дарвозасини тақиилатди. Тўхта хола ҳовлида идиш-товоқ ювиб юрган экан, Олимжонни кўриб, юраги ёрилиб кетгудек бўлди.

— Нима гап, болам? Яхшиликми?

— Бегимхонни кўрмадингизми?— деб сўради Олимжон, кампирнинг ташвишини сезиб.

Кампир кўкрагига тупуриб олди.

— Норматданми, Холматданми гап очсан, деб юрагим қинидан чиқиб кетаёзди. Норматнинг сурати келди. Командирлари билан тушибди. Эрали ҳам бор. Бегимхон шошқалоқлик қилиб олди...

— Демак, Бегимхон келгани йўқ, денг?— деб Олимжон яна қайта сўради.

— Йўқ. Тақ этиб ёпган эшикни қайси юзи билан очади. Сочимнинг оқини ҳурмат қилмай, юзимга тик гапириб кетди.

Олимжон кампир билан хайрлашиб, яна бир неча эшикни қоқди. Бегимхон ҳеч қаерда йўқ...

Олимжон яна ноилож, дашт бригадасига қайтди.

Кунлар, ҳафталар ўта бошлади, аммо Бегимхондан дарак бўлмади.

Йигарма бешинчи боб КУПРИК КҮРМАНАСИ

/

Дарёning шарқий қирғоидаги фашист қисмлари Москвадан келган янги полкларнинг сиқуви билан ғарбий қирғоққа қочиб ўтишга мажбур бўлдилар. Улар ғарбий қирғоқда истеҳкомлар қурдилар. 119 тепалигидан шарқда турган немис дивизияси ўрнидан жилаётниб, ларё кўпригининг бир қанотини портлатиб кетган эди. Немис қўмондонлигининг планида бутун кўприкни портлатиш кўзда тутилган ва бу ҳақда махсус буйруқ чиқарилган бўлса ҳам, икки ўртадаги кўприкни портлатиш жуда қийин бўлди. Фашистларнинг инженерлик қисмлари учун кунгача кўприк томонда ўрмалади-ю, аммо кўпrikка етолмай, ўққа учраб, ер тишлаб қолаверди.

— Нима қилиб бўлса ҳам кўприкни қўпориш керак! — Немис қисмлари қўмондонликдан ҳар соатда ана шу хил телеграмма ва радиограммалар олиб турдилар.

«Нима қилиб бўлса ҳам кўприкни қўлда сақлаш керак!» — Юрьев ана шундай қатъий радиограмма олди.

Дарё кўприги ҳужумга ўтган Қизил Армия қисмлари учун айниқса керак эди.

Кўприкни портлатолмагани учун аламига чидай олмаган немис қўмондонлиги икки кундан бери кўприк районини артиллериядан ўтга тутиб турибди. Немисларнинг қаттиқ отишмасига қарамай совет сапёрлари кўпrikning портлатилган шарқий қанотини тузатдилар. 11 декабрь кечқурун бошланган қурилиш 12 декабрь эрталаб соат 6 да танкларни қабул қилишга тайёр бўлди.

Нормат Жабборов бу ерга эрталаб соат чоракам олтида келди.

— Командиринг қани?

Норматнинг бу саволига кўприк қўриқчиси — қора ёқали сапёр жавоб бериш ўрнига:

— Кўприк берк! — деб Норматнинг йўлини тўсди.

— Менга сапёрлар командири керак.

— Барибир, командир ҳам сенинг араваларингни ўтказмайди. Йўл берк. Генералнинг буйруғи шу!

— Сен билан комендант гаплашяпти, — деди Нормат. — Кўприк менинг ихтиёримда!

Сапёр, кўприк ёнидаги телефон трубкасини олди:

— Ноль ўн беш! Бу ерга бир ефрейтор келиб, кўп-
рикнинг коменданти бўламан деяпти...

Дарё қирғоига яқиндагина қурилган блиндаждан
чиққан инженер-капитан Норматнинг қаршиисига келди:

— Ҳужжатингиз?

Нормат таажжубланди.

— Қандай ҳужжат?

— Ким эканлигингиздан гувоҳлик берувчи ҳужжат.

— Мана,— деди Нормат.— Чўнтағидан бир дафтарча
олиб узатаркан. Бундан бошқа ҳужжатим йўқ.

— «Қизил аскар дафтарчаси»... Сен,— деди инже-
нер-капитан аччиғланиб,— ефрейтор бўла туриб, нега
ўзингни комендант деб эълон қиласан?

Инженер-капитан кўприк қўриқчисига буюрди.

— Буни ўтказма! Қочоқ бўлса керак...

Норматнинг кўзлари қинидан чиқаёзди.

— Ким қочоқ? Оғзингизга қараб гапиринг! Мени
Юрьевнинг ўзи тайинлаган. Мен комендантман!

— Қимирламай тур, мен ҳозир телефон қиласман!

Инженер-капитан Юрьев билан телефон орқали гап-
лашгандан кейин Норматга мулойим гапира бошлади:

— Ўртоқ младший сержант, сизнинг вазифангиз
кўприкдан ўтган танклар ва артиллерия батареяларини
мина майдонларидан очилган йўлларга жўнатиб туриш-
дан иборат экан.

Ўзига младший сержант унвони берилганини Нор-
мат биринчи марта инженер-капитандан эшилди ва хур-
санчилигини яширолмай илжайди.

— Айтмадимми?— деди Нормат.— Оз бўлмаса, мени
ёлғончи қилиб қўяёздингиз-а, ўртоқ капитан!

Эрталаб роса соат 6 да кўприкка қўйилган тўсиқлар
олинди... Энг олдин артиллерија дивизионлари ўтди.
Улар Норматнинг йўл кўрсатишига ҳам қарамай, уч
йўлга бурилиб тарқалишаверди. Енгил тўплар олдинги
позициялар томонга кетди. Оғир тўплар батареялари Нор-
матнинг кўз олдида тарқалиб, артиллериистлар тўплар
учун окоп қазий бошладилар. Аммо шу маҳал немис ар-
тиллеријаси кўприкка ўт ёғдира бошлади. Икки снаряд
кўприк ўртасида ёрилиб, кўприкнинг устки ёғочларини
тўзитиб юборди. Устма-уст финшиб келаётгаян снарядлар
гоҳ қирғоққа тушар, гоҳ сувга чўкиб, дарё сувини чай-
қар ва катта фонтан ҳосил қиласан.

— Сапёрлар!— деди инженер-капитан.

Блиндажларда ҳозир турган сапёрлар олдиндан тай-
ерлаб қўйилган ёғочларни кўтариб, кўприкка келишди
ва душман тўпларининг ҳужумига қарамай, снаряд
тушган жойларни ямаб, яна қирғоққа чиқишиди. Ҳозир-
гина кўприкдан ўтган оғир тўпларимиз тилга киргач,
немис батареялари жимиб қолди.

Танклар колоннасини «КВ»лар бошлаб келди. Ўлар-
нинг оғир гусеницалари ёғочга тегиши билан, бутун кўп-
рик ларзага келди. Нормат биринчи танкни кўприкдаги
колонна йўлига бурди.

— Тўппа-тўғри боравер, бизнинг батальондан чиқа-
сан! — деди у фахрланиб.

— Нима деялсан? — деб сўради танк командири.

Еру кўкни моторларнинг шовқини, артиллерия коно-
вадасининг даҳшати қоплаб олди.

Нормат танкчиларга:

— Тўғри боравер, мина майдонидан йўл очилган!.. —
деб бақиради.

2

Бир танк йўл устида тўхтаб қолди.

— Ут! — деб қичқирди Нормат. — Ўтавер!

Танк командири шовқинда ҳеч нарса тушунмади-да.
йўл кўрсатиб турган ефрейторга қичқирди:

— Ўтири, танкка ўтири!

Нормат танк тепасига чиқиб олди. Танк қуюқ сар-
ғинш тутун чиқариб олға юрди. Нормат кўприк олдидағи
сапёрга қараб:

— Ҳаммасини менинг орқамдан юборавер! — деб
қичқирди.

Нормат танкка таёқ билан йўл кўрсатиб, тўртинчи
рота душман мудофаасини ёриб ўтган жойга бошлади.
Куценко взводининг блиндажлари олдига боргандা
«стўхта!» деб команда берди.

— Нима гап?

— Бизнинг старшина кўчиб кетибди..

Танк командири Норматнинг нима деяётганини ту-
шунмади, Нормат танкдан иргиб тушли ва блиндажлар-
ни, кухня учун қилинган калани титиб чиқди.

— Нима гап? — деб бақиради танк командири тоқат-
сизланиб.

— Аравакашлар хомутни эсдан чиқаришибди. Стар-
шинага элтиб берсам хурсанд бўлади.

— Ҳозир хомут қидирадиган вақтми! — деди танк командири ўшқириб. — Олға!

Танк эллик метрча юргандан кейин, аввал чапга, кейин ўнгга, яна чапга бурилди... Сўнгги ярим чақирим йўл илон изи, эгри-буғри ва танклар учун жуда ҳам чалкаш йўл эди.

— Яхши ҳам ўзинг келганинг, бўлмаса, биз адашиб қолар эканмиз, — деди танк командири.

Танк командири гапга қизиқиб, харитага қарашни эсидан чиқарган эди. Норматнинг:

— Мана энди душман мина майдонига келдик, — деганидан кейин, у шошилиб қолди.

— Тўхта! Тўхта!

— Нега тўхтаймиз? — деди Нормат.

— Биз танклар тўпланадиган жойдан ўтиб кетимиз.

Нормат ўрмон орқасида жанг қилаётган батальонга тезроқ ёрдам кўрсатиш учун шошилар эди. Душманинг иккинчи мудофаа линияси ўрмон орқасидаги қишлоқда эди. Эҳтимол, юрьевчилар очиқ далани босиб ўтолмай, қийналаётгандирлар.

— Ўртоқ командир, бу ерда тўхтаб бўлмайди, — деди Нормат. — Бу ернинг ҳар бир қарицида мина бор. Ундан кейин, бу ер — немиснинг қорага олиб қўйган жойи. Яхшиси, шу мина майдонларидан ўтиб, ўрмон орқасида тўхташ керак. Орқага қайтмайлик!

Нормат командирнинг розилигини ҳам кутмай, таёқ билан «Олға!» деган ишора қилди. Танкчи қаттиқ газ бериб, олдинга юрди. Катта танклар колоннаси унинг орқасидан тизилиб, гарбга йўл олди. 119 тепалиги тутун ичидা, моторлар ҳайқириғи остида қолди.

Нормат тўртнинчи рота ва бутун батальон босиб ўтган жанг майдонини кўздан кечирди. Немисларнинг тўплари, пулемётлари мажақланиб ётибди. Шамдай қотган немис мурдаларининг ҳисоби йўқ...

Танклар душманинг окопларини босиб ўтди. Юрьев батальони кўринмади. Шу маҳал ўнг томондан тўплар нидоси келди. Демак, немис батареяси танкларни кўриб қолиб, ўт очаётиди.

— Душман батареясига қараб залп! — деди танк командири.

«КВ» экипажи тўпдан, пулемётдан ва ҳавога отувчи зенит пулемётидан залп берди. Бошқа танклар ҳам бу-

тун алансини немис батареясига қаратди. Душман батареяси мажақландими, йўқми, ҳар ҳолда унинг овози учуб қолди.

Танк командири полк командиридан радиограмма олди ва унга: «Душман батареясини тор-мор этдик» деб жавоб қилди.

Полк командирининг тажанг овози микрофондан барала эшитилди.

— Нима учун менинг ижозатимсиз жанг бошладинг?

— Вазият шуни талаб қилди. Ҳозир ялангликка чиқиб, олдинга юришга ижозат этинг?

Нормат танклар полки командирининг буйругини тоқатсизланиб кутар эди. Борди-ю у: «Орқангга, танклар тўпланадиган жойга қайт!» деса унда нима бўлади?..

Танкдаги рация сигнал бера бошлади.

— Ўртоқ лейтенант, «Танклар жанговар сафга!»— деб қичқирди рация.

— Тезроқ олға!

Нормат орқасига қараб, қуюқ сарғиш тутун чиқариб бир-бирини қувалаб ўтаётган ва чапга, ўнгга тарқалиб, кенг далани тўлдираётган танкларни кўрди. Гуё бутун дала танклар ўтида куяётгандек тутун ичидаги эди. Танклар жанговар тартибда қишлоқ томон бурилиши билан, немис батареялари танклар фронтига қаратади ўт оча бошлади. Бизнинг жанговар қуролларимиз ҳам тилга кирди. Нормат ҳеч маҳал бундай дуэлни кўргани йўқ эди. Лекин бу дуэль узоққа чўзилмади. Танклар душман батареяларининг ўтини ўчириб, сўнгра уларнинг позицияларини мажақлай бошлади. Пиёда қисмлар танкларнинг паноҳида олға интилдилар. Шу чоғ Нормат ўз ротасининг жангчиларини кўриб қолди. У, танклар группасининг командирига қичқирди:

— Хайр энди, ўртоқ лейтенант. Мен ротамга стиб олдим.

Нормат танкдан ерга сакради. Танклар душман тепасига бостириб кетди.

Нормат танклар орқасидан жанг билан бораётган ўз бўлинмасига қўшилди. У ҳаммани кўрди-ю, Тургеневни тополмади.

— Сержант қани? Эрали қани?

— Яраланди... санитарлар олиб кетишиди,— деб жавоб қилди Эмин.

— Яраси оғирми? — деб ташвишланиб сүради Нормат.

Уларнинг гапини ротадан келган чопар бўлди.

— Нормат, сени лейтенант Морозов чақирипти. Тезроқ юр!

Нормат рота командирини колонна бошида учратди.

— Младший сержант Жабборов ҳузурингизга келдим... — деди Нормат, баланд овоз билан.

— Бўлинмани қабул қил! — деди Морозов каскасини бошидан олиб, пешона терларини артаркан.

— Есть! — деди Нормат, честь бериб.

У бўлинмага келгач, жангчилар ундан танклар жангини айтиб беришни сўрашди.

Танклар ҳужуми даврида душманнинг иккинчи мудофаа линиясида юз берган манзарани тасвир қилишга ва бу воқиаларни дўстларига айтиб беришга Нормат ожиз эди. У «тегирмон қилиб эзди», «толқон қилиб туди», «санжир қилиб ташлади», «қирон келтирди...» деган сўзларни тилга олди. Аммо бу сўзлар ҳам совет танкларининг даҳшатли ҳужуми ва ғолиб жангини тўла ифода қилолмас эди.

3

Эрталаб бошланган қор-бўрон тобора кучаймоқда. У дарахт шохларидаги қор қўноқларини қўзғатиб, ҳавони оппоқ чангга кўммоқда, ҳатто ер юзидағи қалин қор катламларини ҳам кўчириб, фарбга томон учирмоқда. Гўё Россиянинг қиши ҳам ёв юзига қор билан уриб, қон юки кўзларига муз парчалари тиқаётганга ўхшайди. Бўрон қандай зўрайса, жанг ҳам шундай кучайиб бормоқда.

Сержант Тургенев бўлинмаси ротанинг олдида эди, эрталаб Зуево қишлоғига киргач, у яраланди. Энди у биринчи ёрдам пунктининг аравасида. Уни санитарлар бошқа ярадорлар билан бирга госпиталга олиб кетяптилар. 119 тепалигидан жўнаётib, Тургенев фарбга, қадрдан дўстлари жанг қилаётган томонга қарагиси келарди. У: «Дўстларим кўринармикан... Ҳеч ким билан хайрлашолмадим... Хайр десам, яна келаман, кутинглар, десам... Лейтенантни кўрсам, мени госпиталдан чақиририб олинг, деб сўрар эдим...» деб ўй суриб борарди. Лекин қадрдан батальон, севимли рота узоқда қолди. Эрталаб шу ерда тўп отаётган батареялар ҳам окопларини ташлаб кетдилар.

«Жанг тамом бўлдимикин?.. Йўқ! Жанг ҳали-бери тугамайди. Солдат қониқиб қасос олмагунча тўхтамайди»— Тургекев санитар аравасининг кўпприкка етиб келганини ҳам билмай қолди. Кўпприк олдида нотаниш кишилар бир-бирлари билан айтишиб, жанжаллашиб турардилар. Сержант уларнинг нима деб тортишаётганини эшитолмади. Унинг оппоқ бинт билан бойланган яралари ёняпти, оёқ томирлари тортишиб, кўзларини лўқиллатиб оғритмоқда.

— Нега тўқтаб қолдик?— деб сўради Тургеневнинг ёнида осмонга қараб ётган Эрали санитардан.

— Кўпприк банд. Колонна ўтятти.

— Узоқ турамизми?

Колонналар жуда кўп. Бутун армия ўтятти.

Кўпприкдан ўтаётган колонналарнинг баъзилари ҳарбий ашуалалар айтиб ўтмоқда.

— Санитар, чу де отингни!— деди бир командир.— Тезроқ ўт, йўлни банд қилма.

Санитар отига қамчи бериб, кўпприк олдига келганда, от кўпприкдан юрмай, туриб олди.

— Чу де, санитар!

Санитар отни қамчилай бошлади. От фақат орқасига тисарилиб, кўпприкла ҳуркиб турганича турба берди.

Санитар аравадан тушиб, отининг бошини силади ва бир күнлик норма қандини тутди. От қандни қарсиллатиб чайнади ва кўпприк тепасига қадам қўйди.

Санитар дарёдан икки чақирим нарироқдаги кичик бир дараҳтзорликка кириб тўхтади.

— Медсанбатга келдик.

Оқ халатли икки санитарка Тургеневни замбилга солишли.

Палаткага кириш олдидан докторлар унинг бинтларини ечишли, яраларини кўришли ва нималарни дар пичирлашиб гаплашишли. Ҳарорати тобора ошиб, кўзи тиниб, қулоги ғувиллаётган Тургенев уларнинг нима дейишганини тушунолмади.

Медсанбатда Тургеневни узоқ ушлаб ўтиришмади. Унинг яраларини бошқатдан бинтлаб, кийимларини ечириб, янги оқ кийим кийинтириши ва яна аравага солишли.

— Бизни қаёқقا олиб боради?

Тургеневнинг ёнида ётган шериги сира индамас, кўзини ҳам очмас эди. У саволга жавоб қайтармади.

Медсанбатнинг санитар араваси катта йўлга чиқ-
қанда кимнингдир овози эштилди:

- Санитар аравасига йўл бўшатинглар!
- Санитар аравасини ўтказиб юборинглар!

Катта йўл аскарга тўла эди. Буларнинг ҳаммаси
кўприкка, ғарбга, жангга кетишяпти. Тургенев маши-
налардаги снаряд яшикларинигина кўряпти. Пиёда ас-
карлар чалқанча тушиб ётган ярадорга кўринмаяпти.
Тургенев бинтларни йиртиб, шу аскарлар билан яна
олдинги позицияга, қадрдан дўстлар ёнига учгуси кел-
ди, бироқ, у дармонсиз...

Армия эвакогоспитали катта йўл бўйидаги ўрмонга
жойлашган эди. Санитар араваси йўлдан бурилиши
билан, шлагбаумта рўпара келди.

- Пропуск!

Санитар ҳужжат кўрсатиб, госпиталь территорияси-
га кириши билан аравани оқ халатли икки қиз ўради.

- Қанақа ярадорлар?

- Оғир ярадорлар.

Санитаркалар аравани катта палаткага бошладилар.

Тургенев билан Эрали бу жойда фақат бир неча
соат ётди. Уларни бир неча доктор келиб кўрди. Бинт-
ларини ечиб, яна бинт ўрашди. Ечинтириб, яра атрофла-
рини оқ пахтага спирт қуиб артишди. Янги кийимлар
кийинтириб, хушбўй атир сепишди.

Тонг отиши билан яна докторлар кириб, алланима-
ларни ўз тилларида гапиришди ва Тургеневни замбилга
солиб, эвакомашинага ётқизишли. У фақат «Москва»
деган сўзни пайқади, аммо уни Москва госпиталига
олиб кетишяптими, ёки ўрмонма-ўрмон айлантириб
юришадими — у бунинг мъиносига етолмади.

Машина Варшавка йўлидан Москва — Минск трак-
тига чиқиб, изғирия ҳавони кесиб олға интилди.

Йигирма олтинчи боб ИНТИЛИШ

1

Эрта тонгда бошланган жанг кеч тунда тугади. Кеч-
гача совет қўшиклари плацдармни йигирма километр
зинга ва ўн беш километр узунасига кенгайтирилар.
Душман мудофаасини ёриб ўтган ва немис қисмларини

қувлаб бораётган қисмлар Авражное қишлоғида тұнаш учун тұхтади. Норматнинг бўлинмаси қишлоқ чеккасида бутун қолган ҳаммомга жойлашди. Жангчилар ҳаммомнинг деворини тешиб, милтиқ отишга мослаштирилалар.

— Агар фриц контратакага ўтиб қолса, адабини берамиз,— деди Нормат.

Юрьев батальони тұнаш учун тұхтаган қишлоқ аланга ичида эди. Чекинаётган немислар қишлоққа ўт күйиб, аҳолини қаёққадир ҳайдаб кетишигән эди. Яшириниб қолган кишиларнинг айтишларига қараганда, немислар шу яқындаги қишлоқларнинг аҳолисини түплаб, орқа томонда истеҳкомлар қураётган эмишлар. Еш йигит ва қизларнинг кўпи мажбурий равишида Германияга жўнатилган эди. Қишлоққа Қизил Армия қисмлари келганини эшитгач, ўрмонларда немисларга чап бериб, қочиб-писиб юрган кишилар, тугуларини, ёш болаларини кўтариб, қайтиб кела бошладилар.

Нормат эски ҳаммом олдида жангчиларнинг отиш секторини текшираётганды, бир жангчи югуриб келиб:

— Ўртоқ сержант, сизни комвзвод чақириялти,— деди.

— Мана бу дарахтларни кесиб ташлаш керак!— деди Нормат Отступнийга.— Қўл пулемётининг ўқлари йўлини тўсяпти...

Нормат взеод командири Куценко ҳузурига келди.

— Чап қанотга ҳушёр бўл!— деди унга Куценко.— Душман контратака қилиб қолиши мумкин.

— Есть!

Нормат югуриб бўлинмасига етиб келди.

Ҳавода гувиллаган моторлар овози эшитилди ва бир оздан кейин душманнинг зенит пулемётлари, зенит тўплари акиллай бошлади. Ҳавода снарядларнинг ёрқин излари кўринди. Бомбаларнинг даҳшатли портлаши эшитилгач, ғарбда, анча олисда катта аланга кўтарилиди.

— Фашист эшелонлари ёнапти,— деди Нормат.

Шу вақт Ласточкининг қувноқ овози эшитилди.

— Ўйинга тушмаганга хат йўқ.

Крупенъя унинг йўлини тўсди:

— Хат кутаётганлар ўйинга тушаверсин, менга газеталарни бер!

Крупенъя бугунги газеталарни бирин-кетин кўздан кечирди.

— Нормат, мана бу қизни танийсанми? — деди Крупенъя қичқириб. — Мана буни қара, худди сенинг чўнта-гингдаги суратга ўхшайди-я! Фронтга келиб сени қидираётган қиз шу эмасмикин-а?

Нормат «Красноармейская правда» газетасининг биринчи бетида Адолатнинг портретини кўрди-ю:

— Адолат! — деб қичқириб юборганини ўзи ҳам билмай қолди.

Бир зумда бутун бўлинма Норматни қуршаб олди.

— Жуда чиройли қиз экан! — деди Отступний.

— Севинганингча ҳам бор экан! — деди Крупенъя. Нормат тушимми, ўнгимми, дегандек ўз кўзларига ишонмай ҳайронликда турарди.

— Ёзувини ўқичи, нима депти? — Эмин илтимос қилди.

Кимдир сурат тагидаги ёзувни ўқиди.

— Ўзбек халқининг содиқ қизи регулировшчик қизил аскар Адолат Соҳибованинг жасорати...

Нормат суратни бағрига босди. У шу чоқ гўё Адолатнинг нафаси билан нафас олаётгандек, унинг ҳарорати билан қизиётгандек жўшқинланиб кетди.

— Қаерда у? Уни қандай топаман? «Адолат!» деб қичқирсан эшитармикин?..

— Редакцияга хат ёзамиз, қизни топиб беради! — деди Дронов. Норматга маслаҳат бериб.

Нормат қувониб кетди. Гўё у қидирган қанот топилгандек, дили шодликка тўлди. Дарҳол қўйнидан дафтар, пахтали шим чўнтағидан қалам олиб хат ёзи:

«Ҳурматли редакция! Газетангизнинг 15 декабрь сонида, биринчи бўтда босилган сурат менинг севгилиминг сурати. Ўша Адолатхон қаерда? Шу қизнинг адресини, агар малол келмаса, (малол келмасин, ўтина-ман!) менга дарҳол маълум қилсангиз. Мен Погодин қўшилмасининг Юрьев қисмида эканимни Адолатнинг ўзига ҳам айтингизлар!»

Мана энди Ласточка келиши билан бу хат фронт газетасининг редакциясига етиб боради. Адолат эшитади. Қувонч устига қувонч!

Норматнинг назарида Адолат билан учрашиш йўли, Адолатга етишиш йўли мана шу қорайиб турган ўрмон, ёнаётган қишлоқ, портлаётган станция орқали ўтар эди.

Гүё уни Адолат ана шу жанглар йўлида кутиб турган-дек...

* * *

Юрьев батальони қаршисида фашист қўшинларининг аръергард қисмлари тўхтовсиз оқ ракеталар отиб, ўртадаги очиқликни ва ўрмон йўлини ёритиб турибди. Ражабов ракетанинг ёруғи билан ўрмон қирғоғида ва очиқликда мажақланиб ётган икки танкни кўрди... Буларни душман артиллериюси ёндирган.

Авражное қишлоғи икки ўрмон ўртасидаги жарликнинг кун чиқар қирғоғида. Жарликнинг бу томони ғарбий қирғоқдан бир неча метр баланд, пастликдаги ўрмон 250 метрча нарида — сайхонлик орқасида. Ўрмон нарёғида катта темир йўл станцияси, бир неча аҳоли пункти бор. Генерал Погодин қўшинлари эртага эрталаб ўрмондаги душман қисмларини янчиб, станцияни эгаллаши ва ундан кейин кечгача район маркази ва унинг атрофидаги аҳоли пунктларни ишғол қилиши керак.

Майор Юрьев (унга янги унвон берилгани ҳақида кечаси радиограмма олинган эди) рота, взвод командирларини чақириб, жар бўйида рекогнасировка ўтказди, командирларга биринчи навбатдаги вазифаларни тушунтириди. Кейин рота командирлари ҳам ўз навбати билан кичик командирларни тўплашди ва мўлжалларни кўрсатиб, ҳар бир бўлинмага оғзаки буйруқ бериши.

— Учинчи бўлинма,— деди Куценко, Норматга қараб,— ҳов анови ерда турган катта қарағайни кўряпсанми, ўша дарахт томонга бориб, темир йўлга чиққач, стрелка будкасини эгаллайсан.

— Есть!— Нормат командирнинг буйругини такрорлади.

Одатдагидек бугунги ҳужумни: эрталаб соат 6 ноънолда полк ва дивизия артиллериюси бошлаб берди. Немис аръергардлари кечаси билан истеҳком қуришга улгуrolмагани учун артиллерия тайёрлиги жуда қисқа бўлди.

Қишлоқ ўртасидаги гиштин уйдан отилган қизил ракета тонг туманини ёриб, жарлик тепасидан ўтди ва най — камалакка ўхшаб эгилиб ўрмон чеккасига тушди.

Нормат каскасини бостириб кийди ва уни жаги аралаш маҳкам боғлади. Қўйнидан газетани олиб, Адолатга тикилиб қаради да, камарини тортиб, яна бир кўз пастроқдан боғлади.

— Атакага, олға!

Нормат жангчилари гоҳ энгашиб, гоҳ эмаклаб, душман ўқларига чап бериб, ўрмон қирғоғидаги якка қарашай томонга интилдилар. Отступний атака бошлангандан кейин ҳам бир неча дақиқа окопдан чиқолмади. Унинг кўзига гўё бутун отилаётган ўқлар фақат Отступнийнинг йўғон гавдасини қидираётганга ўхшайди. Аммо ўқ қаршисидаги ялангликда бутун ротани кўргач, окопдан сакраб турганини ва уларнинг орқасидан юргурганини ўзи ҳам билмай қолди.

Отступний бир оз эмаклаб юрди, тиззалири оғриб, қўли толгач, ўрнидан туриб, энгашиб югурди: бир оздан кейин ҳансираф, юраги бўғизига тиқилгандек бўлди. У, шунча ҳаракат қилиб югурса ҳам, бўлинма жангчилариға етолмади. Нормат ҳамон орқасига қараб, унинг югуришини кузатмоқда. Отступний «жаҳли тез янги командир»нинг юзига қаради. Норматнинг икки бети қип-қизил, кўзлари ҳам қизарган эди. У ҳужум алсанси билан ёнарди. Отступний бошини кўтариб, милтиқни қўлига ушлаганча, Норматнинг орқасидан югурди.

2

Юрьев батальони темир йўл изига куннин- қоқ ярмида чиқди. Станцияда кечаси бошланган ёнгин тугагани йўқ эди.

Нормат темир йўлнинг қўпорилган изларини кўриб, Отaxon партизанларини эслади. Улар қаерда экан? Совет қўшинлари Чайкадан ўтаётганда, улар Ильичёвка, Авражное атрофларида, ўрмонда, темир йўлда жанг қилаётган эдилар. Улар Варшавкани ўраб олиб, лушмакнинг чекинишини қийинлаштириш вазифасини бажараётган эдилар. Энди уларнинг отишмалари ҳам эшитилмаяпти. Қаерда экан улар? Учрашармикинмиз?

Эрталаб танклар станцияда душманинг қаршилигини синдириб, ўтиб кетди. Пиёда қисмлар станцияга яқинлашган чоқда танклардая яширинган фашист солдатлари уларнинг йўлини тўсиб, танклардан айриб қўйди. Атрофдаги ўрмонлардан станцияга қайтиб кел-

ган немис қисмлари Юрьев батальонига қарши атакага ўтди. Бир оздан сўнг унинг чап қанотида ҳам немислар пайдо бўлиб қолди. Юрьев илғорлаб кетган қисмларга қўшилиш учун станцияни боснб ўтиши керак. Кечки пайт Юрьев Морозовни телефонга чақириб:

— Бир одим, бир қарич бўлса ҳам, олға юр! — деб буюрди.

Рота икки марта темир йўл изидан ҳатлаб ўтиб, яна орқасига қайтди. Туни билан жанг тинмади. Эрталаб ротанинг бир взводи яна атакага ташланди. Бу сафар душман кечагидан кўра қаттиқроқ қаршилик кўрсатди. Стрелка будкаси орқасидан минамётлар отила бошлиди. Кеча қўл пулемётлари турган жойларда ҳозир станкали пулемётлар акилламоқда, кечқурунги окоплар бўйида дзотлар қорайиб қолибди. Демак, душман кечаси билан бу қанотга тўпларини келтиришга ҳам улгурибди. Фашистларнинг бу жойдан кетгиси йўқ. Взвод неча-неча марта темир йўл дўнглигига кўтарилиб, яна пастга қайтишга мажбур бўлди.

— Қувурдан ўтилсин! — деб буюрди Морозов.

Авангард взводнинг биринчи бўлинмаси темир йўл рельслари тагидаги қувурнинг сувини бўғиб, бирма-бир нариги томонга оқа бошлади. Қувурга дастлабки жангчининг боши суқилиши ҳамон, қувур атрофида ўқлар визиллаб қолди.

— Ўт, ўтавер! — деди Морозов, жангчига далда бериб.

Қувурга уч жангчи эмаклаб кирди. Олдингиси қувурдан бош чиқариши билан, ўқ ёғини кучайди, миналар ҳам портлай бошлади. Бош кўтариб бўлмай қолди.

— Нега тўхтаб қолдинг?! Нега ўтмаяпсан?!

— Йўл берк, ўртоқ лейтенант, — деди қувурда ётган жангчи, — йўл берк...

Қувурдан биринчи бўлиб бош чиқарган жангчи ҳалок бўлган эди. У икки қўлинин чўзганча чалқанча ётибди. Морозовнинг буйруги билан жангчилар уни орқага тортиб олишди. Иккинчи жангчи ҳам қувурдан бош чиқариши билан бошидан ўқ еди. Уни ҳам тортиб олишди. Шундан кейин қувурдан бош чиқариш у ёқда турсин, унга бош суқиш ҳам мумкин бўлмай қолди. Немис пулемётлари қувурни нишонга олиб, узлуксиз ўқса тутиб турдилар.

Юрьев лейтенант Морозовни яна телефонга чақирди.

— Нега қимирламаяпсан? Нега тұхтаб қолдинг?

— Құз очиб бұлмайды, үртоқ майор,— деди Морозов,— күп қон тұкиляпти.

— Қонға қарама!— деди Юрьев.— Юқоридан буйруқ шу. Қандай бұлса ҳам будка олиниши керак!

Морозов взвод командирини чақириб: «қувурнинг тепасидан сакра!» деди. Взводнинг бириңчи бўлинмаси кўттармага чиқиши ҳамон, пулемётлар ҳақирлаб, миномётлар патирлаб қолди. Икки жангчи шу ондаёқ орқасига ағанаб тушди. Кимдир бошини рельсга қўйганича ёнбошлаб қола қолди.

— Қайтма, бир эллик ҳам орқага қайтма!— деди Морозов қичқириб.

Взвод темир йўл шпаллари олдида ерга ётиб олди.

— Қайтма!— деб такрорлади Морозов.

Жангчилар белкуракчалари билан шағални ёриб, шпаллар тагига юмронқозиқсимон суқилиб кира бошлидилар. Кечгача рота ўт остида ётди. Кечқурун немислар бутун темир йўлни ракеталар билан ёритиб, кундузи мўлжалга олинган жойларни методик ўқза тутиб турдилар. Икки танк темир йўл ёнидан ўтадиган йўлга чиқиб, қувур атрофини навбатма-навбат тўпга тутиб турди. Миномётлар, замбараклар ҳам тактикасини ўзгартириб, йўлнинг орқа томонини яна ўтга буркади. Морозов ротаси яна олов ичида қолди.

— Душман контратака қиласпти, кўп қон тұкилмоқда,— деди Морозов телефонда комбат Юрьевга.

Юрьев бошқа роталардан ҳам худди шундай хабарлар олди. Вазият кечагидан кўра бугун оғирроқ. Чекинаётган немис қисмлари кучларини тўплаб, Қизил Армия ҳужумини тұхтатиш учун қаттиқ қаршилик кўрсатмоқдалар. Душман контратакалари натижасида бутун дивизиянинг ҳужуми тұхтаб қолди. «Нега тұхтаб турибсан? Нега ерга ётиб олдинг?» деган телеграмма, радиограммалар дивизия штабига, дивизиядан полкка, полкдан батальонга, батальондан роталарга тұхтовсиз оқиб турди. Ҳужумнинг тўртинчи куни эрталаб дивизия командири Юрьевни телефонга чақириб: «нега ётиб олдингиз?» деб ниқтаб қолди. Бу пичинг унинг қайноқ юрагига найзадек санчилди. У, анчагача ўзини ўнглай олмай, гаранг бўлиб юрди. Кейин Морозовни телефонга чақириб: «будка олинса ҳам олинсин, олинмаса ҳам олинсин!» деб буюрди. Морозов унга бирор сабаб кур-

сатди, шекилли, Юрьевнинг жаҳли чиқди: «Нега ер бағирлаб олдинг», Морозов. Ёки ротангни ўзим ердан кўтариб берайми?»

Юрьев тўртинчи рота командирининг кузатиш пунктига йўл тополмади. Батальонни рота билан улайдиган траншеялар тинимсиз тўлга тутилмоқда, Юрьев эмаклаб, неча жойда тўхтаб, қувур олдига келди.

— Морозов қани? Қани Морозов?

Қувурдан берироқдаги окопда ётган жангчилардан бири қўлинин баландга кўтариб, бармоғи билан гарбга имо қилди.

— Уша ёқда...

Юрьев эмаклаб келиб, жангчилар ётган окопга кирди. Бу ерда оғир ярадорлардан бошқа ҳеч ким йўқ эди.

Морозов комбатдан аччиқ таъна эшигандан кейин ўлимига ҳам рози бўлиб кетди. Енгил ярадорларни тўплаб, темир йўл изидан пастга бошлади. Буни кўрган немислар: «большевиклар будка районида асабий атакага ташландилар» деб рупорларда қичқира бошладилар. Оқибатда атака тўхтатилди. Морозов темир йўл кўтармасининг нариги бағрида, снаряд ўйган чуқурчага ётиб олди. Бош кўтариб бўлмай қолди. Морозов ётган чуқурча атрофида кечгача жанг давом этди. Қоронги тушгаҷ, жангчилар уни қувур ичи билан ўз томонларига судраб ўтдилар.

— Ўртоқ майор, топшириқ бажарилмади,— деди Морозов, тепасида турган комбатга қараб.

— Ерга чуқурроқ кириб олингиз!— деди Юрьев жангчиларга қараб.— Бир қарич ҳам орқага чекиниш йўқ. Оғир ярадорларга ҳам ўқ берилсин. 119 тепалигини унутмангиз, шерларим!

Эртасига эрталаб янги кучлар келди. Бир неча танк темир йўлни кесиб ўтиб, станция томонга йўналди. Бчринчиси будкага яқинлашгаҷ, занжирлари сочилиб, қийшайиб тўхтаб қолди. Иккинчи танк ҳам ёна бошлади.

Морозов яраларини боғлаб, ротани айланиб чиқди. Жангчиларнинг соғларини тўплади, аммо улар бир взводдан ошмади. Лекин Морозов сир бой бермади. У, одатдагидек, дадил команда берди:

— Рота, жангга ҳозирлан!

Шу чақ ўрмон томондан «КВ» келиб тўхтади-да, танклар жанг олиб бораётган станция томонга тўп оғзини тўғрилади. Танк люқидан кўк комбинезон кийган,

хушрўй киши чиқиб, темир йўл кўтармасидан сакрашга ҳозир бўлиб турган жангчилар олдига келди.

— Сержант Жабборов ким?

— Мен! — деди Нормат.

— Пичоғинг борми?

— Йўқ.

— Штикни ол, гимнастёркангнинг кўкрагини теш.

— Нега? Нега тешаман?

Комбинезонли киши планшетидан кичкина қутича олиб, уни оча бошлади.

— Сени орден билан табриклайман!

Норматнинг юраги дукиллаб уриб, кўзлари чақнаб кетди. У гимнастёркасини ечмоқчи бўлиб шошилиб қолган эди. Отступний унинг ёнига оқсоқланиб келди.

— Шошма, ўртоқ сержант, менда пичоқ бор,— деди у, Норматнинг тугмаларини ечаркан.

— Кўйвор ёқани! — деди Нормат жаҳл билан.

— Ноз қилма, келавер, кўкрагингга орденни ўзим тақиб қўяман!

Комбинезонли киши «Қизил Юлдуз» орденини Норматнинг кўкрагига ўз қўли билан тақиб қўйди.

Норматнинг кўзи уни табриклаб кулиб турган Крупенъяга тушиб қолди-да, комбинезонли кишига уни таърифлай кетди:

— Ўртоқ генерал, жуда яхши бир жангчимиэ бор. Ғазабидан ўт чақнайди. Оғир ярадор бўлса ҳам, милигини ташлагани йўқ. Мана, шу Крупенъяни ҳам мукофотлаш даркор...

— Бутун бўлинма мукофот олади,— деди комбинезонли киши.

— Ўртоқ генерал! — (Крупенъя комбинезонли кишини танимаса ҳам, унга шундай деб мурожаат қилишни лозим топди.) — Менинг бир дўстим бор. Ҳусейн Оға ўғли. Жуда яхши пулемётчи. Ҳозир ҳам ярадорларни қўриқлаб турибди. Бу медални...

Комбинезонли киши темир йўл кўтармасига қўл пулемётини ўрнатиб олиб станция томонга мўлжал билан ўқ узаётган Ҳусейн Оға ўғлини кўриб унинг олдига борди.

— Жангчи Оға ўғли, сизни «Жанговар хизмат учун» медали билан табриклайман!

Ҳусейн Оға ўғли қувониб медални олди-да, овозининг борича қичқириб:

— Совет Иттифоқига хизмат қиласын! — деди.

Комбинезонли киши жангчилар билан илиқ хайрлашиб, танк олдига бораркан, чуқурликдаги ярадорларга күзи тушиб қолди.

— Нега жұнатылмади булар? — деб сұради у Мороздан.

— Ҳозир жұнатамиз, үртоқ генерал,— деди Морозов,— транспорт йұқ әди...

— Танкка үтқизинглар буларни!

— Есты!

Ярадорлардан уч кишини бирма-бир «КВ»га чиқарыб, люк атроғига үтқазыб қўйишиди.

— Бир-бирларингни ушлаб олинглар! — деди генерал уларга.

Комбинезонли киши дурбин билан станция томонга қаради. Шиддатли танклар жанг бормоқда әди.

Оғир ярадорлар ортилган танк жұнаётганида, Морозов генералдан сұради:

— Ҳужумга үтаверайми, үртоқ генерал?

— Йұқ! — деди комбинезонли киши. — Тұпға ем бўлишнинг ҳожати йұқ. Тактикани ўзgartириш керак!

Танк жұнаб кетди.

Фарбий фронт Ҳарбий Совети аъзосининг тактикани ўзgartириш ҳақида айтган сұзлари Морозовни ҳам, Норматни ҳам, бошқа жангчиларни ҳам ўйлатиб қўйди.

Нормат генерал танкининг орқасидан мамнун тикилиб қолди.

Кечаси Юрьев батальони станцияни үнгда қолдирб танклар орқасидан жанг билан яна Варшавка йўлига чиқди.

Бир оздан кейин Юрьевга янги буйруқ топширилди.

Совет қўшинларининг янги ҳужум тактикасини қўллаши натижасида орқада қолган душман қўшинлари шошилинч равишида станцияни ташлаб ўрмонларга қочмоқда әди. Юрьев батальони бошқа батальонлар билан ҳамжиҳатликда ана шу ёв қисмларининг йўлини тўсиб, аскарларини асир олиши ёки қириб ташлаши керак.

Буйруқ роталарда ўқиб эшилтирилди. Бир неча минутдан кейин батальон қўзғалди. Енгил танклар Варшавкани кесиб ўтиши ҳамон, Нормат бўлинмасига қичқириб команда берди:

— Олға!

Норматнинг кучли овози ўрмонда мағрур янгради.
Жангчиларга унинг овози замбарак овозидан ҳам
қудратлироқ бўлиб туюлди. Чиндан ҳам уни ҳужум,
ғалабага интилиш руҳлантириб юборган. Ҳарбий Со-
вет аъзосининг шахсан ўзи келиб, унга ва унинг жанг-
чиларига орден тақиб қўйганлиги Норматнинг кўнгли-
ни тоғдай кўтариб юборди. У фақат олдинга юриш,
сира тўхтамай, туну кун олдинга юриш орзусида ёниб,
қичқирарди:

— Олға!..



МУНДАРИЖА

<i>Биринчи боб. Ерим, яхши қол!</i>	3
<i>Иккинчи боб. Пўлат изларда</i>	13
<i>Учинчи боб. Адолатнинг аҳди</i>	21
<i>Тўртинчи боб. Газабнинг туғилиши</i>	28
<i>Бешинчи боб. Дастлабки ҳабар</i>	39
<i>Олтинчи боб. Тунги тўқнашув</i>	60
<i>Еттинчи боб. Славик — Тўхта холанинг кенжаси</i>	76
<i>Саккизинча боб. Дастлабки тўқнашув</i>	87
<i>Тўққизинчи боб. Норматнинг ғойиб бўлиши</i>	97
<i>Ўнинчи боб. Даشتдаги ҳангома</i>	109
<i>Ўн биринчи боб. Душман орасида танҳо</i>	119
<i>Ўн иккинчи боб. Диля ҳоҳламаган тўй можароси</i>	124
<i>Ўн учинчи боб. Бегимхоннинг беорлиги</i>	140
<i>Ўн тўртинчи боб. Эргаш Уролда</i>	147
<i>Ўн бешинчи боб. Партизанлар орасида</i>	159
<i>Ўн олтинчи боб. Хушхабар</i>	171
<i>Ўн еттинчи боб. Юрек совғаси</i>	183
<i>Ўн саккизинчи боб. Жанг</i>	194
<i>Ўн тўққизинчи боб. Байрам олди кечаси</i>	209
<i>Йигирманчи боб. 7 ноябрь, Қизил Майдонда</i>	220
<i>Йигирма биринчи боб. Фронт йўли</i>	225
<i>Йигирма иккинчи боб. Гапни гапир ўққанга</i>	235
<i>Йигирма учинчи боб. Тор-мор</i>	242
<i>Йигирма тўртинчи боб. Бегимхоннинг бедарак кетиши</i>	259
<i>Йигирма бешинчи боб. Кўприк кўрманаси</i>	265
<i>Йигирма олтинча боб. Интилиш</i>	272

На узбекском языке
ИБРАГИМ РАХИМ
НАСТОЯЩАЯ ЛЮБОВЬ

Роман

ВТОРОЕ ИЗДАНИЕ
Гослитиздат УзССР — 1960 Ташкент

Редактор А. Рахимов
Рассом В. Венедиктов
Расмилар редактори Г. Бедарев
Техн. редактор Т. Скиба
Корректор И. Кабилов.

Босмахонига берилди 2-VI-1960 й. Босшага рухсат этилди
24/II 1960 й. Формати 84×108¹/32. Босма л. 8,625. Шартли
босма л. 14,16. Нашр л. 15,0. Индекс б/з. Тиражи 15 000.
УзССР Давлат бадний адабиёт нашриёти, Тошкент, Навоий
кӯчаси, 30. Шартнома № 24—60

УзССР Министрияни министрияни Узглавиздатининг 1-босмахони
наси, Тошкент, Ҳамза кӯчаси 21. 1960 й. Заказ № 282.
Баҳоси 6 с. 1961 йил 1 аввардан баҳоси 60 т.